

***Pagsusuri
sa Kasulatan
Araw-araw***

2026



es26-TG
250606

Pagsusuri sa Kasulatan Araw-araw

2026

Taunang Teksto

**“Maligaya ang mga nakauunawa
na kailangan nila ang Diyos.”**

—Mateo 5:3.

Hindi ipinagbibili ang publikasyong ito. Inilaan ito bilang bahagi ng pambuong-daigdig na pagtuturo sa Bibliya na sinusuportahan ng kusang-loob na mga donasyon.

Para sa donasyon, magpunta sa donate.jw.org.

Malibang iba ang ipinapakita, ang mga teksto sa Bibliya ay mula sa makabagong-wikang *Bagong Sanlibutang Salin ng Banal na Kasulatan*.

Pagsusuri sa Kasulatan Araw-araw—2026

Examining the Scriptures Daily—2026

Inimprenta Hunyo 2025

Tagalog (es26-TG)

© 2025

WATCH TOWER BIBLE AND TRACT SOCIETY
OF PENNSYLVANIA

Mga Tagapaglathala

Watchtower Bible and Tract Society of New York, Inc.
Wallkill, New York, U.S.A.

Made in Japan

2026

ENERO

| L | L | M | M | H | B | S |
|----|----|----|----|----|----|----|
| | | | | 1 | 2 | 3 |
| 4 | 5 | 6 | 7 | 8 | 9 | 10 |
| 11 | 12 | 13 | 14 | 15 | 16 | 17 |
| 18 | 19 | 20 | 21 | 22 | 23 | 24 |
| 25 | 26 | 27 | 28 | 29 | 30 | 31 |

PEBRERO

| L | L | M | M | H | B | S |
|----|----|----|----|----|----|----|
| 1 | 2 | 3 | 4 | 5 | 6 | 7 |
| 8 | 9 | 10 | 11 | 12 | 13 | 14 |
| 15 | 16 | 17 | 18 | 19 | 20 | 21 |
| 22 | 23 | 24 | 25 | 26 | 27 | 28 |

MARSO

| L | L | M | M | H | B | S |
|----|----|----|----|----|----|----|
| 1 | 2 | 3 | 4 | 5 | 6 | 7 |
| 8 | 9 | 10 | 11 | 12 | 13 | 14 |
| 15 | 16 | 17 | 18 | 19 | 20 | 21 |
| 22 | 23 | 24 | 25 | 26 | 27 | 28 |
| 29 | 30 | 31 | | | | |

ABRIL

| L | L | M | M | H | B | S |
|----|----|----|----|----|----|----|
| | | | 1 | 2 | 3 | 4 |
| 5 | 6 | 7 | 8 | 9 | 10 | 11 |
| 12 | 13 | 14 | 15 | 16 | 17 | 18 |
| 19 | 20 | 21 | 22 | 23 | 24 | 25 |
| 26 | 27 | 28 | 29 | 30 | | |

MAYO

| L | L | M | M | H | B | S |
|----|----|----|----|----|----|----|
| | | | | | 1 | 2 |
| 3 | 4 | 5 | 6 | 7 | 8 | 9 |
| 10 | 11 | 12 | 13 | 14 | 15 | 16 |
| 17 | 18 | 19 | 20 | 21 | 22 | 23 |
| 24 | 25 | 26 | 27 | 28 | 29 | 30 |
| 31 | | | | | | |

HUNYO

| L | L | M | M | H | B | S |
|----|----|----|----|----|----|----|
| | 1 | 2 | 3 | 4 | 5 | 6 |
| 7 | 8 | 9 | 10 | 11 | 12 | 13 |
| 14 | 15 | 16 | 17 | 18 | 19 | 20 |
| 21 | 22 | 23 | 24 | 25 | 26 | 27 |
| 28 | 29 | 30 | | | | |

HULYO

| L | L | M | M | H | B | S |
|----|----|----|----|----|----|----|
| | | | 1 | 2 | 3 | 4 |
| 5 | 6 | 7 | 8 | 9 | 10 | 11 |
| 12 | 13 | 14 | 15 | 16 | 17 | 18 |
| 19 | 20 | 21 | 22 | 23 | 24 | 25 |
| 26 | 27 | 28 | 29 | 30 | 31 | |

AGOSTO

| L | L | M | M | H | B | S |
|----|----|----|----|----|----|----|
| | | | | | | 1 |
| 2 | 3 | 4 | 5 | 6 | 7 | 8 |
| 9 | 10 | 11 | 12 | 13 | 14 | 15 |
| 16 | 17 | 18 | 19 | 20 | 21 | 22 |
| 23 | 24 | 25 | 26 | 27 | 28 | 29 |
| 30 | 31 | | | | | |

SETYEMBRE

| L | L | M | M | H | B | S |
|----|----|----|----|----|----|----|
| | | 1 | 2 | 3 | 4 | 5 |
| 6 | 7 | 8 | 9 | 10 | 11 | 12 |
| 13 | 14 | 15 | 16 | 17 | 18 | 19 |
| 20 | 21 | 22 | 23 | 24 | 25 | 26 |
| 27 | 28 | 29 | 30 | | | |

OKTUBRE

| L | L | M | M | H | B | S |
|----|----|----|----|----|----|----|
| | | | | 1 | 2 | 3 |
| 4 | 5 | 6 | 7 | 8 | 9 | 10 |
| 11 | 12 | 13 | 14 | 15 | 16 | 17 |
| 18 | 19 | 20 | 21 | 22 | 23 | 24 |
| 25 | 26 | 27 | 28 | 29 | 30 | 31 |

NOBYEMBRE

| L | L | M | M | H | B | S |
|----|----|----|----|----|----|----|
| 1 | 2 | 3 | 4 | 5 | 6 | 7 |
| 8 | 9 | 10 | 11 | 12 | 13 | 14 |
| 15 | 16 | 17 | 18 | 19 | 20 | 21 |
| 22 | 23 | 24 | 25 | 26 | 27 | 28 |
| 29 | 30 | | | | | |

DISYEMBRE

| L | L | M | M | H | B | S |
|----|----|----|----|----|----|----|
| | | 1 | 2 | 3 | 4 | 5 |
| 6 | 7 | 8 | 9 | 10 | 11 | 12 |
| 13 | 14 | 15 | 16 | 17 | 18 | 19 |
| 20 | 21 | 22 | 23 | 24 | 25 | 26 |
| 27 | 28 | 29 | 30 | 31 | | |

**Iskedyul sa Pagbabasa ng Bibliya sa
Ating Buhay at Ministryong Kristiyano Para sa 2026**

Enero

- | | | |
|----|--------------|--------------------------|
| 5 | Isaias 17-20 | <input type="checkbox"/> |
| 12 | Isaias 21-23 | <input type="checkbox"/> |
| 19 | Isaias 24-27 | <input type="checkbox"/> |
| 26 | Isaias 28-29 | <input type="checkbox"/> |

Pebrero

- | | | |
|----|--------------|--------------------------|
| 2 | Isaias 30-32 | <input type="checkbox"/> |
| 9 | Isaias 33-35 | <input type="checkbox"/> |
| 16 | Isaias 36-37 | <input type="checkbox"/> |
| 23 | Isaias 38-40 | <input type="checkbox"/> |

Marso

- | | | |
|----|--------------------|--------------------------|
| 2 | Isaias 41-42 | <input type="checkbox"/> |
| 9 | Isaias 43-44 | <input type="checkbox"/> |
| 16 | Isaias 45-47 | <input type="checkbox"/> |
| 23 | Isaias 48-49 | <input type="checkbox"/> |
| 30 | Linggo ng Memoryal | |

Abril

- | | | |
|----|--------------|--------------------------|
| 6 | Isaias 50-51 | <input type="checkbox"/> |
| 13 | Isaias 52-53 | <input type="checkbox"/> |
| 20 | Isaias 54-55 | <input type="checkbox"/> |
| 27 | Isaias 56-57 | <input type="checkbox"/> |

Mayo

- | | | |
|----|--------------|--------------------------|
| 4 | Isaias 58-59 | <input type="checkbox"/> |
| 11 | Isaias 60-61 | <input type="checkbox"/> |
| 18 | Isaias 62-64 | <input type="checkbox"/> |
| 25 | Isaias 65-66 | <input type="checkbox"/> |

Hunyo

- | | | |
|----|----------------|--------------------------|
| 1 | Jeremias 1-3 | <input type="checkbox"/> |
| 8 | Jeremias 4-6 | <input type="checkbox"/> |
| 15 | Jeremias 7-8 | <input type="checkbox"/> |
| 22 | Jeremias 9-10 | <input type="checkbox"/> |
| 29 | Jeremias 11-12 | <input type="checkbox"/> |

Hulyo

| | | |
|----|----------------|--------------------------|
| 6 | Jeremias 13-15 | <input type="checkbox"/> |
| 13 | Jeremias 16-17 | <input type="checkbox"/> |
| 20 | Jeremias 18-19 | <input type="checkbox"/> |
| 27 | Jeremias 20-21 | <input type="checkbox"/> |

Agosto

| | | |
|----|----------------|--------------------------|
| 3 | Jeremias 22-23 | <input type="checkbox"/> |
| 10 | Jeremias 24-25 | <input type="checkbox"/> |
| 17 | Jeremias 26-28 | <input type="checkbox"/> |
| 24 | Jeremias 29-30 | <input type="checkbox"/> |
| 31 | Jeremias 31 | <input type="checkbox"/> |

Setyembre

| | | |
|----|----------------|--------------------------|
| 7 | Jeremias 32-33 | <input type="checkbox"/> |
| 14 | Jeremias 34-35 | <input type="checkbox"/> |
| 21 | Jeremias 36-37 | <input type="checkbox"/> |
| 28 | Jeremias 38-39 | <input type="checkbox"/> |

Oktubre

| | | |
|----|----------------|--------------------------|
| 5 | Jeremias 40-41 | <input type="checkbox"/> |
| 12 | Jeremias 42-44 | <input type="checkbox"/> |
| 19 | Jeremias 45-46 | <input type="checkbox"/> |
| 26 | Jeremias 47-48 | <input type="checkbox"/> |

Nobyembre

| | | |
|----|----------------|--------------------------|
| 2 | Jeremias 49-50 | <input type="checkbox"/> |
| 9 | Jeremias 51-52 | <input type="checkbox"/> |
| 16 | Panaghoy 1-2 | <input type="checkbox"/> |
| 23 | Panaghoy 3-5 | <input type="checkbox"/> |
| 30 | Ezekiel 1-2 | <input type="checkbox"/> |

Disyembre

| | | |
|----|--------------|--------------------------|
| 7 | Ezekiel 3-4 | <input type="checkbox"/> |
| 14 | Ezekiel 5-6 | <input type="checkbox"/> |
| 21 | Ezekiel 7-8 | <input type="checkbox"/> |
| 28 | Ezekiel 9-10 | <input type="checkbox"/> |

Kung Paano Gagamitin ang Buklet na Ito

Sa buklet na ito, may teksto sa bawat araw at komento para sa tekstong iyon. Puwede itong basahin kahit anong oras, pero nakita ng ilan na nakatulong sa kanila ang pagbabasa nito sa umaga para mapag-isipan nila ito sa maghapon. Napakagandang talakayin ang teksto bilang isang pamilya. Ganiyan ang ginagawa ng mga pamilyang Bethel sa buong mundo sa panahon ng almusal.

Makikita sa dulo ng bawat komento ang reperensiya kung saan ito kinuha. Halimbawa, tumutukoy ang “w24.04 2 ¶1, 3” sa reperensiyang makikita sa ibaba. Ang karagdagang impormasyon tungkol sa paksa ay makikita sa mismong artikulo.

| | |
|-------|---|
| w24 | Taon ng isyu ng <i>Bantayan</i> (2024) |
| 04 | Buwan ng isyu ng <i>Bantayan</i> (Abril) |
| 2 | (Mga) pahina kung saan kinuha ang komento |
| ¶1, 3 | (Mga) numero ng parapo kung saan kinuha ang komento |

Huwebes, Enero 1

Maging nasa hustong-gulang pagdating sa pang-unawa.—1 Cor. 14:20.

Ang pagsilang ng isang malusog na baby ang isa sa pinakamasayang pangyayari sa buhay ng mga mag-asawa. Pero kahit gaano kamahal ng mga magulang ang baby nila, ayaw nila na manatili na lang itong baby habambuhay. Ang totoo, mag-aalala sila kung hindi ito lumalaki. Ganiyan din si Jehova. Masaya siya noong nagpasiya tayong kilalanin siya. Pero ayaw niyang hanggang doon na lang tayo. (1 Cor. 3:1) Sa halip, inaasahan niya na magiging “nasa hustong-gulang” na mga Kristiyano tayo. Sa Bibliya, ang salitang Griego na isinaling “hustong-gulang” ay puwede ring mangahulugang “maygulang,” “perpekto,” at “ganap.” (1 Cor. 2:6) Gaya ng baby na patuloy na lumalaki hanggang sa maging adulto ito, kailangan din nating patuloy na palalimin ang kaugnyan natin kay Jehova para maging maygulang na Kristiyano tayo. Pero kahit maygulang na tayo, kailangan pa rin nating patuloy na sumulong.—1 Tim. 4:15. w24.04 2 ¶1, 3

Biyernes, Enero 2

Maninirahan akong kasama nila, at ako ang magiging Diyos nila.—Ezek. 37:27.

Kung may magtanong, ‘Ano si Jehova para sa iyo?’ Ano ang isasagot mo? Baka sabihin mo, ‘Kaibigan ko siya, Diyos, at Ama.’ Pero alam mo ba na si Jehova ay gaya rin ng isang may-ari ng bahay na nagi-iimbata sa iyo? May sinabi si Haring David tungkol sa pakikipagkaibigan ni Jehova sa tapat na mga mananam-ba Niya. Ikinumpara niya ito sa kaugnyan ng isang may-ari ng bahay sa mga panauhin nito. Sinabi ni David: “O Jehova, sino ang puwedeng maging panauhin sa iyong tolda? Sino ang puwe-

deng tumira sa iyong banal na bundok?” (Awit 15:1) Makikita natin sa talatang ito na puwede tayong maging panauhin, o bisita, sa tolda ni Jehova. Ibig sabihin, puwede niya tayong maging kaibigan. Noong simula, mag-isa lang si Jehova. Pero nang lalangin niya si Jesus, nagkaroon siya ng panauhin sa makasagisag na tolda niya. Si Jesus ang pinakauunang inimitahan ni Jehova, at masaya si Jehova na gawin iyon. Sinasabi ng Bibliya na “gustong-gusto” ng Diyos na kasama ang panganay niyang Anak. At “masayang-masaya” rin si Jesus “sa piling ni [Jehova] sa lahat ng panahon.” —Kaw. 8:30. w24.06 2 ¶1-3

Sabado, Enero 3

Si Zadok [ay] isang malakas at matapang na lalaki.—1 Cro. 12:28.

Isipin ang eksenang ito. Mahigit 340,000 lalaki ang nagsama-sama para gawing hari ng Israel si David. Tatlong araw silang nanatili sa mababatang burol malapit sa Hebron. Masaya silang nagkukuwentuhan doon at umaawit ng mga papuri kay Jehova. (1 Cro. 12:39) Malamang na hindi napansin ng marami na nandoon si Zadok. Pero sinigurado ni Jehova na malalaman natin na nandoon siya. (1 Cro. 12:22, 26-28) Si Zadok ay isang saserdote na laging kasama ng mataas na saserdoteng si Abiatar. Isa rin siyang tagakita; ginawa siya ng Diyos na napakarunong at binigyan ng kakayahang maunawaan ang kaloo-ban Niya. (2 Sam. 15:27) Malakas ang loob niya. Sa mga huling araw na ito, lalong tumitindi ang pag-atake ni Satanang sa bayan ng Diyos. (1 Ped. 5:8) Kaya kailangan nating maging matapang habang hinihintay nating alisin ni Jehova si Satanang at ang masamang sistema nito. (Awit 31:24) Sa paggawa nito, matutularan natin ang katapangan ni Zadok. w24.07 2 ¶1-3

Linggo, Enero 4

Nabuhay si Adan nang 930 taon, at siya ay namatay.—Gen. 5:5.

Gusto ni Jehova na maging masaya ang unang lalaki at babaeng nilalang niya. Binigyan niya sila ng napakagandang lugar na titirhan, masayang pag-aasawa, at makabuluhang atas. Pupunuin nila ng mga anak nila ang buong lupa, at gagawin itong Paraiso gaya ng hardin ng Eden. Binigyan niya lang sila ng isang simpleng utos. At binabalaan niya sila na kung susuway sila sa utos niya at magrebelde sa kaniya, mamamatay sila. Alam na natin ang nangyari. Dumating ang isang masamang anghel na walang pagmamahal sa Diyos o kina Adan at Eva, at tinukso sila na sumuway. Sumunod naman sa kaniya ang mag-asawa. Imbes na magtiwala sa mapagmahal nilang Ama, pinili nilang magkasala. At gaya ng alam natin, nagkakatotoo ang mga sinabi ni Jehova. Mula nang araw na iyon, nagdusa sila. Naranasan na nilang tumanda at bandang huli, namatay sila.—Gen. 1:28, 29; 2:8, 9, 16-18; 3:1-6, 17-19, 24. w24.08 3 ¶3

Lunes, Enero 5

Maging tagatupad kayo ng salita at hindi tagapakinig lang.—Sant. 1:22.

Gusto ni Jehova at ni Jesus na maging masaya tayo. Ganito ang sinasabi sa Awit 119:2: “Maligaya ang mga tumutupad sa kaniyang mga paalaala at buong pusong humahanap sa kaniya.” Sinabi rin ni Jesus: “Maligaya ang mga nakikinig sa salita ng Diyos at tumututpad nito!” (Luc. 11:28) Masaya ang mga naglilingkod kay Jehova dahil regular nating binabasa ang Salita ng Diyos at sinisikap nating isabuhay ang mga natutuhan natin. (Sant. 1:22-25) Kapag isinasabuhay natin ang mga naba-

basa natin, napapasaya natin si Jehova. (Ecles. 12:13) May magandang epekto rin ito sa kaugnayan natin sa pamilya natin at sa mga kapatid sa kongregasyon. Bukod diyan, naiiwasan natin ang mga problemang epekto ng hindi pagsunod sa mga utos ni Jehova. Kaya sangayon tayo sa sinabi ni Haring David. Matapos niyang banggitin sa isang awit ang tungkol sa kautusan, batas, at kahatulan ni Jehova, sinabi niya: “Sa pagsunod sa mga iyon ay may malaking gantimpala.” —Awit 19:7-11. w24.09 2 ¶1-3

Martes, Enero 6

Pinagagaling niya ang mga may pusong nasasaktan; tinatalian niya ang mga sugat nila.—Awit 147:3.

Nakikita ni Jehova ang lahat ng pinagdadaan ng mga lingkod niya. Alam niya kapag masaya tayo, at alam din niya kapag malungkot tayo. (Awit 37:18) Kapag nakikita niyang ginagawa natin ang buong makakaya natin para paglingkuran siya kahit may pinagdadaan tayo, talagang napapasaya natin siya. Kaya gustong-gusto niya tayong tulongan at patibayin. Sinasabi sa Awit 147:3 na ‘tinatalian ni Jehova ang mga sugat’ ng mga may pusong nasasaktan. Inilalarawan sa tekstong ito kung paano inaalagaan ni Jehova ang mga nasasaktan dahil sa pinagdadaan nila. Pero ano ang dapat nating gawin para matanggap ang tulong ni Jehova? Tingnan ang isang ilustrasyon. Kapag nagka-injury ang isang tao, malaki ang maitutulong sa kaniya ng isang doktor. Pero para gumaling siya, dapat niyang sundin ang mga sasabihin ng doktor. Gamit ang Bibliya, kinakausap ni Jehova ang mga taong nasasaktan at binibigyan sila ng payo. w24.10 6 ¶1-2

Miyerkules, Enero 7

Silang lahat ay napawi sa lupa.—Gen. 7:23.

Tinalakay noon sa mga publikasyon natin kung ano ang mangyayari sa mga hinatulan na ni Jehova na di-matuwid. Sinabi natin na hindi na bubuhaying muli ang mga pinuksa na ni Jehova. Sa Bibliya, may mababasa tayong mga ulat tungkol sa ginawang paghatol ni Jehova sa mga taong di-matuwid. Halimbawa, maraming namatay noong panahon ng Baha at noong utusan ni Jehova ang mga Israelita na puksain ang mga nakatira sa pitong bansa na nasa Lupang Pangako. (Deut. 7:1-3) Pinatay rin ng isang anghel ni Jehova ang 185,000 sundalong Asiryano sa isang gabi lang. (Isa. 37:36, 37) Sa mga pangyayaring ito, may sapat na impormasyon ba sa Bibliya para masabi natin na talagang hinatulan na ni Jehova ng walang-hanggang pagkapuksa ang bawat isa sa mga namatay at na wala na silang pag-asang buhaying muli? Wala. Sa mga halimbawang binanggit natin, hindi natin alam kung ano ang hatol ni Jehova sa bawat isa sa mga namatay. Hindi rin natin alam kung nagkaroon sila ng pagkakataong makilala si Jehova at magsisi. w24.05 3 ¶5-7

Huwebes, Enero 8

Patuloy na daigin ng mabuti ang masama.—Roma 12:21.

May sinabing ilustrasyon si Jesus tungkol sa isang biyuda na paulit-ulit na humihingi ng katarungan sa isang hukom. Siguradong alam na alam ng mga alagad ni Jesus ang nararamdaman ng biyudang iyon kasi kadalasan nang nakakaranas ng kawalang-katarungan ang pangkaraniwang mga tao noon. (Luc. 18:1-5) Naiintindihan din natin ang nararamdaman ng biyuda, kasi lahat tayo, nakakaranas ng kawalang-katarungan sa iba't ibang paraan. Normal na lang sa mga tao ngayon na magpakita ng diskriminasyon, maging

makasarili, at sakim. Kaya inaasahan na nating makakaranas talaga tayo ng kawalang-katarungan. (Ecles. 5:8) Pero baka hindi natin inaasahan na mararanasan din natin iyan sa mga kapatid. Di-gaya ng mga umuusig sa atin, hindi naman gusto ng mga kapatid na pakitunguhan tayo nang di-patas. Hindi lang talaga sila perpekto. May matututuhan tayo kay Jesus kung paano niya hinarap ang di-patas na pagtrato ng mga mang-uusig. Kung kaya nating tiisin ang di-patas na pagtrato ng mga mang-uusig, mas lalo tayong dapat na maging matiisin sa mga kapatid natin! w24.11 2 ¶1-2

Biyernes, Enero 9

Saan tayo bibili ng tinapay para sa kanila?—Juan 6:5.

Tinapay ang isa sa pangunahing pagkain noong panahon ng Bibliya. (Gen. 14:18; Luc. 4:4) Ang totoo, sa sobrang dalas nitong kainin ng mga tao, ang salitang “tinapay” sa Bibliya ay puwede ring mangahulugang pagkain. (Mat. 6:11; Gawa 20:7, study note) At sa dalawang kilalang himala ni Jesus, ginamit niya ang tinapay. (Mat. 16:9, 10) Makikita natin ang ulat ng isa sa mga iyon sa Juan kabanta 6. Pagkatapos mangaral ng 12 apostol, sumakay sila sa isang bangka kasama ni Jesus patawid ng Lawa ng Galilea para makapagpahinga. (Mar. 6:7, 30-32; Luc. 9:10) Nagpunta sila sa isang tahimik na lugar malapit sa Betsaida. Nang malaman ito ng mga tao, libo-libo ang nagpuntahan doon. Pero hindi sila itinaboy ni Jesus. Tinuruan niya sila tungkol sa Kaharian at pinagaling ang mga mayasakit. Noong papagabi na, iniisip ng mga alagad kung paano makakakain ang mga tao na nandoon. Posibleng may baon naman ang ilan sa kanila, pero marami ang kailangan pang pumunta sa mga nayon para makabili ng pagkain.—Mat. 14:15. w24.12 2 ¶1-2

Sabado, Enero 10

Ang regalo ng Diyos ay buhay na walang hanggan sa pamamagitan ni Kristo Jesus na ating Panginoon.
—Roma 6:23.

Perpekto at nakatira sa isang napakagandang paraiso ang mga magulang nating sina Adan at Eva. (Gen. 1:27; 2:7-9) Puwede sana silang mabuhay nang masaya magpakailanman. Pero lahat ng ito ay nagbago nang magkasala sila. Nawala nila ang Paraiso at ang pagkakataong mabuhay magpakailanman. Kaya ano ang maipapamana nila sa mga anak nila? Sinasabi ng Bibliya: “Sa pamamagitan ng isang tao [si Adan], ang kasalanan ay pumasok sa sangkatauhan at dahil sa kasalanan ay pumasok ang kamatayan, kaya naman ang kamatayan ay lumaganap sa lahat ng tao, dahil silang lahat ay nagkasala.” (Roma 5:12) Naman natin kay Adan ang kasalanan kaya tayo namamatay. Gaya ito ng isang napakalaking utang na hindi natin kayang bayaran. (Awit 49:8) Itinulad ni Jesus ang mga kasalanan natin sa “utang.” (Mat. 6:12, tlb.; Luc. 11:4) Kapag nagkakasala tayo, para bang nagkakautang tayo kay Jehova. May karapatan siyang singilin tayo sa mga kasalanan natin. At kung walang tutulong sa atin, makakalaya lang tayo sa utang kung mamamatay tayo.—Roma 6:7. w25.02 2 ¶2-3

Linggo, Enero 11

Ipinakilala ko . . . ang pangalan mo.
—Juan 17:26.

Isang pribilehiyo para sa atin na maipangaral ang katotohanan tungkol sa Kaharian ng Diyos! Hindi bukás ang pribilehiyong iyan para sa lahat. Halimbawa, noong nandito si Jesus sa lupa, hindi niya pinahintulutan ang masasamang espiritu na magpatotoo tungkol sa kaniya. (Luc. 4:41) Sa ngayon, bago ma-

kapangaral ang isang tao kasama ng mga Saksi ni Jehova, may mga kuwalipikasyon siyang dapat abutin. Maipapakita nating pinapahalagahan natin ang pribilehiyong mangaral kung magpapatotoo tayo saanman at kailanman puwede. Gaya ni Jesus, ginagawa natin ang buong makakaya natin sa pagtatanim at pagdidilig ng binhi ng katotohanan sa puso ng mga tao. (Mat. 13:3, 23; 1 Cor. 3:6) At gaya ni Jesus, ginagawa rin ng organisasyon ni Jehova ang lahat para tulungan ang mga tao na malaman ang pangalan ng Diyos. Inilathala nito ang *Bagong Sanlibutang Salin ng Banal na Kasulatan* kung saan ibinalik ang pangalan ng Diyos sa orihinal na mga puwesto nito. Ang buong Bibliyang ito o ang ilang bahagi nito ay available na sa mahigit 270 wika. w24.04 9 ¶8-9

Lunes, Enero 12

Tumatayo ang asawa niya at pinupuri siya.—Kaw. 31:28.

Nakasanayan ng ilang brother na masaya sa pag-aasawa na gumawa ng isang bagay araw-araw na nagpapakitang mahal nila ang asawa nila. (1 Juan 3:18) Kahit sa maliliit na bagay, puwedeng iparamdam ng lalaki ang pagmamahal niya sa asawa niya, gaya ng paghawak sa kamay nito o pagyakap dito. Puwede siyang magtext at sabihing “Miss na kita” o “Kumusta ka?” Paminsan-minsan, puwede rin siyang gumawa ng sulat-kamay na card para sa asawa niya. Kapag ginagawa ito ng asawang lalaki, napaparangalan niya ang asawa niya at tumitibay ang pagsasama nila. Kapag pinaparangalan ng lalaki ang asawa niya, mararamdaman ng babae na minamahal siya at pinapahalagahan. Magagawa niya ito kung lagi niyang papasalamatan ang asawa niya sa lahat ng ginagawa nito para suportahan siya. (Col. 3:15) Kapag ginagawa ito nang mula

sa puso, siguradong mapapahalagahan ito ng asawang babae. Magiging panatag siya, at mararamdaman niyang minamahal siya at pinaparangalan. w25.01 11 ¶15; 13 ¶16

Martes, Enero 13

Ako, si Jehova, ang iyong Diyos, . . . ang pumapatnubay sa iyo sa daan na dapat mong lakaran.—Isa. 48:17.

Natapos ang Awit 15 sa isang pangako: “Ang gayong tao ay hindi matitinag.” Ipinapakita dito ng salmista kung bakit ipinapagawa sa atin ni Jehova ang lahat ng binabanggit sa awit na ito. Gusto ni Jehova na maging masaya tayo. Kaya kung gagawin natin ang mga sinabi niya, pagpapalain niya tayo at poprotektahan. Makakaasa ang mga panahin ni Jehova na magkakaroon sila ng magandang kinabukasan. Titira ang tapat na mga pinahiran sa ‘lugar na ini-handa’ ni Jesus para sa kanila sa langit. (Juan 14:2) Hinihintay naman ng mga may pag-asa sa lupa ang mga pangako na nasa Apocalipsis 21:3. Nagpapasalamat tayo na gusto tayong maging panahin ni Jehova sa tolda niya. Talagang napakalaking karangalan na maging kaibigan niya magpakailanman!—Awit 15: 1-5. w24.06 13 ¶19-20

Miyerkules, Enero 14

Ibigay ninyo kay Jehova ang kaluwalhatian ng nararapat sa pangalan niya.—Awit 96:8.

Ano ang kaluwalhatian? Sa Bibliya, tumutukoy ang salitang “kaluwalhatian” sa anumang bagay na nagiging dahilan para purihin at maging kahanga-hanga ang isa. Ipinakita ni Jehova ang kaluwalhatian niya pagkatapos na pagkatapos mapalaya ang mga Israelita mula sa Ehipto. Isipin ito: Milyon-milyong Israelita ang nasa paanan ng Bundok Sinai

para pakinggan ang sasabihin ng Diyos sa kanila. Pagkatapos, natakpan ng makapal na ulap ang bundok. Biglang lumindol at nagkaroon ng usok sa paligid. Kumulog din at kumidlat, at narinig nila ang napakalakas na tunog ng tambuli. (Ex. 19:16-18; 24:17; Awit 68:8) Nang ipakita ni Jehova ang kaluwalhatian niya, siguradong hangang-hanga ang mga Israelita. Naluluwalhati natin ngayon si Jehova kapag sinasabi natin sa iba ang mga kamangha-manghang ginawa niya at ang magagandang katangian niya. Maluluwalhati rin natin siya kapag ibinibigay natin sa kaniya ang papuri para sa mga nagagawa natin.—Isa. 26:12. w25.01 2-3 ¶2-3

Huwebes, Enero 15

Isinugo ako ni Jehova.—Bil. 16:28.

Noong naglalakbay ang mga Israelita papunta sa Lupang Pangako, may mga prominenteng lalaking kumuwestiyon sa atas na ibinigay ni Jehova kay Moises. Sinabi nila: “Banal ang buong bayan, lahat sila [hindi lang si Moises], at nasa gitna nila si Jehova.” (Bil. 16: 1-3) Totoo naman na banal ang “buong bayan” sa paningin ni Jehova, pero si Moises ang pinili niya para mangu-na sa kanila. Nang kuwestiyunin ng mga rebeldeng ito si Moises, ang totoo, si Jehova talaga ang kinukuwestiyon nila. Imbes na magpokus sa gusto ni Jehova, nagpokus sila sa kagustuhan nilang maging mas prominente at magkaroon ng mas malaking awtoridad. Pinatay ng Diyos ang mga nagpasimula ng rebelyon, pati na ang libo-libong sumuporta sa kanila. (Bil. 16:30-35, 41, 49) Sa ngayon, siguradong hindi rin natutuwa si Jehova sa mga ayaw tumanggap sa mga kaayusan ng organisasyon niya. w24.07 11 ¶11

Biyernes, Enero 16

*Ang pangitain ay naghihintay
pa sa takdang panahon nito.*

—Hab. 2:3.

Hindi naniniwala ang marami sa ngayon na malapit na ang wakas ng sistemang ito. Pinagtatawanan pa nga nila ang mga naniniwala dito. (2 Ped. 3:3, 4) Marami pa tayong hindi alam, kaya kailangan natin ng matibay na pananampalataya na talagang darating ang wakas ng sistemang ito sa panahong itinakda ni Jehova. Dapat din tayong maging kumbinsido na tutulungan niya tayo sa panahong iyon. Dapat din nating patibayin ang pananampalataya natin na ginagamit ni Jehova ang “tapat at matalinong alipin” para gabayan tayo sa ngayon. (Mat. 24:45) Posibleng makatanggap tayo ng espesipikong mga tagubilin na magliligtas ng buhay natin kapag nagsimula na ang malaking kapighatian. Kaya ngayon na ang panahon para patibayin ang pagtitiwala natin sa mga nangunguna sa organisasyon ni Jehova. Kasi kung ngayon pa lang, nahihi-rapan na tayong sundin ang mga tagubilin nila, malamang na mas mahirapan tayong gawin iyan sa malaking kapighatian. w24.09 10-11 ¶11-12

Sabado, Enero 17

*[Patunayan] ninyo sa inyong sarili kung
ano ang mabuti, katanggap-tanggap,
at perpektong kalooban ng Diyos.*

—Roma 12:2.

Alam ng mga Kristiyanong magulang na hindi namamana ang pananampalataya sa Diyos. Kaya baka dumating ang panahon na maitanong ng anak mo: ‘Talaga nga kayang may Diyos? Dapat ba talaga akong maniwala sa Bibliya?’ Ang totoo, maganda iyan. Sinasabi ng Bibliya na dapat nating gamitin ang ating “kakayahan sa pangangatuwiran” at

“tiyakin . . . ang lahat ng bagay.” (Roma 12:1; 1 Tes. 5:21) Pero paano mo matutulungan ang anak mo na mapatibay ang pananampalataya niya? Tulungan siyang patunayan sa sarili niya ang katoohan. Kapag nagtanong ang anak mo, samantalahin iyon para turuan siya kung paano hahanapin ang sagot gamit ang mga tool natin sa pagre-research gaya ng *Watch Tower Publications Index* at *Tulong sa Pag-aaral ng mga Saksi ni Jehova*. Sa *Tulong sa Pag-aaral*, sa pak-sang “Bibliya,” puwede niyang tingnan ang “Kinasihan ng Diyos” para makita ang mga ebidensiya na hindi lang isang magandang aklat ang Bibliya na isinulat ng mga tao. Ito ang “salita ng Diyos.” —1 Tes. 2:13. w24.12 15 ¶4-5

Linggo, Enero 18

*Ipagkatiwala mo ang mga ito sa mga
tapat, na magiging lubusan ding
kuwalipikado na magturo sa iba.*

—2 Tim. 2:2.

Paano matutularan ng mga elder si Jesus? Kailangan nilang sanayin at tulungan ang mga brother, kasama na ang mga kabataan, na maging kuwalipikado sa mas mabibigat na pananagutan sa kongregasyon. Alam ng mga elder na marami pang kailangang matutuhan ang mga sinasanay nila. Dapat silang magbigay ng payo sa mabait na paraan para matuto ang mga brother na maging mapagpakumbaba, maaasahan, at handang maglingkod sa iba. (1 Tim. 3:1; 1 Ped. 5:5) Hindi lang pangangaral ang atas na ibinigay ni Jesus sa mga alagad niya, kailangan din nilang magturo. Posibleng naisip ng mga alagad na hindi nila kaya ang ipinapagawa sa kanila. Pero nagtitiwala si Jesus na magagawa nila iyon. Makikita iyon sa sinabi niya: “Kung panong isinugo ako ng Ama, isinusugo ko rin kayo.”—Juan 20:21. w24.10 16 ¶15; 17 ¶17

Lunes, Enero 19

Si David . . . , isang lalaking kalugod-lugod sa puso ko.—Gawa 13:22.

Mabuting hari si David. Isa siyang mandirigma at propeta. Magaling din siya sa musika at paggawa ng tula. Pero marami siyang pinagdaanan sa buhay. Matagal siyang nagtagô dahil gusto siyang patayin ni Haring Saul. Nang maging hari na siya, kailangan niyang magtagô ulit dahil gusto ng anak niyang si Absalom na agawin ang trono at patayin siya. Sa kabila ng lahat ng ito at ng mga kahinaan niya, nanatiling tapat si David sa Diyos buong buhay niya. Inilarawan siya ni Jehova na “isang lalaking kalugod-lugod sa puso [Niya].” Kaya dapat lang na pakinggan natin ang payo ni David! (1 Hari 15:5) Tingnan natin ngayon ang payo ni David sa anak niyang si Solomon, na papalit sa kaniya bilang hari. Pinili ni Jehova si Solomon para magtayo ng templo kung saan sasamba ang bayan. (1 Cro. 22:5) Napakabigat na atas niyan. Kailangan niya rin ng tulong ni Jehova para pamunuan ang bayan. Ano kaya ang ipapayo sa kaniya ni David? Sinabi ni David kay Solomon na kung susunod siya kay Jehova, magtatagumpay siya sa buhay.—1 Hari 2: 2, 3. w24.11 10 ¶9-11

Martes, Enero 20

Ipagkatiwala mo kay Jehova ang landasin mo; manalig ka sa kaniya, at siya ang kikilos para sa iyo.
—Awit 37:5.

May mga kailangang gawin ang isang asawang lalaki na nananakit o nagsasalita nang mapang-abuso sa asawa niya para maayos ang kaugnayan niya dito at kay Jehova. Una, dapat niyang aminin na masama ang ginagawa niya. Wala siyang maitatago kay Jehova. (Awit 44:21; Ecles. 12:14; Heb. 4:13) Ikalawa,

dapat niyang itigil ang pang-aabuso sa asawa niya at baguhin ang ugali niya. (Kaw. 28:13) Ikatlo, dapat siyang humingi ng tawad sa asawa niya at kay Jehova. (Gawa 3:19) Dapat din siyang magsumamo kay Jehova na bigyan siya ng kagustuhang magbago at tulungan siyang kontrolin ang mga iniisip, sinasabi, at ginagawa niya. (Awit 51:10-12; 2 Cor. 10:5; Fil. 2:13) Ikaapat, kikilos siya kaayon ng mga panalangin niya. Sikapin niyang kapootan ang lahat ng uri ng karahasan at mapang-abusong pananalita. (Awit 97:10) Ikalima, kailangan niyang lumapit agad sa mapagmahal na mga elder sa kongregasyon. (Sant. 5:14-16) Ikaanim, gagawa siya ng plano na tutulong sa kaniya na maiwasang maulit ang lahat ng masamang ginagawa niya. w25.01 11 ¶14

Miyerkules, Enero 21

Ano pa ang hinihintay mo?
Magpabautismo ka.—Gawa 22:16.

Siguradong mahal mo ang Diyos na Jehova. Siya ang nagbibigay sa iyo ng lahat ng mabubuting regalo, pati na ang buhay mo. Paano mo maipapakitang mahal mo siya? Ang pinakamagandang paraan para magawa iyan ay ang pag-aalay ng buhay mo sa kaniya at pagpabautismo. Kapag ginawa mo ang mga iyan, magiging bahagi ka ng pamilya ni Jehova. Gagabayan ka at iingatan ng Ama at Kaibigan mo. (Awit 73:24; Isa. 43:1, 2) Kapag nag-alay at nagpabautismo ka na, posible ka nang magkaroon ng buhay na walang hanggan. (1 Ped. 3: 21) May nakakapigil ba sa iyo na magpabautismo? Kung oo, hindi ka nag-iisa. Kinailangang baguhin ng marami ang paraan ng pag-iisip at pagkilos nila para maging kuwalipikadong magpabautismo. At masayang-masaya na sila ngayon na naglilingkod kay Jehova. w25.03 2 ¶1-2

Huwebes, Enero 22

Sa iyo ay may tunay na kapatawaran.
—Awit 130:4.

Madalas itulad ng Bibliya ang kasalanan sa mabigat na pasan. Ganito ang sinabi ni Haring David tungkol sa mga kasalanan niya: “Lampas-ulo na ang mga pagkakamali ko; gaya ng mabigat na pasan, hindi ko na kayang dalhin ang mga ito.” (Awit 38:4) Pero kapag nagsisi ang isa, alam nating papatawarin siya ni Jehova. (Awit 25:18; 32:5) Ang salitang Hebreo na isinaling “patawarin” ay nangangahulugang “buhatin” o “dalhin.” Kaya kapag pinapatawad tayo ni Jehova, para bang binubuhat niya, o dinadala, ang mabigat na pasan natin at inilalayo ito. Makikita sa isa pang ilustrasyon kung gaano kalayo dinadala ni Jehova ang mga kasalanan natin. Sinasabi sa Awit 103:12: “Kung gaano kalayo ang sikatan ng araw sa lubugan ng araw, gayon niya inilalayo sa atin ang mga kasalanan natin.” Silangan ang pinakamalayong lugar mula sa kanluran. Hinding-hindi magtatagpo ang dalawang lugar na ito. Ibig sabihin, inilalayo ni Jehova ang mga kasalanan natin sa pinakamalayong lugar na maiisip natin. Tinitiyak nito sa atin na talagang pinapatawad tayo ni Jehova! w25.02 9 ¶5-6

Biyernes, Enero 23

Kung gagawa ka ng mabuti sa mahihirap, huwag kang hihikap ng trumpeta.—Mat. 6:2.

Noong nasa langit na si Jesus, pinagaling ni apostol Pedro ang isang lalaking ipinanganak na lumpo. (Gawa 1:8, 9; 3:2, 6-8) Marami ang lumapit nang makita nila ang pangyayaring iyon. (Gawa 3:11) Dahil mahalaga sa kultura nila ang pagiging prominente, naisip ba ni Pedro na pagkakataon na niya iyon na sumikat? Hindi. Naging mapagpakumbaba si

Pedro at ibinigay ang papuri kay Jehova at kay Jesus. Sinabi niya: “Sa pamamagitan ng pangalan [ni Jesus] at dahil sa pananampalataya namin dito, napalakas ang taong ito na nakikita ninyo at nakikilala.” (Gawa 3:12-16) Patuloy na naging mapagpakumbaba si Pedro, at matutularan natin siya. Gumagawa tayo ng mabuti sa iba dahil mahal natin si Jehova at ang mga tao, hindi dahil gusto nating humanga sila sa atin. At kapag masaya tayo sa mga ginagawa natin kahit hindi iyon nakikita ng iba, ipinapakita nito na talagang mapagpakumbaba tayo.—Mat. 6:1-4. w25.03 10 ¶11-12

Sabado, Enero 24

Laging bigyang-pansin ang sarili mo at ang itinuturo mo.
—1 Tim. 4:16.

Magiging mas masigla tayo sa ministerio kung magpopokus tayo sa pag-ibig natin kay Jehova at sa kapuwa. (Mat. 22:37-39) Isipin na lang kung gaano kasaya si Jehova kapag nakikita niya tayong nangangaral! Isipin din ang sayang mararamdaman ng mga tao kapag nag-aral na sila ng Bibliya. Isa pa, tandaan na ang mga makikinig sa mensahe natin at maglilingkod kay Jehova ay puwedeng mabuhay nang walang hanggan. (Juan 6:40) Hindi ka ba makalabas ng bahay dahil sa kalagayan mo? Kung oo, pag-isipan ang mga puwede mo pa ring gawin para maipakita ang pag-ibig mo kay Jehova at sa kapuwa. Ganiyan ang naging kalagayan nina Samuel at Dania nitong COVID-19 pandemic. Sa mahirap na panahong iyon, regular silang nagte-telephone witnessing, nagletter writing, at nagba-Bible study sa Zoom. Naging limitado ang kayang gawin nina Samuel at Dania, pero ibinigay pa rin nila ang buo nilang makakaya kaya naging masaya sila. w24.04 18-19 ¶15-16

Lingo, Enero 25

Sino ang makakahanap ng mahusay na asawang babae? Mas malaki ang halaga niya kaysa sa mga korales.—Kaw. 31:10.

Hindi kailangang mag-asawa para maging masaya. Pero maraming single na Kristiyano, kabataan man o may-edad, ang nag-iisip na mag-asawa. Siyempre, bago ka makipagligawan, dapat mayroon ka nang matibay na kaugnayan kay Jehova, kilalang-kilala mo na ang sarili mo, at kaya mo nang makapaglaan sa materyal. (1 Cor. 7:36) Dapat alam mo na rin kung ano ang gusto mo sa mapangasawa mo bago ka manligaw. Kasi kung hindi, baka mapalampas mo ang isa na mahusay o kaya naman, makatutulan mo ang hindi pala bagay sa iyo. Siyempre, dapat na bautisadong Kristiyano lang ang liligawan mo. (1 Cor. 7:39) Pero hindi lahat ng bautisado ay magiging mahusay na asawa para sa iyo. Kaya tanungin ang sarili: ‘Ano ba ang mga goal ko sa buhay? Anong mga katangian ang gusto kong makita sa mapangasawa ko? Makatuwiran ba ang mga inaasahan ko?’ w24.05 20 ¶1; 21 ¶3

Lunes, Enero 26

Maging mabait kayo sa isa’t isa.
—Efe. 4:32.

Bilang magkasintahan, paano ninyo harapin ang mga di-pagkakaunawaan ninyo kung minsan? Ibig sabihin ba agad nito, hindi talaga kayo para sa isa’t isa? Hindi naman; talagang nangyari iyan. Ang matatag na pag-aasawa ay ang pagsasama ng dalawang taong iginagalang ang isa’t isa at handang makibagay sa pagkakaiba nila. Kaya makikita sa pagharap ninyo ng problema ngayon kung magiging matagumpay ang pagsasama ninyo. Pag-isipan ito: ‘Kaya ba naming pag-usapan ang mga problema nang kalmado at magalang pa rin

sa isa’t isa? Inaamin ba namin ang mga pagkakamali namin at sinisikap itong baguhin? Handa ba kaming magparaya sa isa’t isa, humingi ng sorry, at magpatawad?’ (Efe. 4:31) Pero kung lagi na lang kayong nag-aaway sa panahong magkasintahan kayo, malamang na magiging ganiyan din kayo kapag mag-asawa na kayo. Kung nakita mong hindi talaga siya magiging mahusay na asawa para sa iyo, makakabuti para sa inyong dalawa na maghiwalay. w24.05 29 ¶12

Martes, Enero 27

Purihin nawa si Jehova na aking Bato, na nagsasanay sa mga kamay ko sa pakikipaglaban.—Awit 144:1.

Magiging magandang halimbawa tayo sa iba kung determinado tayong gawin kung ano ang tama at kung ibabase natin sa mga prinsipyo sa Bibliya ang mga desisyon natin. Habang tumitibay ang pananampalataya natin at lumalalim ang kaalaman natin, nagiging mas kumbinsido tayo sa katotohanan. Dahil diyan, nagiging matatag tayo sa desisyon natin at hindi tayo basta-basta napapaniwala ng mga maling turo at kaisipan ng mundo. (Efe. 4:14; Sant. 1:6-8) At kahit may mga problema tayo, kaya pa rin nating tumulong sa iba na may pinagdadaanan din. (1 Tes. 3:2, 3) Ang mga elder ay dapat na may kontrol sa paggawi nila, matino ang isip, maayos, at makatuwiran. “Mahigpit [din silang] nanghahawakan sa mapananaligang mensahe.” (Tito 1:9; 1 Tim. 3:1-3) Dahil dito, napapatatag nila ang kongregasyon. Nakakatulong din ang magandang halimbawa nila at pagse-shepherding para maging regular ang mga kapatid sa pulong, ministeryo, at personal study. Kapag sobrang nag-aalala ang mga kapatid dahil sa mga problema, mapapatibay sila ng mga elder na umasa kay Jehova at magtiwala sa mga pangako niya. w24.06 31 ¶16-18

Miyerkules, Enero 28

Magsisi kayo dahil ang Kaharian ng langit ay malapit na.—Mat. 4:17.

Noong nasa lupa si Jesus, itinuro niya sa mga tagapakinig niya na gustong-gusto ng Ama niya na magpatawad. Ginamit niya ang napakagandang ilustrasyon tungkol sa nawalang anak. Pinili ng kabataang lalaking iyon na lumayas sa bahay nila at magpakasasa sa kasalanan. Pero “nang makapag-isip-isip siya,” umuwi siya sa kanila. Ano ang reaksiyon ng tatay niya? Sinabi ni Jesus na habang “malayo pa [ang anak], nata-naw na siya ng kaniyang ama . . . ; tumakbo ito at niyakap at hinalikan siya.” Hindi na inaasahan ng anak na papatawarin siya ng ama niya, kaya gusto na lang niyang hilingin na maging trabahador sa bahay nito. Pero pinatawad agad siya ng ama niya, tinanggap siyang muli sa bahay nito, at tinawag pa ngang ‘anak ko.’ Sinabi ng ama: “Siya ay nawala at natagpuan.” (Luc. 15:11-32) Noong nasa langit pa si Jesus, siguradong paulit-ulit niyang nakita kung paano naging maawain ang Ama niya sa mga nagsisising makasalanan. Sa tulong ng ilustrasyong ito ni Jesus, hindi ba lalo nating minahal ang maawain nating Ama, si Jehova? w24.08 11 ¶11-12

Huwebes, Enero 29

Magkaroon kayo ng matinong pag-iisip.—1 Ped. 4:7.

Kapag may matinong pag-iisip ang isang Kristiyano, sisikapin niyang gumawa ng mga desisyong nagpapakita ng pag-iisip ni Jehova. Alam niyang wala nang mas mahalaga pa sa kaugnayan niya kay Jehova. Balanse ang tingin niya sa sarili niya, at tanggap niyang hindi niya alam ang lahat. Ipinapakita rin niyang umaa-sa siya kay Jehova kaya lagi siyang nananalangin. Kahit na mahusay tayo

sa isang bagay, kailangan pa rin nating umasa kay Jehova. At kapag gumagawa ng malalaking desisyon, hihingi tayo ng tulong kay Jehova sa panalangin kasi nagtitiwala tayong alam niya ang pinakamabuti para sa atin. Talagang nagpapasalamat tayo kay Jehova dahil nilalang niya tayo na may kakayahang tularan ang mga katangian niya. (Gen. 1:26) Hindi natin siya lubusang matutularan.—Isa. 55:9. w25.03 11 ¶13; 13 ¶17-18

Biernes, Enero 30

Inaasahan [ng pag-ibig] ang lahat ng bagay, at tinitis ang lahat ng bagay.—1 Cor. 13:7.

Huwag isipin na hindi mapagpasalamat ang iba. Kung hindi pasalamatang ng iba ang ginawa natin, pag-isipan ito, ‘Talaga bang hindi sila mapagpahalaga o nakalimutan lang nilang magpasalamat?’ O baka may iba pang dahilan. Baka napahalagahan naman talaga ng ilan ang ginawa natin pero hindi lang nila masabi iyon. O kaya naman, baka nahihiya ang iba na tumanggap ng tulong, lalo na kung dati, sila ang tumutulong. Pero kung talagang mahal natin ang mga kapatid, hindi tayo madidismaya sa kanila at patuloy pa rin tayong magiging masaya sa pagbibigay. (Efe. 4:2) Maghintay. Isinulat ng matalinong hari na si Solomon: “Ihagis mo sa tubig ang iyong tinapay, dahil makukuha mo itong muli pagkalipas ng maraming araw.” (Ecles. 11:1) Ipinapakita nito na posibleng hindi agad magpasalamat ang iba sa ginawa natin. Baka kailangan nating maghintay nang “maraming araw.” w24.09 30 ¶18-19

Sabado, Enero 31

Sawayin mo sa harap ng lahat ang mga namimihasa sa kasalanan para magsilbing babala sa iba.—1 Tim. 5:20.

May mga pagkakataon na ipinapatalastas sa kongregasyon na sinaway ang isang kapatid. Sa ganiyang kaso, puwede pa rin tayong makipagsamahan sa kaniya dahil alam nating nagsisi na siya at itinigil na ang maling ginagawa niya. Bahagi pa rin siya ng kongregasyon, at kailangan niya ng pampatibay mula sa mga kapatid para patuloy niyang magawa ang tama. (Heb. 10:24, 25) Pero iba ang gagawin natin kapag inalis sa kongregasyon ang isang tao. 'Ititigil natin ang pakikisama' sa kaniya, at 'hindi man lang tayo kakaing kasama' niya. (1 Cor. 5:11) Ibig bang sabihin, hindi na tala-ga natin siya papansinin? Hindi naman. Totoo, hindi na tayo makikipagsamahan sa kaniya. Pero puwedeng magpasiya ang bawat Kristiyano, depende sa sinasabi ng konsensiya niyang sinanay sa Bibliya, kung iimbitahan niya sa pulong ang isa na inalis sa kongregasyon. Baka kapamilya niya ito o kaibigan. w24.08 30 ¶13-14

Linggo, Pebrero 1

Kapuri-puri ang taong umiiwas sa pakikipagtaló, pero madaling mapaaway ang mangmang.
—Kaw. 20:3.

Pagpapala sa kongregasyon ang mga brother na nagpapakita ng mga Kristiyanong katangian. Sinisikap ng isang taong makatuwiran na mapanatili ang kapayapaan. Kung gusto mong magkaroon ng reputasyon ng pagiging makatuwiran, maging handang makinig at sundin ang sinasabi ng iba. Halimbawa, kapag may meeting, handa ka bang suportahan ang desisyon ng nakakarami kung wala namang prinsipyo sa Bibliya ang

nalalabag? Huwag ipilit ang sarili mong paraan. Pahalagahan ang opinyon ng iba at makinig ka sa kanila. (Gen. 13: 8, 9; Kaw. 15:22) Magalang na makipag-usap sa iba, at maging mabait sa kanila. At dahil mapagpayapa ka, maunang makipag-ayos kahit sa mahihirap na sitwasyon. (Sant. 3:17, 18) Mabait ka ring makipag-usap, kaya napapakalma mo kahit ang mga kumontra sa paniniwala mo. —Huk. 8:1-3; Kaw. 25:15; Mat. 5:23, 24. w24.11 23 ¶13

Lunes, Pebrero 2

Isusugo niya ang kaniyang mga anghel at titipunin ang mga pinili niya mula sa apat na direksiyon, mula sa dulo ng lupa hanggang sa dulo ng langit.
—Mar. 13:27.

Namatay si Jesus “nang minsanan” para sa atin, pero patuloy pa rin siyang nagsasakripisyo hanggang ngayon. (Roma 6:10) Paano? May mga ginagawa pa rin siya hanggang ngayon para makinabang tayo sa pantubos. Halimbawa, naglilingkod siya bilang Hari, Mataas na Sacerdote, at ulo ng kongregasyon. (1 Cor. 15:25; Efe. 5:23; Heb. 2:17) Siya ang nangunguna sa pagtitipon ng mga pinahiran at ng malaking pulutong, isang gawain na aabot bago matapos ang malaking kapighatian. (Mat. 25:32) Sinisigurado rin ni Jesus na may saganang espirituwal na pagkain ang mga lingkod niya sa mga huling araw na ito. (Mat. 24:45) At sa Sanlibong-Taóng Paghahari niya, marami pa siyang gagawin para sa mga tao. Talagang ibinigay ni Jehova ang Anak niya para sa atin! w25.01 24 ¶12

Martes, Pebrero 3

Dahil sa kaniyang walang-kapantay na kabaitan, nagbigay siya ng walang-bayad na regalo—ipinahayag niya silang matuwid sa pamamagitan ng ibinayad na pantubos ni Kristo Jesus na nagpalaya sa kanila.—Roma 3:24.

Kapag nagpatawad si Jehova, lubusan ito at permanente. Dahil dito, puwede niya tayong maging kaibigan. Pero dapat nating tandaan na isang regalo ang pagpapatawad ni Jehova. Ibinibigay niya ito dahil sa pag-ibig at walang-kapantay na kabaitan niya, hindi dahil sa karapat-dapat tayong tumanggap nito. Talagang dapat nating ipagpasalamat na “tunay na kapatawaran” ang ibinibigay ng Diyos nating si Jehova! (Awit 130:4; Roma 4:8) Pero may dapat tayong gawin na mahalagang bagay para mapatawad tayo. Sinabi ni Jesus: “Kung hindi ninyo pinatatawad ang mga pagkakamali ng iba, hindi rin patatawarin ng inyong Ama ang mga pagkakamali ninyo.” (Mat. 6:14, 15) Maliwanag na dapat nating tularan ang pagpapatawad ni Jehova. w25.02 13 ¶18-19

Miyerkules, Pebrero 4

Bubuhaying muli ng Diyos ang mga matuwid at di-matuwid.
—Gawa 24:15.

Isipin ang mga taga-Sodoma at Gomorra. Tumira sa lunsod nila ang matuwid na lalaking si Lot. Pero masasabi ba nating napangaralan silang lahat ni Lot? Hindi. Masasabi rin ba natin na alam nilang lahat na mali ang ginagawa nila? Hindi rin. Isipin noong may isang grupo ng mga lalaki doon na gustong gumahasa sa mga bisita ni Lot. Sinasabi ng Bibliya na may mga bata sa grupong iyon. (Gen. 19:4; 2 Ped. 2:7) Kaya sigurado ba tayo na kahit isa sa kanila, hindi na bubuhaying muli ng maawa-

in nating Diyos? Sinabi ni Jehova kay Abraham na hindi aabot sa 10 ang matuwid sa lunsod na iyon. (Gen. 18:32) Kaya maituturing silang di-matuwid, at pinarusahan sila ni Jehova dahil sa mga ginawa nila. Pero sigurado ba tayo na walang isa man sa kanila ang makakasama kapag ‘binuhay nang muli ang mga di-matuwid’? Hindi natin alam! w24.05 2 ¶3; 3 ¶8

Huwebes, Pebrero 5

Patuloy ninyong unahin ang Kaharian at ang katuwiran niya, at ibibigay niya sa inyo ang lahat ng ito.
—Mat. 6:33.

Dahil sa mga pagbabago sa pinansiyal na kalagayan, pinili ng ilan na tanggapin ang trabahong maglalayo sa kanila sa pamilya nila. Pero bandang huli, nakita ng ilan sa kanila na hindi maganda ang desisyong iyon. Bago tanggapin ang isang trabaho, pag-isipan hindi lang ang laki ng kikitain mo, kundi pati na ang laki ng magiging epekto nito sa espirituwalidad mo at ng pamilya mo. (Luc. 14:28) Pag-isipan ito: ‘Kung magkalayo kaming mag-asawa, ano kaya ang magiging epekto nito sa pagsasama namin? Makakalabas, makakadalo, at makakasama ko pa kaya ang mga kapatid?’ Kung may mga anak ka, pag-isipan din ito: ‘Paano ko papalakihin ang mga anak ko “ayon sa disiplina at patnubay ni Jehova” kung hindi ko sila kasama?’ (Efe. 6:4) Makinig sa payo ni Jehova, hindi sa mga kapamilya at kaibigan na hindi sumusunod sa mga prinsipyo sa Bibliya. w25.03 29 ¶12

Biyernes, Pebrero 6

Huwag na tayong maging mga bata.

—Efe. 4:14.

Kapag hindi pa maygulang, o matured, ang isang Kristiyano, madali siyang ‘madadaya’ at mabibiktima ng “tusong mga pakana.” Baka maniwala rin siya agad sa mga maling impormasyon at apostata. Baka madali rin siyang mainggit, mainis, maghinanakit, o madala ng tukso. (1 Cor. 3:3) Inihalintulad ng Bibliya sa paglaki ng isang bata ang pagsulong tungo sa pagiging maygulang. (Efe. 4:15) Marami pang hindi alam ang isang bata, kaya kailangan niya ang patnubay. Isipin ito: Kung tatawid sa kalsada ang isang nanay kasama ang anak niya, hahawakan niya ang kamay nito. Habang lumalaki ang anak niya, baka hayaan na niya itong tumawid mag-isa, pero papalalahanan pa rin niya ito na tingnan muna kung walang dumadaang sasakyan. Kapag naging adulto na ang bata, alam na niya ang mga panganib. Ganian din kapag naging may-gulang na ang isang Kristiyano. Pinag-iisipan niyang mabuti ang mga prinsipyo sa Bibliya para malaman ang kaisipan ni Jehova, at pagkatapos, susundin niya ito. w24.04 3 ¶5-6

Sabado, Pebrero 7

O Jehova, sino ang puwedeng maging panauhin sa iyong tolda?—Awit 15:1.

Sa loob ng mahabang panahon, ang mga kasama lang ng Diyos sa langit ang may pribilehiyong maging kaibigan niya. Pero nang lalangin niya ang mga tao, inimbitahan niya rin sila na tumira sa tolda niya. Ang ilan sa mga tumanggap sa imbitasyon niya ay sina Enoc, Noe, Abraham, at Job. Tinawag silang mga kaibigan ng Diyos kasi lumakad silang “kasama ng tunay na Diyos.” (Gen. 5:24; 6:9; Job 29:4; Isa. 41:8) Sa

paglipas ng panahon, patuloy na iniimbitahan ni Jehova sa tolda niya ang mga kaibigan niya. (Ezek. 37:26, 27) Halimbawa, matututuhan natin sa hula ni Ezekiel na talagang gusto ng Diyos na maging malapit sa kaniya ang tapat na mga mananamba niya. Nangangako siya na “makikipagtipan [siya] sa kanila para sa kapayapaan.” Tumutukoy ang hulang iyan sa panahon kung kailan magkakasama sa makasagisag na tolda ni Jehova ang mga may pag-asa sa langit at ang mga may pag-asa sa lupa. Magiging “iisang kawan” sila. (Juan 10:16) Natutupad na ngayon ang hulang iyan! w24.06 2 ¶2; 3 ¶4-5

Linggo, Pebrero 8

Nag-ipon kami ng lakas ng loob sa tulung ng ating Diyos.—1 Tes. 2:2.

Bilang mga lingkod ni Jehova, buong puso nating sinusuportahan ang Kaharian ng Diyos. (Mat. 6:33) Pero madalas, kailangan natin ng tapang para magawa iyan. Halimbawa, kailangan natin ng tapang para masunod ang mga paman-tayan ni Jehova at maipangaral ang mabuting balita ng Kaharian sa masamang mundong ito. Kailangan din natin iyan para makapanatili tayong neutral sa mundong ito na nagkakagulo sa politika. (Juan 18:36) Marami sa mga lingkod ni Jehova ang nagkaproblema sa pinansiyal, binugbog, o ikinulong dahil sa pagtanggig magsundalo o sumali sa politika. Lumalakas ang loob natin kapag pinag-iisipan natin ang halimbawa ng mga buong tapang na sumuporta sa pamamahala ni Jehova. Noong nasa lupa ang Hari nating si Kristo Jesus, hindi siya pumayag na maging bahagi ng politikal na sistema ni Satanas. (Mat. 4:8-11; Juan 6:14, 15) Lagi siyang umaasa na ibibigay ni Jehova ang lakas na kailangan niya para magawa ang tama. w24.07 2 ¶4; 3 ¶7

Lunes, Pebrero 9

*Pumitas siya ng bunga at kinain iyon.
At nang kasama na niya ang kaniyang
asawa, binigyan din niya ito at kumain ito.
—Gen. 3:6.*

Ipinasulat ni Jehova sa Bibliya ang malungkot na pangyayaring ito dahil may gusto siyang ituro sa atin. Gusto niyang maintindihan natin kung bakit galit na galit siya sa kasalanan. Dahil kasi sa kasalanan, napapalayo tayo sa kaniya at namamatay tayo. (Isa. 59:2) Pero gustong-gusto iyan ni Satanas kasi galit siya kay Jehova at sa mga tao. Kaya tinukso niya sina Adan at Eva na magkasala, at ganiyan pa rin ang ginagawa niya sa mga tao ngayon. Nang maimpluwensiyahan ni Satanas sina Adan at Eva, akala niya nagtagumpay na siya na sirain ang layunin ni Jehova para sa mga tao. Pero hindi niya alam kung gaano sila kamahal ni Jehova. Hindi binago ng Diyos ang layunin niya sa mga anak nina Adan at Eva. Mahal na mahal niya ang mga tao kaya nagbigay siya agad ng pag-asa para sa lahat. (Roma 8: 20, 21) Alam ni Jehova na ang ilan sa magiging anak nina Adan at Eva ay magma-mahal sa kaniya at hihingi ng tulong sa kaniya para labanan ang kasalanan. At bilang Ama nila at Maylalang, gagawa siya ng paraan para mapalaya sila sa kasalanan at mapalapit sa kaniya. w24.08 3 ¶3-4

Martes, Pebrero 10

*[Tiyakin] ninyo kung ano ang mas
mahahalagang bagay.—Fil. 1:10, tlb.*

Napakaabala ng karamihan sa mga lingkod ni Jehova. Nagtatrabaho tayo para mapaglaanan ang sarili natin at ang pamilya natin. (1 Tim. 5:8) May mga kapatid din na nag-aalaga sa may-sakit o may edad nilang kamag-anak. At lahat tayo, kailangan ng panahon para alagaan ang sarili natin. May mahahalagang gawain din tayo sa kongregasyon. Isa na diyan ang pangangaral, at gusto nating ibigay

ang buong makakaya natin dito. Ang pagbabasa ng Bibliya ay kasama sa “mas mahahalagang bagay” na dapat gawin ng mga Kristiyano. Kaya dapat nating siguraduhin na magagawa natin ito. Ganito ang sinabi ng pinakaunang awit tungkol sa isang maligayang tao: “Nalulugod siya sa kautusan ni Jehova, at ang kautusan Niya ay binabasa niya nang pabulong araw at gabi.” (Awit 1:1, 2) Maliwanag na ipinapakita niyan na dapat maglaan ng panahon para sa pagbabasa ng Bibliya. Kailan pinakamagandang gawin iyan? Baka magkakaiba ang sagot natin diyan. Kung magagawa mong regular ang pagbabasa ng Bibliya sa iskedyul na mapipili mo, masasabing iyon ang pinakamagandang panahon para sa iyo. w24.09 3 ¶5-6

Miyerkules, Pebrero 11

*Ang bawat isa ang magdadala ng sarili
niyang pasan.—Gal. 6:5.*

Kailangan ba ng isang may-gulang na Kristiyano ang tulong ng iba? May mga pagkakataong kailangan din niya ng tulong. Kapag sumusulong pa lang ang isa sa pagiging maygulang, baka inaasahan niya na may magsasabi sa kaniya ng gagawin niya. Pero kapag isang may-gulang na Kristiyano ang kailangang magdesisyon, humihingi rin siya ng tulong sa iba na mas marunong at mas makaranasan. Pero alam niya na siya ang magiging responsable sa desisyon niya at siya mismo ang “magdadala ng sarili niyang pasan.” Kung paanong magkakaiba ng hitsura ang mga adulto, magkakaiba rin ng katangian ang mga may-gulang na Kristiyano. Halimbawa, may ilan na matalino, malakas ang loob, mapagpatuloy, at mapagmalasakit. Puwede rin na magkaiba ang opinyon ng dalawang may-gulang na Kristiyano sa iisang sitwasyon. Pero pareho naman itong makakasulatan. Mada-las na nangyayari ito kapag kailangan nilang magpasiya base sa konsensiya. Kaya iginagalang pa rin nila ang isa’t isa kahit

magkaiba sila ng desisyon. Mas mahalaga sa kanila ang pagkakaisa.—Roma 14:10; 1 Cor. 1:10. w24.04 4 ¶7-8

Huwebes, Pebrero 12

Noong maraming gumugulo sa isip ko, pinayapa mo ang kalooban ko at pinaginhawa mo ako.—Awit 94:19.

Ano ang puwede mong gawin kung naramdaman mo na wala kang halaga? Magbasa ng mga teksto na nagpapakita na talagang mahalaga ka kay Jehova at bulay-bulayin ang mga ito. Huwag ikumpara ang sarili mo sa iba, at huwag magpokus sa hindi mo kayang gawin. Hindi ipapagawa ni Jehova ang alam niyang hindi mo kaya. (Awit 103:13, 14) Kung nakaranas ka ng pagmamaltrato o seksuwal na pang-aabuso, huwag sisihin ang sarili mo. Hindi mo kasalanan iyon. Tandaan, ang mga gumawa ng masama ang mananagot kay Jehova, hindi ang mga biktima. (1 Ped. 3:12) Huwag isipin na hindi ka magagamit ni Jehova para tulungan ang iba. Itinuturing ka niyang kamanggagawa niya sa gawaing pangangaral. (1 Cor. 3:9) Dahil sa mga naranasan mo sa buhay, baka mas madali sa iyo na maintindihan ang naramdaman ng iba at makapagpakita ng malasakit sa kanila. Malaki ang magagawa mo para sa kanila. w24.10 7-8 ¶6-7

Biyernes, Pebrero 13

Hindi ba sisiguraduhin . . . ng Diyos na mabigyan ng katarungan ang mga pinili niya na dumaraing sa kaniya araw at gabi, habang patuloy siyang nagiging matiisin sa kanila? Sinasabi ko sa inyo, kikilos siya agad para mabigyan sila ng katarungan.—Luc. 18:7, 8.

Nakikita ni Jehova kapag pinapakitunguhan tayo nang di-patas ng iba, at ayaw niyang nararanasan natin iyon. Maba-basa sa Awit 37:28 na “iniibig ni Jehova ang katarungan.” Tinitiyak sa atin ni Jesus na kapag panahon na, ‘kikilos agad’

si Jehova para mabigyan tayo ng katarungan. Malapit na niyang alisin ang lahat ng pagdurusa natin, at hinding-hindi na niya hahayaang makaranas ulit tayo ng kawalang-katarungan. (Awit 72:1, 2) Habang hinihintay natin na mawala na ang lahat ng kawalang-katarungan, tinutulongan tayo ni Jehova na maharap ito sa ngayon. (2 Ped. 3:13) Halimbawa, itinuturo niya kung ano ang magandang maging reaksiyon natin para hindi na lumala ang sitwasyon. Gamit ang perpektong halimbawa ni Jesus, ipinakita ni Jehova sa atin kung paano harapin ang kawalang-katarungan. Nagbigay rin siya ng magagandang payo sa Bibliya na tutulong sa atin. w24.11 2-3 ¶3-4

Sabado, Pebrero 14

Bigyan ninyo sila ng makakain.—Mat. 14:16.

Parang imposible ang iniutos na iyon ni Jesus, kasi mga lalaki pa lang nasa mga 5,000 na. Kapag isinama pa ang mga babae at mga bata, posibleng umabot sila ng mga 15,000. (Mat. 14:21) Sinabi ni Andres: “Isang batang lalaki ang may limang tinapay na sebada at dalawang maliliit na isda. Pero paano ito magkakasya sa ganito karaming tao?” (Juan 6:9) Karaniwang pagkain noon ang tinapay na sebada at posibleng inasinan at pinatuyo ang maliliit na isda. Pero kulang ito para mapakain ang lahat. Magandang halimbawa si Jesus sa pagiging mapagpatuloy. Gusto niyang magpakita ng kabaitan sa mga tao, kaya pinaupo niya sila sa damuhan nang grupo-grupo. (Mar. 6:39, 40; Juan 6:11-13) Nakita natin sa ulat na nanalangingin muna si Jesus sa Ama niya para sa tinapay at isda. Tama lang na magpasalamat muna sa Diyos para sa pagkain kasi sa kaniya galing iyon. Napakagandang tularan ng ginawa ni Jesus. Mahalagang manalangin muna bago kumain. Pagkatapos, sinabihan niya ang mga alagad na ipamahagi ang pagkain, kaya kumain ang lahat at nabusog. w24.12 2-3 ¶3-4

Linggo, Pebrero 15

Purihin ninyo . . . si Jehova na inyong Diyos.—1 Cro. 29:20.

Noong nasa lupa si Jesus, niluwalhati niya ang Ama niya nang sabihin niyang sa Kaniya nagmula ang kapangyarihang gumawa ng mga himala. (Mar. 5:18-20) Niluwalhati rin ni Jesus si Jehova dahil sa mga sinabi niya tungkol sa Ama niya at sa paraan ng pakikitungo niya sa iba. Minsan, nagtuturo si Jesus sa sinagoga. Nakikinig sa kaniya ang isang babaeng 18 taon nang may kapansanan at hindi makatayo nang tuwid dahil sinasapi-an ito ng demonyo. Napakahirap ng kagalayan ng babae. Naawa si Jesus, kaya nilapitan niya ito at mabait niyang sinabi: “Mawawala na ang kapansanan mo.” Hinawakan ni Jesus ang babae, “at agad itong nakatayo nang tuwid at niluwalhati ang Diyos.” (Luc. 13:10-13) Tama lang na luwalhatiin ng babae si Jehova, at ganiyan din dapat tayo. w25.01 3 ¶3-4

Lunes, Pebrero 16

Patawarin mo kami sa mga kasalanan namin.—Luc. 11:4.

Posible pa ba nating maibalik ang lahat ng naiwala nina Adan at Eva? Kung tayo lang, hindi na. (Awit 49:7-9) Kung walang tutulong sa atin, wala na tayong pag-asang mabuhay nang walang hanggan at mamamatay na lang tayong gaya ng mga hayop na hindi na bubuhaying muli. (Ecles. 3:19; 2 Ped. 2:12) Ang magpamahal nating Ama, si Jehova, ang nagbigay ng pambayad sa kasalananang minana natin kay Adan. Ipinaliwanag ni Jesus ang ginawa ng Ama niya: “Gayon na lang ang pag-ibig ng Diyos sa sangkatauhan kaya ibinigay niya ang kaniyang kaisa-isang Anak para ang bawat isa na nananampalataya sa kaniya ay hindi mapuksa kundi magkaroon ng buhay na walang hanggan.” (Juan 3:16) Dahil

din sa regalong ito, puwede na ulit mag-ing kaibigan ni Jehova ang mga tao. Puwede tayong makinabang sa napakagandang regalong ito ni Jehova at mapatawad ang mga kasalanan, o “utang,” natin. w25.02 2-3 ¶3-6

Martes, Pebrero 17

Tumayo [si Saul] at nabautismuhan.—Gawa 9:18.

Ano ang nakatulong kay Saul na magpabautismo? Nang kausapin ni Jesus si Saul mula sa langit, nabulag si Saul. (Gawa 9:3-9) Tatlong araw siyang hindi kumain at uminom. Malamang na pinag-isipan din niya ang nangyari sa kaniya. Dahil dito, nakumbinsi si Saul na si Jesus ang Mesiyas at na tama ang pagsamba ng mga Kristiyano. Hindi hinayaan ni Saul na mapigilan siya ng pride o takot sa tao para magpabautismo. Naging Kristiyano siya kahit alam niyang pag-uusigin siya. (Gawa 9:15, 16; 20:22, 23) At pagkatapos mabautismuhan, patuloy siyang nagtiwala kay Jehova para makayanan ang mga pagsubok. (2 Cor. 4:7-10) Kapag nabautismuhan ka na bilang Saksi ni Jehova, puwede ka ring pag-usigin at makaranas ng mga pagsubok. Pero makakasiguro ka na tutulungan at susuportahan ka ng Diyos at ni Kristo.—Fil. 4:13. w25.03 4 ¶8-9

Miyerkules, Pebrero 18

Hindi ako tumatakbo nang walang patutungan.—1 Cor. 9:26.

Magandang goal ang pagbabasa ng Bibliya. Pero may kailangan pa tayong gawin kung gusto talaga nating makinabang dito. Pag-isipan ang ilustrasyong ito: Kailangan ng halaman ang ulan para mabuhay ito. Pero kung sobra-sobrang tubig-ulan ang makukuha ng lupa sa loob ng maikling panahon, hindi magkakaroon ng panahon ang lupa na mabsorb ang tubig. Kaya hindi rin makinabang ang halaman. Ganiyan din sa pagbabasa ng Bibliya. Kung bibilisan natin ito para lang makarami, hindi natin maa-absorb, o maiintindihan, ang bina-basa natin. Wala rin tayong matatandaan na magagamit natin sa buhay natin. (Sant. 1:24) Nangyayari ba sa iyo na mabilisan lang ang pagbabasa mo ng Bibliya? Ano ang puwede mong gawin? Basahin ito sa bilis na makapagbulay-bulay ka habang nagbabasa o pagkatapos mong magbasa. Para magawa iyan, baka puwede mong mas habaan ang pag-aaral mo. w24.09 4 ¶7-9

Huwebes, Pebrero 19

Maging masunurin kayo sa mga nangunguna sa inyo.—Heb. 13:17.

Kapag nakatanggap ng tagubilin ang mga elder, kailangan nila itong basahing mabuti at sikaping masunod ito. Bukod sa mga tagubiling natatanggap nila kung paano gagampanan ang mga bahagi sa pulong at kung paano mananalangin para sa kongregasyon, nakakatanggap din sila ng tagubilin kung paano aalagaan ang mga tupa ni Kristo. Kapag sinusunod ng mga elder ang lahat ng tagubilin mula sa organisasyon, nararamdaman ng mga kapatid na mahal at inaalagaan sila ni Jehova. Dapat na handa tayong sumunod sa mga tagubilin

ng mga elder. Kung ganiyan tayo, magiging mas madali sa kanila na gawin ang atas nila. Pinapasigla tayo ng Bibliya na maging masunurin at mapagpasakop sa mga nangunguna. (Heb. 13:7, 17) Hindi iyan laging madali, kasi hindi sila perpekto. Kung magpopokus tayo sa pangit na mga ugali nila imbes na sa magandang katangian nila, para na rin nating tinutulungan ang mga kaaway natin. Bakit? Gusto kasi ng mga kaaway natin na mawalan tayo ng tiwala sa organisasyon. At puwedeng mangyari iyan kung negatibo ang tingin natin sa mga nangunguna. w24.04 10 ¶11-12

Biyernes, Pebrero 20

Pagbubukod-bukurin niya ang mga tao.—Mat. 25:32.

Wala na bang pag-asang mabuhay-muli ang lahat ng mamamatay sa panahon ng malaking kapighatian? Ang mga pupuk-sain lang ni Jehova at ng mga hukbo niya sa Armagedon ang malinaw na sinasabi ng Bibliya na hindi na bubuhaying muli. Sila ang mga taong kumakalaban sa Diyos. (2 Tes. 1:6-10) Pero paano naman ang iba? Halimbawa, sa panahon ng malaking kapighatian, posibleng may mamatay dahil sa sakit o katandaan. Baka may mamatay rin dahil sa aksidente o dahil sa kagagawan ng iba. (Ecles. 9:11; Zac. 14:13) Posible kaya na kasama sa mga “di-matuwid” na bubuhaying muli ang ilan sa kanila? (Gawa 24:15) Hindi natin alam. Pero alam na natin ang ilang detalye ng mga mangyayari sa hinaharap. Halimbawa, alam nating hahatulan ang mga tao sa Armagedon base sa naging pakikitungo nila sa mga kapatid ni Kristo. (Mat. 25:40) At ituturing na tupa ang mga sumuporta sa mga pinahiran at kay Kristo.—Apoc. 12:17. w24.05 10-11 ¶9-11

Sabado, Pebrero 21

Buháy si Jehova! Purihin ang aking Bato! Dakilain nawa ang Diyos na tagapagligtas ko.—Awit 18:46.

Sinasabi ng Bibliya na “mapanganib at mahirap ang kalagayan” sa ngayon. (2 Tim. 3:1) Pero mas mahirap ang kalagayan natin bilang bayan ni Jehova. Bukod sa mga problema natin sa araw-araw, pinag-uusig din tayo. Kaya bakit patuloy pa rin nating nasasamba si Jehova kahit marami tayong problema? Pangunahin na, dahil pinatunayan sa atin ni Jehova na siya ang “Diyos na buháy.” (Jer. 10:10; 2 Tim. 1:12) Talagang Diyos na buháy si Jehova, dahil nakikita niya ang mga problemang kinakaharap natin at naghahanap siya ng pagkakataong tulungan tayo. (2 Cro. 16:9; Awit 23:4) Kapag tinatandaan natin iyan, makakayanan natin ang anumang pagsubok. w24.06 20 ¶1-2

Linggo, Pebrero 22

Ang landas ng mga matuwid ay gaya ng maningning na liwanag sa umaga, na patuloy na lumiliwanag hanggang sa katanghaliang-tapat.—Kaw. 4:18.

Dapat tayong magtiwala sa organisasyon ni Jehova. Kapag naging malinaw na kailangan ang pagbabago sa unawa natin sa isang turo ng Bibliya o sa isang paraan ng pagsamba natin, agad na ginagawa ng mga nangunguna sa atin ang kinakailangang pagbabago. Ginagawa nila iyon kasi gusto nilang mapasaya lagi si Jehova. Bukod diyan, ginagawa rin nila ang buong makakaya nila na magdesisyon base sa Salita ng Diyos—ang pamantayang dapat sundin ng lahat ng lingkod ni Jehova. Nagpayo si apostol Pablo: “Manghawakan ka sa pamantayan ng kapaki-pakinabang na mga salita.” (2 Tim. 1:13) Ang “pamantayan ng kapaki-pakinabang na mga salita” ay tumutukoy sa mga turong Kristiyano na makikita sa

Bibliya. (Juan 17:17) Ang mga turong ito ang basehan ng lahat ng paniniwala natin. Tinuruan tayo ng organisasyon ni Jehova na kumapit nang mahigpit sa pamantayang iyan. At hangga’t ginagawa natin iyan, pagpapalain tayo. w24.07 11-12 ¶12-13

Lunes, Pebrero 23

Matiisin [si Jehova] sa inyo dahil hindi niya gustong mapuksa ang sinuman kundi gusto niya na ang lahat ay magsisi.—2 Ped. 3:9.

Alam na alam ni apostol Pedro ang pakiramdam ng nagsisi at napatawad, kaya maituturo niya iyon sa iba. Pagkatapos ng kapistahan ng Pentecostes, nagsalita si Pedro sa harap ng isang grupo ng mga di-sumasampalatayang Judío at sinabing may kasalanan sila sa pagkamatay ng Mesiyas. Pero mabait niyang sinabi sa kanila: “Magsisi kayo at manumbalik para mapatawad [o, “mapawi,” tlb.] ang inyong mga kasalanan, para dumating ang mga panahon ng pagpapaginhawa mula mismo kay Jehova.” (Gawa 3: 14, 15, 17, 19) Ipinakita ni Pedro na kung talagang nagsisisi ang isang makasalanan, manunumbalik siya—babaguhin niya ang kaisipan at mga ginagawa niya—at gagawin na ang mga bagay na nagpapasaya sa Diyos. Ipinakita rin ng apostol na papawiin ni Jehova ang mga kasalanan nila at lubusang papatawarin, na para bang binubura ito. Nakakapagpatibay malaman na kapag nakagawa tayo ng kasalanan, puwede tayong mapatawad ni Jehova kahit pa nga malubha ito! w24.08 12 ¶14

Martes, Pebrero 24

Huwag nawang makita sa pamumuhay ninyo ang pag-ibig sa pera.—Heb. 13:5.

Kung matibay ang pananampalataya natin at totoong-totoo sa atin na mala-

pit nang wakasan ni Jehova ang masamang mundong ito, hindi natin uunahin ang materyal na mga bagay. Sa panahon ng malaking kapighatian, mawawalan ng halaga ang pera. Sinasabi ng Bibliya na “itatapon [ng mga tao] sa lansangan ang kanilang pilak,” dahil maiisip nila na “hindi sila maililigtas ng kanilang pilak o ginto sa araw ng galit ni Jehova.” (Ezek. 7:19) Imbes na ubusin ang panahon natin sa pag-iipon ng maraming pera, dapat tayong gumawa ng mga desisyon na tutulong sa atin na magkaroon ng simple at balanseng buhay. Ibig sabihin, napaglalaanan natin ang sarili at pamilya natin habang naglilingkod kay Jehova. Hindi rin tayo umuutang nang hindi kinakailangan o kumukuha ng maraming pag-aari na uubos ng panahon natin. Dapat din tayong mag-ingat para hindi tayo magkaroon ng sobrang pagpapahalaga sa mga pag-aaring mayroon tayo. (Mat. 6:19, 24) Habang papalapit nang papalapit ang wakas, posibleng masubok ang pananampalataya natin dahil sa materyal na mga bagay o iba pang mga dahilan. w24.09 11 ¶13-14

Miyerkules, Pebrero 25

Ang sinumang nag-iisip na nakatayo siya ay dapat mag-ingat para hindi siya mabuwal.—1 Cor. 10:12.

May mga kahinaan tayo na posible nating maalis. Pero baka may ilang kahinaan din na kailangan nating patuloy na labanan. Tingnan ang nangyari kay apostol Pedro. Dahil sa takot sa tao, tatlong beses niyang ikinaila si Jesus. (Mat. 26:69-75) Mukhang napagtagumpayan ni Pedro ang kahinaang iyon nang lakas-loob siyang nagpatotoo sa harap ng Sanedrin. (Gawa 5:27-29) Pero pagkalipas ng ilang taon, ‘dahil sa takot sa mga tagasuporta ng pagtutuli,’ iniwasan niya ang mga Kristiyanong Gentil. (Gal. 2:11, 12) Bumalik ang kahinaan ni Pedro. O baka

nga hindi talaga iyon naalis. Gaya ni Pedro, baka kailangan pa rin nating paglalaanan ang isang kahinaan na akala natin, napagtagumpayan na natin. Pero madaig natin ito kung susundin natin ang payo ni Jesus na “patuloy [na] magbantay.” (Mat. 26:41) Kahit pakiramdam mo, malakas ka, iwasan pa rin ang mga sitwasyon na puwede kang matukso. Patuloy na gawin ang mga bagay na ginagawa mo para labanan ang kahinaan mo. —2 Ped. 3:14. w24.07 18-19 ¶17-19

Huwebes, Pebrero 26

May ibinigay siyang mga tao bilang regalo.—Efe. 4:8.

Walang taong makakapantay sa pagiging mapagbigay ni Jesus. Noong nasa lupa siya, madalas niyang gamitin ang kapangyarihan niya para tulungan ang iba. (Luc. 9:12-17) Nang ibigay niya ang buhay niya para sa atin, naibigay niya ang pinakamahalagang regalo na puwede nating matanggap. (Juan 15:13) Kahit noong matapos siyang buhayang muli, patuloy pa rin siyang naging mapagbigay. Gaya ng ipinangako ni Jesus, hiniling niya kay Jehova na bigyan tayo ng banal na espiritu para maturuan at mapatibay tayo. (Juan 14:16, 17, tlb.; 16:13) At sa mga pulong natin sa kongregasyon, patuloy na ibinibigay ni Jesus ang mga kailangan natin para makagawa tayo ng mga alagad sa buong mundo. (Mat. 28:18-20) Isinulat ni apostol Pablo na noong umakyat si Jesus sa langit, “may ibinigay siyang mga tao bilang regalo.” (Efe. 4:7, 8) Ipinaliwanag ni Pablo na ibinigay ni Jesus ang mga lalaking ito para suportahan ang kongregasyon sa iba’t ibang paraan. (Efe. 1:22, 23; 4:11-13) Siyempre, hindi sila perpekto, kaya puwede pa rin silang magkamali. (Sant. 3:2) Pero ginagamit sila ng Panginoong Jesu-Kristo para tulungan tayo; regalo niya sila sa atin. w24.10 18 ¶1-2

Biyernes, Pebrero 27

Iingatan ka ng kaunawaan.

—Kaw. 2:11.

Sinabi ni David kay Solomon na magiging matagumpay lang siya hangga't sinusunod niya si Jehova. Nakakalungkot, sumamba sa ibang mga diyos si Solomon pagtanda niya. Dahil doon, naiwala niya ang pagsang-ayon ni Jehova at hindi na siya binigyan ng Diyos ng karunungan para mapamunuan nang mabait at makatarungan ang mga sakop niya. (1 Hari 11:9, 10; 12:4) Ano ang aral para sa atin? Kapag masunurin tayo kay Jehova, magtatagumpay tayo. (Awit 1: 1-3) Hindi naman tayo pinangakuan ni Jehova na magiging mayaman at kilala tayo gaya ni Solomon. Pero kung susundin natin ang Diyos, bibigyan niya tayo ng karunungan para makagawa tayo ng matatalinong desisyon. (Kaw. 2:6, 7; Sant. 1:5) Makakatulong sa atin ang mga payo ni Jehova kapag nagdedesisyon tayo pagdating sa trabaho, edukasyon, libangan, at pera. Maiingatan din nito ang kaugnayan natin sa kaniya at ang pag-asa nating mabuhay nang walang hanggan. (Kaw. 2:10, 11) At kapag sumusunod tayo sa Diyos, magkakaron tayo ng mabubuting kaibigan at masayang pamilya. w24.11 10-11 ¶11-12

Sabado, Pebrero 28

Tiyakin ninyo ang lahat ng bagay; manghawakan kayong mahigpit sa kung ano ang mabuti.

—1 Tes. 5:21.

Maraming pagkakataon ang mga magulang na makausap ang anak nila tungkol sa Bibliya o pananampalataya sa Diyos. Puwede mong gawin iyan kapag pumunta kayo sa museum. Puwede mong gamitin ang isang artifact o isang pangyayari sa kasaysayan para ipakitang totoo ang sinasabi ng Bibliya. Alam

kaya niyang makikita ang pangalan ng Diyos sa Moabite Stone, isang piraso ng bato na 3,000 taon na ang tanda? May replika ng Moabite Stone na naka-display sa exhibit na “The Bible and the Divine Name” sa Pandaigdig na Punong-Tanggapan ng mga Saksi ni Jehova sa Warwick, New York. Makikita sa batong iyan na nagrebelde laban sa Israel si Haring Mesa ng Moab. Kaayon iyan ng sinasabi ng Bibliya. (2 Hari 3:4, 5) Kapag nakita mismo ng anak mo ang mga ebidensiya na totoo ang Bibliya, titibay ang pananampalataya niya. w24.12 15 ¶4, 6

Linggo, Marso 1

Ang taong namatay ay napawalang-sala na.—Roma 6:7.

May mababasa tayo sa Bibliya tungkol sa mga taong matuwid na naging dimatuwid. Isa na diyan si Haring Solomon. Kilalang-kilala niya si Jehova, at marami siyang tinanggap na pagpapala noong una. Pero bandang huli, sumamba siya sa huwad na mga diyos. Dahil dito, nagalit sa kaniya si Jehova at nagdusa ang bansang Israel nang maraming taon. Totoo, sinasabi ng Bibliya na noong mamatay si Solomon, inilibing siyang kasama ng mga ama niya, gaya ng tapat na si Haring David. (1 Hari 11: 5-9, 43; 2 Hari 23:13) Dahil ba sa ganing paraan inilibing si Solomon, sigurado nang bubuhayin siyang muli? Walang sinasabi ang Bibliya. Regalo ng mapagmahal nating Diyos ang pagkabuhay-muli. Ibinibigay niya iyon sa mga gusto niyang bigyan ng pagkakataon na maglingkod sa kaniya nang walang hanggan. (Job 14:13, 14; Juan 6:44) Makakatanggap kaya si Solomon ng ganitong regalo? Si Jehova lang ang naka-kaalam. Pero alam natin na gagawin ni Jehova kung ano ang tama. w24.05 4 ¶9

Lunes, Marso 2

Ako ay magiging panauhin sa iyong tolda magpakailanman.

—Awit 61:4.

Nang ialay natin ang buhay natin kay Jehova, naging panauhin tayo sa makasagisag na tolda niya. Sagana tayo sa espirituwal na pagkain, at masaya tayong makasama ang iba pang panauhin ni Jehova. Hindi makikita sa iisang lokasyon ang makasagisag na tolda niya. Makikita ang toldang ito saanman mayroong tapat na mga lingkod niya. (Apoc. 21:3) Paano naman ang tapat na mga lingkod ni Jehova na namatay na? Masasabi ba natin na panauhin pa rin sila sa tolda ni Jehova? Oo. Kasi buhay pa rin sila sa alaala niya. Sinabi ni Jesus: “Sa ulat tungkol sa matinik na halaman, may binanggut si Moises tungkol sa pagbuhay-muli sa mga patay. Tinawag niya si Jehova na ‘Diyos ni Abraham at Diyos ni Isaac at Diyos ni Jacob.’ Siya ay Diyos, hindi ng mga patay, kundi ng mga buhay, dahil silang lahat ay buhay sa kaniya.”—Luc. 20:37, 38. w24.06 3-4 ¶6-7

Martes, Marso 3

Si Jehova ang aking lakas at aking kalasag.—Awit 28:7.

Pumunta si Zadok sa Hebron dala ang mga sandata niya at handang makipaglaban. (1 Cro. 12:38) Handa niyang samahan si David sa digmaan at ipagtanggol ang Israel sa mga kaaway nito. Posibleng walang karanasan si Zadok sa pakikipagdigma, pero napakatapang niya. Ano kaya ang nakatulong sa saserdoteng si Zadok na maging matapang? Marami siyang kasabayan na mga lalaking malakas at matapang. Siguradong natuto siya sa kanila. Halimbawa, buong tapang na ‘pinangunahan ni David ang Israel sa mga labanan’ kaya gus-

to siyang gawing hari ng mga Israelita. (1 Cro. 11:1, 2) Laging umaasa si David kay Jehova sa tuwing nakikipaglaban siya sa mga kaaway. (Awit 138:3) Naging magandang halimbawa rin kay Zadok si Jehoiada at ang mandirigmang anak nito na si Benaia, pati na ang 22 pinuno ng tribo na sumuporta kay David.—1 Cro. 11:22-25; 12:26-28. w24.07 3 ¶5-6

Miyerkules, Marso 4

Sinisikap kang akayin ng Diyos sa pagsisisi dahil sa kabaitan niya.

—Roma 2:4.

Malupit na pinag-usig ni Saul ng Tarsos ang minamahal na mga tagasunod ni Kristo. Posibleng iniisip ng karamihan sa mga Kristiyano noon na wala nang pag-asang magbago si Saul. Pero ibang-iba ang tingin sa kaniya ng binuhay-muling si Jesus. Nakita niya at ng Ama niya ang magagandang katangian ni Saul. Sinabi ni Jesus: “Ang taong ito ay pinili ko.” (Gawa 9:15) Gumamit pa nga si Jesus ng himala para akayin si Saul sa pagsisisi. (Gawa 7:58-8:3; 9:1-9, 17-20) Nang maging Kristiyano na si Saul at makilala bilang si apostol Pablo, madalas niyang sabihin na talagang nagpapasalamat siya sa ipinakitang kabaitan at awa sa kaniya. (1 Tim. 1:12-15) Nang mabalitaan ni Pablo na nagkaroon ng problema tungkol sa imoralidad ang kongregasyon sa Corinto, paano niya ito inasikaso? Kapag pinag-aralan natin ang ulat na ito, marami tayong matututuhan tungkol sa pag-ibig at pagdisiplina ni Jehova. Matututuhan din natin kung paano tayo magiging maawa-in gaya ni Jehova. w24.08 13 ¶15-16

Huwebes, Marso 5

Iyan ang dahilan kung bakit dumating ang Anak ng Diyos, para sirain ang mga gawa ng Diyablo.—1 Juan 3:8.

Sa paglipas ng panahon, unti-unting nilinaw ni Jehova kung paano mapapalapit sa kaniya ang makasalanang mga tao. Pagkatapos ng nangyari sa Eden, si Abel, na ikalawang anak nina Adan at Eva, ang pinakaunang nanampalataya kay Jehova. Mahal ni Abel si Jehova at gusto niyang mapasaya Siya at mapalapit sa Kaniya. Kaya naghandog si Abel. Isa siyang pastol, kaya kumuha siya ng ilang batang tupa at pinatay iyon para ihandog kay Jehova. Ano ang naging reaksiyon ni Jehova? “Sinang-ayunan [niya] si Abel at ang handog nito.” (Gen. 4:4) Tinanggap din ni Jehova ang mga handog ng ibang tao na nagmamahal at nagtitiwala sa kaniya—gaya ni Noe. (Gen. 8:20, 21) Ipinakita ni Jehova na puwede siyang mapasaya ng makasalanang mga tao at posibleng silang mapalapit sa kaniya. w24.08 3 ¶5-6

Biernes, Marso 6

Muntik nang maligaw ang mga paa ko; muntik na akong madulas sa mga hakbang ko.—Awit 73:2.

Kapag nakaranas tayo ng kawalang-katarungan, baka sobra tayong masakitan at malungkot. (Ecles. 7:7) Naramdaman din iyan ng tapat na mga lingkod ni Jehova, gaya nina Job at Habakuk. (Job 6:2, 3; Hab. 1:1-3) Kaya normal lang na maramdaman iyan. Pero dapat nating bantayan ang magiging reaksiyon natin para hindi tayo makagawa ng mga bagay na magpapalala lang sa sitwasyon. Kapag parang hindi naparusahan ang mga gumagawa ng masama, baka magduda tayo kung sulit pa bang gawin ang tama. Nakita ng salmis-

ta na gumaganda ang buhay ng masasama habang nagdurusa naman ang mabubuti dahil sa mga ginagawa nila. Sinabi niya: “Ganiyan ang masasama, na laging maginhawa ang buhay.” (Awit 73:12) Nadidismaya rin siya sa nakikita niyang kawalang-katarungan at naisip pa ngang para saan pa ang paglilingkod niya kay Jehova. Sinabi niya: “Nang subukan kong unawain iyon, nabagabag ako.”—Awit 73:14, 16. w24.11 3 ¶5-7

Sabado, Marso 7

Ibigay ninyo kay Jehova ang nararapat sa kaniya, kayong mga pamilya ng mga bayan, ibigay ninyo kay Jehova ang nararapat sa kaniya dahil sa kaniyang lakas at kaluwalhatian.—Awit 96:7.

Niluluwalhati natin si Jehova kasi malaki ang respeto natin sa kaniya. Marami tayong dahilan para irespeto siya. Siya ang Makapangyarihan-sa-Lahat; kayang-kaya niyang gawin ang anumang gusto niya. (Awit 96:4-7) Kitang-kita ang karunungan niya sa mga nilalang niya. Siya rin ang nagbigay ng buhay natin at ng lahat ng kailangan natin para manatiling buhay. (Apoc. 4:11) Tapat siya. (Apoc. 15:4) Nagtatagumpay ang lahat ng ginagawa niya at lagi niyang tinutupad ang mga pangako niya. (Jos. 23:14) Sinabi nga ni propeta Jeremias tungkol kay Jehova: “Walang sinumang marunong sa lahat ng kaharian ang makapapantay sa iyo!” (Jer. 10:6, 7) Marami talaga tayong dahilan para respetuhin ang Ama natin sa langit. Pero hindi lang natin siya nirerespeto—mahal din natin siya. Niluluwalhati natin si Jehova dahil mahal na mahal natin siya. w25.01 3 ¶5-6

Linggo, Marso 8

Alisin ninyo ang masama sa gitna ninyo.—1 Cor. 5:13.

Gusto ng mga kaaway na palabasing masama ang ilan sa magagandang ginagawa ng organisasyon. Halimbawa, natutuhan natin sa Bibliya na gusto ni Jehova na manatiling malinis sa pisikal, moral, at espirituwal ang mga mananamba niya. Nagbigay siya ng tagubilin sa kongregasyon na itiwag ang sinumang patuloy na gumagawa ng karumihan at hindi nagsisisi. (1 Cor. 5:11, 12; 6:9, 10) Sinusunod natin ang utos na iyan. Pero dahil diyan, inaakusahan tayo ng mga kaaway natin na mas-yado tayong mahigpit, mapanghusga, at malupit. Dapat nating kilalanin kung sino talaga ang kaaway. Kay Satanas na Diyablo galing ang lahat ng kasinungalingan tungkol sa organisasyon. Siya ang “ama ng kasinungalingan.” (Juan 8:44; Gen. 3:1-5) Kaya hindi na tayo magtataka kung gagamit siya ng mga tao para magkalat ng maling impormasyon tungkol sa organisasyon ni Jehova. w24.04 10 ¶13-14

Lunes, Marso 9

Tiyak na magkakatatotoo iyon.
—Ezek. 33:33.

Kapag nagsimula na ang malaking kapighatian at nawasak na ang “Babilonyang Dakila,” baka maalala ng ilan na matagal na itong sinasabi ng mga Saksi ni Jehova. Posible kayang dahil dito, manampalataya na ang ilan kay Jehova? (Apoc. 17:5) Nangyari na iyan sa Ehipto noong panahon ni Moises. “Isang malaking grupo ng mga banyaga” ang sumama sa Israel noong umalis sila sa Ehipto. (Ex. 12:38) May ilan sa mga banyagang ito na nanampalataya lang noong makita nilang nagkatotoo ang mga sinabi ni Moises tungkol sa Sampung Salot.

Kung may mga sumama rin sa atin pagkatapos mawasak ng Babilonyang Dakila at magawa nilang manampalataya bago ang Armagedon, madidismaya ba tayo? Siyempre, hindi! Gusto nating tularan ang Ama natin sa langit, na “isang Diyos na maawain at mapagmalasakit, hindi madaling magalit at sagana sa tapat na pag-ibig at katotohanan.”—Ex. 34:6. w24.05 11 ¶12-13

Martes, Marso 10

Manghawakan ka sa pamantayan ng kapaki-pakinabang na mga salita.
—2 Tim. 1:13.

Ano ang puwedeng mangyari kung bi-bitaw tayo sa “pamantayan ng kapaki-pakinabang na mga salita”? Tingnan ang isang halimbawa. Noong unang siglo, may kumalat na balita sa mga Kristiyano na dumating na ang araw ni Jehova. Posibleng galing ito sa isang liham na iniisip nilang isinulat ni apostol Pablo. Naniwala ang ilang Kristiyano sa Tesalonica sa balitang ito at ikinalat pa nga. Hindi man lang nila tiniyak kung totoo ba ang balita. Hindi sana sila nadaya kung tinandaan nila ang itinuro ni Pablo sa kanila noong kasama pa nila siya. (2 Tes. 2:1-5) Pinayuhan ni Pablo ang mga kapatid na huwag paniwalaan ang lahat ng naririnig nila. At para hindi na ito mangyari ulit, ganito tinapos ni Pablo ang ikalawang liham niya sa mga taga-Tesalonica: “Narito ang aking pagbati, at ako mismong si Pablo ang sumulat nito. Ganito lagi ang paraan ko ng pagsulat, para matiyak ninyo na ako ang sumulat nito.”—2 Tes. 3:17. w24.07 12 ¶13-14

Miyerkules, Marso 11

Kailangan ninyo ng pagtitiis.

—Heb. 10:36.

Kailangan ng mga Hebreong Kristiyano ang kakayahang magtiis habang naglingkod kay Jehova dahil palala na nang palala ang kalagayan sa Judea. Totoo, may ilan sa kanila na nakaranas na ng matinding pag-uusig, pero marami ang hindi pa. Kaya ipinaalala sa kanila ni apostol Pablo na dapat silang maging handa sa mas matitindi pang pag-uusig at maging determinadong manatiling tapat hanggang kamatayan, gaya ni Jesus. (Heb. 12:4) Dahil patuloy na dumarami ang mga Kristiyano, mas tumitindi ang galit ng mga Judio, pati na ang pang-uusig nila. Mga ilang taon bago isulat ni Pablo ang liham sa mga Hebreo, mahigit 40 Judio ang “sumumpa na hindi sila kakain o iinom hangga’t hindi nila napatay si Pablo.” (Gawa 22:22; 23:12-14) Kahit ganiyan ang kalagayan noon, kailangan pa rin ng mga Kristiyano na mag-sama-sama para sumamba, ipangaral ang mabuting balita, at patibayin ang pananampalataya nila. w24.09 11 ¶15

Huwebes, Marso 12

Sinabi [ni Jesus] sa kaniyang ina:

“Tingnan mo! Ang iyong anak!”

—Juan 19:26.

Si Juan ay isang minamahal na apostol ni Jesu-Kristo. (Mat. 10:2) Kasama siya ni Jesus sa pangangaral. Nakita rin niya ang mga himala ni Jesus, at nanatili siyang tapat sa Panginoon niya kahit may mga pagsubok. Nandoon si Juan nang patayin si Jesus, at nakita rin niya ito pagkatapos itong buhaying muli. Bukod diyan, nakita ni Juan ang pagdami ng mga Kristiyano noong unang siglo—mula sa isang maliit na grupo ng tapat na mga lingkod hanggang sa mapangaral ang mabuting balita “sa lahat

ng nilalang sa buong lupa.” (Col. 1:23) Noong malapit nang mamatay ang may edad nang apostol na si Juan, nagkapribilehiyo siyang sumulat ng ilang bahagi ng Bibliya. Isinulat niya ang isang kapanapanabik na “pagsisiwalat ni Jesu-Kristo.” (Apoc. 1:1) Sumulat din siya ng isang Ebanghelyo at tatlong liham. Ang ikatlong liham niya ay para kay Gayo, isang tapat na Kristiyano na minahal ni Juan na gaya ng sarili niyang anak. (3 Juan 1) Malaking pampatibay sa lahat ng tagasunod ni Jesus, mula noon hanggang ngayon, ang isinulat ng tapat na apostol na ito. w24.11 12 ¶15-16

Biernes, Marso 13

Kayong mga asawang lalaki, . . . bigyan ninyo sila ng [karangalan].—1 Ped. 3:7.

Kapag mahal ng lalaki ang asawa niya, pinapahalagahan niya ito at inaalagaan. Itinuturing niya itong isang napakagandang regalo mula kay Jehova. (Kaw. 18:22; 31:10) Kaya pinapakitunghuan niya ito nang mabait at may paggalang, kahit pa nga sa pribadong mga bagay na pangmag-asawa. Hindi pipilitin ng lalaki ang asawa niya na gawin ang mga bagay na ayaw nito kapag nagse-sex. Baka kasi hindi komportable ang babae, pakiramdam niya naaabuso siya, o nababagabag ang konsensiya niya. Pagsisikapan din ng asawang lalaki na panatilihin ang malinis na konsensiya sa harap ni Jehova. (Gawa 24:16) Mga asawang lalaki, makakasigurado kayo na nakikita at pinapahalagahan ni Jehova ang mga pagsisikap ninyo na parangalan ang asawa ninyo sa lahat ng sinasabi at ginagawa ninyo. Maging determinadong iwasan ang mga bagay na makakasakit sa kanila. Maging mabait, magalang, at mapagmahal para maparangalan sila. Sa ganitong paraan, maiparamdam ninyong mahal ninyo sila at pinapahalagahan. Kapag pinaparanga-

lan ninyo ang asawa ninyo, mapoprotektahan ninyo ang pinakamahalagang bagay sa buhay ninyo—ang pakikipag-kaibigan ninyo kay Jehova.—Awit 25:14. w25.01 13 ¶17-18

Sabado, Marso 14

[Ibinigay niya ang] sarili niya para mapalaya tayo . . . at para dalisayin ang isang bayan na espesyal niyang pag-aari at buong pusong gumagawa ng mabuti.—Tito 2:14.

Kitang-kita ang kaibahan ng bayan ni Jehova sa mga nag-aangking Kristiyanong dahil sa sigasig nila sa ministeriyong. Paano natin mapapanatili o mapapagtindi ang sigasig natin sa pangangaral? May matututuhan tayo sa halimbawa ni Jesus sa pangangaral. Noong nasa lupa siya, hindi nabawasan ang sigasig niya. Ang totoo, mas naging masigasig pa nga siya sa paglipas ng panahon. Gaya ng tagapag-alaga ng ubasan sa ilustrasyon ni Jesus na tatlong taong nag-alaga ng isang puno ng igos na hindi namumunga, mga tatlong taong ding nangaral si Jesus sa mga Judio, na karamihan ay hindi nakinig sa kaniya. Hindi sinukuan ng tagapag-alaga ng ubasan ang puno ng igos. Hindi rin sinukuan ni Jesus ang mga tao. (Luc. 13:6-9) Magiging masigasig din tayo ngayon kung pag-aaralan natin ang mga sinabi at ginawa ni Jesus. w25.03 14-15 ¶1-4

Linggo, Marso 15

Ang marunong ay kumikilos nang may kaalaman.—Kaw. 13:16.

Paano kung sa tingin mo, nakakita ka na ng isang mahusay na mapapangasawa? Dapat bang sabihin mo na agad sa kaniya ang nararamdaman mo? Sinasabi ng Bibliya na kumukuha muna ng kaalaman o impormasyon ang isang taong marunong bago kumilos. Kaya maka-

kabuting obserbahan mo muna ang isa bago mo sabihin sa kaniya ang nararamdaman mo. Paano mo maoobserbahan ang isa nang hindi niya napapansin? Sa mga pulong o gathering, posibleng may mapansin ka sa espirituwalidad niya, katangian, at paggawi. Sino ang mga kaibigan niya, at ano ang bukambibig niya? (Luc. 6:45) Pareho ba kayo ng mga goal? Puwede kang magtanong sa mga elder nila sa kongregasyon o sa ibang may-gulang na Kristiyanong na kilalang-kilala siya. (Kaw. 20:18) Puwede mong itanong kung ano ang mga katangian niya o kung anong reputasyon mayroon siya. (Ruth 2:11) Habang inoobserbahan mo siya, tiyakin mong hindi ka makagawa ng bagay na mailang siya. Igalang mo ang nararamdaman niya at privacy niya. w24.05 22 ¶7-8

Lunes, Marso 16

Sa wakas ay ipinagtapat ko sa iyo ang kasalanan ko.—Awit 32:5.

Hindi agad iniisip ng mga elder na ayaw magsisi ng isang nagkasala. Totoo, may ilan na magsisisi agad sa unang pag-uusap pa lang kasama ng komite, pero may ilan na kailangan pa ng panahon. Kaya puwedeng magpasiya ang mga elder na kausapin nang higit sa isang beses ang nagkasala. Baka kasi pagkatapos ng unang pag-uusap nila, mapag-isipan niyang mabuti ang mga sinabi sa kaniya. Baka magpakumbaba na siya at humingi ng kapatawaran kay Jehova. (Awit 38:18) Kaya sa susunod na pag-uusap, posibleng mas bukás na ang isip niya kaysa noong una siyang kausapin. Para maakay ng mga elder sa pagsisisi ang nagkasala, dapat silang magpakita ng empatiya at kabaitan. Ipinapanalangin nila na pagpalain sana ni Jehova ang pagsisikap nila at na matauhan at magsisi ang nagkasala.—2 Tim. 2:25, 26. w24.08 22-23 ¶12-13

Martes, Marso 17

“Hindi ako natutuwa sa kamatayan ng sinuman,” ang sabi ng Kataas-taasang Panginoong Jehova. “Kaya manumbalik kayo at patuloy na mabuhay.”
—Ezek. 18:32.

Ayaw ni Jehova na mapuksa ang sinuman! Gusto niyang makipagkasundo sa kaniya ang mga nagkasala. (2 Cor. 5:20) Kaya naman sa buong kasaysayan ng tao, paulit-ulit na sinikap ni Jehova na tulungan ang masuwaying bayan niya—pati na ang mga nagkasalang indibidwal—na magsisi at manumbalik sa kaniya. Pribilehiyo ng mga elder na makipagtulungan kay Jehova at akayin ang mga nagkasala sa pagsisisi. (Roma 2:4; 1 Cor. 3:9) Isipin na lang kung gaano kasaya sa langit kapag nagsisi ang mga nagkasala! Napakasaya ng Ama natin sa langit sa tuwing bumabalik sa kongregasyon ang isang nawalang tupa. At lalong lumalalim ang pagmamahal natin kay Jehova habang pinag-iisipan natin ang awa at walang-kapantay na kabaitan niya.—Luc. 1:78. w24.08 31 ¶16-17

Miyerkules, Marso 18

Dahil alam ni Jesus na papalapit na sila para kunin siya at gawing hari, muli siyang umalis na nag-iisa papunta sa bundok.—Juan 6:15.

Kung hahayaan ni Jesus ang mga tao na gawin siyang hari, magiging kasangkot siya sa politika. Kasi parang kinakampanan na niya ang mga Judio na sakop noon ng mga Romano. Ano ang ginawa niya? “Umalis [siya] papunta sa bundok.” Kaya kahit pinipilit siya ng iba, hindi siya nakisangkot sa politika. Napakagandang aral niyan sa atin! Siguradong hindi naman inaasahan ng mga tao na makahimala tayong magpaparami ng pagkain o magpapagaling ng may-sakit, at hindi rin nila tayo gagawing

hari o presidente. Pero baka pilitin nila tayong makisangkot sa politika. Baka sabihin nilang iboto natin o suportahan ang isang tao na sa tingin nila ay magiging mahusay na lider. Pero malinaw ang halimbawang iniwan ni Jesus. Tumanggi siyang makisangkot sa politika. Sinabi pa nga niya: “Ang Kaharian ko ay hindi bahagi ng sanlibutang ito.” (Juan 17:14; 18:36) Kaya bilang mga Kristiyan, kailangan nating tularan ang pag-iisip at halimbawa ni Jesus. Tapat tayo sa Kaharian ng Diyos. Ipinapangaral natin ito at ipinapanalangin ang pagdating nito.—Mat. 6:10. w24.12 3-4 ¶5-6

Huwebes, Marso 19

Ang nagmamahal sa akin ay ang tumatanggap sa mga utos ko at sumusunod sa mga iyon. At ang nagmamahal sa akin ay mamahalin ng Ama ko, at mamahalin ko siya at lubusan kong ipapakilala sa kaniya ang sarili ko.
—Juan 14:21.

Habang nag-aaral ka, pag-iisipan kung paano mo isasabuhay ang mga natututuhan mo. Halimbawa, para matularan mo ang katarungan ni Jehova, maging patas sa lahat. Matutularan mo naman ang pag-ibig ni Jesus sa kaniyang Ama at sa iba kung handa mong gawin ang gusto ni Jehova at tulungan ang iba, kahit mahirap iyon kung minsan. Matutularan mo rin si Jesus kung mangangaral ka sa iba para malaman din nila ang napakagandang regalo ni Jehova. Habang mas naiintindihan at napapahalagahan natin ang pantubos, mas mamahalin natin si Jehova at ang Anak niya. Dahil diyan, mas mamahalin din nila tayo. (Sant. 4:8) Kaya patuloy nating gawin ang lahat para matuto pa tungkol sa pantubos. w25.01 25 ¶16-17

Biernes, Marso 20

Itinapon mo sa likuran mo ang lahat ng kasalanan ko.—Isa. 38:17.

Puwedeng isalin ang teksto sa araw na ito sa ganitong paraan: “Inalis mo sa pa-ningin mo ang lahat ng kasalanan ko.” Ipinapakita sa ilustrasyong iyan na itinatapon ni Jehova ang kasalanan ng mga nagsisisi at hindi na niya ito tinitingnan ulit. Puwede ring isalin iyan sa ganitong paraan: “Napangyari mo [ang aking mga kasalanan] na para bang hindi ko ginawa ang mga ito.” Para mas maidiin ang puntong iyan, gumamit ang Bibliya ng isa pang ilustrasyon. Makikita iyon sa Mikas 7:18, 19. Sinasabi dito na para bang inihahagis ni Jehova sa kalaliman ng dagat ang mga kasalanan natin. Noong panahon ng Bibliya, imposible nang makita ulit ang anumang bagay na nahulog sa kalaliman ng dagat. Sa mga ilustrasyong natalakay natin, natutuhan natin na kapag nagpatawad si Jehova, inilalayo niya nang husto ang mga kasalananang nagpapabigat sa atin para maginhawahan tayo. Gaya ng sinabi ni David, “maligaya ang mga pinagpaumanhinan sa kasamaan nila at pinatawad sa mga kasalanan nila.” (Roma 4:7) Iyan ang tunay na pagpapatawad! w25.02 9 ¶7-8

Sabado, Marso 21

Magsaya kayo at magalak magpakailanman sa aking nililikha.—Isa. 65:18.

May isang paraiso ngayon sa lupa na punong-puno ng mga taong abala sa paggawa ng mabuti. Nararanasan nila ang tunay na kapayapaan. Determinado ang mga nasa paraisong ito na huwag itong iwan. At gusto nilang maranasan din ng iba ang paraisong ito. Ano ito? Ang espirituwal na paraiso! Dahil kay Satanas, naging mapanganib at napuno ng galit at kasamaan ang mundong ito. Pero sa kabila nito, nakagawa si Jeho-

va ng isang makasagisag na lugar kung saan payapa at nagkakaisa ang mga tao. (1 Juan 5:19; Apoc. 12:12) Alam ng mapagmahal nating Diyos ang masamang epekto ng mundong ito sa atin. Kaya gumawa siya ng paraan para maging panatag tayo at patuloy na makapaglingkod nang masaya. Sa Bibliya, inilalarawan ang espirituwal na paraiso bilang isang ligtas na “kanlungan” at isang “hardin na laging nadidiligan.” (Isa. 4:6; 58:11) Dahil sa pagpapala ni Jehova, masaya at panatag ang mga nakatira sa paraisong ito kahit nabubuhay sila sa mahirap na mga huling araw na ito.—Isa. 54:14; 2 Tim. 3:1. w24.04 20 ¶1-2

Linggo, Marso 22

Ipaalám ninyo sa Diyos ang lahat ng pakiusap ninyo.—Fil. 4:6.

Kung naghahanap ka ng mapapangasawa, siguradong isinasama mo iyan sa panalangin mo. Hindi pinangakuan ni Jehova ang bawat isa sa atin ng mapapangasawa. Pero nagmamalasakit siya sa iyo, alam niya ang mga kailangan at nararamdaman mo, at kaya ka niyang tulungan na makahanap ng mapapangasawa. Kaya patuloy mong sabihin sa kaniya ang mga gusto at nararamdaman mo. (Awit 62:8) Ipanalangin mong maging matiisin ka at marunong. (Sant. 1:5) Kung hindi ka man makahanap agad ng mapapangasawa, ipinangako sa iyo ni Jehova na ilalaan niya ang pangangailangan mo sa piskal at emosyonal. (Awit 55:22) Tandaan: Huwag hayaang maging pokus ng buhay mo ang paghahanap ng asawa. (Fil. 1:10) Hindi kailangan na may asawa ka para maging masaya. Nakadepende ang tunay na kaligayahan sa mabuting kaugnayan mo kay Jehova. (Mat. 5:3) At habang single ka pa, mas magagawa mong palawakin ang ministeryo mo. (1 Cor. 7:32, 33) Gamiting mabuti ang panahong ito ng buhay mo. w24.05 21 ¶4; 22 ¶6

Lunes, Marso 23

[Isipin] ninyo ang kapakanan ng iba, hindi lang ang sa inyo.—Fil. 2:4.

Gaano kayo dapat katagal na magkasintahan? Kadalasan nang pangit ang resulta ng padalos-dalos na desisyon. (Kaw. 21:5) Kaya dapat na may sapat na haba ng panahon ang pagiging magkasintahan ninyo para talagang makilala ninyo ang isa't isa. Pero hindi rin ito dapat patagalin nang hindi kinakailangan. Sinasabi rin ng Bibliya: “Ang inaasahan na hindi nangyayari ay nagpapalungkot sa puso.” (Kaw. 13:12) Paano makakatu-long ang iba sa magkasintahan? Puwede natin silang imbitahang kumain, sumama sa family worship, o sa paglilibang natin. (Roma 12:13) Kailangan ba nila ng chaperone, ng masasakyan, o ng lugar kung saan puwede silang mag-usap? Kung oo, may magagawa ka ba para tulungan sila? (Gal. 6:10) Kung pinakisu-yuan kang mag-chaperone, isipin mong paraan iyon para matulungan ang mga kaibigan mo. Huwag hayaang magkaroon ng pagkakataon na maiiwan silang dalawa lang. Pero tingnan din kung kailangan nila ng panahon at distansiya para makapag-usap sila nang sila lang. w24.05 30 ¶13-14

Martes, Marso 24

Binigyan ko siya ng panahon para magsisi.—Apoc. 2:21.

Sinisikap alamin ng mga elder kung ano ang mga nagawa ng isang kapatid na umakay sa pagkakasala. Halimbawa, unti-unti bang humina ang espirituwalidad niya dahil napabayaan niya ang personal na pag-aaral o ministeryo niya? Madalang na lang ba siyang manalangin o naging rutin na lang ito? Hindi na ba niya nilalabanan ang maling mga pagnanasa? Masasamang kasama ba o libangan ang pinipili niya? Paano iyan

nakaimpluwensiya sa kaniya? Naiintindihan ba niya na naapektuhan ang Ama niyang si Jehova sa mga desisyong ginawa niya? Puwedeng gumamit ng mga tanyag ang mga elder para tulungan ang kapatid na mapag-isipan kung bakit siya humina sa espirituwal at nagkasala. Gagawin nila ito sa mabait na paraan, at hindi na nila tatanungin ang mga detalyeng hindi naman nila kailangang malaman. (Kaw. 20:5) Puwede ring gumamit ang mga elder ng ilustrasyon para maintindihan ng kapatid kung gaano kasama ang ginawa niya. Posibleng sa unang pag-uusap pa lang, makadama na ang kapatid ng matinding kalungkutan sa mga nagawa niya. Baka nga magsisi na siya. w24.08 22 ¶9-11

Miyerkules, Marso 25

Dapat ko ring ihayag sa ibang lunsod ang mabuting balita ng Kaharian ng Diyos dahil isinugo ako para dito.
—Luc. 4:43.

Masigasig na ipinangaral ni Jesus “ang mabuting balita ng Kaharian” kasi alam niyang ito ang gusto ng Diyos na gawin niya. Ito ang naging pinakamahalaga kay Jesus. Kahit sa mga huling buwan ng ministeryo niya, pumunta siya “sa mga lunsod at nayon at nagturo sa mga tao.” (Luc. 13:22) Tinuruan din niya ang iba pang alagad kung paano mangaral. (Luc. 10:1) Hindi nagbago ang tingin ni Jehova at ni Jesus sa pangangaral. Ito pa rin ang pinakamahalagang atas ng bayan ng Diyos ngayon. (Mat. 24:14; 28: 19, 20) Kapag tinularan natin ang tingin ni Jehova sa mga tao, magiging mas masigasig tayo sa pangangaral. Gusto niyang marinig ng lahat ang mabuting balita at kumilos. (1 Tim. 2:3, 4) Kaya sinasanay niya tayo na maging mas mahusay sa gawaing ito. Hindi man kumilos ang mga tao ngayon, puwede pa rin silang magbago sa hinaharap hangga’t

hindi pa natatapos ang malaking kapighatian. w25.03 15-16 ¶5-7

Huwebes, Marso 26

Ang babati sa kaniya ay magiging kasangkot sa masasamang ginagawa niya.—2 Juan 11.

Dapat gamitin ng bawat Kristiyano ang konsensiya niyang sinanay sa Bibliya para magpasiya kung babati siya o hindi. Pero hindi pa rin tayo makikipagkuwentuhan o makikipagsamahan sa kaniya. Baka maisip ng ilan, ‘Hindi ba sinasabi ng Bibliya na kapag binati natin ang mga di-nagsisising nagkasala, magiging kasangkot tayo sa masasamang ginagawa nila?’ (2 Juan 9-11) Ipinapakita ng konteksto ng tekstong ito na tumutukoy ito sa mga apostata at sa mga umiimpluwensiya sa iba na gumawa ng masama. (Apoc. 2:20) Kaya kapag apostata pa rin ang isang tao o iniimpluwensiyahan niya ang iba na gumawa ng masama, hindi siya dadalawin ng mga elder. Siyempre, umaasa pa rin tayo na puwede pa siyang magbago. Pero hangga’t hindi niya iyon ginagawa, hindi natin siya babatiin o iimbitahan na dumalo sa pulong. w24.08 30 ¶14-15

Biyernes, Marso 27

Hindi pa rin nila naiintindihan.—Mar. 6:52.

Pagkatapos pakainin ni Jesus ang mga tao, pinauna niyang umalis ang mga apostol. Pinasakay niya sila sa isang bangka papuntang Capernaum. At pumunta naman siya sa bundok para makasakan ang mga tao na gusto siyang gawing hari. (Juan 6:16-20) Habang naglalayag ang mga apostol, bumagyo sa lawa, kaya nagkaroon ng malakas na hangin at malalaking alon. Pagkatapos, naglakad si Jesus sa tubig papunta sa kanila. Tinawag niya si apostol Ped-

ro para maglakad din sa tubig. (Mat. 14:22-31) Pagsakay ni Jesus sa bangka, huminto ang bagyo. Manghang-mangha ang mga alagad kaya nasabi nila: “Tagalang ikaw ang Anak ng Diyos.” (Mat. 14:33) May ginawa nang himala si Jesus sa mga tinapay, pero bakit ngayon lang nila nasabi iyan? Isinulat ni Marcos: “Manghang-mangha [ang mga apostol], dahil hindi nila nakuha ang aral sa ginawa niyang himala sa mga tinapay.” (Mar. 6:50-52) Hindi nila naiintindihan kung gaano kalakas ang kapangyarihang ibinigay ni Jehova kay Jesus para gumawa ng mga himala. w24.12 5 ¶7

Sabado, Marso 28

[Gusto ng Diyos na] maligtas ang lahat ng uri ng tao at magkaroon sila ng tumpak na kaalaman sa katotohanan.—1 Tim. 2:4.

Maipapakita nating pinapahalagahan natin ang pag-ibig ni Jehova kung gagamitin natin ang panahon ng Memoryal para ipakitang nagpapasalamat tayo kay Jehova dahil sa pantubos. Siguradong inaayos na natin ang schedule natin para makadalo tayo sa Memoryal. Pero gusto rin nating imbitahan ang iba na dumalo. Ipaliwanag natin sa kanila kung ano ang mayroon sa Memoryal. Makakatulong din kung ipapapanod natin sa kanila ang mga video na *Bakit Namatay si Jesus? at Alalahanin ang Kamatayan ni Jesus* sa jw.org. Dapat ding siguraduhin ng mga elder na maiimbitahan nila ang mga inactive. Isipin na lang kung gaano kasaya ang mga nasa langit, pati na tayo, kapag may nanumbalik na nawawalang tupa ni Jehova! (Luc. 15:4-7) At sa mismong Memoryal, batiin natin ang mga kapatid, pero lalo na ang mga bisita at mga matagal nang hindi nakadalo. Gusto nating maramdaman nila na welcome sila!—Roma 12:13. w25.01 29 ¶15

Linggo, Marso 29

Isinugo ng Diyos ang Anak niya bilang pampalubag-loob na handog para sa mga kasalanan natin . . . dahil mahal niya tayo.—1 Juan 4:10.

Natutuhan natin na makatarungan si Jehova. Pero mas makikita natin sa pantubos ang pag-ibig niya—kung gano niya tayo kamahal. (Juan 3:16; 1 Juan 4:9, 10) Ibinigay ni Jehova ang Anak niya para sa atin dahil gusto niya tayong mabuhay magpakailanman at gusto rin niya na maging bahagi tayo ng pamilya niya. Nang magkasala kasi si Adan, hindi na siya bahagi ng pamilya ni Jehova. Kaya ganiyan na rin ang sitwasyon natin ngayon. Pero dahil sa pantubos, posible nang maging bahagi ng pamilya ni Jehova sa hinaharap ang mga nananampalataya at sumusunod sa Kaniya. At ngayon pa lang, pinapatawad na ni Jehova ang mga kasalanan natin. Puwede na rin tayong maging malapit sa kaniya at sa iba pang sumasamba sa kaniya. Mahal na mahal talaga tayo ni Jehova!—Roma 5:10, 11. w25.01 21 ¶16

Pagbabasa ng Bibliya sa Memoryal:
(Mga pangyayari bago lumubog ang araw: Nisan 9)
Juan 12:12-19; Marcos 11:1-11

Lunes, Marso 30

Sa ganito nahayag ang pag-ibig ng Diyos.—1 Juan 4:9.

Napakagandang regalo ng pantubos! (2 Cor. 9:15) Dahil namatay si Jesus para sa atin, puwede tayong maging kaibigan ng Diyos na Jehova. Puwede rin tayong magkaroon ng buhay na walang hanggan. Kaya tama lang na magpasalamat tayo kay Jehova dahil mahal na mahal niya tayo at ibinigay niya ang pantubos! (Roma 5:8) Para hindi natin makalimutan ang ginawa ni Jehova at ni Jesus, pinasimulan ni Jesus ang Memoryal ng kamatayan niya. (Luc. 22:19, 20) Ngayong

taon, aalalahanin natin ang Memoryal sa Huwebes, Abril 2, 2026. Siguradong gagawin natin ang lahat para makadalo. At mas makikinabang tayo kung pag-iisipan nating mabuti sa panahon ng Memoryal ang ginawa ni Jehova at ni Jesus para sa atin. w25.01 20 ¶1-2

Pagbabasa ng Bibliya sa Memoryal:
(Mga pangyayari bago lumubog ang araw: Nisan 10)
Juan 12:20-50

Martes, Marso 31

Piliin mo ang disiplina ko sa halip na pilak at ang kaalaman sa halip na pinakamagandang klase ng ginto.—Kaw. 8:10.

Matututo ka pa tungkol sa pag-ibig ng Diyos na Jehova at ni Kristo Jesus kung patuloy mo itong pag-iisipan. Ngayong panahon ng Memoryal, puwede mong basahin ang isa o higit pa sa mga Ebanghelyo. Huwag mong madaliin ang pagbabasa. Maghanap ng iba pang dahilan para mahalin si Jehova at si Jesus. Baka matagal ka nang nasa katotohanan at maisip mo kung posible ba talagang may bago kang matutuhan sa mga bagay na alam mo na, gaya ng katarungan ng Diyos, pag-ibig niya, at pantubos. Pero ang totoo, mayroon at mayroon ka pa ring matutuhan tungkol sa mga bagay na ito. Kaya basahin at pag-aralang mabuti ang mga salig-Bibliyang publikasyon natin. w25.01 24-25 ¶13-15

Pagbabasa ng Bibliya sa Memoryal:
(Mga pangyayari bago lumubog ang araw: Nisan 11)
Lucas 21:1-36

Miyerkules, Abril 1

Kalooban ng aking Ama na ang bawat isa na nakakakilala sa Anak at nananampalataya sa kaniya ay magkaroon ng buhay na walang hanggan.—Juan 6:40.

Kailangan nating manampalataya sa pantubos para magkaroon ng buhay na

walang hanggan. (Efe. 1:7) Hindi dapat makibahagi sa tinapay at alak sa Hapunan ng Panginoon ang mga tinawag ni Jesus na “ibang mga tupa.” (Juan 10:16) Pero puwede pa rin silang makinabang sa katawan at dugo ni Jesu-Kristo. Mangyayari iyan kung manampalataya sila sa haing pantubos ni Jesus at sa mga pagpapalang resulta nito. (Juan 6:53) Ang mga kumakain naman ng tinapay at umiinom ng alak ay bahagi ng bagong tipan, at may pag-asa silang mamahala sa Kaharian sa langit. Kaya kasama man tayo sa mga pinahiran o ibang mga tupa, kailangan nating manampalataya sa pantubos para magkaroon ng buhay na walang hanggan. w24.12 13 ¶14, 16

Pagbabasa ng Bibliya sa Memoryal:
(Mga pangyayari bago lumubog ang araw: Nisan 12)
Mateo 26:1-5, 14-16; Lucas 22:1-6

ARAW NG MEMORYAL

Pagkalubog ng Araw

Huwebes, Abril 2

Huwag kayong matakot, munting kawan, dahil ibinigay sa inyo ng inyong Ama ang Kaharian.
—Luc. 12:32.

Noong pasimulan ni Jesus ang Hapunan ng Panginoon, ibinigay niya ang tinapay na walang pampaalsa sa mga apostol at sinabing sumasagisag iyon sa katawan niya. Pagkatapos, ibinigay niya sa kanila ang isang kopa ng alak at sinabing sumasagisag iyon sa “dugo para sa tipan.” (Mar. 14:22-25; Luc. 22:20; 1 Cor. 11:24) Ang bagong tipang ito ay para lang sa mga makakasama ni Jesus na mamahala sa Kaharian ng Diyos. (Heb. 8:6, 10; 9:15) Noong Hapunan ng Panginoon, ang “munting kawan” lang ang kausap ni Jesus. Ang tapat na mga apostol na kasama niya sa silid na iyon ang mga unang naging bahagi ng mali-

it na grupong ito. Sila ang hinilingan ni Jesus na kumain ng tinapay at uminom ng alak nang gabing iyon. Sila ang mga makakasama ni Jesus sa langit. w24.12 11 ¶9-10

Pagbabasa ng Bibliya sa Memoryal:
(Mga pangyayari bago lumubog ang araw: Nisan 13)

Mateo 26:17-19; Marcos 14:12-16;
Lucas 22:7-13

(Mga pangyayari pagkalubog ng araw: Nisan 14)
Juan 13:1-5; 14:1-3

Biyernes, Abril 3

Gayon na lang ang pag-ibig ng Diyos sa sangkatauhan kaya ibinigay niya ang kaniyang kaisa-isang Anak para ang bawat isa na nananampalataya sa kaniya ay hindi mapuksa kundi magkaroon ng buhay na walang hanggan.—Juan 3:16.

Tinraidor si Jesus, inaresto, ininsulto, inakusahan, hinatulan, at pinahirapan pa nga. Bandang huli, ipinako ng mga sundalo si Jesus sa tulos at namatay siya. Habang tinitiiis niya ang lahat ng iyon, may Isa na mas nasasaktan pa sa kaniya—ang Diyos na Jehova. Napakamakapangyarihan ni Jehova at kaya sana niyang pigilan na mangyari ito. Pero bakit hindi niya iyon ginawa? Dahil sa pag-ibig. Ang sakripisyo ni Jesus ang pinakamatibay na ebidensiya na mahal na mahal ka ni Jehova. Ginawa niya ang lahat at tiniis ang pinakamasakit na bagay na puwede niyang maranasan para iligtas ka sa kasalanan at kamatayan. (1 Juan 4:9, 10) Malinaw na gusto niyang tulungan ang bawat isa sa atin na malabanan ang kasalanan—at matalo ito! w24.08 6 ¶13-14

Pagbabasa ng Bibliya sa Memoryal:
(Mga pangyayari bago lumubog ang araw: Nisan 14)
Juan 19:1-42

Sabado, Abril 4

Si Kristo ay nagdusa para sa inyo.

—1 Ped. 2:21.

Mas maiintindihan natin kung gaano tayo kamahal ni Jehova kung pag-iisipan natin ang sakit na naramdaman niya para ilaan ang pantubos. Sinabi ni Satanas na walang mananatiling tapat sa Diyos sa ilalim ng pagsubok. Para patunayang mali si Satanas, hinayaan ni Jehova na magdusa si Jesus bago siya mamatay. (Job 2:1-5) Kitang-kita ni Jehova kung paano ipinahiya si Jesus ng mga kaaway niya, binugbog ng mga sundalo, at ipinako sa tulos. Nakita rin ni Jehova habang unti-unting nagdurusa si Jesus bago siya mamatay. (Mat. 27:28-31, 39) Kayang-kayang pigilan ni Jehova ang lahat ng iyon. (Mat. 27:42, 43) Pero kapag ginawa niya iyon, hindi mailalaan ang pantubos at hindi tayo magkakaroon ng pag-asa. Kaya hinayaan ni Jehova na magdusa ang Anak niya hanggang kamatayan. w25.01 22 ¶7

Pagbabasa ng Bibliya sa Memoryal:
(Mga pangyayari bago lumubog ang araw: Nisan 15)

Mateo 27:62-66

(Mga pangyayari pagkalubog ng araw: Nisan 16)

Juan 20:1

Linggo, Abril 5

Nakita nila siya sa loob ng 40 araw.

—Gawa 1:3.

Nisan 16, 33 C.E. noon. Lungkot na lungkot at natatakot ang mga alagad ni Jesus. Dalawa sa kanila ang umalis ng Jerusalem para pumunta sa Emaus. Isang lalaki ang lumapit at naglakad kasama ng dalawang alagad. Ikinuwento nila sa lalaki ang naramdaman nila sa nangyari kay Jesus. Pero may mga sinabi ang lalaki na hinding-hindi nila makakalimutan. “Pasimula kay Moises at sa lahat ng Propeta,” ipinaliwanag niya kung bakit kailangang mag-

dusa at mamatay ang Mesiyas. Nang makarating na silang tatlo sa Emaus, nakilala na ng dalawang alagad kung sino talaga siya—ang binuhay-muling si Jesus! (Luc. 24:13-35) Noong huling 40 araw ni Jesus sa lupa, maraming beses siyang nagpakita sa mga alagad niya. Pinatibay ni Jesus ang mga alagad niyang lungkot na lungkot at natatakot. Dahil dito, sumaya sila at nagkaroon ng lakas ng loob na ipangaral at ituro ang mabuting balita tungkol sa Kaharian. w24.10 12 ¶1-3

Pagbabasa ng Bibliya sa Memoryal:
(Mga pangyayari bago lumubog ang araw: Nisan 16)

Juan 20:2-18

Lunes, Abril 6

Patibayin ninyo ang inyong kabanal-banalang pananampalataya.—Jud. 20.

Natural na lumalaki ang isang bata at nagiging adulto sa paglipas ng panahon. Pero hindi awtomatikong nagiging may-gulang na Kristiyano ang isa. Halimbawa, tinanggap ng mga kapatid sa Corinto ang mabuting balita, nabautismuhan sila, tumanggap ng banal na espiritu, at natuto sa mga itinuro ni apostol Pablo. (Gawa 18:8-11) Pero paglipas ng ilang taon pagkatapos nilang mabautismuhan, marami sa kanila ang hindi pa rin may-gulang na Kristiyano. (1 Cor. 3:2) Para maging may-gulang na Kristiyano, dapat na determinado tayong sumulong. Nananatiling sangol sa espirituwal at hindi sumusulong ang mga “gustong manatiling walang karanasan.” (Kaw. 1:22) Ayaw nating maging gaya ng mga adulto na nakadepende pa rin sa mga magulang nila kapag nagdedesisyon. Gusto nating tayo mismo ang magpalalim ng pag-ibig natin kay Jehova. Kung sinisikap mong maging may-gulang na Kristiyano, ipanalangin mo kay Jehova na bigyan ka ng “pagnanais at lakas para kumilos [ka] ayon sa kagustuhan niya.” —Fil. 2:13. w24.04 4 ¶9-10

Martes, Abril 7

Hindi [gusto ni Jehova na] mapuksa ang sinuman.—2 Ped. 3:9.

Makikita natin sa isinulat ni Ezekiel kung ano ang nararamdaman ni Jehova sa pagpuksa ng mga tao. (Ezek. 33:11) Hinding-hindi pupuksa si Jehova nang walang dahilan kasi napakamaawain niya at nagpapakita siya ng awa hangga't posib-le. Sino ang mga alam natin na hindi na bubuhaying muli? Tingnan natin ang ilang halimbawa sa Bibliya. Lumilitaw na hindi na bubuhaying muli si Hudas Iscariote base sa sinabi ni Jesus. (Mar. 14:21; tingnan din ang Juan 17:12 at ang study note.) Sinadya kasi ni Hudas na kalabanin si Jehova at ang Anak Niya. (Tingnan ang Marcos 3:29 at ang mga study note.) Isa pang halimbawa ang ilan sa mga lider ng relihiyon na kumontra kay Jesus noon. Sinabi niya na wala na silang pag-asang buhaying muli. (Mat. 23:33; tingnan ang Juan 19:11 at ang study note na “taong.”) Nagbabala rin si apostol Pablo na hindi na bubuhaying muli ang hindi nagsisising mga apostata. —Heb. 6:4-8; 10:29. w24.05 4 ¶10-11

Miyerkules, Abril 8

Iniiingatan ni Jehova ang mga tapat. —Awit 31:23.

Kung mananatili tayo sa tolda ni Jehova, walang magagawa si Satanas na permanenteng pinsala sa atin. (1 Juan 3:8) Sa bagong sanlibutan, patuloy na poprotektahan ni Jehova ang tapat na mga lingkod niya sa anumang puwedeng sumira sa kaugnayan nila sa kaniya. Pero hindi lang iyan, poprotektahan din niya sila mula sa kamatayan. (Apoc. 21:4) Tala-ga ngang malaking pribilehiyo na maging panauhin ni Jehova—puwede tayong maging malapit na kaibigan niya magpakailanman. (Ezek. 37:27) Ano ang dapat nating gawin para patuloy tayong maging panauhin niya? Kung may kaibigan ka na

mag-imbiba sa iyo, siyempre, iisipin mo kung ano ang mga gusto at ayaw niya. Ganiyan din pagdating kay Jehova. Gusto rin nating malaman kung ano ang mga inaasahan niya sa mga iniimbitahan niya. Dahil mahal natin siya, gusto nating gawin ang buong makakaya natin para ‘lubusan siyang mapalugdan.’ (Col. 1:10) Dapat natin siyang igalang. Huwag nating kakalimutan iyan. Tutulong iyan sa atin para maiwasan ang mga paggawi na ayaw niya. Gusto nating maipakita na ‘kinikilala natin ang limitasyon natin’ bilang mga panauhin sa tolda niya.—Mik. 6:8, tlb. w24.06 4 ¶8-9

Huwebes, Abril 9

Namagitan siya para sa mga makasalanang.—Isa. 53:12.

Hiniling ni Jehova kay Abraham na ihan-dog ang anak nitong si Isaac. Siguradong napakahirap nito para kay Abraham. Pero sumunod pa rin siya. Nang gagawin na niya ito, pinigilan siya ni Jehova. Itinuturo ng pangyayaring iyan sa lahat ng may pananampalataya ang isang napakahalagang katotohanan—handang si Jehova na isakripisyo ang pinakamamahal niyang Anak. Ganiyan niya kamahal ang mga tao. (Gen. 22:1-18) Pagkalipas ng daan-daang taon, ibinigay sa bansang Israel ang Ka-utusan. At marami itong hinihiling na handog para makapagbayad-sala ang banyan ng Diyos. (Lev. 4:27-29; 17:11) Itinuturo ng mga handog na iyon na maglalaan si Jehova ng isang mas magandang handog na permanenteng mag-aalis ng kasalanang ng mga tao. Ginamit ni Jehova ang mga propeta niya para humula tungkol sa ipinangakong supling, na bandang huli ay tumutukoy pala sa espesyal na Anak ng Diyos. Ipinaliwanag nila na kailangang magdusa at mamatay ng supling na ito para iligtas sa kasalanan at kamatayan ang mga tao—at kasama ka diyan!—Isa. 53:1-12. w24.08 4 ¶7-8

Biyernes, Abril 10

*Malal na mahal ko ang kautusan mo!
Binubulay-bulay ko ito buong araw.
—Awit 119:97.*

Habang nagbabasa ka ng Bibliya, isipin kung paano mo isasabuhay ang mga natutuhan mo. Tanungin ang sarili, ‘Paano ko magagamit ang impormasyong ito sa buhay ko ngayon o sa hinaharap?’ Halimbawa, isipin na kasama sa bina-sa mo ngayon ang 1 Tesalonica 5:17, 18. Pagkatapos mong mabasa ito, puwede kang huminto sandali at pag-isipan kung gaano ka kadalas manalangin at kung gaano ito kalalim. Puwede mo ring isipin ang mga ipinagpapasalamat mo kay Jehova. Baka may maisip ka na tatlong bagay. Ilang minuto lang ang ginamit mo para pag-isipan ang mga nabasa mo. Pero tutulong na iyan sa iyo na maging tagapakinig at tagatupad ng Salita ng Diyos. Isipin na lang kung gagawin mo ito araw-araw; siguradong magiging mas mahusay kang lingkod ni Jehova! w24.09 4-5 ¶9-10

Sabado, Abril 11

*Mag-ingat kayo, para hindi ninyo maiwala ang mga bagay na pinaghirapan namin, kundi makuha ninyo ang buong gantimpala.
—2 Juan 8.*

Ginawa tayo ni Jehova na maging mas masaya sa pagbibigay kaysa sa pagtanggap. Natutuwa tayo kapag nakakatulong tayo sa mga kapatid natin, at masaya tayo kapag nagpapasalamat sila. Pero gawin man nila iyon o hindi, masaya pa rin tayo kasi ginawa natin kung ano ang tama. Tandaan na anuman ang ibinigay mo, “higit pa roon ang kayang ibigay sa iyo ni Jehova.” (2 Cro. 25:9) Hindi natin mapapantayan ang lahat ng ibinigay sa atin ni Jehova. At kapag siya ang nagbigay ng gantimpala, sigu-

radong iyon ang pinakamakakapagpaysa sa atin! Maging determinado sana tayo na patuloy na tularan ang mapagbigay nating Ama sa langit. w24.09 31 ¶20-21

Linggo, Abril 12

*Pinupuri kita, O Jehova na aking Diyos, nang buong puso ko, at luluwalhatiin ko ang pangalan mo mapakailanman.
—Awit 86:12.*

Maawain si Jehova at mapagmalasakit. (Awit 103:13; Isa. 49:15) Nasasaktan din siya kapag nasasaktan tayo. (Zac. 2:8) Tinutulungan niya tayong mapalapit sa kaniya at maging kaibigan niya. (Awit 25:14; Gawa 17:27) Mapagpakumbaba rin siya kasi “yumuyuko siya para tumingin sa langit at sa lupa, at ibinabangon niya ang hamak mula sa alabok.” (Awit 113:6, 7) Napakarami talaga nating dahilan para purihin ang Diyos natin. Gusto nating makilala ng iba si Jehova. Marami ang hindi nakaalam ng katotohanan tungkol sa kaniya. Bakit? Naniniwala kasi sila sa mga kasinungalingan ni Satanas tungkol kay Jehova. (2 Cor. 4:4) Napaniwala niya sila na magagalitin ang Diyos at walang malasakit. Iniisip din ng ilan na Diyos ang dahilan ng mga pagdurusa natin. Pero alam nating hindi totoo ang mga iyan. At may pribilehiyo tayong sabihin sa iba ang totoo tungkol sa Diyos para mapapurihan siya.—Isa. 43:10. w25.01 3-4 ¶6-7

Lunes, Abril 13

[Si Satanas ang] nagliligaw sa buong mundo.—Apoc. 12:9.

Perpekto si Jesus at gumawa siya ng maraming himala. Pero nakapagkalat pa rin si Satanas ng kasinungalingan tungkol sa Kaniya. Gumamit siya ng mga

tao. Halimbawa, sinabi ng mga lider ng relihiyon na galing sa “pinuno ng mga demonyo” ang kapangyarihan ni Jesus na magpalayas ng mga demonyo. (Mar. 3:22) Noong nililitis si Jesus, inakusahan din siya ng pamumusong ng mga lider ng relihiyon at sinulsulan nila ang mga tao na hilinging patayin siya. (Mat. 27:20) Di-nagtagal, habang nangangaral ng mabuting balita ang mga tagasunod ni Kristo, siniraan sila ng mga kaaway at ‘sinulsulan ang mga tao’ na pag-usigin ang mga Kristiyanong iyon. (Gawa 14:2, 19) Ganito ang sinabi ng *Bantayan*, isyu ng Disyembre 1, 1998, tungkol sa Gawa 14:2: “Hindi pa nakontento sa pagtangi sa mensahe, inilunsad ng mga Judiong mananalansang ang isang kampanya ng paninira, anupat sinikap na sulsulan ang mga mamamayang Gentil laban sa mga Kristiyano.” Hanggang ngayon, ‘inililigaw pa rin ni Satanas ang buong mundo.’ w24.04 11 ¶15-16

Martes, Abril 14

Hindi ba gagawin ng Hukom ng buong lupa kung ano ang tama?
—Gen. 18:25.

Hindi nakadepende ang pag-asa ng isa na mabuhay nang walang hanggan sa panahon kung kailan siya namatay. Perpektong Hukom si Jehova, kaya laging tama at makatarungan ang mga desisyon niya. (Awit 33:4, 5) Makakapagtiwala tayo na gagawin ng “Hukom ng buong lupa” kung ano ang tama. Makatuwiran ding isipin na hindi nakadepende ang pag-asa ng isa sa lugar kung saan siya nakatira. Hinding-hindi ituturing ni Jehova na “kambing” ang milyon-milyong tao dahil lang sa nakatira sila sa lugar na hindi napaabutan ng mabuting balita. (Mat. 25:46) Kung naaawa tayo sa mga taong ito, siguradong mas naaawa sa kanila ang matuwid na Hu-

kom ng buong lupa. Hindi natin alam kung paano pagsusunod-sunurin ni Jehova ang lahat ng mangyayari sa malaking kapighatian. Kaya posibleng ang ilan sa mga taong ito ay magkaroon ng pagkakataong makilala si Jehova, manampalataya sa kaniya, at pumanig sa kaniya kapag ipinakilala na ni Jehova ang sarili niya sa lahat ng bansa.—Ezek. 38:16. w24.05 12 ¶14-15

Miyerkules, Abril 15

Ibigin ninyo ang isa’t isa.
—Juan 15:12.

Gustong-gusto ng mga lingkod ni Jehova na magtulungan. (2 Cor. 8:4) Pero kung minsan, kailangan ng tapang para magawa iyan. Halimbawa, kapag may digmaan, alam ng mga elder na kailangan ng mga kapatid ng pampatibay at baka ng tulong para makakuha ng espirituwal na pagkain o materyal na pangangailangan. Kaya kahit manganib ang buhay nila, ilalaan nila ang pangangailangan ng mga ito. Kailangan ang pagkakaisa sa mapanganib na mga sitwasyon, kaya napakahalagang maging masunurin tayo. Sundin ang mga tagubilin ng tanggapang pansangay. (Heb. 13:17) Dapat na regular na pag-aralan ng mga elder ang mga tagubilin kung paano maghahanda kapag may sakuna sa lugar nila, pati na ang mga tagubilin ng organisasyon sa panahon ng sakuna. (1 Cor. 14:33, 40) Maging matapang pero maging ingat. (Kaw. 22:3) Mag-isip nang mabuti bago kumilos. Isipin ang pinakaligtas na paraan kung paano ka makakatu-long. Umasa kay Jehova. Siguradong gagabayan ka niya na magawa ang tamang desisyon sa pagtulong sa mga kapatid. w24.07 4 ¶8; 5 ¶11

Huwebes, Abril 16

Sa kagipitan ay tumawag ako kay Jehova, . . . at narinig niya ang paghingi ko sa kaniya ng tulong.
—Awit 18:6.

Kilala ni Haring David si Jehova, at umaasa siya sa Kaniya. Nang mga panahong gusto siyang patayin ni Haring Saul at ng iba pang kaaway niya, humingi siya ng tulong kay Jehova. Sinagot ng Diyos ang panalangin ni David at iniligtas siya, kaya sinabi niya: “Buháy si Jehova!” (Awit 18:46) Ano ang ibig sabihin ni David? Ayon sa isang reperensiya, idinidiin niya dito na si Jehova ay isang Diyos na buháy na laging tumutulong sa mga lingkod niya. Napatunayan mismo ni David na buháy si Jehova, at nakatulong iyan sa kaniya na patuloy na paglingkuran at purihin ang Diyos. (Awit 18:28, 29, 49) Kung kumbinsido tayong buháy na Diyos si Jehova, ibibigay natin ang buong makakaya natin sa paglilingkod sa kaniya. Magkakaroon din tayo ng lakas na maharap ang anumang pagsubok at ng determinasyon na patuloy na maglingkod. Bukod diyan, gagawin natin ang lahat para manatiling malapít kay Jehova. w24.06 20-21 ¶3-4

Biyernes, Abril 17

Huwag kayong magpalinlang kaninuman sa anumang paraan.
—2 Tes. 2:3.

Ano ang matututuhan natin sa mga sinabi ni apostol Pablo sa mga taga-Tesalonica? Kapag may narinig tayo na salungat sa natutuhan natin sa Bibliya o kapag may nabalitaan tayong kuwento na sobrang exciting o nakakagulat, dapat na mag-isip muna tayo. Sa dating Soviet Union, nagpakalat ang mga kaaway natin ng isang liham na pinagmukhang galing sa punong-tanggapan. Sa li-

ham, pinayuhan ang ilang kapatid na bumuo ng hiwalay na grupo o organisasyon. Parang totoong-totoo ang liham. Pero hindi nadaya ang tapat na mga kapatid. Nakita nilang salungat ang mensahe nito sa mga katotohanang natutuhan nila. Sa ngayon, gumagamit ang mga kaaway natin ng iba’t ibang bagay, gaya ng Internet at social media, para lituhin tayo at sirain ang pagkakaisa natin. ‘Huwag nating hayaang agad-agad na malihis ang pangangatuwiran natin.’ (2 Tes. 2:2) Hindi tayo madadaya kung ikukumpara natin ang mga narinig o nabasa natin sa mga katotohanang alam na natin.—1 Juan 4:1. w24.07 12 ¶14-15

Sabado, Abril 18

Kung magkasala ang sinuman, may katulong tayo.—1 Juan 2:1.

Ang pinakamahalagang desisyon na magagawa ng isang tao ay ang ialay ang sarili niya kay Jehova at maging bahagi ng pamilya Niya. Gusto ni Jehova na gawin iyan ng lahat. Bakit? Gusto niya silang maging kaibigan at mabuhay nang walang hanggan. (Deut. 30:19, 20; Gal. 6:7, 8) Pero hindi pinipilit ni Jehova ang sinuman na maglingkod sa kaniya. Hinahayaan niya ang bawat tao na gumawa ng sariling desisyon. Paano kung nilabag ng isang bautisadong Kristiyanong utos ng Diyos at nagkasala siya nang malubha? Kung hindi siya magsisisi, aalisin siya sa kongregasyon. (1 Cor. 5:13) Pero kahit mangyari iyan, umaasa si Jehova na manunumbalik sa kaniya ang nagkasala. Ang totoo, isa iyan sa pinakamahahalagang dahilan kung bakit niya inilaan ang pantubos—para mapatawad ang mga nagsisising nagkasala. Napakamapagmahal ng Diyos, at tala-gang sinisikap niyang tulungan ang mga nagkasala na magsisi.—Zac. 1:3; Roma 2:4; Sant. 4:8. w24.08 14 ¶1-2

Lingo, Abril 19

Kung magiging marunong ka, magiging masaya ang puso ko.
—Kaw. 23:15.

Noong isulat ni apostol Juan ang ikatlong liham niya, may mga nagpapakalat na ng maling turo at sumisira sa pagkakaisa ng kongregasyon. Pero may mga ‘patuloy na lumakad sa katotohanan.’ Nanatili silang masunurin kay Jehova at patuloy na “lumakad ayon sa mga utos niya.” (2 Juan 4, 6) Hindi lang si Juan ang napasaya ng tapat na mga Kristiyanong ito, kundi pati si Jehova. (Kaw. 27:11) Ano ang aral para sa atin? Kung mananatili tayong tapat kay Jehova, magiging masaya tayo at mapapasaya din natin ang iba. (1 Juan 5:3) Masaya tayo kasi alam nating napapasaya natin si Jehova. Masaya ang Diyos kapag nilalabanan natin ang mga tukso sa mundong ito at sinusunod ang mga utos niya. Napapasaya rin niyan ang mga anghel sa langit. (Luc. 15:10) Nagiging masaya rin tayo kapag nakikita nating nananatiling tapat ang mga kapatid natin. (2 Tes. 1:4) At kapag dumating na ang bagong sanlibutan, masaya tayo kasi alam nating nanatili tayong tapat kay Jehova habang nabubuhay tayo sa mundong pinamumunuan ni Satanas. w24.11 12 ¶17-18

Lunes, Abril 20

Patuloy na unahin ng bawat isa ang kapakanan ng ibang tao, hindi ang sarili niya.—1 Cor. 10:24.

Gaano ka dapat katagal mag-observa bago mo sabihin sa taong nagugustuhan mo ang nararamdaman mo? Kung magsasabi ka agad sa kaniya, baka isipin niyang hindi mo ito pinag-isipang mabuti. (Kaw. 29:20) Pero kung nararamdaman na ng isa na interesado ka sa kaniya at masyado mong pinapatagal ang pag-

sasabi, baka isipin naman niya na hirap kang magdesisyon. (Ecles. 11:4) Tandaan, hindi kailangang kumbinsido ka na papakasalan mo siya bago ka magsabi ng nararamdaman mo. Pero dapat, kumbinsido kang handa ka nang mag-asawa at nakikita mo ring magiging mahusay siyang asawa. Paano kung nararamdaman mong may gusto sa iyo ang isang tao? Kung hindi mo siya gusto, dapat maging malinaw ito sa paraan ng pakikitungo mo sa kaniya. Kasi kawawa naman siya kung iniisip niyang may posibilidad na maging kayo, kahit ang totoo, wala naman.—Efe. 4:25. w24.05 23 ¶9-10

Martes, Abril 21

Babalik ako at isasama ko kayo sa aking bahay.—Juan 14:3.

Ang tapat na mga pinahiran lang angatanggapin ni Jesus sa Kaharian niya sa langit. Kung hindi mananatiling mapagbantay ang isang pinahiran, hindi siya makakasama kapag tinipon ang “mga pinili.” (Mat. 24:31) Pero siyempre, dapat na patuloy na magbantay at manatiling tapat ang lahat ng lingkod ni Jehova, anuman ang pag-asa nila. Kilala natin si Jehova, kaya nagtitiwala tayo sa mga ginagawa niya. Hindi tayo nag-aalala kung hanggang sa panahon natin, pumipili pa rin siya ng magiging pinahiran. Tandaan ang ilustrasyon ni Jesus tungkol sa mga nagtrabaho sa ubasan noong mga ika-11 oras. (Mat. 20:1-16) Pareho ang natanggap na suweldo ng mga nagtrabaho nang maaga at ng mga huling dumating. Kaya kahit sa panahon natin pinili ang isang pinahiran, tatanggap pa rin siya ng gantimpala sa langit kung mananatili siyang tapat. w24.09 24 ¶15-17

Miyerkules, Abril 22

Si Kristo ay nagdusa para sa inyo, at nag-iwan siya ng huwaran para sundan ninyong mabuti ang mga yapak niya.
—1 Ped. 2:21.

Nagpakita si Jesus ng perpektong halimbawa kung paano haharapin ang kawalang-katarungan. Nakaranas siya ng di-magandang pagtrato sa maraming tao, pati na sa pamilya niya. Sinabi ng mga kamag-anak niya na nababaliw na siya. Sinabi naman ng mga lider ng relihiyon na galing sa demonyo ang kapangyarihan niya. Ininsulto rin siya ng mga Romanong sundalo, pinahirapan, at pinatay. (Mar. 3:21, 22; 14:55; 15:16-20, 35-37) Pero tiniis ni Jesus ang lahat ng iyon at hindi siya gumanti. Ano ang matututuhan natin sa halimbawa niya? (1 Ped. 2:21-23) Tingnan ang perpektong halimbawa ni Jesus ng paghaharap sa kawalang-katarungan. Alam niya kung kailan mananahimik at kung kailan magsasalita. (Mat. 26:62-64) Hindi niya sinagot ang lahat ng kasinungalingang sinasabi tungkol sa kaniya. (Mat. 11:19) At noong magsalita siya, hindi niya ininsulto ang mga umuusig sa kaniya o pinagbantaan sila. w24.11 4-5 ¶9-10

Huwebes, Abril 23

Si Kristo Jesus ay dumating sa mundo para iligtas ang mga makasalanan.
—1 Tim. 1:15.

Isiping nagbigay ka ng isang napakagandang regalo sa taong mahalaga sa iyo at alam mong kailangan niya iyon. Paano kung nalaman mong itinago lang niya iyon at hindi na niya ginamit? Siguradong malulungkot ka. Pero kung nagpasalamat siya sa iyo at lagi niyang ginagamit iyon, siguradong magiging masaya ka. Ang punto? Ibinigay ni Jehova ang Anak niya para sa atin dahil mahal na mahal niya tayo. Kaya talagang magiging

masaya siya kapag ipinakita natin na nagpasalamat tayo sa regalo at pag-ibig niya. (Juan 3:16; Roma 5:7, 8) Sa paglipas ng panahon, baka mabawasan ang pagpapahalaga natin sa pantubos. Kung mangyari iyan, para bang itinago at kinalimutan natin ang regalo ng Diyos. Kaya para hindi mabawasan ang pagpapahalaga natin sa ginawa ng Diyos at ni Kristo, dapat lagi nating pag-isipang mabuti iyon. w25.01 26 ¶1-2

Biyernes, Abril 24

Pag-isipan mong mabuti ang mga bagay na ito; magbuhos ka ng pansin dito para makita ng lahat ang pagsulong mo.—1 Tim. 4:15.

Ang mga brother na maglilingkod bilang elder ay dapat na hindi bagong kumber-te. Hindi naman kailangan na maraming taon ka nang bautisado, pero kailangan mo ng panahon para mapatibay ang kagugnayan mo kay Jehova at masanay na gamitin ang Bibliya kapag gumagawa ng desisyon. Bago ka atasan bilang elder, dapat na naipakita mo nang mapagpakumbaba ka gaya ni Jesus. Ibig sabihin, kontento ka sa mga atas mo at handa kang hintayin si Jehova para sa iba pang mga atas. (Mat. 20:23; Fil. 2:5-8) Mapapatunayan mo namang tapat ka kung patuloy kang mamumuhay sa mga pamantayan ni Jehova at susunod sa mga tagubilin ibinigay ng organisasyon. Malinaw na sinasabi ng Bibliya na ang mga tagapangasiwa ay dapat na kuwalipikadong magturo. Ibig bang sabihin, dapat napakahusay mong mapaghayag? Hindi. May mga kuwalipikadong elder na hindi ganoon kahusay mapaghayag pero epektibo naman sa ministeryo at pagse-shepherding. w24.11 23-24 ¶14-15

Sabado, Abril 25

Mahal ko ang mga utos mo nang higit kaysa sa ginto, maging sa purong ginto.
—Awit 119:127.

Kapag may hindi ka naintindihan sa binabasa mo sa Bibliya, mag-research pa. At sa buong araw, pag-isipang mabuti ang mga bagay na natutuhan mo tungkol kay Jehova, sa Anak niya, at sa pag-ibig nila sa iyo. (Awit 119:97, tlb.) Huwag kang malungkot kung wala kang nakita o natutuhang bago sa pagbabasa at pagre-research mo. Isipin ang mga naghahanap ng ginto. Baka maraming oras o araw ang kailangan bago sila makakita ng ginto. Pero hindi sila humihinto kasi napakahalaga ng bawat piraso nito. Mas mahalaga pa diyan ang bawat katotohanan sa Bibliya! (Kaw. 8:10) Kaya ipagpatuloy mo lang ang schedule mo ng pagbabasa ng Bibliya.—Awit 1:2. w25.01 25 ¶14-15

Linggo, Abril 26

Kung paanong lubusan kayong pinatawad ni Jehova, dapat na ganoon din ang gawin ninyo.
—Col. 3:13.

Inaasahan ni Jehova na magiging mapagpatawad tayo kapag may nakasakit sa atin. (Awit 86:5; Luc. 17:4; Efe. 4:32) Baka may magawa o masabi ang iba na sobrang makasakit sa atin. At mas masakit pa ito kung malapit sa atin o kapamilya natin ang nakagawa nito. (Awit 55:12-14) Kung minsan, sa sobrang sakit, para tayong sinaksak. (Kaw. 12:18) Baka maisip natin na bale-walain na lang ang nararamdaman natin. Pero kung gagawin natin iyan, para tayong sinaksak at pagkatapos ay hinayaan na lang ang kutsilyo na nakabaon sa atin. Kaya hindi gagaling ang nasaktan nating damdamin kung babale-walain natin ito. Kapag may ginawang hindi magan-

da sa atin, baka magalit tayo. Sinasabi sa Bibliya na posible talagang maramdaman natin iyan. Pero sinasabi rin dito na hindi tayo dapat magpakontrol sa galit. (Awit 4:4; Efe. 4:26) Bakit? Kasi kadalasan nang hindi maganda ang resulta kapag nagpapadala tayo sa galit. (Sant. 1:20) Totoo, baka hindi mo mapigilang magalit, pero nasa sa iyo na kung mananatili kang galit. w25.02 15 ¶4-6

Lunes, Abril 27

Iniiingatan ng karunungan ang buhay ng nagtataglay nito.
—Ecles. 7:12.

Sa isang ilustrasyon, ipinakita ni Jesus kung bakit hindi katalinuhang magipon ng pera nang “hindi mayaman sa Diyos.” (Luc. 12:16-21) Hindi natin alam kung ano ang mangyari sa hinaharap. (Kaw. 23:4, 5; Sant. 4:13-15) Sinabi rin ni Jesus na bilang mga tagasunod niya, dapat handa nating ‘iwan ang lahat ng pag-aari natin.’ (Luc. 14:33) Nang mangyari iyan noon sa mga Kristiyano sa Judea, masaya pa rin sila. (Heb. 10:34) Sa panahon natin, maraming kapatid ang nawalan ng trabaho at mga pag-aari dahil wala silang sinuportahan na partido sa politika. (Apoc. 13:16, 17) Ano ang nakatulong sa kanila? Talagang nagtiwala sila sa pangako ni Jehova: “Hinding-hindi kita iiwan, at hindang-hindi kita pababayaan.” (Heb. 13:5) Pinagpaplenuhan natin ang hinaharap. Pero kung may mangyaring hindi natin inaasahan, nagtiwala tayong tutulungan tayo ni Jehova. w25.03 29 ¶13-14

Martes, Abril 28

Ngayong nalampasan na natin ang unang mga doktrina tungkol sa Kristo, sumulong tayo sa pagiging maygulang at huwag na tayong magpabalik-balik sa panimulang mga bagay.—Heb. 6:1.

Alam ni Jehova na kailangan natin ang tulong ng iba para sumulong tayo at maging maygulang. Binigyan niya tayo ng mga pastol at guro sa kongregasyon para tulungan tayo na “maging adulto, hanggang sa maging maygulang tayo gaya ng Kristo.” (Efe. 4:11-13) Inilalan din ni Jehova ang banal na espiritu niya para tulungan tayong magkaroon ng “pag-iisip ni Kristo.” (1 Cor. 2:14-16) Bukod diyan, ipinasulat ng Diyos ang apat na Ebanghelyo para tulungan tayong makita kung paano nag-isip, nagsalita, at kumilos si Jesus noong nandito siya sa lupa. Kung tutularan natin si Jesus, magiging may-gulang na Kristiyano tayo. Pero para sumulong tayo at maging may-gulang na Kristiyano, dapat na “nalampasan na natin ang unang mga doktrina,” o pangunahing mga turo, tungkol sa Kristo. w24.04 4-5 ¶11-12

Miyerkules, Abril 29

Babantayan ka ng iyong kakayahang mag-isip, at iingatan ka ng kaunawaan.—Kaw. 2:11.

Araw-araw, kailangan nating gumawa ng mga desisyon. May ilan na madali lang gawin, gaya ng pagdedesisyon kung ano ang almusal natin o kung anong oras tayo matutulog. Pero may ilang bagay na mahirap pagdesisyonan. Kasi baka may epekto iyon sa kalusugan natin, kaigayahan, mga kapamilya, o sa kaugnayan natin kay Jehova. Gusto nating makagawa ng mga desisyon na makakabuti sa atin at sa pamilya natin. Pero higit sa lahat, gusto nating magpasaya kay

Jehova ang mga desisyon natin. (Roma 12:1, 2) Mahalagang kunin ang mga impormasyong kailangan mo. Bakit iyan mahalaga? Pag-isipan ito: Isang pasyenteng may malalang sakit ang nagpakonsulta sa doktor niya. Gagawa ba agad ng desisyon ang doktor kung paano ito gagamutin nang hindi man lang ito sinusuri o tinatanong? Siyempre hindi. Gaya ng isang mahusay na doktor, aalamin muna natin ang mga impormasyong kailangan natin bago magdesisyon. w25.01 14 ¶1-3

Huwebes, Abril 30

Pinatatawad ni Jehova ang kasalanan mo. Hindi ka mamamatay.—2 Sam. 12:13.

Napakamaawain ni Jehova at “hindi niya gustong mapuksa ang sinuman.” (2 Ped. 3:9) Tingnan natin kung paano niya iyan ipinakita sa mga nakagawa ng malulubhang kasalanan gaya nina Haring David at Haring Manases. Nagkasala si David ng pangangalunya at pagpatay. Pero nagsisi siya, kaya pinatawad siya ni Jehova. (2 Sam. 12:1-12) Marami ring ginawang masama si Manases. Pero kahit sobrang lala ng mga ginawa niya, pinatawad siya ni Jehova kasi nagsisi siya. (2 Cro. 33:9-16) Itinuturo sa atin ng mga halimbawang ito na nagpapakita ng awa si Jehova kung may dahilang gawin iyon. Gaya nina David at Manases, bubuhaying muli ni Jehova ang mga taong nagkasala nang malubha pero nagsisi. w24.05 4 ¶12

Biyernes, Mayo 1

Hindi nagtatangi ang Diyos.—Roma 2:11.

Pagkatapos palayain ni Jehova ang bayan niya mula sa pagkaalipin sa Ehipto, nag-atas siya ng mga saserdote na maglilingkod sa tabernakulo. Inatasan niya

ang mga Levita na mag-asikaso ng mga gawain sa banal na toldang iyon. Kung ikukumpara sa mga Israelitang nasa malayo, mas nakakalamang ba ang mga naglilingkod sa tabernakulo pati na ang mga nakapuwesto malapit dito? Hindi! Alam nating patas si Jehova. Puwedeng maging malapit na kaibigan ni Jehova ang lahat ng Israelita. Halimbawa, sinigurado ni Jehova na makikita ng buong bayan ang haliging ulap at haliging apoy na nasa ibabaw ng tabernakulo. (Ex. 40:38) Kapag nagsimula nang gumalaw ang ulap para magbigay ng direksiyon, makikita ito kahit ng mga Israelitang nakapuwesto sa pinakadulo ng kampo. Kaya makakasabay sila sa pagkakalas ng tolda, pag-aayos ng gamit, at pag-alis ng buong bayan. (Bil. 9:15-23) Ganiyan din sa ngayon. Saanman tayo nakatira, mararamdaman nating mahal tayo ni Jehova, pinapangalagaan niya tayo, at pinoprotektahan. w24.06 4 ¶10-11; 6 ¶12

Sabado, Mayo 2

Halikayo, tumakas na tayo. Kung hindi, walang makaliligtas sa atin kay Absalom!—2 Sam. 15:14.

Gustong patayin ni Absalom ang tatay niyang si David para maging hari siya. (2 Sam. 15:12, 13) Kaya kinailangang umalis agad ni David sa Jerusalem. Habang tumatakas siya kasama ang mga lingkod niya, naisip ni David na kailangang may maiwan para malaman nila ang mga plano ni Absalom. Kaya pinabalik niya sa lunsod si Zadok at ang iba pang saserdote para makakuha ng impormasyon. (2 Sam. 15:27-29) Kailangan nilang maging maingat. Nagpatulong si David sa tapat niyang mga kaibigang sina Zadok at Husai para gawin ang isang plano. (2 Sam. 15:32-37) Nagkunwari si Husai na kakampi ni Absalom at binigyan ito ng estratehiya kung pano aatakin si David, na magbibigay

naman kay David ng pagkakataong makapaghanda. Nagtiwala si Absalom sa estratehiyang ito. Pagkatapos, sinabi ni Husai kina Zadok at Abiatar ang naging pag-uusap nila ni Absalom. (2 Sam. 17:8-16) Naiparating naman ng dalawang lalaking ito ang mensahe kay David kaya naprotektahan si David.—2 Sam. 17:21, 22. w24.07 4-5 ¶9-10

Linggo, Mayo 3

“Halikayo ngayon at ituwid natin ang mga bagay-bagay sa pagitan natin,” ang sabi ni Jehova.
—Isa. 1:18.

May ilan sa mga lingkod ni Jehova na nakokonsensiya pa rin sa mga nagawa nilang kasalanan bago o pagkatapos ng bautismo nila. Pero tandaan na mahal na mahal tayo ni Jehova at inilaan niya ang pantubos para mapatawad ang mga kasalanan natin. Siguradong gusto niyang tanggapin natin ang pagpatawad niya. Kapag nagawa na nating ‘ituwid ang mga bagay-bagay’ sa pagitan natin at ni Jehova, tinitiyak niyang hindi na niya aalalahanin ang mga kasalanan natin. Talagang napakamapagmahal na Ama ni Jehova! Kinakalimutan niya ang mga nagawa nating kasalanan, pero hindi niya makakalimutan ang mga nagawa nating mabuti. (Awit 103:9, 12; Heb. 6:10) Kung sobra ka pa ring nakokonsensiya sa mga nagawa mong kasalanan noon, gawin ang buong makakaya mo para makapagpokus ka sa mga ginagawa mo ngayon at sa mga puwede mong gawin sa hinaharap. Wala ka nang magagawa sa mga nangyari noon. Pero may magagawa ka ngayon para purihin at sambahin si Jehova. Puwede mo ring pag-isipan ang magagandang pangako niya sa hinaharap. w24.10 8 ¶8-9

Lunes, Mayo 4

Isuot ninyo ang bagong personalidad.
—Col. 3:10.

Kapag nagbabasa ka ng Bibliya, baka masiraan ka ng loob kung minsan, kasi nakita mo na ang dami mong kailangang pasulungin. Halimbawa, sa araw na ito, nabasa mo sa Bibliya na hindi dapat magpakita ng paboritismo. (Sant. 2:1-8) Naisip mo na may magagawa ka pa para mas mapakitunguhan nang tama ang iba. At ginawa mong goal iyon. Kinabukasan naman, nabasa mo na kailangan mong maging maingat sa mga sinasabi mo. (Sant. 3:1-12) Alam mo sa sarili mo na may nasasabi kang hindi maganda kung minsan. Kaya ginawa mong goal na maging nakakapagpatibay ang mga sinasabi mo. Sa sumunod na araw, nabasa mo ang babala tungkol sa pakikipagkaibigan sa sanlibutan. (Sant. 4:4-12) Naisip mo na kailangan mong maging mas maingat sa pinipili mong libangan. Pero pagdating ng ikaapat na araw, baka nasiraan ka na ng loob kasi nakita mo na ang dami mo palang kailangang baguhin. Huwag masiraan ng loob. Tandaan na patuluyang proseso ang pagsusuot ng “bagong personalidad.” w24.09 5-6 ¶11-12

Martes, Mayo 5

Pabanalin ninyo ang Kristo bilang Panginoon sa mga puso ninyo, na laging handang ipagtanggol ang inyong pag-asa sa harap ng lahat ng humihingi ng paliwanag tungkol dito, pero ginagawa iyon nang mahinahon at may matinding paggalang.
—1 Ped. 3:15.

Alam ni Jesus na nakikita ni Jehova ang kawalang-katarungang nararanasan niya. At nagtitiwala siyang aayusin ni Jehova ang mga ito sa tamang panahon. Matutularan natin si Jesus kung magi-

ging maingat tayo sa mga sinasabi natin kapag tinatrato tayo nang di-maganda. Kung minsan, baka puwede nating palampasin na lang ang ginawa sa atin kung hindi naman iyon ganoon kaser-yoso. O baka may pagkakataong huwag na lang tayong magsalita para hindi na lumala ang sitwasyon. (Ecles. 3:7; Sant. 1:19, 20) Pero kung minsan, baka kailangan nating ipagtanggol ang paniniwala natin o ang isa na nakakaranas ng dipatas na pagtrato. (Gawa 6:1, 2) Pero kapag nagsalita tayo, dapat nating sikapang maging kalmado at magalang. Matutularan din natin si Jesus kung ipagkakatiwala natin ang sarili natin sa “Diyos na humahatol nang matuwid.” —1 Ped. 2:23. w24.11 5-6 ¶10-12

Miyerkules, Mayo 6

Nagsasaya . . . ang mga anghel ng Diyos dahil sa isang makasalanan na nagsisisi.—Luc. 15:10.

Napakasaya natin kapag nagsisi ang isang nagkasala! (Luc. 15:7) Pero sino ang dapat purihin? Ang mga elder ba? Alalahanin ang sinabi ni apostol Pablo tungkol sa mga nagkasala: “Baka sakaling bigyan sila ng pagkakataon ng Diyos na magsisi.” (2 Tim. 2:25) Ganito ang sinasabi ng study note sa talatang iyan: “Kung magsisi man ang isang Kristiyano, hindi ito dahil sa sinumang tao, kundi dahil kay Jehova, na tumulong sa kaniya na magbago. Binanggit din ni Pablo ang ilan sa magagandang resulta ng pagsisipi ng isang makasalanan—mas lumalalim ang pagkaunawa niya sa katotohanan, bumabalik ang katinuan ng kaniyang isip, at makakatakas siya sa bitag ni Satanas.—2Ti 2:26.” Kapag nagsisi ang nagkasala, isasaayos ng komite na patuloy siyang madalaw. Tutulong ito sa kaniya na patuloy na malabanan ang bitag ni Satanas at magawa ang tama. —Heb. 12:12, 13. w24.08 23 ¶14-15

Huwebes, Mayo 7

Hinahanap ninyo ako, hindi dahil sa nakakita kayo ng mga tanda, kundi dahil sa kumain kayo ng tinapay at nabusog.—Juan 6:26.

Ang mga tao na pinakain ni Jesus ay nakapokus sa pisikal na pangangailangan nila. Kinabukasan, bumalik ang mga tao sa lugar kung saan sila pinakain ni Jesus, pero wala na siya doon at ang mga apostol. Kaya sumakay ang mga tao sa mga bangkang galing sa Tiberias at pumunta sa Capernaum para hanapin si Jesus. (Juan 6:22-24) Ginawa ba nila iyon para matuto pa tungkol sa Kaharian? Hindi. Ginawa nila iyon kasi gusto nilang pakainin ulit sila ni Jesus. Bakit natin nasabi iyan? Pansinin ang nangyari nang mahanap ng mga tao si Jesus malapit sa Capernaum. Deretsahan niyang sinabi sa kanila na hinahanap lang nila siya dahil gusto nilang masapatan ang pisikal na pangangailangan nila. Totoo, “kumain [sila] ng tinapay at nabusog” pero ang kinain nila ay “pagkaing nasisira.” Kaya pinayuhan sila ni Jesus na ang dapat nilang pagsikapang makuha ay ang “dinasisirang pagkain na nagbibigay ng buhay na walang hanggan.” (Juan 6:26, 27) Sinabi ni Jesus na maglalaan ang Ama niya ng ganiyang pagkain. w24.12 5 ¶8-9

Biyernes, Mayo 8

Ang puso ng marunong ay nagbibigay ng kaunawaan sa bibig niya at nagdagdag ng panghihikayat sa pananalita niya.—Kaw. 16:23.

Mga brother, para maging mas epektibong tagapagturo, laging ibase sa Salita ng Diyos ang mga itinuturo at payo ninyo. Maging masipag sa pag-aaral ng Bibliya at ng mga publikasyon natin. (Kaw. 15:28) Habang nag-aaral, tingnan kung paano ipinapaliwanag ng mga publikasyon natin ang isang teksto sa Bibliya

para maipaliwanag ninyo ito nang tama. At kapag nagtuturo, sikaping maabot ang puso ng mga tagapakinig ninyo. Mapasulong ninyo ang pagtuturo ninyo kung hihingi kayo ng payo sa makaranasang mga elder at susundin ang mga iyon. (1 Tim. 5:17) Dapat na may kaka-yahan din ang mga elder na magpatibay sa mga kapatid. Pero kung minsan, kailangan nilang magbigay ng payo, o sumaway pa nga. Dapat na lagi silang maging mabait sa paggawa ng mga ito. Kung maging mahinahon kayo, mapagmahal, at lagi ninyong ibabase sa Salita ng Diyos ang mga itinuturo ninyo, maging epektibo kayo kasi tinutularan ninyo ang Dakilang Guro, si Jesus.—Mat. 11:28-30; 2 Tim. 2:24. w24.11 24 ¶16

Sabado, Mayo 9

Isaysay ninyo sa mga bansa ang kaluwalhatian niya.—Awit 96:3.

Maluluwalhati natin si Jehova sa mga sinasabi natin tungkol sa kaniya. Sinasabi sa atin ng Bibliya na ‘umawit kay Jehova,’ ‘purihin ang pangalan niya,’ ‘ihayag ang mabuting balita ng pagliligtas niya,’ at ‘isaysay sa mga bansa ang kaluwalhatian niya.’ (Awit 96:1-3) Kapag ginawa natin ang mga iyan, napapapurihan natin ang Ama natin sa langit. (Gawa 4:29) Maluluwalhati rin natin si Jehova gamit ang mga pag-aari natin. Matagal nang ginagawa iyan ng mga tunay na mananamba ni Jehova. (Kaw. 3:9) Halimbawa, nagbigay ng mga materyal na bagay ang mga Israelita noon para sa pagtatayo at pagkukumpuni ng templo. (2 Hari 12:4, 5; 1 Cro. 29:3-9) Ginamit din ng mga alagad “ang sarili nilang pag-aari” para paglingkuran si Kristo at ang mga apostol niya. (Luc. 8:1-3) Nagbigay rin ng tulong ang mga Kristiyano noon sa mga kapatid nila. (Gawa 11:27-29) Maluluwalhati rin natin ngayon si Jehova gamit ang mga donasyon natin. w25.01 4 ¶8; 5 ¶11

Linggo, Mayo 10

Sino ang makapagsasabing hindi dapat bautismuhan sa tubig ang mga taong ito?—Gawa 10:47.

Ano ang nakatulong kay Cornelio na magpabautismo? Sinasabi ng Bibliya na “may takot [si Cornelio] sa Diyos, pati na ang buong sambahayan niya.” Lagi rin siyang nagsusumamo sa Diyos. (Gawa 10:2) Kaya nang ipangaral ni Pedro kay Cornelio ang mabuting balita tungkol sa Kristo, tinanggap iyon ni Cornelio at ng pamilya niya. Nagpabautismo sila agad. (Gawa 10:47, 48) Siguradong handang gumawa ng mga pagbabago si Cornelio para masamba niya at ng pamilya niya si Jehova. (Jos. 24:15; Gawa 10:24, 33) Hindi hinayaan ni Cornelio na mapigilan siya ng posisyon niya para maging Kristiyano. Kailangan mo rin bang gumawa ng malalaking pagbabago para mabautismuhan? Tutulungan ka ni Jehova na gawin iyan. Pagpapalain niya ang pagsisikap mong sundin ang mga prinsipyo sa Bibliya. w25.03 5 ¶12-13

Lunes, Mayo 11

Iwasan mo ang mga kuwentong di-totoo at lumalapastangan sa Diyos.—1 Tim. 4:7.

Kung may marinig kang masamang bagay tungkol sa organisasyon o sa mga nangunguna, alalahanin mo kung ano ang ginawa ng mga kaaway ng Diyos kay Jesus at sa unang-siglong mga Kristiyano. Sa ngayon, gaya ng inihula ng Bibliya, sinisiraan at pinag-uusig ang bayan ni Jehova. (Mat. 5:11, 12) Hindi tayo mapapaniwala ng mga kasinungalingang iyon kung tatandaan natin kung kanino iyon galing at kung kikilos tayo agad para maprotektahan ang sarili natin. Paano natin ito magagawa? Tanggihan ang mga kuwentong di-totoo. Malinaw na sinabi ni apostol Pablo kung ano ang dapat gawin kapag nakari-

nig tayo ng mga kuwentong di-totoo. Sinabi niya kay Timoteo na “iwasan . . . ang mga kuwentong di-totoo” at na ‘sabihaan ang ilan na huwag magbigay-pansin dito.’ (1 Tim. 1:3, 4) Tinatanggihan din natin ang mga kuwentong di-totoo kasi alam natin kung saan galing iyon. At nanghahawakan tayo sa “kapaki-pakinabang na mga salita” ng katotohanan.—2 Tim. 1:13. w24.04 11 ¶16; 13 ¶17

Martes, Mayo 12

Inililigaw nila ang mga walang muwang gamit ang kanilang mapanghikayat na pananalita at pambobola.—Roma 16:18.

Manatiling kaisa ng mga tapat kay Jehova. Gusto ni Jehova na magkaisa tayo sa pagsamba sa kaniya. Magagawa natin iyan kung patuloy tayong kakapit nang mahigpit sa katotohanan. Sinisira ng mga nagpapakalat ng maling impormasyon ang pagkakaisa ng kongregasyon. Kaya naman, pinayuhan tayo ni Jehova na “iwasan [natin] sila.” Kung hindi natin sila iiwasan, puwede rin tayong uti-unting mapalayo sa katotohanan. (Roma 16:17) Kung lagi nating aalamin ang totoo at kakapit nang mahigpit dito, mananatili tayong malapit kay Jehova at lalong titibay ang pananampalataya natin. (Efe. 4:15, 16) Hindi tayo madadaya ng mga kasinungalingan at propaganda ni Satanas, at siguradong iingat tayo ni Jehova sa panahon ng malaking kapighatian. Kaya patuloy tayong kumapit nang mahigpit sa katotohanan, “at [sasatain] ang Diyos ng kapayapaan.”—Fil. 4: 8, 9. w24.07 13 ¶16-17

Miyerkules, Mayo 13

Ang taong ito ay nag-alay ng isang handog para sa mga kasalanan at ang bisa nito ay walang hanggan.—Heb. 10:12.

Nagbigay si Jesus ng espesyal na atensiyon sa mga taong nabibigatan dahil sa

kasalanan nila, at binigyan niya sila ng pagkakataong maging tagasunod niya. Alam niyang kasalanan ang puno't dulo ng pagdurusa ng mga tao. Kaya partikular niyang tinulungan ang mga kilalang makasalanan. Gamit ang isang ilustrasyon, ipinaliwanag niya kung bakit niya ginagawa ito: "Ang malulusog ay hindi nangangailangan ng manggagamot, kundi ang mga maysakit." Sinabi pa niya: "Dumating ako para tawagin, hindi ang mga matuwid, kundi ang mga makasalanan." (Mat. 9:12, 13) Talagang ginawa ni Jesus ang mga sinabi niya. Nang hugasan ng isang babae ang mga paa niya gamit ang mga luha nito, mabait niyang kinausap ito at pinatawad sa mga kasalanan. (Luc. 7:37-50) Tinuruan niya ng mahahalagang katotohanan ang isang Samaritana sa tabi ng balon, kahit alam niyang imoral ang pamumuhay nito. (Juan 4:7, 17-19, 25, 26) Binigyan din ng Diyos si Jesus ng kapangyarihan na alisin ang resulta ng kasalanan—ang kamatayan. Bumuhay siya ng mga patay—lalaki at babae, bata at matanda.—Mat. 11:5. w24.08 4 ¶9-10

Huwebes, Mayo 14

Hahatulan niya ang lupa ayon sa katuwiran at ang mga bayan ayon sa kaniyang katapatan.
—Awit 96:13.

Paano ipapakita ni Jehova sa hinaharap na dapat siyang luwalhatiin ng lahat? Magiging matuwid siya sa mga hatol niya. Malapit na niyang puksain ang Babilonyang Dakila dahil siniran nito ang pangalan niya. (Apoc. 17:5, 16; 19:1, 2) Pero may ilang makakasaksi sa pagkawasak ng Babilonyang Dakila na posibleng sumama sa atin sa tunay na pagsamba. At sa Armagedon, tuluyan nang aalisin ni Jehova ang sistemang ito ni Satanas. Kaya mawawala na ang lahat ng kumakalaban sa kaniya

at naninira sa pangalan niya. Pero iligligtas niya ang lahat ng nagmamahal, sumusunod, at nagbibigay ng kaluwalhatian sa kaniya. (Mar. 8:38; 2 Tes. 1:6-10) Pagkatapos ng Sanlibong-Taóng Paghahari ni Kristo, magkakaroon ng huling pagsubok. Kapag natapos na iyon, lubusan nang naluwalhati ni Jehova ang pangalan niya. (Apoc. 20:7-10) Sa panahong iyon, "ang lupa ay mapupuno ng kaalaman sa kaluwalhatian ni Jehova gaya ng tubig na tumatakip sa dagat." (Hab. 2:14) Talagang napakasayang makita ang panahon na ibinibigay ng lahat kay Jehova ang kaluwalhatianang nararapat sa kaniya! w25.01 6-7 ¶15-16

Biyernes, Mayo 15

Kailangan ninyong magtiis bilang bahagi ng disiplina sa inyo.
—Heb. 12:7.

Ano ang makakatulong sa mga Hebreong Kristiyano na matiis ang pag-uusig? Alam ni apostol Pablo na kailangan nilang magkaroon ng tamang pananaw dito. Ipinaliwanag niya na kapag nakakaranas ng pagdurusa ang isang Kristiyano, posibleng gamitin iyon ng Diyos bilang pagsasanay sa kaniya. Dahil sa ganiyang pagsasanay, magkakaroon at mapapasulong ng isa ang mga katangiang gusto ni Jehova. Kung magpopokus ang mga Hebreong Kristiyano sa magagandang resulta ng pag-uusig, magiging mas madali sa kanila na magtiis. (Heb. 12:11) Pinatibay ni Pablo ang mga Hebreong Kristiyano na lakas ang loob nila at huwag sumuko kapag may pag-uusig. Alam na alam ni Pablo ang sinasabi niya. Pinag-usig niya dati ang mga Kristiyano, kaya alam niya kung paano sila tinatrato ng mga mang-uusig. Siya rin mismo, nakaranas ng iba't ibang uri ng pag-uusig mula noong naging Kristiyano siya.—2 Cor. 11:23-25. w24.09 12 ¶16-17

Sabado, Mayo 16

Patuloy kayong magbantay.

—Mat. 25:13.

Bakit nagiging mas apurahan ang ministryo natin sa bawat lumilipas na araw? Kasi kaunting panahon na lang ang natitira. Pag-isipan ang inihula ni Jesus sa Marcos 13:10 tungkol sa gawaing pangangaral sa mga huling araw. Ayon sa ulat ni Mateo, sinabi ni Jesus na ipapangaral ang mabuting balita sa lahat ng bansa bago dumating “ang wakas.” (Mat. 24:14) Tumutukoy ang wakas sa panahon kung kailan aalisin na ang masamang sistema ni Satanas. Nakapagdesisyon na si Jehova kung anong “araw at oras” mangyayari ito. (Mat. 24:36; Gawa 1:7) Sa bawat araw na lumilipas, mas lumalapit tayo sa panahong iyon. (Roma 13:11) Kaya dapat na patuloy tayong mangaral habang may panahon pa. Ano ang sagot ninyo sa tanong na ‘Bakit tayo nangangaral’? Dahil sa pag-ibig. Kapag nangangaral tayo, nakikita ang pag-ibig natin—pag-ibig sa mabuting balita, pag-ibig sa mga tao, at higit sa lahat, pag-ibig kay Jehova at sa pangalan niya. w24.05 14 ¶2-3

Linggo, Mayo 17

Nakita ng Diyos ang lahat ng ginawa niya, at iyon ay napakabuti.

—Gen. 1:31.

Mga magulang, tulungan ang anak ninyo na pag-isipan ang kalikasan. Habang naglalakad kayo sa labas o may ginagawa sa hardin, ipakita sa anak ninyo ang mga nakakamanghang pattern na makikita sa kalikasan. Pinapatunayan ng mga iyan na may isang matalino at mahusay na Disenyador. Halimbawa, matalagal nang pinag-aaralan ng mga scientist ang mga spiral pattern. Ipinaliwanag ng biophysicist na si Nicola Farnelli na kapaag binilang mo ang mga spiral na ma-

kikita sa isang bagay sa kalikasan, maddiskubre mo na may pattern ang mga bilang na ito. Tinatawag ito na Fibonacci sequence. Makikita ang spiral pattern sa maraming bagay sa kalikasan, gaya ng hugis ng ilang galaksi, pattern ng mga shell ng nautilus, mga dahon ng halaman, at gitna ng sunflower. w24.12 16 ¶7

Lunes, Mayo 18

Siya ang inyong buhay.

—Deut. 30:20.

Ibang-iba ang panahon at sitwasyon nina Moises, David, at Juan kung ikukumpara sa atin. Pero malaki ang pagkakapareho natin sa kanila. Mga lingkod sila ng tunay na Diyos, at ganiyan din tayo. Gaya nila, nananalangin tayo kay Jehova, nagtitiwala sa kaniya, at umaasa sa patnubay niya. At sigurado rin tayo na pagpapalain ni Jehova ang mga sumusunod sa kaniya. Talagang napakahalagang makinig tayo sa mga huling habilin ng tapat na mga may edad na iyon at sumunod kay Jehova! Kung gagawin natin iyan, magiging matagumpay tayo. ‘Mabubuhay tayo nang mababa’—nang walang hanggan! At magiging masaya tayo dahil alam nating napapasaya natin ang mapagmahal nating Ama, na saganang magbibigay sa atin ng mga gantimpalang higit sa maiisip natin.—Efe. 3:20. w24.11 13 ¶20-21

Martes, Mayo 19

Inilagay ng Diyos sa kongregasyon ang bawat isa sa mga ito.

—1 Cor. 12:28.

Noong unang siglo, may ilang lalaki sa kongregasyon na inatasan bilang mga ministeryal na lingkod. (1 Tim. 3:8) Lumilitaw na sila ang tinutukoy ni apostol Pablo na “tumululong sa iba.” Kaya malamang na sila ang nag-aasikaso ng

ibang mahahalagang gawain para makapagpokus sa pagtuturo at pagpapastol ang matatandang lalaki sa kongregasyon. Halimbawa, posibleng tumutulong ang mga ministeryal na lingkod sa paggawa ng mga kopya ng Kasulatan o sa pagbili ng mga materyales para dito. Tingnan ang ilan sa mahahalagang gawain ng mga ministeryal na lingkod na nakakatulong sa kongregasyon ninyo. (1 Ped. 4:10) Inaatasan ang ilan na magasikaso ng accounts ng kongregasyon, rekord ng mga teritoryo, o mga publikasyong gagamitin ng mga kapatid. Inaatasan naman ang iba na mag-operate ng audio/video, maging attendant, o tumulong sa pagmamantini ng Kingdom Hall. Napakahalaga ng mga ito para maging organisado ang mga gawain sa kongregasyon.—1 Cor. 14:40. w24.10 19 ¶4-5

Miyerkules, Mayo 20

May lakas akong harapin ang anumang bagay dahil sa kaniya na nagbibigay ng kapangyarihan sa akin.
—Fil. 4:13.

Mahaharap natin ang anumang problema, maliit man o malaki, kung tandaan nating buháy si Jehova at kaya niya tayong tulungan. Dahil siya ang Makapangyarihan-sa-Lahat, maibibigay niya ang lakas na kailangan natin. Kaya hindi tayo dapat panghinaan ng loob kapag may pinagdadaan tayo. Isa pa, kapag nakikita nating tinutulungan tayo ni Jehova sa maliliit na problema natin, nagiging mas kumbinsido tayo na tulungan niya rin tayong maharap ang malalaking pagsubok. Tingnan natin ang dalawang karanasan ni Haring David na nagpatibay sa tiwala niya kay Jehova. Noong bata pa si David, pinapastulan niya ang mga tupa ng tatay niya. Minsan, may dumating na isang leon at tumangay ng isang tupa. Minsan naman,

isang oso ang sumalakay. Sa dalawang pagkakataong iyon, lakas-loob na hinabol ni David ang mga hayop at iniligtas ang mga tupang tinangay ng mga ito. Pero hindi niya inisip na nagawa niya iyon dahil magaling siya. Alam niyang tinulungan siya ni Jehova. (1 Sam. 17:34-37) Laging iniisip ni David ang mga naranasan niya, kaya tumibay ang tiwala niya na patuloy siyang palalakasin ng buháy na Diyos. w24.06 21 ¶5-6

Huwebes, Mayo 21

Kapag sumasagot ang isang tao bago niya marinig ang mga detalye, kamangmangan iyon at kahiya-hiya.
—Kaw. 18:13.

Isipin na inimitahan ka sa isang gathering. Dadalo ka ba? Kung hindi mo kilala kung sino ang nag-organisa sa gathering na iyon o hindi mo alam kung ano ang mga gagawin doon, dapat mong itanong: “Saan at kailan gagawin ang gathering? Gaano karami ang pupunta? Sino ang mangangasiwa? Sino-sino ang pupunta? Ano ang mga gagawin doon? May alak ba doon?” Tutulong ang mga tanong na ito sa iyo para makagawa ka ng matalinong desisyon. Kapag nakuha mo na ang mga impormasyong kailangan mo, pag-isipang mabuti ang mga puwedeng mangyari. Paano kung malaman mo na may mga pupunta na hindi sumusunod sa pamantayan ni Jehova, o kaya naman, may alak doon pero wala kayong makakasamang maygulang? Nakikita mo bang posibleng mauwi ang gathering na iyon sa sinasabi ng Bibliya na “magulong pagsasaya”? (1 Ped. 4:3) Kapag napag-isipan mo na ang lahat ng impormasyong nakuha mo, mas magiging madali na sa iyo na gumawa ng tamang desisyon. w25.01 15 ¶4-5

Biyernes, Mayo 22

Kahit na ang mga kasalanan ninyo ay gaya ng iskarlata, mapapuputi ang mga ito na gaya ng niyebe.

—Isa. 1:18.

Dahil sa pantubos, puwedeng burahin ni Jehova ang kasalanan ng mga nagsisi-si. Napakahirap alisin ng mantso na kulay iskarlata o krimson. Pero idiniidiin ni Jehova sa ilustrasyong ito na puwedeng mahugasan, o mapaputi, ang mga kasalanan natin hanggang sa wala na itong bakas. Itinulad din ang kasalanan sa “utang.” (Mat. 18:32-35) Kaya sa tuwing nagkakasala tayo kay Jehova, parang lalo tayong nalulubog sa utang. Masasabing napakalaki ng utang natin sa kaniya! Pero kapag nagpatawad si Jehova, hindi na niya pinapabayaran ang mga utang natin. Hindi na niya tayo sisingilin para sa mga kasalanang pinatawad na niya. Tuwang-tuwa ang isang tao kapag hindi na siya pinagbayad ng utang. Ganiyan din ang nararamdaman natin kapag pinapatawad ni Jehova ang mga kasalanan natin. w25.02 10 ¶9-10

Sabado, Mayo 23

Hindi ang mga anak ang inaasahang mag-ipon para sa mga magulang nila, kundi ang mga magulang para sa mga anak nila.—2 Cor. 12:14.

Habang tumatanda ang mga magulang, baka kailanganin nila ng tulong, at masayang ginagawa iyan ng maraming anak. (1 Tim. 5:4) Pero dapat tandaan ng mga Kristiyanong magulang na magiging mas masaya sila kung papalakihin nila ang mga anak nila na maging lingkod ni Jehova kaysa kung papalakihin nila ang mga ito para lang suportahan sila kapag tumanda na sila. (3 Juan 4) Habang tinuturuan ang anak ninyo na suportahan ang sarili niya, ipakita nin-yong nagtitiwala kayo kay Jehova. Ka-

hit bata pa siya, ituro din sa kaniya kung bakit mahalagang maging masipag. (Kaw. 29:21; Efe. 4:28) At habang lumalaki siya, tulungan siyang magsikap sa pag-aaral. Puwedeng i-research ng mga Kristiyanong magulang ang mga prinsipyo sa Bibliya na magagamit ng anak nila sa pagdedesisyon tungkol sa edukasyon. Tulungan siyang maintindihan na pansuporta ito sa sarili niya at sa mga goal niya sa espirituwal. w25.03 30-31 ¶15-16

Linggo, Mayo 24

Isuot ang bagong personalidad.

—Efe. 4:24.

Inilarawan ni Jehova sa Isaias kabanta 65 kung ano ang magiging kalagayan sa espirituwal na paraiso. Unang natupad ang hulang ito noong 537 B.C.E. Nang panahong iyon, nakalaya sa Babilonya ang nagsising mga Judio at nakabalik sa lupain nila. Pinagpala sila ni Jehova at tinulungan na mapagandang muli ang wasak na lunsod ng Jerusalem. Naitayo rin nilang muli ang templo na sentro ng tunay na pagsamba sa Israel. (Isa. 51:11; Zac. 8:3) Nagsimula ang ikalawang katuparan ng hula ni Isaias noong 1919 C.E. nang makalaya sa Babilonyang Dakila ang mga lingkod ni Jehova sa ngayon. Pagkatapos, unti-unti nang lumawak ang espirituwal na paraiso sa lupa. Dahil sa masisigasig na tagapaghayag ng Kaharian, nagkaroon ng maraming kongregasyon na binubuo ng may-gulang na mga Kristiyano. Ang ilan sa kanila ay dating marahas at imoral. Pero isinuot nila ang “bagong personalidad na nilikha ayon sa kalooban ng Diyos.” w24.04 20-21 ¶3-4

Lunes, Mayo 25

Ang bawat isa ang magdadala ng sarili niyang pasan.—Gal. 6:5.

Sa ilang lugar, ang mga magulang o iba pang adulto ang pumipili ng mapapangasawa ng mga kamag-anak nila. Sa ibang lugar naman, ang pamilya o mga kaibigan ang naghahanap ng mapapangasawa ng isa. Pagkatapos, isasabayos nila na magkita ang dalawa para tingnan kung magugustuhan nila ang isa't isa. Kung hingan ka ng tulong na humanap ng mapapangasawa, tiyakin kung ano ang gusto at pangangailangan nilang dalawa. Kapag may naisip ka nang tao na bagay sa hinahanapan mo, sikaping kilalaning mabuti ang taong iyon, alamin ang mga katangian niya, at ang pinakamahalaga, ang espirituwalidad niya. Mas mahalaga ang malapit na kaugnayan kay Jehova kaysa sa pera, edukasyon, o katayuan sa buhay. Pero tandaan, silang dalawa pa rin ang magpapasiya kung magpapakasal sila. w24.05 23 ¶11

Martes, Mayo 26

Ang tunay na kaibigan ay nagmamahal sa lahat ng panahon.—Kaw. 17:17.

Makakatulong tayo sa mga magkasintahan kung magiging maingat tayo sa mga sinasabi natin. Minsan, kailangan nating kontrolin ang sarili natin at huwag nang magkomento. (Kaw. 12:18) Halimbawa, baka excited tayong sabihin sa iba na may bagong magkasintahan. Pero baka gusto nila na sila mismo ang magsabi nito. Hindi rin natin sila dapat pagtsismisan o kuwestiyunin ang mga personal na bagay tungkol sa kanila. (Kaw. 20:19; Roma 14:10; 1 Tes. 4:11) Bukod diyan, hindi tayo dapat magkomento o magtanong ng makaka-pressure sa kani-la na magpakasal. Paano kung nalaman nating naghiwalay ang isang magkasin-

tahan? Dapat nating iwasang makialam sa desisyon nila o sisihin ang isa man sa kanila. (1 Ped. 4:15) Kapag nagdesisyong naghiwalay ang magkasintahan, walang mali dito. Kadalasan, ipinapakitang lang nito na naging epektibo ang pagiging magkasintahan nila—nakatulong ito sa kanila na gumawa ng tamang desisyon. Pero siyempre, baka dahil dito, masaktan sila at malungkot. Kaya dapat natin silang tulungan. w24.05 31 ¶15-16

Miyerkules, Mayo 27

Kapag nanghihina ang loob mo sa panahon ng problema, mababawasan din ang lakas mo.—Kaw. 24:10.

Napakahirap kapag iniwan ng isang kapamilya o kaibigan natin si Jehova. (Awit 78:40) At magiging mas mahirap pa ito kung talagang malapit tayo sa taong iyon. Kung ganiyan ang sitwasyon mo ngayon, makakatulong sa iyo ang halimbawa ng katapatan ni Zadok. Natili siyang tapat kay Jehova kahit pinili ng kaibigan niyang si Abiatar na magiging hindi tapat. Nangyari iyan noong malapit nang mamatay si David. Tinangka ng anak niyang si Adonias na agawin ang trono kahit si Solomon ang pinili ni Jehova na maging hari. (1 Cro. 22:9, 10) Pinili ni Abiatar na suportahan si Adonias. (1 Hari 1:5-8) Sa ginawang ito ni Abiatar, hindi siya naging tapat kay David at kay Zadok at lalo na kay Jehova. Sa loob ng maraming taon, magkasama sina Zadok at Abiatar bilang mga saserdote.—2 Sam. 8:17; 15:29; 19:11-14. w24.07 6 ¶14-15

Huwebes, Mayo 28

Maligaya ang taong laging nagbabantay.—Kaw. 28:14.

Siguradong sulit ang pagsisikap natin na patuloy na magbantay. Anumang ‘pan-samantalang kasiyahan’ ang maibigay ng kasalanan, hindi iyon maikukumpara sa sayang mararamdaman natin kung susundin natin ang mga pamantayan ni Jehova. (Heb. 11:25; Awit 19:8) Dinisenyo kasi tayo para gawin ang kaloo-ban niya. (Gen. 1:27) Kapag namuhay tayo sa paraang gusto ni Jehova, panatag tayo kasi malinis ang konsensiya natin at posible tayong mabuhay nang walang hanggan. (1 Tim. 6:12; 2 Tim. 1:3; Jud. 20, 21) Totoo, “mahina ang laman.” (Mat. 26:41) Pero hindi ibig sabihin nito na wala na tayong magagawa para labanan ang kahinaan natin. Lagging nandiyan si Jehova para ibigay ang lakas na kailangan natin. (2 Cor. 4:7) Pero tandaan, lakas na higit sa karaniwan ang ibinibigay ni Jehova. Kaya responsibilidad pa rin natin na gamitin ang lakas na mayroon tayo para labanan ang kahinaan natin. Sasagutin ni Jehova ang mga panalangin natin para sa paghingi ng higit na lakas. (1 Cor. 10:13) Sa tulong ni Jehova, makakapag-ingat tayo at malalabanan natin ang tukso. w24.07 19 ¶19-21

Biyernes, Mayo 29

Sawayin mo sa harap ng lahat ang mga namimihasa sa kasalanan.
—1 Tim. 5:20.

Sinabi ni apostol Pablo sa kapuwa niya elder na si Timoteo ang pananalita sa teksto sa araw na ito na sawayin “sa harap ng lahat” ang mga nagkasala. Ibig bang sabihin, lagi itong dapat gawin sa harap ng buong kongregasyon? Hindi naman. Tinutukoy dito ni Pablo ang mga posibleng nakaalam sa pangyayari.

Baka nasaksihan nila ito mismo o baka nasabi ito sa kanila ng nagkasala. Sa kanila lang ipapaalam ng mga elder na nasikaso na ito at na naituwid na ang nagkasala. May pagkakataon na marami sa kongregasyon ang nakakaalam o posibleng makaalam ng pagkakasala. Sa ganiyang kaso, ang “lahat,” na sinabi ni Pablo, ay tumutukoy na sa buong kongregasyon. Kaya ipapatalastas ng isang elder sa kongregasyon na sinaway ang kapatid na nakagawa ng kasalanan. Bakit? Sinabi ni Pablo: ‘Para magsilbi itong babala sa iba’ at huwag silang magkasala. w24.08 23-24 ¶16-17

Sabado, Mayo 30

Ito ang tunay na mga pananalita ng Diyos.—Apoc. 19:9.

Dapat na maging masipag tayo sa paglilingkod kay Jehova hanggang wakas. Dapat na maging mapagbantay ang mga pinahiran para ‘isama’ sila ni Jesus at makuha nila ang gantimpala nila sa langit. (Mat. 24:40) Sabik na silang dumating ang panahon na ‘titipunin na silang kasama ni Jesus’ sa langit. Pagkatapos ng digmaan ng Armagedon, sila ang mapapangasawa ng Kordero, si Jesus. (2 Tes. 2:1) Malapit na ang araw ng paghatol, pero hindi tayo dapat matakot. Kung mananatili tayong tapat, bibigyan tayo ng ating mapagmahal na Ama sa langit ng “lakas na higit sa karaniwan” para “makatayo [tayo] sa harap ng Anak ng tao.” (2 Cor. 4:7; Luc. 21:36) Sa langit man o dito sa lupa ang pag-asa natin, matutuwa sa atin ang Ama natin kung makikinig tayo sa mga babala sa mga ilustrasyon ni Jesus. At dahil sa walang-kapantay na kabaitan ni Jehova, mapapasulat ang mga pangalan natin sa aklat ng buhay.—Dan. 12:1; Apoc. 3:5. w24.09 25 ¶19-20

Lingo, Mayo 31

Nakakabuti ang paglapit sa Diyos.

—Awit 73:28.

Paano makakatulong ang Salita ng Diyos kapag naiisip natin na parang mali ang naging mga desisyon natin? Pag-isipan ang magagandang bagay na mayroon ka—gaya ng mga pagpapala ni Jehova—at isipin na wala nito ang mga hindi naglilingkod sa kaniya. Para sa kaniya, ang maalwang buhay nila ngayon ang pinakamahalaga kasi wala na silang inaasahang pag-asa sa hinaharap. Pero tayo, pinagpapala na ngayon ni Jehova at marami pa tayong magagandang bagay na inaasahan sa hinaharap. (Awit 145:16) Pag-isipan din ito: Sigurado ka ba na talagang mas maganda ang buhay mo ngayon kung iba ang naging desisyon mo? Tandaan, kapag gumawa ka ng mga desisyon dahil sa pag-ibig mo sa Diyos at sa iba, siguradong magkakaron ka ng mga bagay na talagang magpapasaya sa iyo. w24.10 27 ¶12-13

Lunes, Hunyo 1

Ikaw, O Jehova, ay mabuti at handang magpatawad.

—Awit 86:5.

Ngayon pa lang, nakikinabang na tayo sa pantubos ni Kristo. Halimbawa, pinapatawad ni Jehova ang mga kasalanan natin dahil sa pantubos. Hindi naman siya obligadong gawin iyon, pero gusto niya. (Awit 103:3, 10-13) Baka maramdaman ng ilan na hindi sila karapat-dapat patawarin ni Jehova. Ang totoo, lahat tayo, hindi karapat-dapat. Sinabi nga ni apostol Pablo na ‘hindi siya karapat-dapat tawaging apostol.’ Pero sinabi rin niya: “Dahil sa walang-kapantay na kabaitan ng Diyos, ako ay naging kung ano ako ngayon.” (1 Cor. 15:9, 10) Kapag pinagsisihan na natin ang mga kasalanan natin, papatawarin tayo ni Je-

hova. Bakit? Hindi dahil karapat-dapat tayo dito kundi dahil mahal niya tayo. Kaya kung nararamdaman mong hindi ka karapat-dapat patawarin ni Jehova, tandaan mo na hindi ibinigay ni Jehova ang pantubos para sa mga hindi nagkakasala. Ibinigay niya iyon para sa mga nagsisising makasalanan.—Luc. 5:32; 1 Tim. 1:15. w25.01 26-27 ¶3-4

Martes, Hunyo 2

Kapag mabait ang isang tao, siya mismo ang nakikinabang; pero kapag malupit ang isa, siya mismo ang napapahamak.
—Kaw. 11:17.

Hindi natin makokontrol ang sasabihin o gagawin ng iba sa atin. Pero makokontrol natin ang sarili natin. Kapag may nakasakit sa atin, madalas na ang pinakamagandang gawin ay magpatawad. Bakit? Kasi mahal natin si Jehova at gusto niya na maging magpatawad tayo. Kapag nagpadala tayo sa galit at hindi nagpatawad, malamang na makagawa tayo ng mga bagay na pagsisihan natin. Baka makaapekto pa nga ito sa kalusugan natin. (Kaw. 14:17, 29, 30) Kapag inalis natin ang galit sa puso natin, hindi na ito makaapekto sa pakikitungo natin sa iba. Natutulungan din natin ang sarili natin—nakaka-move on tayo at nagiging masaya ulit sa buhay. Paano natin maaalis ang galit? Kung minsan, baka kailangan lang ng panahon. Isipin ang isang taong nagkaroon ng matinding injury. Kailangan niya ng panahon para maka-recover. Ganiyan din kapag sobra tayong nasaktan. Baka kailangan din natin ng panahon para maalis ang galit at magpatawad. (Ecles. 3:3; 1 Ped. 1:22) Ipanalangin kay Jehova na tulungan kang magpatawad. w25.02 16 ¶8-11

Miyerkules, Hunyo 3

Ang matigas na pagkain ay para sa mga maygulang.—Heb. 5:14.

Kasama sa pangunahing mga turo ang pagsisipi, pananampalataya, bautismo, at pagkabuhay-muli. (Heb. 6:1, 2) Iyan ang mga turo na pinaniniwalaan ng lahat ng Kristiyano. Kaya nang mangaral si apostol Pedro noong Pentecostes, iyan ang mga itinuro niya. (Gawa 2:32-35, 38) Dapat na tanggapin natin ang pangunahing mga turong ito para maging alagad tayo ni Kristo. Halimbawa, sinabi ni Pablo na hindi tayo tunay na mga Kristiyano kung hindi tayo naniniwala sa pagkabuhay-muli. (1 Cor. 15:12-14) Pero hindi tayo dapat makontento sa pangunahing mga katotohanan. Di-gaya ng mga pangunahing turo, ang matigas na espirituwal na pagkain ay hindi lang tumutukoy sa mga utos ni Jehova. Kasama rin dito ang mga prinsipyo sa Bibliya, na tumutulong sa atin na maintindihan ang pag-iisip niya. Para makinabang tayo sa matigas na espirituwal na pagkain, dapat pag-aralan natin ang Salita ng Diyos, bulay-bulayin ito, at gawin ang buong makakaya natin para masunod ang mga natutuhan natin. Kapag ginawa natin iyan, matututo tayong gumawa ng mga desisyong magpapasaya kay Jehova. w24.04 5 ¶12-13

Huwebes, Hunyo 4

Ang mga taga-Nineve ay bubuhaying muli sa paghuhukom.—Mat. 12:41.

Ipinaalala ni Jehova kay Jonas na ‘hindi man lang alam ng mga Ninevita ang kaibahan ng tama at mali.’ (Jon. 1:1, 2; 3:10; 4:9-11) Ginamit ni Jesus ang pangyayaring ito para ituro na maawain at makatarungan si Jehova. Ano ang ibig sabihin ng sinabi ni Jesus na “bubuhaying muli sa paghuhukom” ang mga Ninevita? ‘Pagkabuhay-muli sa paghatol’ ang tinutukoy ni Jesus. (Juan 5:29) Mangyaya-

ri iyan sa Sanlibong-Taóng Paghahari niya kapag binuhay nang muli ang “mga matuwid at di-matuwid.” (Gawa 24:15) Ang mga di-matuwid ay may pag-asang ‘bubuhaying muli tungo sa paghatol.’ Sa panahong iyon, oobserbahan sila ni Jehova at ni Jesus at titingnan kung susundin nila ang mga ituturo sa kanila. Pero kapag ayaw talagang sumunod ng isang Ninevita, pupuksain na siya ni Jehova. (Isa. 65:20) Kapag naging tapat naman ang isa kay Jehova, magkakaroon siya ng pag-asang mabuhay nang walang hanggan. —Dan. 12:2. w24.05 5 ¶13-14

Biyernes, Hunyo 5

Dumating ang Anak ng tao para hanapin at iligtas ang nawala.—Luc. 19:10.

Perpektong naipakita ni Jesus ang awa ng Ama niya. (Juan 14:9) Sa salita at gawa, ipinakita niyang mahal ng maawain niyang Ama ang mga tao at gusto Niya silang tulungan na malabanan ang kasalanan. Dahil sa mga ginawa ni Jesus, napakilos ang makasalanang mga tao na magbago at sumunod sa kaniya. (Luc. 5:27, 28) Alam na ni Jesus kung ano ang mangyayari sa kaniya. Hindi lang niya isang beses sinabi sa mga tagasunod niya na tatraidurin siya at mamamatay sa tullos. (Mat. 17:22; 20:18, 19) Bukod diyan, alam niyang maaalis ng sakripisyo niya ang kasalanan ng sangkatauhan. Sinabi rin ni Jesus na pagkatapos niyang mamatay, ‘ilalapit niya sa kaniya ang lahat ng uri ng tao.’ (Juan 12:32) Mapapasaya ng makasalanang mga tao si Jehova kung mananampalataya sila kay Jesus at tutularan ang halimbawa niya. Kung gagawin nila ito, ‘mapapalaya sila mula sa kasalanan.’ (Roma 6:14, 18, 22; Juan 8:32) Kaya naman bukal sa pusong ibinigay ni Jesus ang buhay niya at lakas-loob na hinarap ang isang masakit na kamatayan. —Juan 10:17, 18. w24.08 5 ¶11-12

Sabado, Hunyo 6

Kailangan munang ipangaral ang mabuting balita sa lahat ng bansa.

—Mar. 13:10.

Naaalala mo pa ba ang naramdaman mo nang malaman mo ang katotohanang nasa Bibliya? Halimbawa, nalaman mo na mayroon kang mapagmahal na Ama sa langit at na gusto niyang makasama ka sa malaking pamilya na naglilingkod sa kaniya. (Mar. 10:29, 30; Roma 8:38, 39) Nalaman mo rin na aalisin niya ang lahat ng problema at pagdurusa at na bubuhayin niyang muli sa Paraiso ang mga mahal mo sa buhay. (Juan 5:28, 29; Apoc. 21:3, 4) Maluha-luha ka ba nang malaman mo ang mga katotohanang ito? (Luc. 24:32) Siguradong nagustuhan mo ang mga natutuhan mo at hindi mo mapigilang ikuwento iyon sa iba! (Ihambing ang Jeremias 20:9.) Kapag tumagos sa puso natin ang mga katotohanan sa Bibliya, hindi natin mapipigilang sabihin ito sa iba. (Luc. 6:45) Ganiyan din ang naramdaman ng mga alagad ni Jesus noong unang siglo. Sinabi nila: “Hindi namin kayang tumigil sa pagsasalita tungkol sa mga bagay na nakita namin at narinig.” (Gawa 4:20) Mahal na mahal natin ang katotohanan, at gusto nating malaman ito ng mga tao. w24.05 15 ¶5; 16 ¶7

Linggo, Hunyo 7

Maglingkod kayo nang masaya kay Jehova.—Awit 100:2.

Bilang bayan ni Jehova, nangangaral tayo dahil mahal natin ang Ama natin sa langit at gusto nating tulungan ang iba na makilala siya. Pero mayroong nahihi-rapang mangaral. Bakit? Baka mahiyain sila, at pakiramdam nila, hindi sila magaling magturo. Hindi naman komportable ang ilan na pumunta sa bahay ng ibang tao nang hindi iniimbitahan. Natatakot ang iba na baka magalit sa kanila ang

kausap nila. Tinuruan naman ang iba na umiwas sa pakikipagtalo hangga’t maaari. Nahihirapan ang mga kapatid na ito na ibahagi ang mabuting balita sa mga hindi nila kilala. Nahihirapan ka rin bang maging masaya sa ministryo kung minsan? Kung oo, huwag kang masiraan ng loob. Kung pakiramdam mo hindi ka magaling magturo, ipinapakita lang niyan na mapagpakumbaba ka. Baka ayaw mo lang din na mapunta sa iyo ang atensiyon. O kaya naman, baka natatakot kang mauwi sa pagtatalo ang usapan. At lahat tayo, ayaw nating magalit sa atin ang iba, lalo na kung may ginagawa tayong mabuti para sa kanila. Alam na alam ng Ama mo sa langit ang nararamdaman mo, at gusto ka niyang tulungan.—Isa. 41:13. w24.04 14 ¶1-2

Lunes, Hunyo 8

Ang karunungan ay nasa mga mapagpakumbaba.—Kaw. 11:2.

Imbes na sikaping sabay-sabay na gawin ang lahat ng goal mong pasulungin habang nagbabasa ng Bibliya, pumili lang muna ng ilan. Subukan ito: Ilista ang mga kailangan mong baguhin. Mula sa mga ito, pumili ng isa o dalawa na gusto mong unahin. Pagkatapos, isunod naman ang iba. Pero ano ang uunahin mo? Puwede mong unahin ang goal na pinakamadali para sa iyo; o kaya naman, ang sa tingin mong pinakakailangan mong pasulungin. Kapag nakapili ka na, mag-research sa mga publikasyon natin. Ipanalangin din ito kay Jehova. Hilangin sa kaniya na bigyan ka ng “pagnanais at lakas para kumilos.” (Fil. 2:13) Pagkatapos, sikaping gawin ang natutuhan mo. Kapag nakagawa ka na ng isang pagbabago o napasulong mo ang isang katangiang Kristiyano, malamang na mas ganahan ka nang abutin ang iba pang goal mo. Ang totoo, baka nga maging mas madali na lang iyon para sa iyo. w24.09 6 ¶13-14

Martes, Hunyo 9

Ginawa ninyo nang tama ang lahat ng bagay para malutas ang problemang ito.
—2 Cor. 7:11.

Baka nag-aalala ka kasi nakita mo ang epekto sa iba ng nagawa mo. Ano ang mga puwede mong gawin? Kung may magagawa ka para bumuti ang sitwasyon nila, gawin iyon. Humingi rin ng tawad sa kanila at ipakitang talagang nagsisisi ka. Hilangin kay Jehova na tulungan ang mga naapektuhan ng ginawa mo. Matutulungan ka niya, pati na ang nasaktan mo, na patuloy na makapaglingkod sa kaniya at huwag nang masyadong mag-alala. Matuto mula sa pagkakamali mo at maging handang gawin anuman ang ipagawa sa iyo ni Jehova. Tingnan ang nangyari kay propeta Jonas. Imbes na sundin ang utos ng Diyos na pumunta sa Nineve, pumunta si Jonas sa kabilang direksiyon nito. Dinisiplina ni Jehova si Jonas, at natuto siya sa pagkakamali niya. (Jon. 1:1-4, 15-17; 2:7-10) Hindi sinukuan ni Jehova si Jonas. Binigyan niya ulit ito ng pagkakataon na pumunta sa Nineve, at sinunod na ito ni Jonas. Sising-sisi siya sa nagawa niya, pero hindi ito nakapigil sa kaniya na tanggapin ang atas na ibinigay ni Jehova. —Jon. 3:1-3. w24.10 8-9 ¶10-11

Miyerkules, Hunyo 10

Kaya magsisi kayo at manumbalik para mapatawad ang inyong mga kasalanan, para dumating ang mga panahon ng pagpapaghing mula mismo kay Jehova.
—Gawa 3:19.

Sa orihinal na wika, ang pandiwang Griego na isinaling “mapatawad” sa tekstong ito ay nangangahulugang “burahin sa pamamagitan ng pagpunas.” Bukod sa hindi na tayo pinagbabayad ni Jehova sa mga utang, o kasalanan, natin, may iba pa siyang ginagawa—“binubura” niya ang mga ito. Hindi lang niya basta nilalagyan ng malaking X ang rekord ng utang natin;

kung ganito lang ang gagawin niya, mababasa pa rin ang rekord. Para mas maintindihan natin ang ilustrasyon, tandaan na madaling mabura ng tubig ang tinta na ginagamit ng mga tao noon. Puwedeng gumamit ng basang sponge para buurahin ang mga nakasulat. Kaya kapag binura ang utang natin, wala nang makakabasa at makakaalam nito—parang hindi talaga tayo nagkautang. Nagpapasalamat tayo kay Jehova na hindi na niya tayo pinagbabayad sa mga kasalanan natin at binubura pa niya iyon na parang hindi iyon nangyari!—Awit 51:9. w25.02 10 ¶11

Huwebes, Hunyo 11

Huwag kang mayamot at gumawa ng masama.—Awit 37:8.

Kapag ginawan tayo ng mali o inakusahan ng iba, nagtitiwala tayong alam ni Jehova kung ano ang totoo. At dahil alam nating aalisin ni Jehova ang lahat ng kawalang-katarungan, makakatulong ito sa atin na matiis ang sitwasyon natin. Kapag ipinaubaya na natin kay Jehova ang mga bagay-bagay, maiiwasan nating magalit o maghinanakit. Kasi kung hindi natin kokontrolin ang nararamdaman natin, baka may magawa tayong masama. Baka mahirapan din tayong maging masaya at masira pa nga ang kaugnayan natin kay Jehova. Siyempre, hindi natin kayang tularan nang eksaktong-eksakto ang perpektong halimbawa ni Jesus. Kaya kung minsan, baka may magawa o masabi pa rin tayong pagsisisihan natin bandang huli. (Sant. 3:2) Posible rin na may maranasan tayong kawalang-katarungan na may matagal na epekto sa atin sa pisikal at emosyonal na paraan. Baka nga kailangan nating tiisin iyon hangga’t nabubuhay tayo sa sistemang ito. Kung nararanasan mo iyan ngayon, makapagtiwala kang alam ni Jehova ang pinagdadaanan mo. Bukod diyan, isipin si Jesus, na nakaranas din ng kawalang-katarungan. Siguradong nauunawaan niya ang nararam-

daman mo. (Heb. 4:15, 16) Masaya tayo dahil nagbigay si Jehova ng magandang payo sa atin kung paano haharapin ang kawalang-katarungan. w24.11 6 ¶12-13

Biyernes, Hunyo 12

Para maisakatuparan ang gawain ng Diyos, dapat kayong manampalataya sa isinugo niya.—Juan 6:29.

Para “magkaroon ng buhay na walang hanggan,” kailangang manampalataya ng mga tao kay Jesus. (Juan 3:16-18, 36; 17:3) Hindi naniwala ang maraming Judio na kailangan nilang manampalataya kay Jesus. Sinabi nila: “Anong tanda ang ipapakita mo sa amin para maniwala kami sa iyo?” (Juan 6:30) Binanggit nila na noong panahon ni Moises, tumatanggap ang mga ninuno nila ng regular na suplay ng pagkain—ang manna. (Neh. 9:15; Awit 78: 24, 25) Maliwanag, nakapokus pa rin ang mga Judiong iyon sa pagkakaroon ng literal na pagkain. Pagkatapos, binanggit ni Jesus ang isang tinapay na nakakahigit sa manna—ang “tunay na tinapay na mula sa langit” na makakapagbigay ng buhay na walang hanggan. (Juan 6:32) Pero hindi man lang nila tinanong kung ano ang ibig niyang sabihin. Masyado silang nakapokus sa pisikal na pangangailangan nila kaya binale-wala nila ang katotohanang gustong ituro ni Jesus. w24.12 5-6 ¶10-11

Sabado, Hunyo 13

Ang nagtayo ng lahat ng bagay ay ang Diyos.—Heb. 3:4.

Sa school, baka may matutuhan pa ang anak mo na iba pang pattern na makikita sa kalikasan. Halimbawa, makikita sa maraming puno ang isang pattern na umuulit. Ang katawan ng puno ay nahahati sa mga sanga, ang mga sanga naman ay nahahati sa mga tangkay, na nahahati naman sa mas maliliit pang tangkay. Tinatawag ang pattern na ito na fractal. Makikita ang fractal pattern sa iba pang bagay

sa kalikasan. Pero sino ang nasa likod ng magagandang pattern na ito? Bakit napakaganda at napakaayos ng mga ito? Kapag pinag-isipan iyan ng anak mo, mas titibay ang paniniwala niya na Diyos ang luma-lang ng lahat ng bagay. At kapag medyo malaki na siya, kailangan mo ring ituro sa kaniya kung bakit mahalagang sundin ang mga utos ng Diyos. Para magawa iyan, puwede mo siyang tanungin, “Kung Diyos ang lumalang sa atin, hindi ba siya rin ang pinakanakakaalam kung ano ang makakabuti sa atin?” Pagkatapos, puwede mong ipaliwanag na ibinigay sa atin ng Diyos ang Bibliya para ituro kung ano ang mga dapat nating gawin. w24.12 16 ¶8

Linggo, Hunyo 14

Nabalitaan ko na may isang lalaki sa inyo na kinakasama ang asawa ng kaniyang ama. Ang ganitong seksuwal na imoralidad ay mas masahol pa sa ginagawa ng ibang mga bansa.—1 Cor. 5:1.

Sa pamamagitan ng banal na espiritu, ipinasulat ng Diyos kay apostol Pablo na dapat alisin sa kongregasyon ang isang dinagsisising nagkasala. (1 Cor. 5:13) Paano ngayon papakitunguhan ng tapat na mga Kristiyano ang nagkasala? Sinabihan sila ni Pablo na “tigilan ang pakikisama” sa taong iyon. Ano ang ibig sabihin nito? Ipinaliwanag ni Pablo na ‘hindi man lang sila dapat kumaing kasama ng nagkasala.’ (1 Cor. 5:11) Kasi kadalasan na, kapag kumakain tayong kasama ng iba, nage-enjoy tayo sa kuwentuhan at baka nga makasanayan nating lagi na natin siyang kasama. Kaya maliwanag na sinasabi ni Pablo sa kanila na hindi sila dapat makipagsamahan sa taong iyon. Mapoprotektahan nito ang kongregasyon sa masamang impluwensiya ng taong iyon. (1 Cor. 5:5-7) Makakatulong din iyon sa taong nagkasala para makitang talagang nasaktan niya si Jehova. At dahil dito, puwede siyang makadama ng kahihiyang at mapakilos na magsisi. w24.08 15 ¶4-5

Lunes, Hunyo 15

Gayon na lang ang pag-ibig ng Diyos sa sangkatauhan kaya ibinigay niya ang kaniyang kaisa-isang Anak.

—Juan 3:16.

Ang Araw ng Pagbabayad-Sala ay ipinagdiriwang ng mga Israelita taon-taon. Sa araw na iyon, maghahandog ang mataas na saserdote ng mga hayop para sa bayan. Siyempre, hindi lubusang mababayaran ng mga handog na ito ang mga kasalanan nila, kasi nakakahigit ang mga tao kaysa sa mga hayop. Pero hangga't inihahandog ng mga nagsisising Israelita ang mga hinihiling ni Jehova, handa siyang patawarin sila. (Heb. 10:1-4) Napapaaalala ng kaayusang ito sa mga Israelita na makasalanan sila. Pero gumawa si Jehova ng permanenteng kaayusan para mapatawad ang mga kasalanan natin. Isinugo niya ang pinakamamahal niyang Anak, na 'naghandog ng buhay nito nang minsanan para dalhin ang kasalanan ng marami.' (Heb. 9:28) Ibinigay ni Jesus "ang buhay niya bilang pantubos na kapalit ng marami."—Mat. 20:28. w25.02 4 ¶9-10

Martes, Hunyo 16

Patuloy kayong magbantay at manalangin para hindi kayo mahulog sa tukso.

—Mat. 26:41.

"Gusto ng puso, pero mahina ang laman." (Mat. 26:41b) Sa sinabing iyan ni Jesus, ipinakita niya na alam niyang hindi tayo perpekto at na nagkakamali tayo. Pero babala rin ito sa atin na huwag tayong masyadong magtiwala sa sarili. Ilang oras bago sinabi iyon ni Jesus, nangako ang mga alagad niya na hindi nila iiwan ang Panginoon nila. (Mat. 26:35) Gusto nilang gawin ang tama. Pero hindi nila naisip na kapag nalagay sila sa mahirap na sitwasyon, madali silang makakagawa ng mali.

Kaya sinabi ni Jesus sa kanila ang mababasa sa teksto sa araw na ito. Nakakalungkot, hindi patuloy na nagbantay ang mga alagad. Nang arestuhin si Jesus, imbes na samahan siya, natakot sila at tumakas. Iniwan nila si Jesus. Dahil hindi sila nag-ingat, nagawa nila ang mismong ipinangako nila na hindi nila gagawin.—Mat. 26:56. w24.07 14 ¶1-2

Miyerkules, Hunyo 17

Naipagkasundo na tayo sa [Diyos] sa pamamagitan ng kamatayan ng kaniyang Anak.—Roma 5:10.

Naiwala nina Adan at Eva ang napakagandang kaugnayan nila sa Ama nilang si Jehova. Noon, parte sila ng pamilya ng Diyos. (Luc. 3:38) Pero itinakwil sila ni Jehova nang suwayin nila siya. Nangyari ito bago pa sila magkaanak. (Gen. 3:23, 24; 4:1) At dahil nagmula tayo sa kanila, kailangan nating maipagkasundo kay Jehova. (Roma 5:10, 11) Ibig sabihin, kailangan nating magkaroon ng magandang kaugnayan sa kaniya. Ayon sa isang reperensiya, ang salitang Griego para sa terminong "naipagkasundo" ay puwedeng mangahulugang "maging magkaibigan ang dating magkaaway." Nakapagpatibay malaman na si Jehova pa ang unang kumilos para maipagkasundo ang mga tao sa kaniya. Paano niya iyon ginawa? Ang pagbabayad-sala ay ang kaayusang ginawa ng Diyos para maibalik ang mabuting kaugnayan sa kaniya ng makasalananang mga tao. Sa kaayusang ito, naglaan si Jehova ng eksaktong katumbas ni Adan para maibalik ang naiwala nito. w25.02 3-4 ¶7-8

Huwebes, Hunyo 18

Ang kalungkutan na ayon sa kalooban ng Diyos ay umaakay sa pagsisisi at kaligtasan.—2 Cor. 7:10.

Nagkaroon ng magandang resulta nang alisin sa kongregasyon ang nagkasalang lalaki. Sinabi ni apostol Pablo na “ang saway . . . na ibinigay ng karamihan ay sapat na para sa gayong tao.” (2 Cor. 2: 5-8) Ibig sabihin, nagsisi ang lalaki na gumawa ng seksuwal na imoralidad sa asawa ng kaniyang ama. (1 Cor. 5:1) Kaya hindi na siya kailangan pang patuloy na disiplinahin. (Heb. 12:11) Sinabi ni Pablo sa kongregasyon kung ano ang dapat nilang gawin sa lalaking nagkasala: “Dapat na ninyo siyang patawarin nang buong puso at aliwin [at] tiyakin sa kaniya na mahal ninyo siya.” Pansinin na hindi lang basta papayagan ng kongregasyon ang lalaki na bumalik sa bayan ng Diyos. Gusto ni Pablo na tiyakin nila sa taong iyon sa pamamagitan ng sinasabi nila at pakikitungo sa kaniya na talagang mahal at pinatawad na nila siya. Kung gagawin nila iyan, mararamdaman ng nagkasala na masaya ang mga kapatid na nakabalik siya. w24.08 15 ¶14; 16-17 ¶16-8

Biernes, Hunyo 19

Inaalipusta at pinahihirapan kayo nang hayagan.—Heb. 10:33.

Alam ni apostol Pablo kung ano talaga ang kailangan para makapagtiis. Ipinalala niya sa mga Kristiyano na kapag nasa ganitong sitwasyon sila, hindi sila dapat umasa sa sarili nila kundi kay Jehova. Ito ang nagbigay kay Pablo ng lakas ng loob kaya nasabi niya: “Si Jehova ang tumutulong sa akin; hindi ako matatakot.” (Heb. 13:6) May mga kapatid tayo sa ngayon na pinag-uusig. Mapapakita nating mahal natin sila kung ipapanalangin natin sila. Bukod diyan,

baka puwede rin nating maibigay kung ano ang pangangailangan nila. Pero sinasabi ng Bibliya na “pag-uusigin din ang lahat ng gustong mamuhay nang may makadiyos na debosyon bilang mga alagad ni Kristo Jesus.” (2 Tim. 3:12) Kaya lahat tayo, dapat maging handa sa mga mangyayari sa hinaharap. Ibigay sana natin ang buong tiwala natin kay Jehova. Siguradong tutulungan niya tayong matiis ang anumang pagsubok. Darating ang panahon, hindi na ito mararanasan ng lahat ng tapat na lingkod niya.—2 Tes. 1:7, 8. w24.09 12-13 ¶17-18

Sabado, Hunyo 20

Marami sa mga taga-Corinto na nakarinig ng mabuting balita ang nanampalataya at nabautismuhan.—Gawa 18:8.

Ano ang nakatulong sa mga taga-Corinto na magpabautismo? (2 Cor. 10:4, 5) Ang Salita ng Diyos at ang banal na espiritu ang nakatulong sa kanila na gumawa ng malalaking pagbabago. (Heb. 4:12) Dahil tinanggap ng mga taga-Corinto ang mabuting balita tungkol sa Kristo, nagawa nilang talikuran ang masasamang gawain gaya ng paglalasing, pagnanakaw, at homoseksuwalidad. (1 Cor. 6:9-11) Hindi madali para sa mga taga-Corinto na talikuran ang mga nakasanayan na nila. Pero hindi nila inisip na imposible na silang maging Kristiyano. Talagang nagsikap sila para makalakad sa makitid na daan papunta sa buhay. (Mat. 7:13, 14) May pinagsisi-kapan ka rin bang baguhin sa buhay mo para mabautismuhan? Huwag kang susuko! Hilingin ang banal na espiritu ni Jehova para malabanan mo ang kagustuhang gumawa ng masama. w25.03 6 ¶15-17

Linggo, Hunyo 21

Kung ang sinuman sa inyo ay kulang sa karunungan, patuloy siyang humingi sa Diyos.—Sant. 1:5.

Nangangako si Jehova na bibigyan ka niya ng karunungan at kaunawaan para malaman mo kung anong desisyon ang magpapasaya sa kaniya. “Sagana Siyang nagbibigay [ng ganiyang karunungan] sa lahat at hindi nandurusta.” Kapag hiningi mo na ang tulong ni Jehova sa panalangin, pakinggan ang sagot niya. Halimbawa, kapag naligaw ka sa isang lugar, baka maisip mong magtanong sa tagaroon. Pero aalis ka ba nang hindi mo pa naririnig ang sagot niya? Siyempre hindi. Makikinig ka munang mabuti sa direksiyong sasabihin niya. Kaya kapag hiningi mo ang tulong ni Jehova, aalamin mo rin ang sagot niya sa tulong ng mga utos at prinsipyo sa Bibliya na bagay sa sitwasyon mo. Halimbawa, kapag naimbitahan ka sa isang gathering, puwede mong pag-isipan ang sinasabi ng Bibliya tungkol sa magulong pagsasaya, masasamang kasama, at pag-una sa Kaharian imbes na sa sarili mong kagustuhan.—Mat. 6:33; Roma 13:13; 1 Cor. 15:33. w25.01 16 ¶6-7

Lunes, Hunyo 22

Ang mga lingkod ko ay kakain, pero kayo ay magugutom.
—Isa. 65:13.

Ipinakita sa hula ni Isaías ang malaking pagkakaiba ng mga nasa espirituwal na paraiso at ng mga wala dito. Saganang inilalaan ni Jehova ang espirituwal na pangangailangan ng mga mananamba niya. Mayroon tayong banal na espiritu, nasusulat na Salita niya, at saganang espirituwal na pagkain para ‘makakain tayo, makainom, at maging masaya.’ (Ihambing ang Apocalipsis 22:17.) Pero ang mga wala sa espirituwal na para-

iso ay ‘nagugutom, nauuhaw, at nasa kahiya-hiyang kalagayan.’ Hindi nasa-sapatan ang espirituwal na pangangailangan nila. (Amos 8:11) Saganang inilalaan ni Jehova sa bayan niya ang kailangan nila, kasama na ang espirituwal na pagkain. (Joel 2:21-24) Inilaan niya ang Bibliya at mga salig-Bibliyang publikasyon, ang website natin, pati na ang mga pulong, asamblea, at kombensiyon. Araw-araw, makakakain tayo sa espirituwal na mga paglalaan ni Jehova, kaya nagiging mas malusog tayo at maginhawa ang pakiramdam. w24.04 21 ¶5-6

Martes, Hunyo 23

Laging maging mabait sa inyong pananalita.—Col. 4:6.

Kung desidido ka nang ligawan ang isang tao, puwede mo siyang kausapin sa isang lugar na maraming tao o sa telepono. Sabihin sa kaniya na gusto mo siya at na gusto mo siyang mas makilala. (1 Cor. 14:9) Kung kailangan, bigyan mo siya ng panahon na makapag-isip kung ano ang isasagot niya sa iyo. (Kaw. 15:28) At kung sabihin niyang hindi siya interesado sa iyo, igalang ang desisyon niya. Paano kung may nagsabi sa iyo na gusto ka niya? Siguradong nag-ipon siya ng lakas ng loob bago siya lumapit sa iyo. Kaya maging mabait at magpakita ng paggalang. Kung kailangan mo ng panahon para mag-isip, sabihin ito sa kaniya. Pero huwag itong patagalin. (Kaw. 13:12) Kung hindi ka interesado sa kaniya, sabihin ito sa malinaw at mabait na paraan. Pero kung interesado ka, sabihin sa kaniya ang nararamdaman mo at ang inaasahan mo sa panahon ng pagliligawan ninyo. Baka magkaiba kayo ng inaasahan. w24.05 24 ¶12-13

Miyerkules, Hunyo 24

Lalabanan kita sa ngalan ni Jehova ng mga hukbo.—1 Sam. 17:45.

Minsan, pumunta si David sa kampo ng hukbo ng mga Israelita. Malamang na teenager na siya noon. Nakita niyang takot na takot ang mga mandirigma dahil hinahamon ng higanteng Filisteong si Goliat ang “hukbo ng Israel.” (1 Sam. 17:10, 11) Natakot sila dahil nagpokus sila sa laki ng higante at sa pananakot nito. (1 Sam. 17:24, 25) Pero iba si David. Imbes na isiping ang hukbo ng Israel ang hinahamon ni Goliat, malinaw sa kaniya na ang “hukbo ng Diyos na buháy” ang iniinsulto nito. (1 Sam. 17:26) Kay Jehova siya nagpokus. Nagtiwala siya na kung tinulungan siya ni Jehova noong nagpapastol siya, tutulungan din siya ngayon ng Diyos. Kaya nilabanan niya si Goliat, at siyempre, nanalo siya!—1 Sam. 17:45-51. w24.06 21 ¶7

Huwebes, Hunyo 25

Huwag kang matakot, dahil kasama mo ako. Huwag kang mag-alala, dahil ako ang Diyos mo. Papatibayin kita, oo, tutulungan kita, talagang aalalayan kita sa pamamagitan ng matuwid kong kanang kamay.—Isa. 41:10.

Pag-isipan kung ano na ang buhay natin ngayon kung hindi tayo naglilingkod kay Jehova. Makakatulong iyan sa atin na manatiling tapat at masabi ang gaya ng sinabi ng salmista: “Nakakabuti [sa akin] ang paglapit sa Diyos.” (Awit 73:28) Mahaharap natin ang anumang hamon sa mga huling araw na ito kasi naglilingkod tayo sa “buháy at tunay na Diyos.” (1 Tes. 1:9) Talagang nagmamalasakit siya sa atin at kumikilos siya para tulungan tayo. Hindi niya pinabayaan ang mga lingkod niya noon, at ganiyan din ang gagawin niya sa atin ngayon. Napakalapit na ng malaking ka-

pighatian. Pero hindi natin iyon haharapin nang mag-isa; kasama natin si Jehova. Kaya lakasan natin ang loob natin at masabi sana ng bawat isa sa atin: “Si Jehova ang tumutulong sa akin; hindi ako matakot.”—Heb. 13:5, 6. w24.06 25 ¶17-18

Biyernes, Hunyo 26

Makikita [ninyo] ang pagkakaiba ng matuwid at ng masama.
—Mal. 3:18.

Sinasabi sa Bibliya ang pangalan ng mahigit 40 lalaki na naging hari ng Israel. May mabubuting hari na nakagawa ng masama. Isa na diyan si Haring David. Sinabi ni Jehova: “Sumunod sa akin nang kaniyang buong puso [ang lingkod kong si David]; lagi niyang ginagawa kung ano ang tama sa paningin ko.” (1 Hari 14:8) Pero alam nating nakagawa ng imoralidad si David sa isang babangeng may asawa at nagpakanang ipapatay ang asawa nito sa digmaan. (2 Sam. 11:4, 14, 15) Sinabi rin sa Bibliya ang ilan sa mabubuting bagay na ginawa ng di-tapat na mga hari. Isa diyan si Rehoboam. Sa paningin ni Jehova, “ginawa [ng haring ito] ang masama.” (2 Cro. 12:14) Pero may nagawa ring mabuti si Rehoboam. Sumunod siya nang utusan siya ni Jehova na huwag makipaglaban sa 10 tribo ng Israel at hayaan silang pumili ng ibang hari. Ginawa rin niyang matibay ang mga lunsod sa kaharian niya para maprotektahan ang bayan ng Diyos mula sa mga kaaway nito. (1 Hari 12:21-24; 2 Cro. 11:5-12) Bakit itinuring ni Jehova na tapat ang ilang hari at hindi naman ang iba? Maliwanag na naging basehan ni Jehova ang puso nila, pag-sisisi, at paninindigan sa tunay na pag-samba. w24.07 20 ¶1-3

Sabado, Hunyo 27

Palakihin sila ayon sa disiplina at patnubay ni Jehova.—Efe. 6:4.

Paano naman kung isang bautisadong menor de edad—wala pang 18 taóng gulang—ang nakagawa ng malubhang pagkakasala? Isasaayos ng lupon ng matatanda na kausapin siya ng dalawang elder kasama ang mga Saksing magulang niya. Alamin ng mga elder kung ano na ang mga ginawa ng mga magulang para tulungan ang anak nila na magbago at magsisi. Kung nakikipagtulungan ang menor de edad at kaya nang asikasuhin ng mga magulang ang sitwasyon, puwedeng magpasiya ang dalawang elder na hindi na gumawa ng higit pang aksiyon. Tatal, mga magulang naman talaga ang binigyan ni Jehova ng responsibilidad na ituwid ang mga anak nila sa maibiging paraan. (Deut. 6:6, 7; Kaw. 6:20; 22:6; Efe. 6:2-4) Sa panapanahon, kukumustahin ng mga elder ang mga magulang para matiyak na natutulungan ang menor de edad. Pero pano kung ayaw magbago ng menor de edad? Sa ganiyang kaso, kakausapin na siya ng isang komite ng mga elder kasama ang Saksi niyang mga magulang. w24.08 24 ¶18

Linggo, Hunyo 28

May higit na kaligayahan sa pagbibigay kaysa sa pagtanggap.—Gawa 20:35.

Masaya tayo kapag may natatanggap tayong regalo. Pero iba pa rin ang saya kapag tayo ang nagbibigay. Dahil sa pagkakagawa sa atin ni Jehova, nasa atin ang kontrol kung gusto nating maging mas masaya. Kung maghahanap tayo ng mga pagkakataon para maging mas mapagbigay, magiging mas masaya tayo. Talagang ipinagpapasalamat natin na ganiyan tayo ginawa ni Jehova. (Awit

139:14) Gaya nga ng sabi ng Bibliya, masaya ang nagbibigay. Kaya naman maiintindihan natin kung bakit tinawag si Jehova na “maligayang Diyos.” (1 Tim. 1:11) Siya ang pinakaunang nagbigay at ang pinakamagandang halimbawa sa paggawa nito. Sinabi ni apostol Pablo na dahil kay Jehova, “tayo ay may buhay at kumikilos at umiiral.” (Gawa 17:28) Talagang mula sa kaniya “ang bawat mabuting kaloob at ang bawat perpektong regalo”! (Sant. 1:17) Siguradong gusto nating lahat na maranasan ang saya ng pagbibigay. Magagawa natin iyan kung tutularan natin ang pagbibigay ni Jehova.—Efe. 5:1. w24.09 26 ¶1-4

Lunes, Hunyo 29

Anumang antas ng pagsulong ang naabot na natin, patuloy tayong lumakad nang maayos sa gayong landasin.—Fil. 3:16.

Pagkatapos pag-aralan ang mga kuwalipikasyon para maging elder, baka maramdaman ng ilang ministeryal na lingkod na hindi nila kayang maabot ang pribilehiyong iyan. Pero tandaan na hindi inaasahan ni Jehova o ng organisasyon niya na maipapakita mo nang perpekto ang mga kuwalipikasyong ito. (1 Ped. 2:21) Tandaan din na tutulungan ka ng banal na espiritu ni Jehova na maabot ang mga ito. (Fil. 2:13) May naiisip ka bang katangian na gusto mong mapasulong? Ipanalangin ito kay Jehova, mag-research tungkol dito, at hingin ang payo ng isa sa mga elder kung pano mo ito mapapasulong. Patuloy na abutin ang pagiging elder! Hilingin kay Jehova na sanayin ka para mas mapaglingkuran mo siya at ang kongregasyon. (Isa. 64:8) Pagpalain sana ni Jehova ang mga pagsisikap mo na maging isang elder. w24.11 25 ¶17-18

Martes, Hunyo 30

Matuwid ang Diyos, kaya hindi niya lilimutin ang mga ginawa ninyo at ang pag-ibig na ipinakita ninyo para sa pangalan niya sa pamamagitan ng paglilingkod at patuloy na paglilingkod sa mga banal.—Heb. 6:10.

Huwag nating isipin na dapat lang na patawarin tayo ni Jehova dahil matagal na tayong naglilingkod sa kaniya. Totoo, pinapahalagahan ni Jehova ang katapatan natin. Pero ibinigay niya ang Anak niya bilang regalo, hindi bilang bayad sa mga nagawa nating paglilingkod sa kaniya. Kaya maling isipin na obligado si Jehova na patawarin tayo. Kasi kung ganoon, para nating sinasabi na hindi natin kailangan ang pantubos. (Ihambing ang Galacia 2:21.) Alam ni apostol Pablo na hindi siya karapat-dapat sa pagpatawad ni Jehova. Kaya bakit ginawa pa rin niya ang lahat para paglingkuran ang Diyos? Kasi gusto niyang ipakitang nagpapasalamat siya sa walang-kapantay na kabaitan ni Jehova. (Efe. 3:7) Gaya ni Pablo, ginagawa rin natin ang lahat sa paglilingkod para ipakitang nagpapasalamat tayo sa awa ni Jehova, hindi para maging karapat-dapat dito. w25.01 27 ¶5-6

Miyerkules, Hulyo 1

Wala pa akong nakitang matuwid na pinabayaan.—Awit 37:25.

Ang ilan sa mga lingkod ni Jehova ay nagkakaedad na, mahina na ang kalusugan, o may kapansanan. Dahil dito, baka maramdaman nilang hindi na sila mahalaga kay Jehova at maitanong nila, ‘May nagagawa pa ba ako para kay Jehova?’ Naisip din iyan ng manunulat ng Awit 71. Ipinanalangin niya: “Huwag mo akong iwan kapag mahina na ako.” (Awit 71: 9, 18) Pero kahit nanghihina ang salmista, sigurado siya na patuloy siyang su-

suportahan at gagabayan ni Jehova kung mananatili siyang tapat. Natutuhan niya na natutuwa si Jehova sa mga lingkod Niyang ibinigay ang buong makakaya nila kahit may mga limitasyon sila. (Awit 37:23-25) Mga may-edad, isipin kung ano ang tingin sa inyo ni Jehova. Matutulungan niya kayong manatiling tapat kahit may mga limitasyon na kayo. (Awit 92:12-15) Imbes na isip-isipin ang mga bagay na hindi na ninyo nagagawa, magpokus sa mga kaya pa ninyong gawin. w24.10 28 ¶14-16

Huwebes, Hulyo 2

Tungkol sa pagkain ng mga pagkaing inihandog sa mga idolo, alam natin na walang halaga ang idolo.—1 Cor. 8:4.

Ang mga Kristiyanong hindi pa maygulang ay kadalasan nang nahihirapang magdesisyon sa mga sitwasyong hindi espesipikong binabanggit sa Bibliya. Kapag walang espesipikong utos sa Bibliya, baka maisip ng ilan na puwede nilang gawin ang anumang gusto nila. Baka may iba naman na gumawa ng patakaran kahit hindi naman kailangan. Halimbawa, sumulat kay apostol Pablo ang mga Kristiyano sa Corinto para itanong kung puwede silang kumain ng karne na inihandog sa mga idolo. Imbes na sabihin kung ano ang gagawin nila, sinabi ni Pablo na may ‘karapatang pumili’ ang bawat isa ayon sa konsensiya nila. Bumanggit siya ng ilang prinsipyo sa Bibliya na makakatulong sa kanila na makapagdesisyon nang hindi sila makokonsensiya at hindi makakatisod sa iba. (1 Cor. 8:7-9) Tinulungan ni Pablo ang mga taga-Corinto na magdesisyon ayon sa Kasulatan imbes na umasa sa iba o maghanap ng espesipikong mga utos. Talagang nagsikap siyang tulungan sila na maging maygulang sa espirituwal. w24.04 5 ¶14

Biyernes, Hulyo 3

Ako, si Jehova, ay sumusuri sa puso . . . para ibigay sa bawat isa ang nararapat sa landasin niya.—Jer. 17:10.

Noong panahon ni Jonas, nagkaroon ng pagkakataong magsisi ang mga Ninevita. Isa pa, tandaan ang sinabi ni Jesus tungkol sa mga ‘bubuhaying muli sa paghatol.’ Kasama dito ang “mga gumawa ng masasamang bagay.” (Juan 5:29) Kaya lumilitaw na may pag-asa pa ang ilang taga-Sodoma at Gomorra. Posibleng buhaying muli ang ilan sa kanila, at baka nga magkaroon pa tayo ng pagkakataong turuan sila tungkol kay Jehova at kay Jesu-Kristo. Laging ‘sinusuri ni Jehova ang puso at kaloob-looban ng isip’ ng isang tao. Kaya kapag nagdedesisyon siya kung sino ang bibigyan niya ng pag-asang mabuhay-muli, makakasigurado tayong tatanggapin ng bawat isa kung ano ang nararapat sa kaniya. Hinding-hindi labagin ni Jehova ang mga matuwid na pamantayan niya kapag humahatol. Pero magpapakita siya ng awa hangga’t posible. Kaya hindi natin puwedeng sabihin na wala nang pag-asang mabuhay-muli ang isa hangga’t hindi ito malinaw na sinasabi ng Bibliya! w24.05 5-6 ¶15-16

Sabado, Hulyo 4

Huwag kang matakot. Tutulungan kita.—Isa. 41:13.

Mula noon, napapalakas ng mensahe ng Diyos ang mga lingkod niya kapag may gagampanan silang mahirap na atas. Ganiyan ang nangyari kay propeta Jeremias. Nag-aalangan siyang tanggapin ang atas na mangaral na ibinigay sa kaniya ni Jehova. Sinabi niya: “Hindi ako marunong magsalita, dahil bata pa ako.” (Jer. 1:6) Paano niya iyan napagtagumpayan? Pinalakas siya ng Salita ng Diyos. Sinabi niya: “Naging gaya ito ng

nagniningas na apoy na nakakulong sa mga buto ko, at pagod na ako sa kapipigil.” (Jer. 20:8, 9) Kahit mahirap ang teritoryo ni Jeremias, ang mensaheng ipinapangaral niya ang nagbigay ng lakas sa kaniya para magampanan ang atas niya. Napapalakas ang mga Kristiyano ng Salita ng Diyos. Sinabi ni apostol Pablo na ang pagkuha ng tumpak na kaalaman ay nakakatulong sa kanila na “makapamuhay . . . nang karapat-dapat sa harap ni Jehova” habang ‘namumunga sila dahil sa kanilang mabubuting gawa.’—Col. 1:9, 10. w24.04 14-15 ¶2-4

Linggo, Hulyo 5

Pinahiran [ng saserdoteng si Zadok] si Solomon.—1 Hari 1:39.

Nanatiling tapat si Zadok kay Jehova sa kabila ng desisyon ng mataas na saserdoteng si Abiatar na suportahan ang anak ni David na si Adonias, na nangatangkang agawin ang trono. Nang mabunyang ang pakana ni Adonias, pinili ni David sina Zadok, Natan, at Benaias para gawing hari si Solomon. (1 Hari 1: 32-34) Talagang nagtitiwala si David kay Zadok! Ano kaya ang nakatulong kay Zadok na manatiling tapat? Malamang na napatibay siya ng magandang halimbawa ng iba pang tapat na lingkod ni Jehova, gaya ni Natan at ng iba pang tagasuporta ni Haring David. At nang maging hari na si Solomon, ‘inatasan niya ang saserdoteng si Zadok kapalit ni Abiatar.’ (1 Hari 2:35) Paano mo matutularan si Zadok? Kapag iniwan ng isa na malapit sa iyo si Jehova, ipakita mong si Jehova ang pinakamahalaga sa iyo. (Jos. 24:15) Bibigyan ka niya ng lakas na magawa ang tama. Kaya laging manalangin sa kaniya at manatiling malapit sa iba pang tapat na lingkod niya. Mahalaga kay Jehova ang katapatan mo, at gagantimpalaan ka niya dahil dito.—2 Sam. 22:26. w24.07 6-7 ¶16-17

Lunes, Hulyo 6

Huwag tayong tumigil sa paggawa ng mabuti.—Gal. 6:9.

Makikita sa Awit 15:2 na dapat sikapin ng isang kaibigan ng Diyos na ‘magkaroon ng malinis na pamumuhay at gawin ang tama.’ Para manatili tayong kaibigan ng Diyos, dapat na patuloy nating gawin iyan. Pero posible ba talaga tayong magkaroon ng “malinis na pamumuhay” kahit hindi tayo perpekto? Oo. Kung gagawin natin ang buong makakaya natin para sundin si Jehova, para sa kaniya, ‘malinis ang pamumuhay’ natin. Nang mag-alay tayo ng sarili sa Diyos at magpabautismo, simula pa lang iyon ng pakikipagkaibigan natin sa kaniya. Noong panahon ng Bibliya, hindi dahil Israelita ang isa, awtomatiko na siyang panauhin ni Jehova. May mga tumatawag noon sa Diyos pero hindi “ayon sa katotohanan at katuwiran.” (Isa. 48:1) Para maipakita ng mga Israelita na talagang gusto nilang maging panauhin ni Jehova, kailangan nilang malaman ang mga utos niya at sundin ang mga iyon. Ganiyan din sa ngayon. Para maging malapit na kaibigan tayo ni Jehova, hindi sapat na magpabautismo lang tayo at sumama sa kongregasyon. Dapat na patuloy nating ‘gawin ang tama.’ w24.06 9 ¶4; 10 ¶6

Martes, Hulyo 7

Tularan ninyo ang Diyos.
—Efe. 5:1.

Paano ipinapakita ni Jehova na mapagbigay siya? Tingnan ang ilang halimbawa. Ibinibigay ni Jehova ang mga pangangailangan natin. Hindi man laging maalwan ang buhay natin, nagpapasalamat tayo kay Jehova dahil ibinibigay niya kung ano ang kailangan natin. Halimbawa, dahil sa kaniya, mayroon tayong nakakain, naisusuot, at natitirhan.

(Awit 4:8; Mat. 6:31-33; 1 Tim. 6:6-8) Hindi lang ito ginagawa ni Jehova dahil obligado siyang gawin ito. Pag-isipan ang mga sinabi ni Jesus sa Mateo 6: 25, 26. Dito, ginamit ni Jesus na halimbawa ang mga ibon. Sinabi niya: “Hindi sila nagtatanim o umaani o nagtitipon sa kamalig.” Pero tingnan ang sumunod na sinabi ni Jesus: “Pinakakain sila ng inyong Ama sa langit.” Pagkatapos, itinanong niya: “Hindi ba mas mahalaga kayo kaysa sa kanila?” Ang aral? Kung pinaglalaanan ni Jehova ang mga hayop, siguradong paglalaanan niya rin tayo. Gaya ng isang mapagmahal na ama, ginagawa ito ni Jehova sa pamilya niya dahil mahal niya sila.—Awit 145:16; Mat. 6:32. w24.09 26-27 ¶4-6

Miyerkules, Hulyo 8

Ang mga lalaking naglilingkod sa mahusay na paraan ay nagkakaroon ng magandang reputasyon at malaking kalayaan sa pagsasalita tungkol sa pananampalataya.—1 Tim. 3:13.

Ang isang ministeryal na lingkod ay isang bautisadong brother na inatasan sa pamamagitan ng banal na espiritu. Tinutulungan nila ang mga elder sa iba’t ibang gawain sa kongregasyon. Ang pinakamahalaga, mahal ng mga ministeryal na lingkod si Jehova at sinusunod nila ang mga pamantayan niya. Mahal na mahal din nila ang mga kapatid. (Mat. 22:37-39) Ano ang kailangang gawin ng isang bautisadong brother para maging ministeryal na lingkod? Sinasabi sa Bibliya ang mga kuwalipikasyon para maatasan bilang isang ministeryal na lingkod. (1 Tim. 3:8-10, 12) Para maa-bot ang pribilehiyong ito, puwede mong pag-aralan ang mga kuwalipikasyong binabanggit sa Bibliya at sikaping gawin ang mga iyon. Pero bago mo gawin iyan, dapat mo munang suriin ang motibo mo. w24.11 15 ¶4-5

Huwebes, Hulyo 9

Tinanggap ninyo ito, hindi bilang salita ng tao, kundi gaya ng kung ano talaga ito, bilang salita ng Diyos.
—1 Tes. 2:13.

May mga taong nagsasabi na maraming beses na nilang nabasa ang Bibliya. Pero talaga bang naniniwala sila dito? Isinasabuhay ba nila ang mga binabasa nila? Nakakalungkot, madalas na hindi. Pero hindi ganiyan ang mga lingkod ni Jehova. Hinahayaan nating maimpluwensiyahan nito ang buhay natin. Pero hindi laging madali na basahin at isabuhay ang Salita ng Diyos. Baka nahihirapan tayong maghanap ng oras sa pagbabasa, o baka nakasana-yan na nating gawin ito nang mabilisan kaya wala tayong masyadong natututuhan. Baka nasisiraan din tayo ng loob sa dami ng kailangan nating pasulungin. Anuman ang sitwasyon mo ngayon, kakayanin mo iyan sa tulong ni Jehova. Maging determinado sana tayo na maging tagatupad ng Salita ng Diyos. Kung patuloy nating babasahin ang Bibliya at isasabuhay ang mga natututuhan natin, siguradong magiging mas masaya tayo.
—Sant. 1:25. w24.09 7 ¶15-16

Biyernes, Hulyo 10

Patuloy na humingi at bibigyan kayo.
—Luc. 11:9.

Ginagamit ni Jehova ang banal na espiritu niya para patibayin tayo kapag may nangyaring hindi maganda sa atin o na-trauma tayo. Kung sobra kang nasasaktan dahil sa mga nangyari sa iyo, puwede mong sabihin ang lahat ng nararamdaman mo kay Jehova. Puwede kang manalangin sa kaniya nang kahit ilang beses at kahit gaano katagal. (Awit 86:3; 88:1) Laging humingi kay Jehova ng banal na espiritu niya. Hinding-hindi niya iyon ipagdadamot sa iyo. Nanghi-

hina ka ba dahil sa mga pinagdadaanan mo? Mapapalakas ka ng banal na espiritu para patuloy kang makapaglingkod kay Jehova nang tapat. (Efe. 3:16) Pagkatapos mong humiling ng banal na espiritu kay Jehova, ano pa ang dapat mong gawin? Makibahagi sa mga gawain na tutulong sa iyo na tumanggap nito, kasama dito ang pagdalo sa mga pulong at pangangaral. Basahin ang Bibliya araw-araw para mapuno ang isip mo ng mga kaisipan ni Jehova. (Fil. 4:8, 9) Tingnan ang mga halimbawa sa Bibliya na nakaranas ng mga problema, at pagisipan kung paano sila tinulungan ni Jehova na magtiis. w24.10 9 ¶12-14

Sabado, Hulyo 11

Gayon na lang ang pag-ibig ng Diyos sa sangkatauhan.—Juan 3:16.

Gaya ni Jehova at ni Jesus, mahal natin ang mga tao. (Kaw. 8:31) Naaawa tayo sa mga taong nabubuhay na “walang Diyos” at “walang pag-asa.” (Efe. 2:12) Nalulunod na sila sa problema, at nasa atin ang makakatulong sa kanila—ang mabuting balita tungkol sa Kaharian ng Diyos. Mahal natin sila at nagmamalasakit tayo sa kanila, kaya ginagawa natin ang lahat para masabi sa kanila ang mabuting balita. Alam natin na magbibigay ito sa kanila ng pag-asa, tutulong sa kanila na maging masaya ngayon, at magbibigay sa kanila ng pagkakataong maranasan ang “tunay na buhay”—ang buhay na walang hanggan sa Paraiso. (1 Tim. 6:19) Papalapit na nang papalapit ang pagkawasak ng masamang sanlibutang ito. At dahil mahal natin ang mga tao, gusto natin silang babalaan. (Ezek. 33:7, 8) Alam natin na sa malaking kapighatian, aalisin ang lahat ng huwad na relihiyon at pupuksain ang masamang sistemang ito sa Armagedon.—Apoc. 16:14, 16; 17:16, 17; 19:11, 19, 20. w24.05 16 ¶8-9

Lingo, Hulyo 12

Huwag ninyong ipaghiganti ang inyong sarili, mga minamahal, kundi bigyang-daan ninyo ang poot; dahil nasusulat: “Akin ang paghihiganti; ako ang gaganti,” sabi ni Jehova.”—Roma 12:19.

Pinayuhan ni apostol Pablo ang mga Kristiyano na ‘bigyang-daan ang poot.’ Kaninong poot? Sa konteksto, poot ni Jehova ang tinutukoy dito. Binibigyang-daan natin ang poot ni Jehova kapag hinahayaan nating itama niya ang mga bagay-bagay sa panahon niya at sa paraan niya. Ganito ang sinabi ni John, isang brother na nakaranas ng kawalang-katarungan: “Pinipigilan ko ang sarili ko na itama ang mga bagay-bagay sa paraan ko. Natulungan ako ng Roma 12:19 na hintayin si Jehova.” Makakabuti kung hihintayin natin si Jehova na itama ang mga bagay-bagay. Kapag ginawa natin iyan, maiiwasan nating sobrang ma-stress at madismaya kasi hindi na natin kailangang solohin ang isang mahirap na problema. Tandaan, gusto tayong tulungan ni Jehova. Para bang sinasabi niya, ‘Ako na’ng bahala.’ Kung magti-tiwala tayo sa pangako ni Jehova na siya ang gaganti, hindi na natin kailangang isip-isipin ang problema kasi sigurado tayong gagawin niya ang pinakamabuti para sa lahat. w24.11 6 ¶14-15

Lunes, Hulyo 13

Bigyan mo kami ng pagkain sa bawat araw ayon sa kailangan namin.
—Luc. 11:3.

Huwag nating gawing pangunahin sa buhay natin ang materyal na mga bagay. Idiniin iyan ni apostol Pablo nang sumulat siya sa mga Kristiyano noon. Binanggit niya ang masasamang ginawa ng mga Israelita noong nasa ilang sila, kasama na ang nangyari malapit sa Bundok Sinai. Binabalaan niya ang mga Kristiyano na

‘huwag magnasa ng nakapipinsalang mga bagay gaya ng ginawa ng mga Israelita.’ (1 Cor. 10:6, 7, 11) Dahil sa kasakiman ng mga Israelita, naging ‘nakapipinsala’ pati ang pagkain na makahimalang ibinigay ni Jehova. (Bil. 11:4-6, 31-34) At noong sambahin nila ang gintong guya, ipinakita ng mga Israelita na mas mahalaga sa kanila ang pagkain, pag-inom, at pagsasaya kaysa sa pagsunod kay Jehova. (Ex. 32:4-6) Ginamit ni Pablo ang halimbawa nila para babalaan ang mga Kristiyanong nabubuhay noong malapit nang matapos ang Judiong sistema noong 70 C.E. Malapit na ring matapos ngayon ang sistema ng mundong ito, kaya talagang dapat nating pakinggan ang babala ni Pablo. w24.12 6 ¶13

Martes, Hulyo 14

Masiyahan ka nawa sa iyong asawa mula pa noong kabataan mo.—Kaw. 5:18.

“Maligayang Diyos” si Jehova, at gusto niya rin tayong maging masaya. (1 Tim. 1:11) Binigyan niya tayo ng napakaraming regalo para ma-enjoy ang buhay. (Sant. 1:17) Isa sa mga regalang iyon ang pag-aasawa. Kapag naging mag-asawa ang isang lalaki’t babae, nangangako silang mamahalin, irerespeto, at papahalagaan nila ang isa’t isa. Kung papanatilihin nila ang malapit na ugnayan nila, talagang magiging masaya sila. Nakakalungkot, hindi tinutupad ng maraming mag-asawa ngayon ang pangako nila noong ikasal sila. Dahil dito, hindi sila masaya. Paano nga ba gusto ni Jehova na pakitunguhan ng lalaki ang asawa niya? Inutusan ni Jehova ang mga lalaki na parangalan ang asawa nila. Kapag pina-parangalan mo ang isang tao, ipinapakita mo sa salita at gawa na iginagalang mo siya. Kaya napaparangalan ng lalaki ang asawa niya kapag nakikitungo siya dito nang mabait at may pagmamahal.—1 Ped. 3:7. w25.01 8 ¶1-2; 9 ¶4-5

Miyerkules, Hulyo 15

Si Jehova ang tumutulong sa akin; hindi ako matatakot.—Heb. 13:6.

Siguradong nakatulong ang liham ni apostol Pablo sa mga Hebreong Kristiyano para maging handa sila sa kapihatiing mararanasan nila. Pinatibay niya silang palalimin ang kaalaman nila sa Kasulatan at pag-isipan itong mabuti para mas maintindihan ito. Tutulong iyan sa kanila na tanggihan ang mga turo na magpapahina sa pananam-palataya nila. Sinabi rin niya sa kanila na patibayin ang pananampalataya nila para madali nilang masunod ang mga tagubilin ni Jesus at ng mga nangunguna sa kongregasyon. Tinulungan niya rin sila na matiis ang pag-uusig. Ipinali-wanag niya kung ano ang dapat na mag-ing pananaw nila dito—dapat nila itong ituring na pagsasanay sa kanila ni Jeho-va. Masunod din sana natin ang mga pa-yong iyan ng Bibliya. Kung gagawin natin iyan, makakapagtiis tayo at maka-kapanatiling tapat hanggang wakas.—Heb. 3:14. w24.09 12 ¶17; 13 ¶19

Huwebes, Hulyo 16

Napabanal tayo sa pamamagitan ng paghahandog ng katawan ni Jesu-Kristo nang minsanan.—Heb. 10:10.

Ayon sa Bibliya, ang pantubos ang halagang kailangan para mabayaran ang kasalanan natin at maipagkasundo tayo sa Diyos. Ito ang magiging basehan ni Jeho-va para ibalik ang naiwala. Ano nga bang klase ng pantubos ang kailangan? Para masagot iyan, tandaan ang naiwala nina Adan at Eva—ang pagiging perpekto at ang pagkakataong mabuhay nang walang hanggan. Kaya ang pantubos ay dapat na kasinghalaga ng buhay na naiwala nila. (1 Tim. 2:6) Para mabaya-ran ito, kailangan ng isang adultong la-

laki na (1) perpekto, (2) may pagka-kataong mabuhay nang walang hanggan sa lupa, at (3) handang ibigay ang buhay niya para sa atin. Tingnan ang tatlong dahilan kung bakit puwedeng ma-ging pantubos si Jesus. (1) Perpekto siya—“hindi siya nagkasala.” (1 Ped. 2: 22) (2) Dahil diyan, puwede siyang ma-buhay nang walang hanggan sa lupa. (3) Handa siyang mamatay at ibigay ang buhay niya para sa atin.—Heb. 10:9. w25.02 4-5 ¶11-12

Biernes, Hulyo 17

Hindi Siya maramot sa pagbibigay ng espiritu.—Juan 3:34.

Laging tandaan na mahal ka ni Jehova at na gusto ka niyang ma-ging bahagi ng pamilya niya. Hindi iyan magbabago kahit ano pang hadlang sa bautismo ang mapaharap sa iyo. Si-nabi ni Jesus sa ilan sa mga alagad niya noon: “Kung may pananampalata-ya kayo na kasinliit ng binhi ng mustasa, sasabihin ninyo sa bundok na ito, ‘Lu-mipat ka roon,’ at lilipat ito, at walang magiging imposible para sa inyo.” (Mat. 17:20) Ilang taon pa lang kasama ni Je-sus ang mga kausap niya noon, kaya kailangan pa nilang patatagin ang pana-nampalataya nila. Pero tiniyak sa kanila ni Jesus na kung matibay ang pananam-palataya nila, tutulungan sila ni Jeho-va na maalis ang malalaking hadlang. At gagawin din iyan ni Jehova para sa iyo! Kung may nakakahadlang sa iyo na magpabautismo, kumilos agad para ma-lampasan iyon. Ialay ang sarili mo kay Jehova at magpabautismo. Iyan ang pi-nakamagandang desisyon na magagawa mo! w25.03 6-7 ¶18-20

Sabado, Hulyo 18

Kakampi ko si Jehova; hindi ako matatakot.—Awit 118:6.

Makakayanan natin ang mga problema kung tatandaan nating handa tayong tulungan ng Diyos na buháy. Titibay ang tiwala natin sa kaniya kung pag-iisipan natin ang mga ginawa niya noon. (Isa. 37:17, 33-37) Puwede rin nating basahin o panoorin ang mga report sa jw.org na nagpapakitang sinusupportahan ni Jehova ang mga kapatid natin sa ngayon. Bukod diyan, isipin din ang mga panahong tinulungan ka ng Diyos. Okey lang kung wala kang kakaibang karanasan. Kasi ang totoo, marami na siyang nagawa para sa iyo! Halimbawa, inilapit ka niya sa kaniya para maging kaibigan niya. (Juan 6:44) Kaya hilingin kay Jehova na tulungan kang maalala ang mga pagkakataong sinagot niya ang panalangin mo, ibinigay niya ang kailangan mo sa tamang panahon, o pinalakas ka niya sa isang mahirap na sitwasyon. Kung iisipin mo ang mga iyan, titibay ang tiwala mo na lagi kang tutulungan ni Jehova. w24.06 21 ¶8

Linggo, Hulyo 19

Ang kamatayan ay lumaganap sa lahat ng tao, dahil silang lahat ay nagkasala.—Roma 5:12.

Baka determinado naman talaga tayo na huwag gawin ang anumang bagay na maglalayo sa atin kay Jehova. Pero tandaan, hindi tayo perpekto at madali tayong matukso. (Roma 7:21-23) Puwede tayong biglang malagay sa alanganing sitwasyon na tutukso sa atin na gumawa ng mali. Para makapanatili tayong tapat kay Jehova at sa Anak niya, kailangan nating sundin ang payo ni Jesus na maging maingat para hindi tayo matuksong gumawa ng kasalanan. Lahat tayo, natutuksong magkasala pero sa iba't ibang

bagay o sitwasyon. Magkakaiba kasi tayo ng kahinaan. Halimbawa, baka pinaglalaman ng isa ang tuksong makagawa ng malubhang kasalanan, gaya ng imoralidad. Baka hirap na hirap naman ang iba na labanan ang tuksong gumawa ng maruruming gawain, gaya ng masturbasyon o pagtingin sa pornograpiya. Baka may ilan naman na pinaglalaman ang takot sa tao, pride, pagiging magagalitin, at iba pa. w24.07 14 ¶3; 15 ¶5

Lunes, Hulyo 20

Patawarin [ninyo siya] nang buong puso at aliwin para hindi siya madaig ng sobrang kalungkutan.—2 Cor. 2:7.

Ano kaya ang puwedeng mangyari kung hindi pinayagan ng mga elder na makabalik sa kongregasyon ang isang nagsising nagkasala o kung hindi ipinaramdam sa kaniya ng mga kapatid na mahal nila siya? Posible siyang madaig ng “sobrang kalungkutan.” Baka maramdaman pa nga niyang hindi na siya puwedeng maglingkod kay Jehova kahit kailan. Kaya baka sumuko na siyang ayusin ang kaugnayan niya sa Diyos. Mas malala pa, kung hindi papatawarin ng mga kapatid sa kongregasyon ang nagsising nagkasala, posibleng masira nito ang kaugnayan nila kay Jehova. Bakit? Kasi nagiging gaya sila ni Satanas na malupit at walang awa, imbes na maging gaya ni Jehova na mapagpatawad. Para nilang hinahayaan si Satanas na gamitin sila para sirain ang kaugnayan ng taong iyon sa Diyos.—2 Cor. 2:10, 11; Efe. 4:27. w24.08 17 ¶7, 10-11

Martes, Hulyo 21

Nang umakyat siya sa kaitaasan, . . . may ibinigay siyang mga tao bilang regalo.—Efe. 4:8.

May isa pang grupo ng mga lalaki na inatasan para magpatibay sa kongregasyon. Sa pamamagitan ng matatandang lalaki sa Jerusalem, isinugo ni Kristo Jesus sina Pablo, Bernabe, at ang iba pa bilang mga naglalakbay na tagapangasiwa. (Gawa 11:22) Bakit sila isinugo? Gaya rin ng dahilan kung bakit nag-aatas ng mga ministeryal na lingkod at elder: para patibayin ang mga kongregasyon. (Gawa 15:40, 41) Laging naglalakbay ang mga tagapangasiwa ng sirkito. May ilan na bumibiyahe nang daan-daang kilometro para makapunta sa mga kongregasyon. Linggo-linggo, nagpapahayag sila, nagshe-shepherding, nangangasiwa sa meeting ng mga payunir at elder, at nangunguna sa pagtitiipon para sa paglilingkod sa larangan. Nag-oorganisa rin sila ng mga pansirkitong asamblea at kombensiyon at naghahanda ng mga pahayag para dito. Nagtuturo sila sa mga pioneer school at nagsasaayos ng special meeting ng mga payunir sa sirkito. At kung minsan, may biglaang atas na ibinibigay ang tanggapang pansangay na kailangan nilang unahin. w24.10 21-22 ¶12-13

Miyerkules, Hulyo 22

Patatawarin ko ang pagkakamali nila, at hindi ko na aalalahanin ang kasalanan nila.—Jer. 31:34.

Sinabi ni Jehova kay propeta Jeremias ang mga salita sa teksto natin sa araw na ito. Iyan ang nasa isip ni apostol Pablo nang isulat niya: “Hindi ko na aalalahanin ang mga kasalanan nila.” (Heb. 8:12) Pero ano ang ibig sabihin niyan? Sa Bibliya, ang pananalitang “alalahanin” ay hindi laging tumutukoy sa pag-

alala o pag-iisip sa mga nangyari sa nakaraan. Puwede rin itong tumukoy sa gagawin ng isa. Halimbawa, hiniling kay Jesus ng kriminal na nakapako rin sa tulos: “Jesus, alalahanin mo ako pagdating mo sa iyong Kaharian.” (Luc. 23: 42, 43) Hindi lang niya basta hinihiling kay Jesus na alalahanin, o isipin, siya. Gusto niyang may gawin si Jesus para sa kaniya, at ipinangako naman ni Jesus na bubuhayin siya. Kaya kapag sinabi ni Jehova na hindi na niya aalalahanin ang mga kasalanan natin, ibig sabihin, wala na siyang gagawin laban sa atin. Hindi na niya tayo paparusahan para sa mga kasalananang pinatawad na niya. w25.02 11 ¶14-15

Huwebes, Hulyo 23

Ang kaalaman tungkol sa Kabanalan ay nagbibigay ng unawa.—Kaw. 9:10.

Magkakaroon tayo ng tunay na unawa kung alam natin ang mga katangian ni Jehova, ang layunin niya, at ang mga gusto at ayaw niya. Kaya tanungin ang sarili, ‘Base sa alam ko tungkol kay Jehova, anong desisyon ang magpapasaya sa kaniya?’ (Efe. 5:17) Minsan, baka madismaya sa atin ang mga malapit sa atin dahil pinili nating gawin ang magpapasaya kay Jehova. Halimbawa, baka dahil sa pagmamalasakit, ipilit ng magulang sa adulto nilang anak na babae na magpakasal sa isa na maykaya—o sa isa na makakapagbigay ng malaking dote—kahit hindi ito nakapokus sa paglilingkod kay Jehova. Totoo, gusto lang naman nilang magkaroon ng magandang buhay ang anak nila, pero paano naman ang espirituwal na pangangailangan niya? Ano ang tingin ni Jehova sa bagay na ito? Makikita ang sagot sa Mateo 6:33. Sa tekstong ito, pinapayuhan ang mga Kristiyano na “patuloy [na] unahin ang Kaharian.” Mahal natin ang mga

magulang natin at iginagalang ang mga tao sa lugar natin. Pero ang pinakamahalaga sa atin ay ang pasayahin si Jehova. w25.01 17 ¶9-10

Biyernes, Hulyo 24

Ang Panginoon ay tumayong malapit sa akin at pinalakas niya ako.

—2 Tim. 4:17.

Kailangan natin ang tulong ni Jehova para maging masigasig pa rin sa pangangaral kahit may pag-uusig. (Apoc. 12:17) Bakit ka nakakasiguradong tutulungan ka ni Jehova? Tingnan ang panalangin ni Jesus sa Juan kabanata 17. Hiniling ni Jesus na bantayan ni Jehova ang mga apostol. At sinagot iyan ni Jehova. Mababasa sa aklat ng Mga Gawa kung paano niya tinulungan ang mga apostol na maging masigasig kahit may pag-uusig. Ipinanalangin din ni Jesus na bantayan ni Jehova ang mga makikinig sa mabuting balita, at kasama ka diyan. Sinasagot pa rin ni Jehova hanggang ngayon ang panalangin ni Jesus. Gaya ng ginawa ni Jehova sa mga apostol, tutulungan ka rin niya. (Juan 17:11, 15, 20) Habang papalapit ang wakas, baka maging mas mahirap para sa atin na mangaral. Pero tiniyak ni Jesus na may tutulong sa atin.—Luc. 21:12-15. w25.03 17-18 ¶13-14

Sabado, Hulyo 25

Ang mga lingkod ko ay hihiyaw sa kagalakan.—Isa. 65:14.

‘Humihyaw sa kagalakan’ ang bayan ng Diyos dahil sa sobrang pasasalamat nila sa kaniya. Mayroon tayong “mabuting kalagayan ng puso” dahil sa nakakapagpatibay na mga pangako at katotohanan sa Bibliya. Dahil din ito sa tunay na pagasa nating salig sa haing pantubos ni Kristo. Kapag pinag-uusapan natin ang mga ito, talagang sumasaya tayo. (Awit

34:8; 133:1-3) Kitang-kita ang pag-ibig at pagkakaisa ng bayan ng Diyos sa espirituwal na paraiso. Ang pagkakaisang ito ay patikim ng magiging buhay natin sa bagong sanlibutan, kung saan lalo pang titibay ang bukid ng pag-ibig at pagkakaisa ng mga lingkod ni Jehova. (Col. 3:14) Kung gusto ng isang tao na maging tunay na masaya at kontento, kailangan niyang maging bahagi ng espirituwal na paraiso. Iba man ang maging tingin ng sanlibutan sa mga lingkod ni Jehova, ang mahalaga, may magandang pangalan sila sa harap ng Diyos at sa iba pang mga lingkod niya.—Isa. 65:15. w24.04 21 ¶7-8

Linggo, Hulyo 26

Patuloy ninyong . . . patibayin ang isa’t isa.—1 Tes. 5:11.

Paano natin mapapatibay ang mga single na Kristiyano na gustong mag-asawa? Kung magiging maingat tayo sa sinasabi natin. (Efe. 4:29) Tanungin ang sarili: ‘Inaasar ko ba ang mga gustong mag-asawa? Kapag nakakita ako ng single na brother at single na sister na nag-uusap, iniisip ko ba agad na may gusto sila sa isa’t isa?’ (1 Tim. 5:13) Isa pa, hindi natin dapat maiparamdam sa mga single na Kristiyano na may kulang sa kanila dahil wala silang asawa. Makakatulong tayo sa kanila kung papasalamat natin sila sa mga nagagawa nila. Paano kung sa tingin mo, bagay ang isang brother at isang sister? Sinasabi ng Bibliya na igalang natin ang naramdaman ng iba. (Roma 15:2) Maraming single na Kristiyano ang ayaw na inirereto sila sa iba, at dapat nating igalang iyon. (2 Tes. 3:11) Gusto naman ng iba na magpatulong, pero hindi tayo dapat makialam hangga’t hindi sila humihingi ng tulong.—Kaw. 3:27. w24.05 24-25 ¶14-15

Lunes, Hulyo 27

Ang kanilang bato ay hindi gaya ng ating Bato.—Deut. 32:31.

Sa mundong ito, may mga problemang puwedeng makaapekto o bumago sa buhay natin. Buti na lang, nandiyan ang Diyos na Jehova para tulungan tayo! Kapag nararanasan natin ang tulong niya, patunay iyon sa atin na talagang “buháy si Jehova!” (Awit 18:46) Pero pagkatapos sabihin ni David na buháy ang Diyos, ikinumpara niya ang Diyos sa isang bagay na walang buhay. Tinawag niya si Jehova na “aking Bato.” Ano ang ibig niyang sabihin? Ginagamit ng Bibliya ang salitang “bato” para tulungan tayong maintindihan ang mga katangian ni Jehova. Madalas, mababasa ito sa mga ulat na pinupuri si Jehova ng mga lingkod niya. Sa Deuteronomio 32:4 unang tinukoy si Jehova bilang “ang Bato.” Sinabi naman ni Hana sa panalangin niya: “Walang bato na gaya ng aming Diyos.” (1 Sam. 2:2) Tinawag ni Habakuk si Jehova na “aking Bato.” (Hab. 1:12) Itinuring naman ng manunulat ng Awit 73 ang Diyos na “bato ng puso” niya. (Awit 73:26) At kahit si Jehova mismo, tinukoy niya ang sarili niya na isang bato.—Isa. 44:8. w24.06 26 ¶1, 3

Martes, Hulyo 28

[Si] *Jehosapat* [ay] *humanap kay Jehova nang buong puso niya.*
—2 Cro. 22:9.

Ang mga hari ng Israel na itinuring ni Jehova na tapat ay ang mga naglingkod sa kaniya nang buong puso. Mababasa tungkol kay Josias: “Walang haring nauna sa kaniya ang gaya niya na nanumbalik kay Jehova nang kaniyang buong puso.” (2 Hari 23:25) Ano naman ang sinabi tungkol kay Solomon, na gumawa ng masama noong tumanda

na siya? “Hindi niya ibinigay ang buong puso niya.” (1 Hari 11:4) Ganiyan din ang sinabi ng Bibliya tungkol sa di-tapat na haring si Abiam: “Hindi niya ibinigay ang buong puso niya kay Jehova.” (1 Hari 15:3) Kapag ginagamit ng Bibliya ang salitang “puso,” karaniwan na itong tumutukoy sa buong pagkatao ng isa, kasama na ang mga kagustuhan, iniisip, pananaw, ugali, kakayahan, motibo, at tunguhin niya. Paano nga ba masasabing buo ang puso ng isa sa paglilingkod kay Jehova? Masasabing buo ang puso ng isa sa paglilingkod kung ginagawa niya iyon dahil mahal na mahal niya at nirerespeto si Jehova, at hindi lang dahil sa iyon ang kailangan niyang gawin. Patuloy rin niyang ipinapakita ang pagmamahal at respetong ito sa buong buhay niya. w24.07 21 ¶4-5

Miyerkules, Hulyo 29

Pawiin mo ang lahat ng pagkakamali ko.—Awit 51:9.

May ilustrasyon na ginamit si Jehova para maintindihan natin kung paano siya nagpapatawad. Sinabi niya: “Tatakpan ko ang mga pagkakamali mo na parang nasa likod ng ulap at ang mga kasalanan mo na parang nasa likod ng makapal na ulap.” (Isa. 44:22) Kapag nagpapatawad si Jehova, para bang gumagamit siya ng makapal na ulap para itago ang mga kasalanan natin. Kaya wala nang makakakita nito! Ano ang itinuturo sa atin ng ilustrasyong ito? Tandaan natin na kapag pinatawad na ni Jehova ang mga kasalanan natin, hindi na tayo dapat makonsensya na parang may naiwan pang mantsa sa atin. Dahil sa dugo ni Jesu-Kristo, lubusan nang nabayaran ang mga kasalanan natin. Binura niya iyon na para bang hindi tayo nagkautang. Ganiyan tayo pinapatawad ni Jehova kapag pinagsisisihan natin ang mga kasalanan natin. Dahil maa-

wain si Jehova, makakasigurado tayo na naibalik na ang nasirang pakikipagkaibigan natin sa kaniya. Kaya hindi na tayo dapat sobrang makonsensiya sa mga nagawa natin. w25.02 10-11 ¶11-14

Huwebes, Hulyo 30

Sinisikap kang akayin ng Diyos sa pagsisisi dahil sa kabaitan niya.

—Roma 2:4.

Pananagutan ng mga elder kay Jehova na panatilihin malinis ang kongregasyon. (1 Cor. 5:7) Pero gusto rin nilang maakay sa pagsisisi ang nagkasala hangga't posible. Kaya habang tinutulungan nila ang kapatid na nagkasala, umaasa silang magbabago ito. Bakit? Kasi gusto nilang tularan si Jehova, na “napakamapagmahal at maawain.” (Sant. 5:11) Ganiyang-ganiyan din si apostol Juan. Isinulat niya: “Mahal kong mga anak, sumulat ako sa inyo tungkol sa mga bagay na ito para hindi kayo magkasala. Pero kung magkasala ang sinuman, may katulong tayo na kasama ng Ama, ang matuwid na si Jesu-Kristo.” (1 Juan 2:1) Nakakalungkot, may mga pagkakataong ayaw magsisi ng isang Kristiyano. Kaya kailangan siyang alisin sa kongregasyon. w24.08 25 ¶19-20

Biyernes, Hulyo 31

Manghawakan kayong mahigpit sa pananampalataya.—1 Cor. 16:13.

Bakit hindi mo dapat ikumpara ang nagagawa mo sa nagagawa ng iba? Kasi hindi iyan ginagawa ni Jehova. (Gal. 6:4) Halimbawa, binigyan ni Maria si Jesus ng mabango at mamahaling langis. (Juan 12:3-5) Sa kabaligtaran, nagbigay ng dalawang maliit na barya na napakaliit ng halaga ang mahirap na biyuda. (Luc. 21:1-4) Hindi pinagkumpara ni Jesus ang ibinigay nila. Pareho niya itong pinahalagahan. Ganiyan

din ang Ama niya. Para kay Jehova, napakahalaga ng anumang ibinigay natin sa kaniya kung ginagawa natin ito dahil mahal natin siya. Normal lang na magduda tayo kung minsan. Pero makatulong ang Salita ng Diyos para maaalis ito. Kung gagawin mo iyan, maaalis ang mga pagdududa mo. Kilalang-kilala ka ni Jehova. Tuwang-tuwa siya sa mga ginagawa mo para sa kaniya, at gusto ka niyang gantimpalaan. Mahal na mahal ni Jehova ang bawat isa sa mga lingkod niya at nagmamalasakit siya sa kanila. w24.10 25 ¶3; 29 ¶17-18

Sabado, Agosto 1

Magkakaroon ng malaking kapighatian na hindi pa nangyayari mula nang pasimula ng mundo hanggang sa ngayon.—Mat. 24:21.

Ipinapanalangin natin na marami pa sana ang makinig sa babala at sumama sa atin sa pagsamba kay Jehova. Pero paano kung hindi sila makinig ngayon? Baka may mga taong manampalataya kay Jehova kapag nakita na nilang nawasak ang Babilonyang Dakila. Natutuhan natin na posible silang bigyan ng pagkakataon ni Jehova. Kaya napakahalaga na patuloy tayong magbabala sa mga tao. Puwede nilang maalala sa hinaharap ang sinasabi natin sa kanila sa ngayon. (Ihambing ang Ezekiel 33:33.) Hindi kaya bigla na lang nilang maisip ang mga babalang sinabi natin sa kanila, at dahil dito, sumama na rin sila sa pagsamba kay Jehova bago mahuli ang lahat? May tagapagbilanggo noon sa Filipos na nanampalataya lang pagkatapos “lumindol nang malakas.” Kaya posible rin na may mga hindi nakikinig ngayon na mananampalataya lang kapag nakita na nilang nawasak ang Babilonyang Dakila.—Gawa 16:25-34. w24.05 16-17 ¶9-10

Linggo, Agosto 2

Si Kristo ang wakas ng Kautusan.

—Roma 10:4.

May mahalaga tayong matututuhan sa mga isinulat ni apostol Pablo para sa mga Hebreong Kristiyanong. May ilan sa kanila na hindi sumulong; “gatas ulit ang kailangan [nila] sa halip na matigas na [espirituwal] na pagkain.” (Heb. 5:12) Hindi nila natutuhan at tinanggap ang mga bagong bagay na itinuturo noon sa kanila ni Jehova sa pamamagitan ng kongregasyon. (Kaw. 4:18) Halimbawa, kahit mga 30 taon na mula noong wakasan ng haing pantubos ni Jesus ang Kautusang Mosaiko, marami pa rin ang nagsasabi na dapat sundin ito. (Tito 1:10) Sa liham ni Pablo para sa mga Hebreo, tinulungan niya silang maintindihan ang malalalim na katotohanang itinuro niya. Nakatulong ito sa kanila na makita na nakakahigit ang bagong paraan ng pagsamba kay Jehova sa pamamagitan ni Jesus. Nagbigay rin ito sa kanila ng lakas ng loob na maganal.—Heb. 10:19-23. w24.04 6 ¶15

Lunes, Agosto 3

Bubuhaying muli ng Diyos ang mga matuwid at di-matuwid.

—Gawa 24:15.

Mula noong sumama sina Adan at Eva sa pagrerebelde ni Satanas kay Jehova, bilyon-bilyon na ang naging biktima ng kamatayan. Pero ano ang mangyayari sa lahat ng taong namatay? May ilang tapat na tagasunod si Jesus na bubuhaying muli sa langit. Sinasabi ng Bibliya na 144,000 ang bilang nila. (Apoc. 14:1) At bubuhayin din ang maraming tapat na lingkod ni Jehova sa ‘pagbuhay-muli sa mga matuwid.’ Kung mananatili silang matuwid sa loob ng Sanlibong-Taóng Paghahari ni Kristo at sa huling pagsubok, mabubuhay sila magpakai-

lanman sa lupa. (Dan. 12:13; Heb. 12:1) May bubuhayin ding mga “di-matuwid” sa panahon ng paghahari ni Kristo. Kasama dito ang mga taong hindi naging lingkod ni Jehova o ‘gumawa pa nga ng masasamang bagay.’ Bibigyan sila ng pagkakataong magbago at maging tapat na lingkod niya. (Juan 5:29; Luc. 23: 42, 43) Pero may mga hindi na bubuhaying muli si Jehova. Sila ang mga taong sobrang sama.—Luc. 12:4, 5. w24.05 2 ¶3; 5 ¶15; 6 ¶17

Martes, Agosto 4

Pinararangalan nila ako sa pamamagitan ng mga labi nila, pero malayong-malayo ang puso nila sa akin.
—Isa. 29:13.

Kung gusto nating sang-ayunan tayo ni Jehova, dapat na ‘nagsasabi tayo ng totoo sa puso natin.’ (Awit 15:2) Hindi lang ito basta hindi pagsisinungaling. Gusto ni Jehova na maging tapat tayo sa lahat ng sinasabi at ginagawa natin. (Heb. 13:18) Napakahalagang gawin natin iyan, “dahil nasusuklam si Jehova sa mga mapanlinlang, pero ang matuwid ay matalik niyang kaibigan.” (Kaw. 3:32) Ang isang taong “nagsasabi ng totoo sa puso niya” ay hindi nagkukunwaring masunurin kapag nakikita siya ng iba pero sumusuway naman sa mga utos ng Diyos kapag walang nakakita sa kaniya. Hindi siya nanlililang. Paano ba nagiging mapanlinlang, o mapagkunwari, ang isang tao? Sa umpisa, baka pagdudahan niya kung tama bang sundin ang ilan sa mga utos ni Jehova. (Sant. 1:5-8) Baka suwayin niya ang ilang utos na sa tingin niya, hindi naman ganoon kahalaga. Pagkatapos, kapag nakikita niya na parang wala namang masamang epekto ang mga ginagawa niya, baka lumakas ang loob niya na suwayin ang iba pang utos ng Diyos. Bandang huli, magiging mapagkunwari na

ang pagsamba niya. (Ecles. 8:11) Pero tayo, gusto nating magsabi ng totoo sa puso natin. Kaya magiging tapat tayo sa lahat ng bagay. w24.06 10 ¶7-8

Miyerkules, Agosto 5

Tumayo kayong matatag, na suot ang sinturon ng katotohanan.
—Efe. 6:14.

Para sa mga lingkod ni Jehova, napakahalaga ng mga katotohanang mula sa Bibliya. Nakabase dito ang pananam-palataya natin. (Roma 10:17) Naniniwala tayo na ginagamit ni Jehova ang kongregasyong Kristiyano bilang “isang haligi at pundasyon ng katotohanan.” (1 Tim. 3:15) Gustong-gusto ni Satanas na mawala ang tiwala natin sa Bibliya o sa mga tagubiling natatanggap natin mula sa organisasyon ng Diyos. (Efe. 4:14) Hindi na magtatagal, dadayain ng Diyablo ang mga bansa para kalabanin si Jehova. Gagamit siya ng mga propaganda at kasinungalingan para magawaito. (Apoc. 16:13, 14) Aasahan din natin na lalo pang titindi ang mga ginagawa ni Satanas para iligaw ang mga lingkod ni Jehova. (Apoc. 12:9) Kaya napakahalagang sanayin natin ang sarili natin na makita ang pagkakaiba ng katotohanan at ng kasinungalingan at na maging masunurin sa katotohanan. (Roma 6:17; 1 Ped. 1:22) Kailangan natin iyan para makaligtas sa malaking kapighati-an! w24.07 8 ¶1-3

Huwebes, Agosto 6

Ang utos na ito na ibinibigay ko sa inyo ngayon ay hindi naman napakahirap sundin o napakalayo sa inyo.—Deut. 30:11.

Nang organisahin ni Jehova ang mga Israelita na maging bayan niya, nakipagtipan siya sa kanila at tinanggap nila iyon. Kung susundin nila ang mga utos niya,

poprotektahan niya sila at pagpapalain. Kung magrebelde sila—halimbawa, kung sasamba sila sa ibang diyos—aalisin niya ang proteksiyon niya at magdurusa sila. Pero kahit mangyari iyon, posible ulit nilang makuha ang pagsang-ayon ng Diyos. Puwede silang ‘manumbalik sa Diyos nilang si Jehova at makinig sa tinig niya.’ (Deut. 30:1-3, 17-20) Ibig sabihin, puwede silang magsisi. Kung gagawin nila iyan, lalapit si Jehova sa kanila at pagpapalain ulit sila. Paulit-ulit na nagrebelde kay Jehova ang piniling bayan niya. Nagdusa sila dahil dito. Pero hindi sila sinukuan ni Jehova. Paulit-ulit siyang nagpadala ng mga propeta sa masuwaying bayan niya para akayin sila sa pagsisisi at manumbalik sa kaniya.—2 Hari 17:13, 14. w24.08 9 ¶4-5

Biyernes, Agosto 7

Nagsimula ang matinding pag-uusig sa kongregasyon na nasa Jerusalem.
—Gawa 8:1.

Pagkamatay ni Jesus, napakahirap ng mga pinagdaanan ng mga Hebreong Kristiyano na nakatira sa Jerusalem at Judea. Pagkabuo ng kongregasyong Kristiyano, nakaranas sila ng matinding pag-uusig. Pagkalipas ng mga 20 taon, nagdusa sila dahil sa nangyaring taggutom at kahirapan. (Gawa 11:27-30) Pero noong mga 61 C.E., nagkaroon ng pansamantalang kapayapaan. Sa panahong ito nila natanggap ang liham ni apostol Pablo—talagang napapanahon ito. Kailangang-kailangan ng mga Kristiyano ang liham ni Pablo dahil hindi magtatagal ang kapayapaang nararanasan nila. Nagbigay siya doon ng mga payo na makakatulong sa kanila na makapagtiis. w24.09 8 ¶1-2

Sabado, Agosto 8

Talagang napalalakas nila ako.

—Col. 4:11.

Kapag may pinagdadaan tayo, ginagamit ni Jehova ang mga kapatid para ipakitang mahal niya tayo. May mga kapatid na handang makinig nang mabuti sa mga sinasabi natin at laging nandiyan kapag may mga problema tayo. Kung minsan, nagbibigay sila ng mga tekstong nagpapatibay sa atin o nananalangin kasama natin. (Roma 15:4) Puwede ring ipaalala ng isang kapatid ang tingin ni Jehova sa sitwasyon natin, at dahil dito, patuloy tayong nakakapagtiis. Matutulungan din tayo ng mga kapatid sa iba pang paraan, gaya ng pagbibigay ng pagkain para gumanda ang pakiramdam natin. Para matanggap natin ang tulong ng iba, baka kailangan nating magsabi sa kanila. (Kaw. 17:17) Baka hindi nila alam ang nararamdaman natin o kung ano ang kailangan natin. (Kaw. 14:10) Kaya sabihin mo sa matured mong mga kaibigan ang nararamdaman mo. Sabihin sa kanila kung ano ang puwedeng makatulong sa iyo. Puwede mo ring sabihan ang isa o dalawang elder na palagay ang loob mo. Nakatulong naman sa ilang sister ang pakikipag-usap sa iba pang matured na sister. w24.10 10 ¶15-16

Linggo, Agosto 9

Ang bawat isa na nakakakilala sa Anak at nananampalataya sa kaniya ay [magkakaroon] ng buhay na walang hanggan.—Juan 6:40.

Iniingatan ng mga tao ang kalusugan nila, kaya pinipili nila ang mga kinakain nila at sinisikap nilang maging regular sa pag-eehersisyo. Pero hindi nila iniisip na mabubuhay sila nang walang hanggan. Para sa kanila, imposible iyon. At baka nga ayaw nila iyon kasi iniisip

nilang pagdudusahan nila habambuhay ang mga epekto ng pagtanda. Pero gaya ng makikita sa sinabi ni Jesus sa Juan 3:16 at 5:24, hindi imposible ang “buhay na walang hanggan,” at magiging ka-siya-siya iyon. Makahimalang pinakain ni Jesus ang libo-libong tao ng tinapay at isda. Kamangha-mangha iyon, pero mas kamangha-mangha pa ang sinabi niya noong sumunod na araw. Sinundan siya ng mga tao sa Capernaum, malapit sa baybayin ng Galilea, at doon, sinabi niya sa kanila na puwedeng buhayin muli ang mga tao at magkaroon ng buhay na walang hanggan. (Juan 6: 39, 40) Tinitiyak ng mga sinabi ni Jesus na marami sa mga namatay na ang bubuhaying muli. Ipinapakita rin niyan na puwede mong makasama magpakailanman ang mga mahal mo sa buhay. w24.12 8 ¶1-2

Lunes, Agosto 10

Kayong mga asawang lalaki, . . . bigyan ninyo sila ng karangalang gaya ng sa mas mahinang sisidlan, na katangian ng mga babae.—1 Ped. 3:7.

Ayon sa kamakailang report ng World Health Organization, maraming asawang lalaki ang nananakit sa asawa nila, nagsasalita ng masama sa mga ito, o nang-aabuso sa iba pang paraan. Baka napakabait nila sa asawa nila kapag nasa harap ng iba, pero minamaltrato naman ito kapag nasa bahay na. Ano ang mga posibleng dahilan kung bakit mapang-abuso ang isang asawang lalaki? Baka mapang-abuso ang tatay niya, kaya akala niya, normal lang iyon. Posible ring nakaimpluwensiya sa kaniya ang kultura niya. Baka sa kanila, hindi ka “tunay na lalaki” kung hindi mo napupuwersang pasunurin ang asawa mo. May ilang lalaki naman na hindi natutong kontrolin ang emosyon nila, kasama na ang galit nila. Nagkaroon naman ng maling pana-

naw ang ilang lalaki sa mga babae at sa sex dahil sa panonood ng pornograpiya. Bukod diyan, sinasabi ng mga report na pinalala pa ng COVID-19 pandemic ang mga problemang ito. Pero hindi dahilan ang alinman sa mga ito para abusuhin ng lalaki ang asawa niya. w25.01 8 ¶12-3

Martes, Agosto 11

Dahil si Kristo ay nagdusa sa laman, magkaroon kayo ng ganoon ding kaisipan.—1 Ped. 4:1.

“Dapat mong ibigin si Jehova na iyong Diyos nang buong puso mo at nang buong kaluluwa mo at nang buong lakas mo at nang buong pag-iisip mo.” (Luc. 10:27) Nilinaw ni Jesus na ito ang pinakamahalagang utos sa Kautusang Mo-saiko. Sinabi niya na kapag mahal natin si Jehova, kasama diyan ang puso natin—mga gusto, emosyon, at damdamin natin. Kasama rin diyan ang ating buong-kaluluwang debosyon at lakas. Pero mahal din natin si Jehova nang buong pag-iisip natin—kung paano tayo mag-iisip. Kahit hindi natin lubos na maiintindihan kung paano mag-isip si Jehova, dapat pa rin nating tularan ang paraan niya ng pag-iisip. Makakatulong sa atin kung pag-aaralan natin ang “pag-iisip ni Kristo,” kasi perpektong natularan ni Jesus ang paraan ng pag-iisip ng Ama niya.—1 Cor. 2:16. w25.03 8 ¶1

Miyerkules, Agosto 12

Ayon sa kasaganaan ng walang-kapan-tay na kabaitan ng Diyos, nailaan ang pantubos sa pamamagitan ng dugo ng kaniyang anak at nabuksan ang daan para mapalaya tayo, oo, napatawad ang ating mga kasalanan.—Efe. 1:7.

Perpekto si Jesus, gaya ni Adan bago magkasala. (1 Cor. 15:45) Kaya noong mamatay si Jesus, naibigay niya ang pambayad-sala na kailangan para ma-

ibalik ang naiwala ni Adan. (Roma 5:19) Dahil diyan, tinawag si Jesus na “huling Adan.” Hindi na kailangan ang isa pang perpektong tao para bayaran ang naiwala ni Adan. Namatay si Jesus “nang minsanan.” (Heb. 7:27; 10:12) Ano ang pagkakaiiba ng pagbabayad-sala at ng pantubos? Ang pagbabayad-sala ay ang kaayusang ginawa ng Diyos para maibalik ang magandang kaugnyan sa kaniya ng mga tao. Ang pantubos naman ay ang halagang pambayad para sa pagkakasala ng mga tao. Ito ang perpektong buhay na ibinigay ni Jesus para sa atin.—Heb. 9:14. w25.02 5 ¶12-13

Huwebes, Agosto 13

Ang Diyos ay tapat, at hindi niya hahayaang tukuhin kayo nang higit sa matitiis ninyo, kundi gagawa siya ng daang malalabasan para matiis ninyo ang tukso.—1 Cor. 10:13.

Tama ang magiging pananaw natin sa mga pagsubok kung magpopokus tayo sa ating buhay na Diyos, si Jehova. Makikita kasi natin na ang mga problema natin ay kaugnay ng malaking isyu sa pagitan niya at ni Satanas. Sinasabi ng Diyablo na kapag nahihirapan na tayo, iiwan natin si Jehova. (Job 1:10, 11; Kaw. 27:11) Pero kapag nananatili tayong tapat kay Jehova kahit may mga pagsubok, napapatunayan natin na mahal natin siya at na sinungaling ang Diyablo. Baka may pag-uusig ngayon sa lugar ninyo, mahirap ang buhay, hindi interesado sa mensahe natin ang mga tao, o may iba kang problema. Anuman ang sitwasyon mo, may pagkakataon kang pasayahin ang puso ni Jehova. Tandaan din na hindi ka niya hahayaang masubok nang higit sa matitiis mo. Ibigay niya ang lakas na kailangan mo. w24.06 22 ¶9

Biyernes, Agosto 14

Ang bawat isa ay nasusubok kapag nadadala at naaakit ng sarili niyang pagnanasa.—Sant. 1:14.

Alam mo ba kung saan ka pinakamadaling matukso? Delikado kung babalewalain natin ang mga kahinaan natin o iisipin natin na hindi tayo makakagawa ng kasalanan. (1 Juan 1:8) Tandaan, sinabi ni Pablo na kahit ang “may-gulang na mga Kristiyano,” posibleng matukso kung hindi sila mag-iingat. (Gal. 6:1) Kaya dapat tayong maging totoo sa sarili natin at aminin kung saan tayo mahina. (2 Cor. 13:5) Kapag nalaman na natin kung saan tayo pinakamahina, ano ang dapat nating gawin? Patibayin ang panlaban natin; palakasin ito! Tingnan ang isang ilustrasyon. Noong panahon ng Bibliya, ang mga pintuang-daan, o gate, ang pinakamahinang bahagi ng mga pader ng lunsod; ang bahaging ito ang pinakabinabantayan. Ganiyan din sa atin. Mas kailangan nating bantayan ang mga kahinaan natin para maging handa tayong labanan ang tukso.—1 Cor. 9:27. w24.07 15 ¶5-7

Sabado, Agosto 15

[Mamunga] kayo dahil sa inyong mabubuting gawa at [palaguin ninyo] ang inyong tumpak na kaalaman tungkol sa Diyos.—Col. 1:10.

Kasama sa mabubuting gawa na binanggit sa teksto sa araw na ito ang pangangaral ng mabuting balita. Kaya kapag binabasa natin at binubulay-bulay ang Salita ng Diyos, napapatibay ang panampalataya natin kay Jehova at mas naiintindihan natin kung bakit mahalagang ibahagi sa iba ang mensahe ng Kaharian. Para makinabang tayo nang husto sa Salita ng Diyos, huwag nating madaliin ang pagbabasa, pag-aaral, at pagbubulay-bulay. Kapag may naba-

sa kang teksto na mahirap maintindihan, huwag itong lampasan. Gamitin ang *Watch Tower Publications Index* o ang *Tulong sa Pag-aaral ng mga Saksi ni Jehova* para makita ang paliwanag sa teksto. Kung hindi ka magmamadali sa pag-aaral, magiging mas kumbinsido ka na talagang totoo ang Salita ng Diyos. (1 Tes. 5:21) At habang mas nakukumbinsi ka, mas gugustuhin mong sabihin sa iba ang mga natututuhan mo. w24.04 15 ¶4-5

Linggo, Agosto 16

Ang dahilan ng pagsulat ko sa inyo noon [ay] para malaman kung magiging masunurin kayo sa lahat ng bagay.—2 Cor. 2:9.

Si Jehova ay “mabuti at handang magpatawad,” ang sabi ni David. (Awit 86:5) Isinulat ni Mikas: “Sino ang Diyos na tulad mo, nagpapaumangin sa kamalian at nagpapalampas ng kasalanan?” (Mik. 7:18) Sinabi naman ni Isaias: “Iwan ng masama ang landas niya, alisin ng masama ang mga kaisipan niya; manumbalik siya kay Jehova, na maaawa sa kaniya, sa ating Diyos, dahil magpapatawad siya nang lubusan.” (Isa. 55:7) Para matuluran ng kongregasyon sa Corinto si Jehova, sinabihan silang tanggapin muli ang nagsising lalaki at tiyakin sa kaniya na mahal nila siya. Kung papatawarin nila ang lalaking iyon, mapapatu-nayan nilang “masunurin [sila] sa lahat ng bagay.” Totoo, ilang buwan pa lang ang nakakalipas mula nang alisin ang lalaki sa kongregasyon. Pero dahil nagsisi na siya, wala nang dahilan ang mga elder para hindi pa siya ibalik sa kongregasyon. w24.08 17-18 ¶12-13

Lunes, Agosto 17

Ang isa ay isasama at ang isa naman ay iiwan.—Mat. 24:40.

Marami tayong inaabangang pangyayari sa panahon natin! Malapit nang hatulan ni Jesus ang bawat tao sa lupa. Sinabi niya sa atin kung ano ang mga mangyayari bago siya humatol. Sinabi niya sa mga alagad niya ang magiging “tanda” ng presensiya niya at ng “katapusan ng sistemang ito.” (Mat. 24:3) Nakulat iyan sa Mateo kabanata 24 at 25, pati na sa Marcos kabanata 13 at Lucas kabanata 21. Gumamit si Jesus ng tatlong ilustrasyon para magbigay ng babala: ang ilustrasyon tungkol sa mga tupa at mga kambing, sa matatalino at mga mangmang na dalaga, at sa mga talento. Tutulong ito sa atin na makita na nakadepende sa ginagawa ng isang tao ang magiging hatol sa kaniya ni Jesus. w24.09 20 ¶1-2

Martes, Agosto 18

Gawin ninyo ang lahat ng bagay nang may pag-ibig.—1 Cor. 16:14.

Pag-isipan ang napakagandang halimbawang ipinakita ni Jesu-Kristo. Naglilingkod siya dahil mahal niya ang Ama niya at ang mga tao. Dahil sa pag-ibig na iyon, nagagawa niya ang mahihirap na atas, pati na ang mga gawaing minamaliit ng iba. (Mat. 20:28; Juan 13:5, 14, 15) Mga brother, kung naglilingkod kayo dahil sa pag-ibig, pagpapalain kayo ni Jehova at tutulongan niya kayong maa-bot ang mga goal ninyo, gaya ng pagiging ministeryal na lingkod. (1 Ped. 5:5) Sa ngayon, karaniwan nang mas nagugustuhan ng mga tao ang mga nagsisipag para maging mas mataas sa iba. Pero hindi ganiyan sa organisasyon ni Jehova. Kung pag-ibig ang motibo ng isang brother gaya ni Jesus, hindi siya magsisipag para lang magkaroon ng ka-

pangyarihan, awtoridad, o posisyon. Kung mapagmataas ang mga brother na aatasan sa kongregasyon, baka tanggi-han nila ang maliliit na atas na kailangang gawin para maalagaan ang mahahalagang tupa ni Jehova. Baka isipin nila na hindi para sa kanila ang mga atas na iyon.—Juan 10:12. w24.11 15 ¶6-7

Miyerkules, Agosto 19

Inatasan kayo ng banal na espiritu para maging mga tagapangasiwa.—Gawa 20:28.

Sa buong mundo, kailangan pa natin ng mas maraming inatang brother. (Efe. 4:8) Kung isa kang bautisadong brother, makakatulong ka ba sa ganitong paraan? (Kaw. 3:27) Inaabot mo ba ang mga kuwalipikasyon sa pagiging ministeryal na lingkod? Kung isa ka nang ministeryal na lingkod, sinisikap mo bang maging elder para mas matulungan ang mga kapatid? Handa ka bang gumawa ng mga pagbabago para makapag-apply sa School for Kingdom Evangelizers? Tutulong ang paaralang ito sa iyo para mas magamit ka pa nang husto ni Jesus. Kung sa tingin mo, hindi mo kayang abutin ang mga pribilehiyong iyan, manalangin kay Jehova. Humingi sa kaniya ng banal na espiritu para magawa mo ang anumang atas na ibigay sa iyo. (Luc. 11:13) Dahil sa ‘mga taong ibinigay ni Jesus bilang regalo,’ patunay iyan na nandiyan siya para mangu-na sa atin sa mga huling araw na ito. (Mat. 28:20) Talagang nagpapasalamat tayo dahil mapagmahal at mapagbigay ang Hari natin. Alam niya ang mga pangangailangan natin, at naglaan siya ng mga kuwalipikadong brother na mangangalaga sa atin. w24.10 23 ¶16-17

Huwebes, Agosto 20

Ang dating mga bagay ay hindi na maaalaala pa.—Isa. 65:17.

May mga problema rin ang mga lingkod ng Diyos, pero ano ang mangyayari sa mga ito? ‘Malilimutan na ang mga ito at mawawala na sa paningin ng Diyos.’ (Isa. 65:16) Aalisin ni Jehova ang lahat ng problema natin, at darating ang panahon na hindi na natin maaalala ang lahat ng ito. Ngayon pa lang, napapanatag na tayo. Kapag dumadalo tayo sa mga pulong natin, narerelaks tayo at pansamantala nating nalilimutan ang mga problema sa mundong ito. Matutulungan natin ang mga kapatid na magiging panatag din kung magpapakita tayo ng pag-ibig, kagalakan, kapayapaan, kabaitan, at kahinahunan, na kasama sa mga katangiang bunga ng espiritu ng Diyos. (Gal. 5:22, 23) Talagang ipinagpapasalamat natin na bahagi tayo ng organisasyon ng Diyos! Makikita ng mga mananatili sa espirituwal na paraiso ang lubusang katuparan ng pangako ng Diyos na isang “bagong langit at bagong lupa.” w24.04 22 ¶9-10

Biernes, Agosto 21

Nagiging bitag sa isang tao ang pagsigaw niya nang padalos-dalos, “Banal!” At pagkatapos na lang niya pag-iisipan ang panata niya.—Kaw. 20:25.

Totoo, masaya ang panahon ng pagiging magkasintahan. Pero seryosong hakbang din ito na papunta sa pag-aasawa. Sa panahon ng kasal, mananata sa harap ni Jehova ang lalaki at babae na mamahalin nila at irerespeto ang isa’t isa habang nabubuhay sila. Bago tayo gumawa ng anumang panata, dapat na pag-iisipan natin itong mabuti. Totoo rin iyan sa panata sa pag-aasawa. Tumutulong ang panahon ng pagiging magkasintahan para makilalang mabuti ng la-

laki at babae ang isa’t isa at makagawa ng tamang desisyon. Minsan, ang tamang desisyon ay magpakasal; kung minsan naman, ang tamang desisyon ay maghiwalay. Kung naghiwalay ang magkasintahan, walang mali doon. Ipinapakita lang niyan na naging epektibo ang panahon ng pagiging magkasintahan nila—nakatulong iyon para makagawa sila ng tamang desisyon. Bakit mahalagang magkaroon tayo ng tamang pananaw sa pagliligawan at pagiging magkasintahan? Kung tama ang pananaw ng isang tao tungkol dito, hindi siya manliligaw kung wala siyang intensiyong mag-asawa. w24.05 26-27 ¶3-4

Sabado, Agosto 22

Huwag mong ikahiya ang pagpapatotoo tungkol sa ating Panginoon.—2 Tim. 1:8.

Minsan, baka mag-alangan ang isang kabataang Kristiyano na ipagtanggol ang paniniwala niya. Baka kabahan siya kapag pinag-usapan sa klase ang teoriya ng ebolusyon. Bakit? Kasi baka sabihin ng mga teacher niya na totoo ang ebolusyon at hindi lang basta teoriya. Kung isa kang magulang, paano mo matutulungan ang anak mo na makumbinsi na ang pinapaniwalaan niya ang totoo? Tiyakin sa kaniya na hindi niya dapat ikahiya na naniniwala siya sa Maylalang. Bakit? Kasi marami ring scientist ang naniniwala na hindi lang basta lumitaw ang mga bagay na may buhay o na nagkataon lang ito. Alam nila kung gaano kakomplikado at kasalimuot ang disenyo ng mga bagay na may buhay, kaya naniniwala sila na may Isa na matalino na gumawa ng lahat ng ito. Dahil diyan, hindi nila tinatanggap ang teoriya ng ebolusyon. Mapapatibay rin ang pananampalataya ng anak mo kung pag-iisipan niya kung ano ang nakakumbinsi sa ibang kapatid na maniwala sa Maylalang. w24.12 18 ¶14-15

Lingo, Agosto 23

Nag-umapaw siya sa kagalakan dahil sa banal na espiritu.—Luc. 10:21.

Nagtitiwala si Jesus na may mga makikinig sa mabuting balita. Dahil diyan, positibo siya sa pangangaral. Halimbawa, noong mga huling buwan ng 30 C.E., nakita ni Jesus na marami ang handang makinig sa mabuting balita. Itinulad niya sila sa isang bukirin na puwede nang anihin. (Juan 4:35) Paglipas ng mga isang taon, sinabi niya sa mga alagad: “Talagang marami ang aanihin.” (Mat. 9:37, 38) Di-nagtagal, inulit niya: “Talagang marami ang aanihin . . . Ma-kiusap kayo sa Panginoon ng pag-aani na magpadala ng mga manggagawa sa pag-aani niya.” (Luc. 10:2) Laging nakikita ni Jesus ang potensiyal ng mga tao na tumugon sa mabuting balita. At masya siya kapag ginagawa nila iyon. Para manatiling positibo ang mga alagad, sinabi ni Jesus na magkakaroon ng magagandang resulta ang mensaheng ipangaral nila. w25.03 18-19 ¶15-16

Lunes, Agosto 24

Ang aking Diyos, siya ang aking batong kanlungan.—Awit 94:22.

Isang kanlungan si Jehova. Gaya ng isang malaking bato o kuweba na puwedeng takbuhan kapag may malakas na bagyo, puwede rin nating takbuhan si Jehova kapag may mga problema tayó. Tinutulungan niya tayong maingatan ang kaugnayan natin sa kaniya, at sisiguraduhin niya na hindi magkakaroon ng permanenteng epekto sa atin ang mga problema natin sa ngayon. Hindi lang iyan. Nangangako rin siya na aalisin niya ang lahat ng dahilan ng pag-aalala at pagdurusa natin. (Ezek. 34:25, 26) Paano natin magagawang Kanlungan si Jehova? Ang isang paraan ay ang pananalangin sa kaniya. Kapag ginagawa natin ito, bi-

nibigyan tayo ni Jehova ng “kapayapaan ng Diyos” na pumoprotekta sa puso at isip natin. (Fil. 4:6, 7) Maaasahan natin na laging nandiyan si Jehova para sa atin. Makakapagtiwala tayo sa kaniya dahil siya ang “walang-hanggang Bato.” (Isa. 26:3, 4) Hinding-hindi mawawala si Jehova, kaya lagi siyang nandiyan para tuparin ang mga pangako niya, pangangan ang mga panalangin natin, at tulungan tayo kapag kailangan natin. Isa pa, tapat siya sa mga naglilingkod sa kaniya. (2 Sam. 22:26) Hinding-hindi niya kakalimutan ang mga ginagawa natin, at nangangako siyang gagantimpalaan niya tayo.—Heb. 6:10; 11:6. w24.06 27 ¶4-6

Martes, Agosto 25

Ingatan mo ang iyong puso, dahil dito nagmumula ang bukal ng buhay.—Kaw. 4:23.

Puwedeng makaapekto sa puso natin ang kuwestiyunableng mga libangan. Dapat din nating piliing mabuti ang mga kaibigan natin kasi puwede nila tayong maimpluwensiyahan na maging materyalistiko. Kapag napansin mong nababawasan na ang pag-ibig mo kay Jehova dahil sa isang bagay, gawin ang buong makakaya mo para iwasan o alisin iyon. (Mat. 5:29, 30) Hindi natin dapat hayaan na mahati ang puso natin. Baka maisip natin na dahil marami tayong ginagawa para kay Jehova, hindi na natin kailangang iwasan ang masasamang impluwensiya. Tingnan ang ilustrasyong ito. Isiping maghapon ka sa labas at init na init. Pagkauwi mo, binuksan mo ang air-con. Pero ano ang mangyayari kung iniwan mo namang nakabubakas ang pinto? Papasok pa rin ang init. Ang punto? Hindi sapat na gawin lang natin ang mga bagay na magpapalapit sa atin kay Jehova. Dapat din nating “isara ang pinto” para hindi makapasok ang masasamang impluwensiya na magpapahina ng pag-ibig natin kay Jehova.—Efe. 2:2. w24.07 21 ¶6-7

Miyerkules, Agosto 26

Patuloy na mahalin ang inyong mga kaaway at ipanalangin ang mga umuusig sa inyo.—Mat. 5:44.

Napakasakit ng pinagdaanan ni Jesus at nakakahiya. Talagang nakaranas siya ng kawalang-katarungan. Pero hindi nagpaapekto si Jesus sa kawalang-katarungang nararanasan niya. Nanatili siyang tapat at mapagmahal. Imbes na sumpain ang mga sundalo na nagpako sa kaniya sa tulos, nanalangin siya: “Ama, patawarin mo sila, dahil hindi nila alam ang ginagawa nila.” (Luc. 23:34) Kapag ipinapanalangin natin ang mga gumagawa ng masama sa atin, nakakatu-long ito para manatili tayong kalmado at mabawasan ang galit natin. Baka mabago pa nga nito ang tingin natin sa kanila. Habang nabubuhay tayo sa masamang mundong ito, hindi natin maiiwasang mapaharap sa iba’t ibang klase ng kawalang-katarungan. Anuman ang mangyari, laging hingin ang tulong ni Jehova sa panalangin. Tularan din kung paano hinarap ni Jesus ang kawalang-katarungan, at patuloy na sundin ang mga prinsipyo sa Bibliya. Kung gagawin natin iyan, siguradong pagpapalain tayo ni Jehova.—1 Ped. 3:8, 9. w24.11 7 ¶16-17, 19

Huwebes, Agosto 27

Ikaw ay Diyos na hindi nalulugod sa kasamaan; walang sinumang masama ang mananatiling kasama mo.
—Awit 5:4.

Hindi kunsintidor na Diyos si Jehova; galit siya sa kasalanan. (Awit 5:4-6) Gusto niya na sundin natin ang mataas na pamantayan niya na nasa Bibliya. Inaasahan ba ni Jehova na hindi tayo magkakamali? Hindi, kasi alam niyang hindi tayo perpekto. (Awit 130:3, 4) Pero hindi niya kinukunsinti ang “mga

taong di-makadiyos na ginagawang dahilan ang walang-kapantay na kabaitan [niya] para gumawi nang may kapangahasan.” (Jud. 4) Kaya sinasabi ng Bibliya na ‘mapupuksa ang mga taong di-makadiyos’ sa digmaan ng Armagedon. (2 Ped. 3:7; Apoc. 16:16) Pero ayaw ni Jehova na mapuksa ang sinuman. Malinaw na sinasabi ng Bibliya na “gusto niya na ang lahat ay magsisi.” (2 Ped. 3:9) Tinutularan ng mga elder si Jehova, kaya matiyaga nilang tinutulungan ang nagkasala na magbago at manumbalik sa kaniya. w24.08 26 ¶1-2

Biyernes, Agosto 28

Binubuksan mo ang iyong kamay at ibinibigay ang inaasam ng bawat bagay na may buhay.
—Awit 145:16.

Gaya ni Jehova, puwede rin tayong magbigay ng materyal na tulong sa iba dahil sa pag-ibig. Halimbawa, may kilala ka bang kapatid na nangangailangan ng pagkain o ng damit? Puwede kang gamitin ni Jehova para tulungan siya. Kapag may likas na sakuna, mabilis ding magbigay ng tulong ang mga lingkod ni Jehova. Ganiyan ang ginawa ng mga kapatid natin noong COVID-19 pandemic. Nagbigay sila ng pagkain, damit, at iba pang supply sa mga nangangailangan. Marami rin ang nagbigay ng donasyon para sa pambuong-daigdig na gawain. Dahil diyan, nakapamahagi tayo ng relief sa mga kapatid sa buong mundo. Sinusunod ng mapagbigay na mga kapatid ang sinasabi sa Hebreo 13:16: “Huwag ninyong kalimutang gumawa ng mabuti at magbahagi sa iba ng kung ano ang mayroon kayo, dahil nalulugod ang Diyos sa gayong mga handog.” w24.09 27 ¶6-7

Sabado, Agosto 29

[*Tiyakin*] *ninyo kung ano ang mas mahahalagang bagay.—Fil. 1:10, tlb.*

Pag-isipan ang sitwasyong ito: Naghahanap ka ng trabaho para suportahan ang pamilya mo. May dalawa kang pinagpipilian. Inalam mo ang lahat ng impormasyong kailangan mo, gaya ng kung anong klase ito ng trabaho, ano ang schedule ng pasok, gaano ito kalayo sa bahay mo, at iba pa. Pareho namang angkop sa isang Kristiyano ang dalawang trabahong ito. Ngayon, baka para sa iyo, mas maganda ang isa kasi mas mae-enjoy mo iyon o mas malaki ang suweldo. Pero may iba ka pang dapat pag-isipan bago magdesisyon. Halimbawa, tatama ba sa schedule ng puulong ang trabaho? Kukunin ba nito ang oras na ginagamit mo para ilaan ang emosyonal at espirituwal na pangangailangan ng pamilya mo? Tutulong ang mga tanong na ito para mauna mo “ang mas mahahalagang bagay”—ang pagsamba mo at ang pangangalaga sa pamilya mo—hindi ang materyal na mga bagay. Kung gagawin mo iyan, makakagawa ka ng desisyong pagpapalain ni Jehova. w25.01 17-18 ¶11-13

Linggo, Agosto 30

Si Jehova ay malapit sa mga may pusong nasasaktan.—Awit 34:18.

Kahit gawan ka ng masama ng iba, makakatiyak ka na mahal ka ni Jehova at mahalaga ka sa kaniya. Kung pakiramdam mo, wala kang halaga, tandaan na may nakitang magagandang katangian si Jehova sa iyo at personal ka niyang inilapit sa kaniya. (Juan 6:44) At dahil mahal na mahal ka niya, lagi siyang handang tulungan ka. Mas maiintindihan natin ang nararamdaman ni Jehova kung titingnan natin ang halimbawa ni Jesus. Noong nasa lupa si Jesus, na-

pakabait niya sa mga taong itinuturing ng iba na hindi mahalaga. (Mat. 9:9-12) Nang hawakan ng isang babaeng may malubhang sakit ang damit ni Jesus, dahil umaasa siya na gagaling siya, pinatibay siya ni Jesus at pinuri dahil sa pananampalataya niya. (Mar. 5:25-34) Eksaktong-eksaktong natularan ni Jesus ang Ama niya. (Juan 14:9) Kaya talagang makakatiyak ka na mahalaga ka kay Jehova at nakikita niya ang magagandang katangian mo, gaya ng pananampalataya at pag-ibig mo sa kaniya. w24.10 7 ¶4-5

Lunes, Agosto 31

Ipunin mo ang mga luha ko sa iyong sisidlang balat.—Awit 56:8.

May mahihirap na sitwasyon na pinagdaanan si David na talagang nagpaluha sa kaniya. Maraming galit sa kaniya. Tinraidor pa nga siya ng ilang kaibigan at kapamilya niya. (1 Sam. 19:10, 11; 2 Sam. 15:10-14, 30) Minsan, nasabi niya: “Nanghihina na ako sa kalungkutan; sa buong magdamag, basang-basa ng luha ang higaan ko; bumabaha ng luha sa kama ko.” (Awit 6:6) Pero kahit maraming problema si David, kumbinsido siyang mahal siya ni Jehova. Isinulat niya: “Maririnig ni Jehova ang pag-iyak ko.” (Awit 6:8) Kitang-kita sa teksto sa araw na ito na mahal na mahal tayo ni Jehova at talagang nagmamalasakit siya sa atin. Para kay David, iniipon ni Jehova ang mga luha niya sa isang lalagyan o isinusulat iyon sa isang aklat. Sigurado siya na nakikita at tinatandaan ni Jehova ang lahat ng sakit na naranasan niya. At kumbinsido siyang hindi lang basta alam ng mapagmahal niyang Ama sa langit ang mga pinagdadaanan niya, kundi alam din ni Jehova kung ano ang nararamdaman niya dahil sa mga iyon. w24.12 22 ¶11-12

Martes, Setyembre 1

Patuloy na subukin kung kayo ay nasa pananampalataya.
—2 Cor. 13:5.

Kapag sumulong na tayo at naging may-gulang, dapat tayong magsikap na mapanatili ito. Kaya dapat nating iwasan ang pagkakaroon ng sobrang tiwala sa sarili. (1 Cor. 10:12) Dapat na “patuloy [nating] subukin” ang sarili natin para matiyak na tuloy-tuloy ang pagsulong natin. Sa liham ni apostol Pablo sa mga taga-Colosas, ipinakita niyang kailangan nilang manatiling maygulang. Kahit may-gulang na mga Kristiyano na sila, sinabihan pa rin sila ni Pablo na dapat silang mag-ingat para hindi sila madaya ng kaisipan ng mundo. (Col. 2: 6-10) Isa pa, laging ipinapanalangin ni Epafras na ‘manatiling may-gulang’ ang mga kapatid sa kongregasyon. (Col. 4:12) Lumilitaw na kilalang-kilala niya sila. Ano ang natutuhan natin dito? Para kina Pablo at Epafras, kailangan ang pagsisikap at tulong ng Diyos para mapanatili natin ang pagiging maygulang. Gusto nilang magawa ito ng mga taga-Colosas anumang hamon ang mapaharap sa mga ito. w24.04 6-7 ¶16-17

Miyerkules, Setyembre 2

Sumasaatin si Jehova. Huwag kayong matakot sa kanila.—Bil. 14:9.

Kung may takot tayo kay Jehova, hindang-hindi tayo gagawa ng bagay na magpapalungkot sa kaniya kasi mahal na mahal natin siya. Talagang tinitiyak natin kung ano ang tama at mali, kung ano ang totoo at kasinungalingan, para mapasaya natin siya. (Kaw. 2:3-6; Heb. 5:14) Kung magiging mas matindi ang takot natin sa tao kaysa sa Diyos, puwede tayo nitong mailihis sa katotohanan. Tingnan ang halimbawa ng 12 pinuno na nag-espiya sa lupaing ipinangako ni Je-

hova sa mga Israelita. Mas nangibabaw sa 10 espiya ang takot nila sa mga Cananita kaysa sa pagmamahal nila kay Jehova. Sinabi nila sa iba pang Israelita: “Hindi natin sila kayang labanan dahil mas malalakas sila kaysa sa atin.” (Bil. 13:27-31) Kung sa paningin ng tao, totoo naman na mas malakas ang mga Cananita. Pero totoo ba na hindi nila kayang talunin ang mga kaaway nila? Sa pag-iisip niyan, maliwanag na nakalimutan nila si Jehova. w24.07 9 ¶5-6

Huwebes, Setyembre 3

Hindi ba gagawin ng Hukom ng buong lupa kung ano ang tama?
—Gen. 18:25.

Bakit tayo nagtitiwala na kapag humatol si Jehova, laging tama ang desisyon niya? Kasi gaya ng alam ni Abraham, naniniwala rin tayo na perpekto si Jehova, siya ang pinakamarunong sa lahat, at siya ang maawaing “Hukom ng buong lupa.” Sinanay ni Jehova ang Anak niya at ipinagkatiwala dito ang lahat ng paghatol. (Juan 5:22) Parehong nakakabasa ng puso si Jehova at si Jesus. (Mat. 9:4) Kaya tama ang magiging hatol nila sa bawat tao! Lagi sana tayong magtiwala na mas alam ni Jehova kung ano ang tama. Tandaan natin na hindi para sa atin ang humatol. Si Jehova na ang bahala doon! Siya ang may kakayahang gawin iyon. (Isa. 55:8, 9) Kaya magtiwala tayo sa lahat ng magiging hatol niya at ng Anak niya na inatasan niyang maging Hari; perpektong natutularan ni Jesus ang pagiging makatarungan at maawain ni Jehova.—Isa. 11:3, 4. w24.05 7 ¶18-19

Biernes, Setyembre 4

Nasusuklam si Jehova sa mga mapanlinlang, pero ang matuwid ay matalik niyang kaibigan.

—Kaw. 3:32.

Napakahalaga na magsalita tayo ng totoo sa puso natin. Pansinin ang sinabi ni Jesus nang ipakilala ni Felipe ang kaibigan niyang si Natanael. Kahit unang beses pa lang nakita ni Jesus si Natanael, sinabi na ni Jesus: “Tingnan ninoy, isang tunay na Israelita na walang anumang pagkukunwari.” (Juan 1:47) May kakaiba siyang katapatan na nakita kay Natanael. Gaya natin, hindi rin perpekto si Natanael, pero nakita ni Jesus na totoo siya at tapat sa lahat ng bagay at kinomendahan siya dahil doon. Karamihan sa mga dapat nating gawin para palugdan si Jehova na makikita sa Awit 15 ay may kinalaman sa pakikitungo natin sa iba. Sinabi sa Awit 15:3 na ang isang panauhin sa tolda ni Jehova ay “hindi . . . naninirang-puri, hindi siya gumagawa ng masama sa kapuwa niya, at hindi niya sinisiraan ang mga kaibigan niya.” Kung gagamitin natin sa maling paraan ang kakayahan nating magsalita, puwede tayong makasakit sa iba. —Sant. 1:26. w24.06 10 ¶7; 11 ¶9-10

Sabado, Setyembre 5

Panginoon, maging ang mga demonyo ay napapasunod namin sa pamamagitan ng pangalan mo.—Luc. 10:17.

Kung naghanda kang mabuti para sa ministeryo, hindi ka masyadong kakabahan sa pakikipag-usap sa mga tao. Tinulungan ni Jesus ang mga alagad niya na maghanda bago sila pumunta sa ministeryo. (Luc. 10:1-11) Dahil sinunod nila ang mga itinuro ni Jesus, talagang naging masaya sila sa mga nagawa nila. Paano tayo maghahanda para sa ministeryo? Dapat nating pag-isipan kung ano

ang gusto nating sabihin at kung paano natin iyon sasabihin sa natural na paraan. Makakatulong din kung mag-iisip tayo ng dalawa o tatlong karaniwang reaksiyon ng mga tao sa teritoryo at paghandaan kung paano natin sasagutin ang mga iyon. At kapag kakausapin na natin sila, sikaping maging kalmado, ngumiti, at maging friendly. w24.04 16 ¶6-7

Linggo, Setyembre 6

O Jehova na Diyos namin, ikaw ang karapat-dapat sa kaluwalhatian at karangalan at kapangyarihan, dahil nilalang mo ang lahat ng bagay. —Apoc. 4:11.

Mahal natin ang Diyos na Jehova at ang pangalan niya. Iyan ang pinakamahalagang dahilan kung bakit tayo nangangaral. Alam nating isang paraan ang ministeryo para purihin ang minamahal nating Diyos. Talagang sang-ayon tayo na karapat-dapat si Jehova na tumanggap ng kaluwalhatian, karangalan, at kapangyarihan mula sa mga lingkod niya. Nakakapagbigay tayo sa kaniya ng kaluwalhatian at karangalan kapag sinasabi natin sa iba ang mga patunay na siya ang ‘lumalang sa lahat ng bagay’ at na utang natin sa kaniya ang buhay natin. Naibibigay naman natin kay Jehova ang kapangyarihan natin kapag ginagamit natin nang husto ang panahon, lakas, at pag-aari natin para sa ministeryo. (Mat. 6:33; Luc. 13:24; Col. 3:23) Talagang gustong-gusto nating sabihin sa mga tao ang tungkol sa minamahal nating Diyos! Bukod diyan, gusto rin nating sabihin sa kanila ang pangalan niya at kung anong klase siya ng Diyos. w24.05 17 ¶11

Lunes, Setyembre 7

Nagbibigay [siya] ng gantimpala sa mga humahanap sa kaniya nang buong puso.—Heb. 11:6.

Tinutulungan tayo ni Jehova na maging kontento at panatag ngayon, at bibigyan niya tayo ng buhay na walang hanggan sa hinaharap. Makakapagtiwala tayo na talagang gusto tayong gantimpalaan ni Jehova at na may kakayahan siyang gawin iyon. Dahil sa tiwalang iyan, ibinibigay natin ang buo nating makakaya sa pag-samba, gaya ng ginawa ng mga lingkod niya noon. Tingnan natin ang halimbawa ni Timoteo. (Heb. 6:10-12) Buo ang tiwala ni Timoteo na gagantimpalaan siya ng Diyos na buháy. (1 Tim. 4:10) Kaya may matibay siyang dahilan para ibigay ang buong makakaya niya sa paglilingkod. Sa ano-anong paraan? Una, pinasigla siya ni apostol Pablo na maging mas mahusay na tagapagturo sa ministeryo at sa kongregasyon. Dapat din siyang maging mahusay na halimbawa sa mga kapana-nampalataya niya, bata man o matanda. At may mahihirap na atas siyang kailangang gampanan, gaya ng pagbibigay ng deretsahan pero maibiging payo sa mga nangangailangan nito. (1 Tim. 4:11-16; 2 Tim. 4:1-5) Sigurado si Timoteo na gagantimpalaan siya ni Jehova.—Roma 2:6, 7. w24.06 22-23 ¶10-11

Martes, Setyembre 8

*Paulit-ulit na nagbabala si Jehova sa Israel at Juda sa pamamagitan ng lahat ng propeta [niya].
—2 Hari 17:13.*

Laging nagpapadala si Jehova ng mga propeta para babalaan at ituwid ang bayan niya. Halimbawa, inutusan ng Diyos si Jeremias na sabihin sa mga Israelita: “Manumbalik ka, O suwail na Israel . . . Hindi na ako magagalit sa iyo, dahil tapat ako . . . Hindi ako maghi-

hinanakit magpakailanman. Pero aminin mo ang kasalanan mo, dahil nagrebelde ka kay Jehova.” (Jer. 3:12, 13) Ipinasabi naman ni Jehova kay Joel: “Manumbalik kayo ngayon sa akin nang buong puso.” (Joel 2:12, 13) Inutusan niya rin si Isaias na sabihin: “Linisin ninyo ang inyong sarili; alisin ninyo sa paningin ko ang masasama ninyong gawain; tigilan na ninyo ang paggawa ng masama.” (Isa. 1:16-19) At ganito naman ang ipinasabi niya kay Ezekiel: “Natutuwa ba ako kapag namatay ang masama? . . . Hindi ba mas gusto kong talikuran niya ang kaniyang landasin at patuloy siyang mabuhay? Hindi ako natutuwa sa kamatayan ng sinuman, . . . kaya manumbalik kayo at patuloy na mabuhay.” (Ezek. 18:23, 32) Tuwang-tuwa si Jehova kapag nagsisisi ang mga tao, kasi gusto niya silang mabuhay nang walang hanggan. w24.08 9 ¶5-6

Miyerkules, Setyembre 9

Ang buong Kasulatan ay mula sa Diyos at kapaki-pakinabang.—2 Tim. 3:16.

Lahat ng lingkod ng Diyos, nakakatanggap ng espirituwal na pagkain, patnubay, at proteksiyon na kailangan nila. Tiniyak ni Jehova na puwedeng mabasa ngayon ng mga tao sa buong mundo ang Bibliya. Isang paraan iyan ni Jehova para ipakitang patas siya. Ang Banal na Kasulatan ay unang isinulat sa tatlong wika: Hebreo, Aramaiko, at Griego. Masasabi ba natin na may mas malapít na kaugnayan kay Jehova ang mga nakakabasa sa mga wikang iyon? Hindi. (Mat. 11:25) Hindi kailangan na mataas ang pinag-aralan natin o alam natin ang orihinal na mga wika ng Bibliya para maging kaibigan tayo ni Jehova. Ipinapaalam niya ang karunungan niya sa lahat ng tao sa buong mundo, mataas man ang pinag-aralan o hindi. Isinalin sa libo-libong wika ang kaniyang Salita, ang Bibliya; kaya may pagkakataon ang mga tao sa buong mundo

na matuto sa kaniya at maging kaibigan niya.—2 Tim. 3:16, 17. w24.06 6-7 ¶13-15

Huwebes, Setyembre 10

Malapit na ang pagtitiwangwang sa [Jerusalem].—Luc. 21:20.

Malapit na ang kapighatiang inihula ni Jesus—ang pagkawasak ng Jerusalem. (Luc. 21:20) Kailangang gamitin ng mga Kristiyano ang panahong mayroon sila para mapaghandaan ito. Puwede nilang patibayin ang pananampalataya nila at sanayin ang sarili nilang magtiis. (Heb. 10:25; 12:1, 2) Malapit na nating maranasan ang kapighatiang mas mahirap pa sa naranasan ng mga Hebreong Kristiyano. (Mat. 24:21; Apoc. 16:14, 16) Tingnan ang ilang payo na ibinigay ni Jehova sa mga Kristiyano noon na makakatulong din sa atin sa ngayon. Pinayuhan ni apostol Pablo ang mga Kristiyano noon na pag-aralan at bulay-bulayin ang Salita ng Diyos. (Heb. 5:14–6:1) Ginamit ni Pablo ang Hebreong Kasulatan para ipakita sa kanila na nakakahigit ang paraan ng pagsamba ng mga Kristiyano kaysa sa mga Judio. Alam ni Pablo na kapag napalalim nila ang kaalaman nila at mas naintindihan nila ang katotohanan, tutulong ito sa kanila na tanggihan ang maling mga pangangatuwiran. w24.09 8 ¶2-3; 9 ¶6

Biernes, Setyembre 11

Talaga ngang binuhay-muli ang Panginoon.—Luc. 24:34.

Kailangan ng mga alagad ni Jesus ang pampatibay. Bakit? May ilan sa kanila na iniwan ang bahay nila, pamilya, at negosyo para maging tagasunod ni Jesus. (Mat. 19:27) May ilan naman na nakaranas ng di-magandang pagtrato mula noong maging alagad sila. (Juan 9:22) Ginawa nila ang mga sakripisyong ito kasi naniniwala silang si Jesus ang Mesiyas. (Mat. 16:16) Pero noong mamatay si Jesus, lungkot na

lungkot sila at pinanghinaan ng loob kasi iniisip nilang hindi na mangyayari ang mga inaasahan nila. Normal lang na malungkot ang mga alagad ni Jesus pagkamatay niya, at naintindihan niya iyon. Alam niyang hindi iyon dahil sa wala silang pananampalataya. Kaya noong mismong araw na binuhay siya, pinatibay niya ang mga kaibigan niya. Halimbawa, nagpakita siya kay Maria Magdalena habang umiiyak ito malapit sa libingan niya. (Juan 20:11, 16) Nagpakita rin siya sa dalawang alagad niya na pumunta sa Emaus. Pagkatapos, nagpakita siya kay apostol Pedro. w24.10 13 ¶5-6

Sabado, Setyembre 12

[Maging] laging handang ipagtanggol ang inyong pag-asa sa harap ng lahat ng humihingi ng paliwanag tungkol dito.—1 Ped. 3:15.

Mga magulang, tulungan ang anak ninyo na maging handang ipagtanggol ang paniniwala niya sa Maylalang. Puwede ninyong magkasamang pag-aralan ang mga artikulo sa jw.org sa seryeng “Tanong ng mga Kabataan—Paglalang o Ebolusyon?” Papiliin siya ng punto na sa tingin niya, makakakumbinsi sa iba na maniwalang mayroong Maylalang. Tulungan siyang mag-practice kung paano niya ito ipapaliwanag sa iba. Tulungan siyang gumamit ng simpleng pangangatuwiran kung mayroong handang makinig sa paliwanag niya. Halimbawa, baka sabihin ng isang kabataan: “Naniniwala lang ako sa mga bagay na nakikita ko, at hindi ko pa nakita ang Diyos.” Puwedeng sabihin ng kabataang Kristiyano: “Isipin mong naglalakad ka sa isang gubat na malayo sa siyudad o bayan. ‘Tapos may nakita ka doong balon. Ano’ng maiisip mo? Siguradong may gumawa n’on. Ganiyan din ang planeta natin at ang lahat ng bagay na may buhay. Siguradong may gumawa sa lahat ng ito!” w24.12 18 ¶16

Linggo, Setyembre 13

Hindi ba taglay ng matatanda ang karunungan at nagkakaroon ng unawa ang may mahabang buhay?—Job 12:12.

Lahat tayo, kailangan ng patnubay para makagawa ng matatalinong desisyon sa buhay. Siguradong makakatulong sa atin diyan ang mga elder at iba pang may-gulang na Kristiyano. Kung dihamak na mas matanda sila kaysa sa atin, huwag natin agad isipin na hindi na natin magagamit ang mga payo nila. Gusto ni Jehova na matuto tayo sa mga may-edad. Mas makaranasan sila, marunong, at malawak ang unawa dahil mas matagal na silang nabubuhay kaysa sa atin. Noong panahon ng Bibliya, ginamit ni Jehova ang tapat na mga may-edad para patibayin at gabayan ang bayan niya. Ang ilan sa kanila ay sina Moises, David, at apostol Juan. Magka-kaibang panahon sila nabuhay, at magkakaiba rin ang sitwasyon nila. Pero lahat sila, nagbigay ng magandang payo sa mga nakakabata sa kanila noong malapit na silang mamatay. Itinuro nila kung gaano kahalagang maging masunurin sa Diyos. Bata man tayo o matanda, makikinabang tayo sa payo nila.—Roma 15:4; 2 Tim. 3:16. w24.11 8 ¶1-2

Lunes, Setyembre 14

Kung hindi ninyo kakainin ang katawan ng Anak ng tao at iinumina ang kaniyang dugo, hindi kayo magkakaroon ng buhay.—Juan 6:53.

Noong panahon ni Noe, ipinagbawal ng Diyos sa mga tao ang pagkain ng dugo. (Gen. 9:3, 4) Inulit ni Jehova ang utos na iyan sa Kautusang ibinigay niya sa Israel. Sinumang kumain ng dugo ay “papatayin.” (Lev. 7:27) Itinuro ni Jesus sa mga Judio na sundin ang Kautusan. (Mat. 5:17-19) Kaya imposibleng sabihin niya sa mga Judio na literal na kai-

nin ang katawan niya o inumin ang dugo niya. Gumamit si Jesus ng ilustrasyon nang kausapin niya ang mga tao sa Galilea. Ganiyan din ang ginawa niya nang sabihin niya sa babaeng Samaritana: “Ang tubig na ibibigay ko ay . . . magbibigay . . . ng buhay na walang hanggan.” (Juan 4:7, 14) Hindi sinasabi ni Jesus sa babaeng Samaritana na magkakaroon siya ng buhay na walang hanggan kung literal siyang iinum ng isang klase ng tubig. Kaya hindi rin sinasabi ni Jesus sa mga tao sa Capernaum na magkakaroon sila ng buhay na walang hanggan kung literal nilang kakainin ang katawan niya at iinumina ang dugo niya. w24.12 9 ¶4-6

Martes, Setyembre 15

Iharap ninyo ang inyong katawan bilang isang haing buhay, banal, at katanggap-tanggap sa Diyos, para makapaglingkod kayo sa kaniya gamit ang inyong kakayahan sa pangangatuwiran.—Roma 12:1.

Dapat mag-ingat ang mga Kristiyanong asawang lalaki na magkaroon ng maling pananaw sa mga babae. Bakit? Kasi kadalasan nang nagagawa ng isang tao kung ano ang nasa isip niya. Sinabihan ni apostol Pablo ang mga pinahirang Kristiyano sa Roma na “huwag [nang] magpahubog sa sistemang ito.” (Roma 12:1, 2) Noong sumulat si Pablo sa kongregasyon sa Roma, lumilitaw na matagal na silang mga Kristiyano. Pero ipinapakita ng mga sinabi ni Pablo na may ilan sa kongregasyon na naiimpluwensiyahan pa rin ng mga kaugalian at kaisipan ng mundo. Kaya pinayuhan niya sila na baguhin ang pag-iisip nila at paggawi. Para din iyan sa mga Kristiyanong asawang lalaki sa ngayon. Nakakalungkot, may ilan na naiimpluwensiyahan ng kaisipan ng mundo at naging mapang-abuso pa nga sa asawa nila. w25.01 9 ¶4

Miyerkules, Setyembre 16

Pastulan ninyo ang kawan ng Diyos na nasa pangangalaga ninyo bilang mga tagapangasiwa.—1 Ped. 5:2.

Maraming gawain ang mga elder sa ngayon. Mga ebanghelisador sila. (2 Tim. 4:5) Nagpapakita sila ng magandang halimbawa sa ministryo, inoorganisa nila ang pangangaral sa teritoryo nila, at sinasanay ang mga kapatid na mangaral at magturo. Naglilingkod din sila bilang mga hukom, na maawain at hindi nagtatangi. Kapag may kapatid na nakagawa ng malubhang kasalanan, sinisikap ng mga elder na tulungan siyang maayos ang kaugnayan niya kay Jehova. Pero siyempre, tinitiyak rin nilang mapanatiling malinis ang kongregasyon. (1 Cor. 5:12, 13; Gal. 6:1) Pangunahin na, kilala ang mga elder bilang mga pastol. (1 Ped. 5:1-3) Sinisikap nilang magbigay ng pinaghandang mga pahayag, makilala ang lahat ng kapatid sa kongregasyon, at makapag-shepherding. May ilang elder din na tumutulong sa construction at maintenance ng mga Kingdom Hall, pag-oorganisa ng mga kombensiyon, at gawain ng mga Hospital Liaison Committee at Patient Visitation Group. Karagdagang atas nila ang mga ito, bukod pa sa mga ginagawa nila sa kongregasyon. Talagang nagpapagal nang husto ang mga elder! w24.10 20 ¶9

Huwebes, Setyembre 17

Kung kay Adan, ang lahat ay namamatay; kay Kristo naman, ang lahat ay bubuhayin.—1 Cor. 15:22.

Sa Bibliya, ang salitang “pagpapalaya” ay tumutukoy sa pagpapawalang-sala dahil sa ibinayad na pantubos. Gani-to ang sinabi ni apostol Pedro tungkol diyan: “Alam ninyo na pinalaya [lit., “tinubos”] kayo mula sa walang-saysay na pamumuhay na natutuhan ninyo sa mga

ninuno ninyo, hindi sa pamamagitan ng mga bagay na nasisira, ng pilak o ginto, kundi sa pamamagitan ng mahalagang dugo, gaya ng sa isang walang-dungis at walang-batik na kordero, ang kay Kristo.” (1 Ped. 1:18, 19; tlb.) Dahil sa pantubos, puwede tayong mapalaya sa kasalanan at kamatayan na nagpapahirap sa atin. (Roma 5:21) Talagang napakalaki ng utang na loob natin kay Jehova dahil pinalaya niya tayo. Nagpapasalamat din tayo kay Jesus kasi namatay siya para sa atin. w25.02 5 ¶15-16

Biernes, Setyembre 18

Maligaya ang taong laging nagbabantay.—Kaw. 28:14.

Paano ba tayo mag-iingat para hindi tayo matukso? Tingnan natin kung ano ang puwede nating matutuhan sa nangyari sa kabataang lalaki sa Kawikaan kabanata 7. Inakit siya ng isang imoral na babae, at nakagawa sila ng imoralidad. Sinasabi sa talata 22 na “agad” siyang sumunod sa babae, na para bang bigla na lang nangyari iyon. Pero makikita sa naunang mga talata na may iba pa siyang mga ginawa kaya siya unti-unting natukso na magkasala. Ano ba ang mga ginawa niya bago siya nagkasala? Una, bago gumabi, “dumaan siya malapit sa kanto ng bahay ng babae.” Pagkatapos, naglakad siya papunta sa bahay nito. (Kaw. 7:8, 9) Nang makita niya ang babae, hindi siya umalis. Pumayag pa nga siya na halikan nito, at nakinig siya habang ikinukuwento ng babae na naghandog ito ng mga haing pansalo-salo. Malamang na sinabi ito ng babae para hindi isipin ng kabataang lalaki na masama siya. (Kaw. 7:13, 14, 21) Kung hindi sana ginawa ng kabataang lalaki ang lahat ng iyon, naiwasan sana niyang mapaharap sa tukso at magkasala. w24.07 16 ¶8-9; 19 ¶19

Sabado, Setyembre 19

Dapat na ninyo siyang patawarin nang buong puso at aliwin.—2 Cor. 2:7.

Hindi kinukunsinti ni Jehova ang malubhang pagkakasala ng mga lingkod niya. Iniisip ng ilan na dahil “maawain” siya, hahayaan niyang manatili sa organisasyon niya ang mga di-nagsisising nagkasala. Pero hindi ganiyan magpakita ng awa si Jehova. Maawain siya pero hindi kunsintidor; hindi niya ibinababa ang pamantayan niya. (Judas 4) Ang totoo, kapag hinayaan niyang manatili sa kongregasyon ang di-nagsisising nagkasala, hindi siya nagiging maaawain, kasi puwede itong ikapahamak ng buong kongregasyon. (Kaw. 13:20; 1 Cor. 15:33) Pero natutuhan din natin na ayaw ni Jehova na mapuksa ang sinuman. Gusto niyang maligtas ang mga tao hangga’t posible. Nagpapakita siya ng awa sa mga nagsisisi at gustong ayusin ang kaugnayan nila sa kaniya. (Ezek. 33:11; 2 Ped. 3:9) Kaya nang magsisi ang lalaki sa Corinto at magbago, ginamit ni Jehova si apostol Pablo para sabihin sa kongregasyon na dapat na nilang patawarin ang lalaki at na puwede na itong makabalik. w24.08 17 ¶7; 18-19 ¶14-15

Linggo, Setyembre 20

Anuman ang ginawa ninyo sa isa sa pinakamababa sa mga kapatid ko ay ginawa ninyo sa akin.—Mat. 25:40.

Sa ilustrasyon tungkol sa mga tupa at mga kambing, sinabi ni Jesus na hahatulan niya ang mga tao base sa naging pagsuporta nila sa pinahirang mga kapatid niya. (Mat. 25:31-46) Gagawin niya ang paghatol na ito sa panahon ng “malaking kapighatian,” bago magsimula ang Armagedon. (Mat. 24:21) Ibinubukod ng isang pastol ang mga tupa mula sa mga kambing. Ganiyan din ang

gagawin ni Jesus kapag humatol na siya. Ibubukod din niya ang mga tapat na sumuporta sa pinahirang mga tagasunod niya mula sa mga hindi sumuporta sa mga ito. Sinasabi sa Bibliya na magiging patas sa paghatol si Jesus, ang inatasang Hukom ni Jehova. (Isa. 11:3, 4) Inoobserbahan ni Jesus ang mga ginagawa, iniisip, at sinasabi ng mga tao—kasama na ang pakikitungo nila sa pinahirang mga kapatid niya. (Mat. 12:36, 37) Kaya masasabi niya kung tala-gang sinuportahan ng isa ang pinahirang mga kapatid niya at ang gawain nila. Ang isa sa pinakamahalagang paraan para masuportahan ang mga kapatid ni Kristo ay ang pakikibahagi sa gawaing pangangaral. w24.09 20-21 ¶3-4

Lunes, Setyembre 21

Tiyakin ninyo ang lahat ng bagay.—1 Tes. 5:21.

Alamin ang sinasabi ng Bibliya kapag hindi tayo sigurado sa iniisip natin. Halimbawa, tingnan natin ang kabataang nag-iisip kung mahalaga ba siya sa Diyos. Hahayaan na lang ba niya ang pagdududa niyang ito? Hindi, dapat niyang ‘tiyakin ang lahat ng bagay’—dapat niyang alamin kung ito ba talaga ang iniisip ni Jehova sa kaniya. Kapag nagbabasa tayo ng Bibliya, para bang nakikipag-usap sa atin si Jehova. Pero para malaman ang sagot niya sa mga tanong natin, may kailangan pa tayong gawin. Kailangan nating hanapin at pag-aralan ang mga teksto na makakatulong para masagot ang mga tanong natin. Para magawa iyan, puwede tayong mag-research sa mga publikasyon natin. (Kaw. 2:3-6) Ipanalangin kay Jehova na gabayan tayo sa pagre-research at makita ang sagot niya sa mga tanong natin. Pagkatapos, hanapin ang mga prinsipyo sa Bibliya at mga impormasyong makakatulong sa atin. w24.10 25 ¶4-5

Martes, Setyembre 22

Hindi inuuna [ng pag-ibig] ang sariling kapakanan.—1 Cor. 13:5.

Hindi pagpapalain ni Jehova ang pag-sisikap ng isa kung ginagawa niya iyon para purihin siya ng iba. (1 Cor. 10: 24, 33; 13:4) Kahit ang malalapit na kabiligan ni Jesus, nagkaroon ng maling motibo sa pag-abot ng pribilehiyo. Tingnan ang ginawa ng mga apostol na sina Santiago at Juan. Hiniling nila kay Jesus na bigyan sila ng mataas na posisyon sa Kaharian niya. Para kay Jesus, hindi nila dapat ginawa iyon. Kaya sinabi niya sa 12 apostol: “Ang sinumang gustong maging dakila sa inyo ay dapat na maging lingkod ninyo, at ang sinumang gustong maging una sa inyo ay dapat na maging alipin ng lahat.” (Mar. 10: 35-37, 43, 44) Kung ang motibo ng isang brother sa pag-abot ng pribilehiyo ay para mapaglingkuran ang iba, marami siyang magagawa para sa kongregasyon. —1 Tes. 2:8. w24.11 15-16 ¶7-8

Miyerkules, Setyembre 23

Nagtatagumpay ito kapag marami ang tagapayo.—Kaw. 15:22.

Kapag gumagawa ng desisyon, papakilusin tayo ng pag-ibig na unahin ‘ang kapakanan ng iba’ at maging mahinhin. (1 Cor. 10:23, 24, 32; 1 Tim. 2:9, 10) Tutulong ang dalawang katangiang ito para makagawa tayo ng desisyong nagpapakita na mahal at nirerespeto natin ang iba. Kung gagawa ka ng isang malaking desisyon, pag-isipan ang mga kailangan para magawa mo iyon. Tinuruan tayo ni Jesus na ‘kuwentahin ang gastusin.’ (Luc. 14:28) Kaya isipin kung gaano karaming panahon, lakas, at iba pang bagay ang kailangan mong ibigay para maisagawa mo ang desisyon mo. Sa ilang pagkakataon, baka kailangan mong konsultahin ang pamil-

ya mo para mapag-usapan kung paano sila puwedeng makasuporta sa gagawin mong desisyon. Bakit mahalagang gagawin iyan? Kasi baka dahil diyan, maki-ta mo na may kailangan kang i-adjust sa desisyon mo o baka may mas maganda pang opsiyon. At kapag kinonsulta mo ang pamilya mo sa desisyon mo at pina-kinggan sila, magiging mas handa silang tulungan ka na maisagawa ang desisyon mo. w25.01 18-19 ¶14-15

Huwebes, Setyembre 24

Magsaya kayo at magalak.—Isa. 65:18.

Sinabi ni Isaiaas ang dahilan kung bakit dapat tayong ‘magsaya at magalak’ sa espirituwal na paraiso. Si Jehova ang gumawa ng paraisong ito. (Isa. 65:18, 19) Kaya naman hindi nakakapagtaka na ginagamit niya tayong mga lingkod niya para akayin ang iba na nasa mundong ito na gutom sa espirituwal papunta sa ating napakagandang espirituwal na paraiso! Napakarami nating tinatanggap na pagpapala dahil nasa katotohanan tayo, kaya sabik na sabik tayong sabihin sa iba ang mga ito. (Jer. 31:12) Nagpapasalamat din tayo at sabik na sabik sa mararanasan nating buhay sa hinaharap dahil sa magandang kaugnayan natin kay Jehova. Ipinangako ng Bibliya na “magtatayo [tayo] ng mga bahay at titira sa mga iyon, at magtatanim [tayo] ng ubas at kakainin ang bunga nito.” “Hindi [tayo] magpapagod nang walang saysay,” dahil ‘pagpapalain tayo ni Jehova.’ Nangangako siya ng isang panatag at makabuluhang buhay. Alam niya ang pangangailangan ng bawat isa at ‘ibibigay niya ang inasam nila.’—Isa. 65:20-24; Awit 145:16. w24.04 22-23 ¶11-12

Biyernes, Setyembre 25

Ang aking matibay na bato, ang aking kanlungan, ay ang Diyos.—Awit 62:7.

Ginagawa nating Bato ng buhay natin si Jehova kapag buong puso tayong umaasa sa kaniya. Nagtitiwala tayo na kung susundin natin siya kahit sa mahihirap na kalagayan, mapapabuti tayo. (Isa. 48:17, 18) At sa tuwing nararanasan natin ang tulong niya, mas tumitibay ang tiwala natin sa kaniya. Dahil dito, naging kumbinsido tayo na anumang hamon ang mapaharap sa atin, makakayanan natin iyon sa tulong ni Jehova. Gaya ng isang malaking bato o bundok, matatag si Jehova at hindi natitinag. Hindi nagbabago ang mga katangian niya at layunin. (Mal. 3:6) Nang magrebelde sina Adan at Eva, hindi niya binago ang layunin niya. Gaya ng isinulat ni apostol Pablo, ‘hindi kaya ni Jehova na kumilos nang taliwas sa pamantayan niya.’ (2 Tim. 2:13, tlb.) Kaya anumang mangyari o gawin ng iba, hindi-hindi nagbabago si Jehova. Dahil diyan, makapagtiwala tayong tutulungan niya tayo sa mahihirap na kalagayan at talagang tutuparin niya ang mga pangako niya sa hinaharap.—Awit 62:6, 7. w24.06 27-28 ¶7-8

Sabado, Setyembre 26

[Napakahalaga ng] panloob na pagkatao.—1 Ped. 3:4.

Kung may kasintahan ka na, ano ang makakatulong sa iyo na makapagdesisyon kung papakasalan mo siya o hindi? Kilalaning mabuti ang isa’t isa. Baka may ilang bagay ka nang alam sa kaniya bago pa kayo magsimulang magligawan. Pero ngayon, may pagkakataon kayong alamin ang “panloob na pagkatao” ng bawat isa. Kasama dito ang pagalam sa lalim ng kaugnayan niya kay Jehova, kung ano ang mga katangian niya,

at kung paano siya mag-isip. Paglipas ng panahon, dapat masagot mo ang mga tanong na gaya nito: ‘Magiging mabuting asawa kaya siya para sa akin?’ (Kaw. 31:26, 27, 30; Efe. 5:33; 1 Tim. 5:8) ‘Kaya ba naming ibigay ang pagmamahal at atensiyon na kailangan ng isa’t isa? Kaya ko bang palampasin ang di-magagandang ugali niya?’ (Roma 3:23) Habang mas nakikilala ninyo ang isa’t isa, tandaan: Ang pinakamahalaga ay hindi ang dami ng pagkakapareho ninyo, kundi ang kakayahang ninyong mag-adjust sa mga pagkakaiba ninyo. w24.05 27 ¶5

Linggo, Setyembre 27

*Nagkasala ako kay Jehova.
—2 Sam. 12:13.*

Nakagawa ng malubhang kasalanan si Haring David. Pero nang puntahan siya ni propeta Natan para sabihing nagkasala siya, nagpakumbaba si David at nagsisi. (Awit 51:3, 4, 17, superskripsiyon) Nagkasala rin si Haring Hezekias kay Jehova. (2 Cro. 32:25) Pero gaya ni David, nagpakumbaba rin si Hezekias at nagsisi. (2 Cro. 32:26) Bandang huli, ano ang naging tingin ni Jehova kay Hezekias? Isa siyang tapat na hari na “patuloy [na] ginawa ang tama sa paningin” Niya. (2 Hari 18:3) Ano ang natutuhan natin? Dapat tayong magsisi at gawin ang buong makakaya natin para hindi na maulit ang mga nagawa nating kasalanan. Paano naman kung pinayuhan tayo ng mga elder, baka sa isang bagay pa nga na sa tingin natin, hindi naman ganoon kaseryoso? Hindi natin dapat isipin na nadismaya sa atin si Jehova o ang mga elder. Kahit ang mabubuting hari ng Israel, kinailangang payuhan at ituwid. (Heb. 12:6) Kaya kapag pinayuhan tayo, (1) dapat tayong magiging mapagpakumbaba at tanggapin ang pagtutuwid, (2) dapat nating gawin ang kinakailangang pagbabago, at (3) dapat

na patuloy tayong maglingkod kay Jehova nang buong puso. Kung pagsisihan natin ang mga kasalanan natin, patawarin tayo ni Jehova.—2 Cor. 7: 9, 11. w24.07 21 ¶8; 22 ¶9, 11

Lunes, Setyembre 28

Alisin ninyo ang masama sa gitna ninyo.—1 Cor. 5:13.

Inaalas sa kongregasyon ang isang nagkasala kapag pinili niya pa ring ituloy ang masamang ginagawa niya kahit paulit-ulit siyang tinulungan ng mga elder na magsisi. (2 Hari 17:12-15) Ipinakita niya na ayaw niya talagang sundin ang pamantayan ni Jehova. (Deut. 30:19, 20) Ipatatalastas na hindi na siya isang Saksi ni Jehova. Hindi ito ginagawa para ipahiya ang nagkasala. Ipinatalastas ito para masunod ng kongregasyon ang utos ng Bibliya na “tigilan ang pakikisama” sa taong iyon at “huwag man lang kumaing kasama” niya. (1 Cor. 5:9-11) May mahalagang dahilan kung bakit iniutos iyan ni Jehova. Isinulat ni apostol Pablo: “Ang kaunting lebadura ay nagpapaalsa sa buong masa.” (1 Cor. 5:6) Kung hindi aalisin sa kongregasyon ang di-nagsisising nagkasala, puwedeng maisip ng ilan na hindi naman pala nila kailangang sundin ang pamantayan ng Diyos.—Kaw. 13:20; 1 Cor. 15:33. w24.08 27 ¶3-4

Martes, Setyembre 29

May lakas akong harapin ang anumang bagay dahil sa kaniya na nagbibigay ng kapangyarihan sa akin.—Fil. 4:13.

Hindi tayo literal na makakapagpasa ng lakas sa iba. Pero puwede natin itong gamitin para tulungan sila. Halimbawa, baka puwede nating tulungan ang may edad o may-sakit nating mga kapatid sa mga gawain nila sa bahay o sa mga kailangan nilang bilhin. Puwede rin tayong magboluntaryo sa paglilinis at pagma-

mantini ng Kingdom Hall. Tandaan na puwede rin nating mapalakas ang iba gamit ang kakayahan nating magsalita. May naiisip ka bang kapatid na nangangailangan ng komendasyon o pampatibay? Kung mayroon, iparamdam mo sa kaniya na nagmamalasakit ka. Puwede mo siyang bisitahin, tawagan, o itext. Puwede mo rin siyang padalhan ng card o email. Huwag masyadong mag-alala sa sasabihin mo. Kung minsan, ang kailangan lang talaga ng mga kapatid ay simpleng mga salita na mula sa puso. Tutulong na iyan sa kanila na makayanan ang araw nila o makapanatiling tapat. —Kaw. 12:25; Efe. 4:29. w24.09 28 ¶8-10

Miyerkules, Setyembre 30

Kung nagsisikap ang isang lalaki na maging tagapangasiwa, magandang tunguhin iyan.—1 Tim. 3:1.

Kung isa kang ministeryal na lingkod ngayon, malamang na sinisikap mo nang magkaroon ng mga katangiang kailangan para maging elder. Puwede mo bang abutin ang pribilehiyong ito? Ano nga ba ang mga gawain ng mga elder? Nagpapakita sila ng magandang halimbawa sa pangangaral. Masipag din sila sa pagse-shepherding at pagtuturo sa mga kapatid. At sinisikap nilang nakakapagpatibay ang mga sinasabi at ginagawa nila. Kaya naman, tinatawag sila sa Bibliya na ‘mga taong ibinigay bilang regalo.’ (Efe. 4:8) Paano ka magiging kuwalipikadong maging elder? Hindi ito parang pag-a-apply ng trabaho. Kadalasan na, kapag may skill ka na hinahanap ng isang kompanya, matatanggap ka sa trabaho. Pero hindi lang skill ang kailangan kung gusto mong maging elder. Hindi sapat na marunong kang mangaral at magturo. Kailangan mong maabot ang mga kuwalipikasyon para sa mga elder na binabanggit sa 1 Timoteo 3:1-7 at Tito 1:5-9. w24.11 20 ¶1-3

Huwebes, Oktubre 1

Patuloy akong maghihintay kay Jehova.
—Mik. 7:7.

Madalas tayong makatanggap ng mga tagubilin mula sa mga elder, tagapangasiwa ng sirkito, tanggapang pansangay, at Lupong Tagapamahala. Pero paano kung hindi natin maintindihan kung bakit ibinigay ang isang tagubilin? Baka magduda tayo kung talaga bang makakabuti sa atin ang pagsunod doon. At baka nga magpokus pa tayo sa mga kahinaan ng mga brother na nagbigay ng tagubilin. Kapag lumalakad tayo ayon sa pananampalataya, nagtitiwala tayong si Jehova ang talagang gumagabay sa organisasyon niya at na alam niya ang pinakamabuti para sa atin. Kaya sinusunod natin agad ang mga tagubilin, at positibo tayo sa pagsunod sa mga ito. (Heb. 13:17) Alam nating makakatulong sa pagkakaisa ng kongregasyon ang pagsunod. (Efe. 4:2, 3) Kahit hindi perpekto ang mga nangunguna, nagtitiwala tayong pagpapalain ni Jehova ang pagsunod natin. (1 Sam. 15:22) At kung may kailangan ngang baguhin, gagawin iyon ni Jehova sa tamang panahon. w25.03 23-24 ¶13-14

Biernes, Oktubre 2

[Ang Diyos ay] Tagapagsiwalat ng mga lihim.—Dan. 2:28.

Napakalapit na ng wakas! Araw-araw nating nakikitang natutupad ang mga hula sa Bibliya. Halimbawa, nakikita nating nag-aagawan sa kapangyarihan ang “hari ng hilaga” at ang “hari ng timog.” (Dan. 11:40, tlb.) Nakikita rin nating napapangaral na ang mabuting balita ng Kaharian sa buong mundo at dumarami ang sumasama sa paglilingkod kay Jehova. (Isa. 60:22; Mat. 24:14) At tuma-tanggap tayo ng napakaraming espirituwal na pagkain “sa tamang panahon.”

(Mat. 24:45-47) Unti-unting nililina sa atin ni Jehova ang mga detalye ng mahahalagang pangyayari sa hinaharap. (Kaw. 4:18) Sigurado tayo na kapag nagsimula na ang malaking kapighatian, alam na natin ang dapat nating gawin para makapanatili tayong tapat at nagkakaisa. Pero dapat nating tanggapin na may ilang bagay pa rin na hindi natin malalaman. w24.05 8 ¶1-2

Sabado, Oktubre 3

Hindi siya naninirang-puri.
—Awit 15:3.

Espesipikong binanggit ng salmista ang tungkol sa paninirang-puri. Ano nga ba ito? Karaniwan na, ito ang pagsasabi ng maling impormasyon tungkol sa isang tao na makakasira sa reputasyon niya. Sinasabi rin sa Awit 15:3 na ang mga panauhin ni Jehova ay hindi gumagawa ng masama sa kapuwa nila at hindi nila sinisiraan ang mga kaibigan nila. (Awit 15:1) Paano natin iyan posibleng magawa? Puwede nating masiraan nang hindi sinasadya ang iba kung magkakalat tayo ng maling impormasyon tungkol sa kanila. Halimbawa, (1) baka nabalitaan mong tumigil sa pagpapayunir ang isang sister, (2) lumabas ng Bethel ang isang mag-asawa, o (3) hindi na elder o ministeryal na lingkod ang isang brother. Sa ganitong mga sitwasyon, tama bang sabihin natin sa iba na baka may nagawa silang mali kaya nangyari iyon? Hindi natin dapat gawin iyan kasi maraming posibleng dahilan na hindi natin alam. At gaya ng binanggit kanina, ang isang panauhin sa tolda ni Jehova ay “hindi . . . gumagawa ng masama sa kapuwa niya, at hindi niya sinisiraan ang mga kaibigan niya.” w24.06 11-12 ¶11-13

Linggo, Oktubre 4

*Laging nasa isip ko si Jehova.
Dahil nasa kanan ko siya, hindi
ako matitinag.*—Awit 16:8.

Magagawa nating sanayin ang sarili nating matakot kay Jehova kung lagi nating iisipin ang magpapasaya sa kaniya sa bawat desisyong ginagawa natin. Kapag nagbabasa ka ng isang ulat sa Bibliya, tanungin ang sarili, ‘Ano ang gagawin ko kung ako ang nasa sitwasyong ito?’ Halimbawa, isiping nandoon ka noong sinasabi ng 10 pinunong Israelita na hindi nila kayang talunin ang mga Cananita pagkatapos nilang mag-espiya sa lupaing ipinangako ni Jehova sa mga Israelita. Maniniwala ka ba sa sinabi nila at magpapadala sa takot sa tao, o mangingibabaw ang pagmamahal mo kay Jehova at ang kagustuhang mapasaya siya? Katotohanan ang sinabi nina Josue at Caleb, pero hindi iyon nakita ng mga Israelita. Dahil doon, hindi sila nakapasok sa Lupang Pangako.—Bil. 14: 10, 22, 23. w24.07 10 ¶7

Lunes, Oktubre 5

Si Jehova ang tagasuri ng mga puso.
—Kaw. 17:3.

Iniwan ni Gomer ang asawa niyang si propeta Oseas at sumama sa ibang lalaki. Imposible na bang magsisi si Gomer? Nakakabasa ng puso si Jehova, at gani-to ang ipinagawa niya kay Oseas: “Mahalin mong muli ang babaeng iniibig ng ibang lalaki at nangangalunya, kung panong iniibig ni Jehova ang bayang Israel kahit bumabaling sila sa ibang mga diyos.” (Os. 3:1; Kaw. 16:2) Pansinin na kasalukuyan pang nangangalunya ang asawa ni Oseas. Pero inutusan ni Jehova si Oseas na maunang lumapit kay Gomer, patawarin ito, at tanggapin ulit bilang asawa. Ginamit ni Jehova ang halimbawang ito para ipaalam

sa bayan ang nararamdaman niya para sa kanila. Kahit na gumagawa pa sila ng malulubhang kasalanan, mahal niya pa rin sila at patuloy siyang gumagawa ng paraan para tulungan silang magsisi at magbago. Ibig sabihin nito, kahit kasalukuyang gumagawa ng malubhang kasalanan ang isang tao, tinutulungan na siyang magsisi ni Jehova, “ang tagasuri ng mga puso.” w24.08 10 ¶7

Martes, Oktubre 6

*Ang Kautusan ay may anino ng
mabubuting bagay na darating.*
—Heb. 10:1.

Maraming kailangang baguhin ang mga Judio noon na naging Kristiyano, at hindi ito madali. Dati, ang mga Judio ang piniling bayan ni Jehova. Napakaespesyal din ng Jerusalem noon, kasi nandito ang kinatawang hari ng Diyos at ang templo dito ang sentro ng tunay na pagsamba. Sinusunod ng lahat ng tapat na Judio ang Kautusang Mosaiko at mga batas na itinuturo ng mga lider ng relihiyon nila. May mga batas tungkol sa pagkain, pagtutuli, at kung paano nila papakitunguhan ang mga di-Judio. Pero pagkamatay ni Jesus, hindi na tinatanggap ni Jehova ang mga haing inihahandog sa templo. Nahirapan ang mga Judiong Kristiyano na tanggapin iyan. (Heb. 10:1, 4, 10) Kahit ang may-gulang na mga Kristiyanong gaya ni apostol Pedro, nahirapang tanggapin ang ilan sa mga pagbabago. (Gawa 10:9-14; Gal. 2:11-14) Dahil sa mga bagong paniniwala ng mga Kristiyanong ito, pinag-usig sila ng mga Judiong lider ng relihiyon. w24.09 9 ¶4

Miyerkules, Oktubre 7

Alalahanin ninyo ang mga nangunguna sa inyo, na nagsabi sa inyo ng salita ng Diyos.—Heb. 13:7.

Kapag may ibinibigay si Jehova na atas sa mga lingkod niya, inaasahan niyang gagawin nila iyon nang organisado. (1 Cor. 14:33) Halimbawa, kalooban ng Diyos na maipangaral ang mabuting balita sa buong lupa. (Mat. 24:14) Si Jesus ang inatasan ni Jehova na manguna sa gawaing ito, at sinigurado niyang magiging organisado ito. Noong unang siglo, habang nagkakaroon ng mga kongregasyon sa iba't ibang lugar, nag-aatas din ng matatandang lalaki, o mga elder, para magbigay ng tagubilin at manguna sa mga iyon. (Gawa 14:23) Sa Jerusalem, may isang grupo ng mga elder, na binubuo ng mga apostol at matatandang lalaki. Sila ang gumagawa ng mga desisyon na dapat sundin ng lahat ng kongregasyon. (Gawa 15:2; 16:4) Dahil sinunod ng mga kapatid ang mga tagubilin iyon, “patuloy na tumitibay ang pananampalataya ng mga kongregasyon at nadaragdagan sila araw-araw.”—Gawa 16:5. w24.04 8 ¶1

Huwebes, Oktubre 8

Pinuntahan ni Maria Magdalena ang mga alagad at sinabi ang balita: “Nakita ko ang Panginoon!”
—Juan 20:18.

Noong umaga ng Nisan 16, may mga babaeng pumunta sa libingan ni Jesus. (Luc. 24:1, 10) Si Maria Magdalena ang isa sa mga babae. Pagkarating niya sa libingan, wala na doon ang katawan ni Jesus. Tumakbo siya para sabihin ito kina Pedro at Juan, at sumunod din siya nang pumunta ang mga ito sa libingan. Nang makita nina Pedro at Juan na wala na talaga doon ang katawan ni Jesus, umuwi na sila. Pero naiwan doon si Ma-

ria at umiiyak. Nakikita siya ni Jesus at gusto siyang patibayin. Kaya nagpakita si Jesus sa kaniya, kinausap siya, at binigyan ng mahalagang atas na nagpatibay sa kaniya—inatasan siya ni Jesus na ibalita sa mga kapatid Niya ang tungkol sa pagkabuhay-muli Niya.—Juan 20:17, 18. w24.10 13 ¶7

Biyernes, Oktubre 9

Pararamihin ko ang aking mga tanda at himala sa lupain ng Ehipto.
—Ex. 7:3.

Naglingkod si Moises bilang propeta, hukom, lider ng bayan, at istoryador. Pinangunahan niya ang bansang Israel sa paglabas sa Ehipto, at nakita niya mismo ang marami sa mga himala ni Jehova. Bukod diyan, ginamit siya ni Jehova para isulat ang unang limang aklat ng Bibliya, ang Awit 90, at posibleng pati ang Awit 91. Malamang na siya rin ang sumulat ng aklat ng Job. Talagang maraming naranasan si Moises! Noong malapit nang mamatay si Moises sa edad na 120, tinipon niya ang lahat ng Israelita para ipaalala sa kanila ang mga nakita at naranasan nila. Nakita nila ang maraming himala ni Jehova at kung pano niya pinarusahan ang mga Ehipsiyo. (Ex. 7:4) Nakita nilang nahati ang Dagat na Pula, at nakalakad sila dito. Pagkatapos, nakita nilang pinatay ang Pararon at ang buong hukbo nito. (Ex. 14:29-31) Habang nasa ilang, naranasan nila ang proteksiyon at pangangalaga ni Jehova. (Deut. 8:3, 4) Ngayong papasók na ang bayan sa Lupang Pangako, gusto silang patibayin ni Moises sa huling pagkakataon. w24.11 8-9 ¶3-4

Sabado, Oktubre 10

Ang sinumang kumakain ng tinapay na ito ay mabubuhay magpakailanman . . . Ang tinapay na ibibigay ko alang-alang sa sangkatauhan ay ang aking katawan.
—Juan 6:51.

May pagkakaiba ang sinabi ni Jesus sa Hapunan ng Panginoon at ang sinabi niya sa Galilea. Ang sinabi ni Jesus sa Hapunan ng Panginoon ay para lang sa maliit na grupo. Pero sa Galilea, malaking bilang ng mga tao ang kausap niya. Nang nasa Galilea si Jesus noong 32 C.E., ang karamihan sa kausap ni Jesus ay mga Judiong gusto lang makatanggap ng pagkain. Pero gusto niyang ituro sa kanila na may mas mahalaga pa kaysa sa literal na pagkain. Sinabi niya kung paano sila puwedeng magkaroon ng buhay na walang hanggan. Sinabi rin ni Jesus na puwedeng buhayang muli sa huling araw ang mga namatay at mabuhay magpakailanman. Hindi niya tinutukoy dito ang iilang tao lang na pini-li, gaya ng ginawa niya sa Hapunan ng Panginoon. Dito sa Galilea, para sa lahat ng tao ang sinasabi niyang pagpapala. w24.12 11 ¶10-11

Linggo, Oktubre 11

Mga asawang lalaki, patuloy na mahalín ang inyong asawang babae.—Col. 3:19.

Galit si Jehova sa mararahas. (Awit 11:5) Espesipiko niyang binanggit na galit siya sa mga lalaking inaabuso ang asawa nila. (Mal. 2:16) Kapag minamaltrato ng lalaki ang asawa niya, masisira ang kaugnyan niya sa Diyos. Hindi papakinggan ni Jehova ang mga panalangin niya. (1 Ped. 3:7) May mga lalaki na galit makipag-usap sa asawa nila at masakit magsalita. Pero ayaw ni Jehova sa “galit, poot, pagbulyaw, at mapang-abusong pananalita.” (Efe. 4:31, 32) Kapag masakit magsalita ang lalaki sa asawa niya, hindi lang pag-

sasama nila ang nasisira, kundi pati ang kaugnyan niya sa Diyos. (Sant. 1:26) Ganiyan din pagdating sa isang asawang lalaki na tumitingin sa pornograpiya. Nasisira din ang kaugnyan niya kay Jehova at nawawalang-dangal ang asawa niya. Inaasahan ni Jehova na magiging tapat ang lalaki sa asawa niya, hindi lang sa mga ginagawa niya, kundi pati sa mga iniisip niya. Sinabi ni Jesus na ang isang lalaking tumitingin sa ibang babae nang may pagnanasa ay nagkasala na ng pangangalunya “sa puso niya.”—Mat. 5: 28, 29. w25.01 9 ¶6-8

Lunes, Oktubre 12

Ang isang tao ay ipinahahayag na matuwid . . . sa pamamagitan lang ng pananampalataya kay Jesu-Kristo.
—Gal. 2:16.

Sinasabi ng Bibliya na ipinahayag na matuwid ni Jehova ang mga lingkod niya. Ibig sabihin, hindi na niya tayo sisingilin sa mga kasalanan natin. Hindi naman ibig sabihin nito na nilalabag ni Jehova ang pamantayan niya ng katarungan. Hindi niya tayo ipinahayag na matuwid dahil sa mga nagawa natin o dahil kinunksinti niya tayo. Pinatawad niya tayo at ipinahayag na matuwid dahil nanampalataya tayo sa ginawa niya at ng kaniyang Anak para matubos tayo. (Roma 3:24) Ano ang mga naging posible dahil ipinahayag tayong matuwid? May mga napiling mamahalang kasama ni Jesus sa langit at naging mga anak ng Diyos. (Tito 3:7; 1 Juan 3:1) Pinatawad na ang mga kasalanan nila. Binura iyon ni Jehova na para bang hindi sila nagkasala, kaya puwede na silang maging bahagi ng Kaharian. (Roma 8:1, 2, 30) Ang iba naman na ipinahayag na matuwid ay titira dito sa lupa magpakailanman. Pinatawad na ni Jehova ang mga kasalanan nila at naging mga kaibigan niya sila.—Sant. 2:21-23. w25.02 5 ¶17-18

Martes, Oktubre 13

Hindi kaisipan ng Diyos ang iniisip mo, kundi kaisipan ng tao.

—Mat. 16:23.

May pagkakataon na hindi natularan ni apostol Pedro ang pag-iisip ni Jehova. Kakasabi pa lang ni Jesus sa mga apostol na pupunta siya sa Jerusalem, aarestuhin ng mga kaaway niya, papahirapan, at papatayin. (Mat. 16:21) Alam ni Pedro na si Jesus ang Mesiyas na magliligtas sa bayan ng Diyos. Kaya hindi niya matanggap na hahayaan ni Jehova na mamatay si Jesus. (Mat. 16:16) Sinabi ni Pedro kay Jesus: “Maging mabait ka sa sarili mo, Panginoon; hindi iyan kailanman mangyayari sa iyo.” (Mat. 16:22) Iba ang naiisip ni Pedro kumpara kay Jesus kasi hindi natularan ni Pedro kung paano mag-isip si Jehova. Alam ni Jesus na para magawa ang kalooban ni Jehova, dapat siyang magdusa at mamatay. Kaya hindi niya pinakinggan si Pedro kahit maganda naman ang intensiyon nito. Natutuhan dito ni Pedro na dapat niyang tularan kung paano mag-isip si Jehova. At iyan din ang dapat nating gawin. w25.03 9 ¶5-6

Miyerkules, Oktubre 14

Si Jehova ay malapit sa mga may pusong nasasaktan; inililigtas niya ang mga nasisiraan ng loob.

—Awit 34:18.

Nasasaktan ka ba ngayon dahil binigo ka o ginawan ng masama ng taong pinagkakatiwalaan mo? Paano ka man tinrato ng iba, mahal ka pa rin ng iyong Ama sa langit. Kapag binigo tayo ng iba, mapapatibay tayo sa sinabi ni David sa teksto sa araw na ito. Ayon sa isang reperensiya, ang ekspresyong “nasisiraan ng loob” ay puwedeng tumukoy sa “mga wala nang magandang bukas na natatanaw.” Paano tinutulungan ni Je-

hova ang mga taong nakakaramdam ng ganiyan? Kapag nakita ng isang mapagmahal na magulang na umiiyak ang anak niya, yayakapin niya ito at papakalmahin. Ganiyan din si Jehova, “malapit” siya sa atin. Kapag nasasaktan tayo dahil sa ginawa ng iba sa atin, naiintindihan niya ang nararamdaman natin at gusto niyang tumulong agad. Iniibsan niya ang sakit na nararamdaman natin at binibigyan niya tayo ng maraming magagandang bagay na papanabikan para matiis ang mga pinagdadaanan natin ngayon.—Isa. 65:17. w24.12 23 ¶13-14

Huwebes, Oktubre 15

Si Jehova ang magbibigay sa inyo ng . . . gantimpala.

—Col. 3:24.

Sa ngayon, makakapagtiwala ang mga elder na nakikita at pinapahalagahan ni Jehova ang mga pagsisikap nila. Bukod sa pagse-shepherding, pagtuturo, at pangangaral, marami sa kanila ang nagboboluntaryo rin sa mga construction project ng organisasyon at tumutulong kapag may sakuna. Ang iba naman ay miyembro ng Patient Visitation Group o Hospital Liaison Committee. Alam ng mga elder na ito na kay Jehova ang kongregasyon. Ibinibigay nila ang buong makakaya nila sa paglilingkod at talagang nagtitiwala sila na gagantimpalaan sila ng Diyos. (Col. 3:23, 24) Hindi lahat, puwedeng maging elder. Pero lahat tayo, may maibibigay kay Jehova. Masayang-masaya si Jehova kapag ibinibigay natin ang buong makakaya natin para sa kaniya. Nakikita niya ang mga donasyon natin sa pambuong-daigdig na gawain, kahit gaano ito kaliit. At masaya siya kapag nagpapatawad tayo. Makakaasa kang pinapahalagahan ni Jehova ang nagagawa mo. Mahal ka niya, at gagantimpalaan ka niya.—Luc. 21:1-4. w24.06 23 ¶12-13

Biernes, Oktubre 16

Huwag mong hayaang maakit ang puso mo sa mga daan niya. Huwag kang gumala-gala sa kaniyang mga landas.
—Kaw. 7:25.

Ipinapakita ng ulat na ito ni Solomon ang puwedeng mangyari sa kahit sinong lingkod ni Jehova. Puwede siyang makagawa ng malubhang kasalanan, at pagkatapos, maisip niyang bigla lang nangyari iyon. Pero kung pag-iisipan niya ito, malamang na makita niyang may nagawa muna siyang maling mga desisyon bago siya nagkasala. Baka nakipagkai-bigan siya sa mga hindi lingkod ni Jehova, pumili ng kuwestiyunableng libangnan, o baka paulit-ulit siyang pumunta sa mga website o lugar na hindi para sa mga Kristiyano. Posible rin na tumigil na siyang manalangin, magbasa ng Bibliya, dumalo sa pulong, o mangaral. Gaya ng kabataang lalaki sa Kawikanan, baka hindi naman talaga biglaan ang nagawa niyang kasalanan. Ano ang natutuhan natin? Dapat nating iwasan, hindi lang ang mismong kasalanan, kundi pati na ang mga desisyon na umaakay dito. Iyan mismo ang ipinaliwanag ni Solomon pagkatapos niyang sabihin ang nangyari.
—Mat. 5:29, 30. w24.07 16 ¶10-11

Sabado, Oktubre 17

Ibinigay sa amin ang kayamanang ito kahit gaya lang kami ng mga sisidlang luwad.—2 Cor. 4:7.

Ano ang kayamanang ito? Ang nagliligtas-buhay na gawaing pangangaral ng mensahe ng Kaharian. (2 Cor. 4:1) Ano naman ang mga sisidlang luwad? Tumutukoy ito sa mga lingkod ng Diyos na naghahatid ng mabuting balita sa iba. Noong panahon ni Pablo, ginagamit ng mga negosyante ang mga banga na lalagyan para maghatid ng mahahalagang produkto, gaya ng pagkain at alak, pati

na ng pera. Ipinagkatiwala ni Jehova sa atin ngayon ang napakahalagang mensahe ng mabuting balita. Sa tulong niya, magkakaroon tayo ng lakas na maihatid ang mensaheng ito. Minsan, baka matakot tayo sa tao o mag-alala sa magiging reaksiyon nila. Ano ang makakatu-long sa atin? Pag-isipan ang panalangin ng mga apostol nang utusan silang huwag nang mangaral. Imbes na magpadaig sa takot, nanalangin sila kay Jehova na tulungan silang patuloy na magsalita nang walang takot. Sinagot agad ni Jehova ang panalangin nila. (Gawa 4: 18, 29, 31) Kaya kung nahihirapan kang mangaral dahil sa takot sa tao, sabihin kay Jehova na tulungan kang mapalalim ang pag-ibig mo sa mga tao para madaig mo ang takot. w24.04 16 ¶8-9

Linggo, Oktubre 18

Ama namin na nasa langit, pakabanalin nawa ang pangalan mo.—Mat. 6:9.

Mahal natin si Jehova kaya gusto nating mapabanal ang pangalan niya. Gusto nating malinis ang pangalan niya sa mga kasinungalingang ikinakalat ni Satanas tungkol sa Kaniya. (Gen. 3:1-5; Job 2:4; Juan 8:44) Kapag nangangaral tayo, sinasabi natin sa mga taong handang makinig ang katotohanan tungkol sa Diyos natin. Gusto nating malaman ng lahat na napakamapagmahal niya at na matuwid at makatarungan ang pamamahala niya. (1 Juan 4:8) Sinasabi rin natin sa kanila na malapit nang alisin ng Kaharian niya ang lahat ng problema, kaya magiging payapa at masaya ang lahat ng tao. (Awit 37:10, 11, 29) Kapag itinuturo natin ang mga ito sa ministeryo, napapabanal natin ang pangalan ni Jehova. Dahil din dito, nagiging masaya tayo, kasi nagagawa natin ang dapat nating gawin bilang mga Saksi niya. At isang karangalan para sa atin na tawagin sa pangalang ito. w24.05 18 ¶12

Lunes, Oktubre 19

Kapag naghanda ka, imbitahan mo ang mahihirap, mga pilay, mga bulag, at iba pang may kapansanan; at magiging magilaga ka, dahil wala silang maisusukli sa iyo. Susuklian ka sa pagkabuhay-muli ng mga matuwid.—Luc. 14:13, 14.

Mga brother, masasabing “mapagpatuloy” kayo kung ginagawan ninyo ng mabuti ang iba, kasama na ang mga hindi malalapit sa inyo. (1 Ped. 4:9) Ganito inilarawan ng isang reperensiya ang isang mapagpatuloy na tao: “Ang pinto ng bahay niya—at ng puso niya—ay bukas sa mga estranghero.” Tanungin ang sarili, “Kilala ba akong nagpapakita ng kabaitan sa mga bumibisita sa kongregasyon?” (Heb. 13:2, 16) Ang isang mapagpatuloy na tao ay nagpapakita ng kabaitan sa lahat. Kasama diyan ang mahihirap, mga inimbitahang speaker, at iba pang masisipag na lingkod ni Jehova, gaya ng mga tagapangasiwa ng sirkito.—Gen. 18:2-8; Kaw. 3:27; Gawa 16:15; Roma 12:13. w24.11 21 ¶6

Martes, Oktubre 20

Ang mga dalagang nakahanda ay kasama niyang pumasok sa bahay na pagdarausan ng handaan.—Mat. 25:10.

Sa ilustrasyon tungkol sa 10 dalaga, sinabi ni Jesus na lumabas sila para salubungin ang lalaking ikakasal. (Mat. 25:1-4) Gusto nila siyang samahan sa bahay na pagdarausan ng handaan. Sinabi ni Jesus na ang lima sa kanila ay “matatolino” at ang lima pa ay “mangmang.” Handang hintayin ng matatalinong dalaga ang lalaking ikakasal kahit gaano pa katagal—kahit gabing-gabi pa siya dumating. Kaya nagdala sila ng lampara at ng reserbang langis sakaling matagalan pa siya. Talagang handang-handa sila! (Mat. 25:6-10) Nang dumating ang lalaking ika-

kasal, sumama sa kaniya ang matatalinong dalaga nang pumasok siya sa bahay na pagdarausan ng handaan. Ganiyan din ang puwedeng maranasan ng pinahirang mga Kristiyanong. Kung mananatili silang alerto at tapat hanggang sa dumating ang Kristo, makukuha nila ang gantimpala nila sa langit—makakasama nila sa Kaharian niya si Jesus, ang Lalaking Ikakasal.—Apoc. 7:1-3. w24.09 21 ¶6

Miyerkules, Oktubre 21

Nakita ko ang isang malaking pulutong . . . mula sa lahat ng bansa.—Apoc. 7:9.

Kapag pinag-iisipan natin ang resulta ng gawaing pangangaral sa buong mundo ngayon, makakapanatili tayong positibo. Bawat taon, milyon-milyong interesado ang dumadalo sa Memoryal at nagpapabau-tismo at sumasama sa atin sa pangangaral. Hindi natin alam kung gaano pa karami ang makikinig sa atin. Pero alam nating isang malaking pulutong ang tinipon ni Jehova, at makakaligtas sila sa malaking kapighatian. (Apoc. 7:9, 14) Nakikita ng Panginoon ng pag-aani na marami pa ang tatanggap sa mabuting balita, kaya dapat tayong patuloy na mangaral. (Luc. 10:2) Kilalá ang mga alagad ni Jesus sa pagiging masigasig sa pangangaral. Nang makita ng mga tao noon ang katapangan ng mga apostol sa pangangaral, “naalaala nilang ang mga ito ay kasama noon ni Jesus.” (Gawa 4:13) Patuloy sana tayong maging masigasig sa pangangaral para makita ng mga tao na tinutularan natin si Jesus. w25.03 18 ¶15; 19 ¶17-18

Huwebes, Oktubre 22

O Jehova, ano ang tao para pansinin mo?—Awit 144:3.

Makikita natin sa Bibliya na mahalaga kay Jehova kahit ang mga taong hindi

napapansin ng iba. Halimbawa, tingnan ang nangyari nang papuntahin ni Jehova si propeta Samuel sa bahay ni Jesse para pumili ng magiging hari ng Israel sa isa sa mga anak nito. Tinawag ni Jesse ang pito sa walong anak niyang lalaki para humarap kay Samuel. Hindi niya isinama ang bunsong si David. Pero si David ang pinili ni Jehova. (1 Sam. 16: 6, 7, 10-12) Nakita ni Jehova ang nasa puso ni David—alam niyang mahal na mahal siya nito. Pag-isipan kung paano na naipakita ni Jehova na mahalaga ka sa kaniya. Nagbibigay siya sa iyo ng payo na sakto sa kalagayan mo. (Awit 32:8) Magagawa niya ba iyan kung hindi ka niya kilala? (Awit 139:1) Kapag sinunod mo ang payo niya at nakita mo kung paano ito nakatulong sa iyo, magiging mas kumbinsido ka na mahalaga ka sa kaniya. (1 Cro. 28:9; Gawa 17: 26, 27) Nakikita niya ang mga pagsisi- kap mo na paglingkuran siya. Alam niya ang magagandang katangian mo, at gusto ka niyang maging kaibigan.—Jer. 17:10. w24.10 25-26 ¶7-9

Biernes, Oktubre 23

Naawa siya sa kanila dahil para silang mga tupa na walang pastol.
—Mar. 6:34.

Siguradong mahal mo si Jehova at gusto mong paglingkuran ang iba. Ano ang magpapakilos sa iyo na abutin ang pribilehiyong ito? Puwede mong isip-isipin ang mararamdaman mong saya kapag pinaglingkuran mo ang mga kapatid. Sinabi ni Jesus: “May higit na kaligayahan sa pagbibigay kaysa sa pagtanggap.” (Gawa 20:35) Makikita iyan mismo kay Jesus. Talagang naging masaya siya sa paglilingkod sa iba. Tingnan ang halimbawa na nasa Marcos 6:31-34. Pagod na pagod si Jesus at ang mga apostol niya, kaya pumunta sila sa isang lugar na malayo sa mga tao para makapagpahinga.

Pero nauna pa doon ang napakaraming tao na gustong makinig kay Jesus. Puwede naman sana niya silang tanggi- han kasi ‘wala man lang siyang panahon at ang mga kasama niya para kumain.’ O kaya naman, magturo lang siya ng isa o dalawang katotohanan, pagkatapos, pauwiin na sila. Pero dahil mahal niya ang mga tao, “tinuruan niya sila” kahit “gumagabi na.”—Mar. 6:35 w24.11 16 ¶9-10

Sabado, Oktubre 24

Gagantimpalaan ang mga ginagawa ninyo.—2 Cro. 15:7.

Mga magulang, tulungan ang anak ninyo na maghanap ng mga pagkakataon para sabihin sa iba ang katotohanang nasa Bibliya. (Roma 10:10) Puwedeng ikumpara ang pagsasabi ng paniniwala mo sa iba sa pag-aaral kung paano tutugtugin ang isang instrumento. Sa umpisa, mga simpleng kanta lang ang tutugtugin ng nag-aaral. At paglipas ng panahon, masasanay na siyang tumugtog. Ganiyan din ang puwedeng gawin ng isang kabataang Kristiyno. Puwede niyang simulan ang pakikipag- usap sa isang simpleng paraan. Halimbawa, puwede niyang tanungin ang kaklase niya: “Alam mo ba na mada- las, kinokopya lang ng mga engineer ang disenyo nila mula sa kalikasan? Tingnan mo itong video na ‘to.” Puwede niyang ipakita ang isang video sa ser- yeng *May Nagdisenyo Ba Nito?* Pagkata- pos, puwede niyang sabihin: “Pinupuri ang mga scientist dahil sa disenyong ki- nopya lang nila sa kalikasan. Paano na- man ang orihinal na nagdisenyo nito?” Posibleng makatulong ang simpleng pa- raan na iyan para maging interesado ang isang kabataan na matuto pa tung- kol kay Jehova. w24.12 19 ¶17-18

Linggo, Oktubre 25

Sa pamamagitan ng isang tao, ang kasalanan ay pumasok sa sangkatauhan at dahil sa kasalanan ay pumasok ang kamatayan.—Roma 5:12.

Para mapalaya tayo sa kasalanan at kamatayan, ibinigay ni Jehova si Jesus para maging pantubos. Pero paano maliligtas ng kamatayan ng isang perpektong tao ang buhay ng milyon-milyon? Ipinaliwanag iyan ni apostol Pablo: “Dahil lang sa pagsuway ng isang tao [si Adan], marami ang naging makasalanan, pero dahil sa pagkamasunurin ng isang tao [si Jesus], marami ang magiging matuwid.” (Roma 5:19; 1 Tim. 2:6) Sinasabi dito ni Pablo na naging makasalanan at namamatay ang lahat ng tao dahil sinuway ng isang perpektong tao ang Diyos. Kaya para mapalaya tayo sa kasalanan at kamatayan, kailangan ang isang perpektong tao na magiging masunurin sa Diyos. Puwede naman sanang hayaan na lang ni Jehova na mabuhay magpakailanman ang mga naging anak ni Adan na sumunod sa Diyos. Sa pananaw ng di-perpektong tao, magandang solusyon iyan. Pero hindi mapipakita ng solusyong iyan ang perpektong katarungan ni Jehova. Dahil makatarungan siya, hindi niya puwedeng bale-walain ang pagsuway ni Adan. w25.01 21 ¶3-4

Lunes, Oktubre 26

Lumalakad tayo ayon sa pananampalataya, at hindi ayon sa nakikita natin.—2 Cor. 5:7.

Alam noon ni apostol Pablo na malapit na siyang mamatay. Pero dahil kontento siya sa naging buhay niya, masaya pa rin siya. Sinabi niya: “Natapos ko na ang takbuhan, nanatili akong matatag sa pananampalataya.” (2 Tim. 4: 6-8) Nakagawa siya ng magagandang

desisyon para paglingkuran si Jehova, at alam niyang napasaya niya ang Diyos. Gusto rin nating gumawa ng magandang desisyon at mapasaya si Jehova. Paano? Sinabi ni Pablo tungkol sa sarili niya at sa iba pang tapat na Kristiyano: ‘Lumalakad kami ayon sa pananampalataya, at hindi ayon sa nakikita namin.’ Sa Bibliya, ang “paglakad” ay tumutukoy kung minsan sa piniling paraan ng pamumuhay ng isang tao. Kapag ang isang tao ay lumalakad ayon sa pananampalataya, pinag-iisipan muna niya ang gusto ni Jehova bago magdesisyon. Kitang-kita sa pamumuhay niya na kumbinsido siyang pagpapalain siya ni Jehova at na mapapabuti siya kapag sinunod niya ang mga payo sa Bibliya.—Awit 119:66; Heb. 11:6. w25.03 20 ¶1-2

Martes, Oktubre 27

Magbagong-anyo kayo sa pamamagitan ng pagbabago ng inyong pag-iisip.—Roma 12:2.

Sa tulong ng espiritu ng Diyos, nakagawa ng malalaking pagbabago sa buhay ang mga dating may makahayop na mga ugali. (Isa. 65:25) Nagsikap sila nang husto para maalis ang pangit na mga ugali nila. (Efe. 4:22-24) Siyempre, hindi pa rin tayo perpekto, kaya magkakamali pa rin tayo. Pero pinagkaisa ni Jehova ang “lahat ng uri ng tao” na nagmamahal sa kaniya at mahal ang isa’t isa. (Tito 2:11) Kaya nararanasan nila ang tunay na kapayapaan. Isa itong himala na ang Diyos na Makapangyarihan-sa-lahat lang ang makakagawa! Lagging nagkakatotoo ang salita niya. (Isa. 55:10, 11) Umiiral na sa ngayon ang espirituwal na paraiso. Bumuo si Jehova ng isang espesyal na kapatiran. Dahil bahagi tayo ng kapatirang ito, nakakaranas tayo ng kapayapaan sa gitna ng isang marahas at magulong mundo. (Awit 72:7) Kaya naman, gusto nating

marami tayong matulungan na maging bahagi ng ating Kristiyanong kapatiran. At magagawa natin ito kung magpopokus tayo sa paggawa ng alagad.—Mat. 28:19, 20. w24.04 23 ¶13, 15

Miyerkules, Oktubre 28

Taglay natin ang pag-iisip ni Kristo.
—1 Cor. 2:16.

Minahal ni Jesus si Jehova nang buong pag-iisip niya. Alam niya ang gusto ng Diyos para sa kaniya. At kumilos siya base dito, kahit alam niyang magdurusa siya. Dahil nakapokus siya sa layunin ng Diyos, ito ang naging pinakamahaling sa kaniya. Dahil nakasama ni Pedro at ng ibang mga apostol si Jesus, natutuhan nila mismo kung paano siya mag-iisip. Nang isulat ni Pedro ang unang liham niya, pinayuhan niya ang mga Kristiyano na magkaroon ng kaisipang gaya ng kay Kristo. (1 Ped. 4:1) Sa orihinal na wika, ang termino para sa “magkaroon” ay puwedeng gamitin para lumarawan sa mga sundalong naghahanda sa digmaan. Ibig sabihin, kung tutularan ng mga Kristiyano ang kaisipan ni Jesus, magiging handa rin silang labanan ang pagiging makasalanan nila at ang impluwensiya ng mundong ito.—2 Cor. 10:3-5; Efe. 6:12. w25.03 8-9 ¶1-3

Huwebes, Oktubre 29

Ang laman ng puso ng tao ay gaya ng malalim na tubig, pero nasasalok ito ng taong may kaunawaan.
—Kaw. 20:5.

Ano ang dapat mong malaman tungkol sa kasintahan mo? Bago pa tuluyang mahulog ang loob mo sa kaniya, ipakipag-usap mo na ang ilang mahahalagang bagay, gaya ng mga goal niya. Paano mo makikilala nang husto ang kasintahan mo? Magagawa mo ito kung mag-uusap kayo nang masinsinan, ma-

giging totoo sa isa't isa, at makikinig nang mabuti. (Sant. 1:19) Puwede kayong makapag-usap nang mabuti habang kumakain kayo, naglalakad sa lugar na maraming tao, o kapag nangangaral kayong magkasama. Mas makikilala rin ninyo ang isa't isa kapag kasama ninyo ang mga kaibigan at pamilya ninyo. Bukod diyan, magplano ng mga gawain kung saan makikita mo kung paano gumagawi ang kasintahan mo sa iba't ibang sitwasyon kasama ang iba't ibang tao. w24.05 28 ¶6-7

Biernes, Oktubre 30

Tularan ninyo ang Diyos, bilang minamahal na mga anak.
—Efe. 5:1.

Inaasahan natin na malapit na nating maranasan ang mas mahihirap pang sitwasyon. Mas kailangan nating umasa kay Jehova sa mga panahong iyon. Makikita natin sa mga ulat sa Bibliya at sa mga karanasan ng mga kapatid natin kung paano naging gaya ng bato si Jehova para sa mga lingkod niya. Tutulong iyan sa iyo na makita kung paano mo ring gagawing Bato ng buhay mo si Jehova. Mas mapapatatag mo rin ang kongregasyon. Pansinin na binigyan ni Jesus si Simon ng pangalang Cefas (na isinasaling “Pedro”), ibig sabihin, “Isang Bato.” (Juan 1:42) Ipinapakita nito na mapapalakas at mapapatatag ni Pedro ang kongregasyon. Itinulad ang mga elder sa “lilim ng malaking bato.” Ipinapakita naman niyan kung paano nila pinoprotektahan ang kongregasyon. (Isa. 32:2) Kaya isipin na lang kung lahat ng kapatid, magpapakita ng tuladbatong mga katangian ni Jehova. Siguradong makikinabang ang kongregasyon! w24.06 28 ¶10-11

Sabado, Oktubre 31

Si Jehova ay . . . humihiling ng bukod-tanging debosyon.
—Deut. 4:24.

Nanindigan sa tunay na pagsamba ang mga hari ng Israel na itinuring ni Jehova na tapat. Ang karamihan sa mga hari ng Israel na itinuring ni Jehova na di-tapat ay hindi sumunod sa kautusan niya at sumamba sa huwad na mga diyos. (1 Hari 21:25, 26; 2 Cro. 12:1) Bakit malaking bagay kay Jehova ang pagsamba? Ang isang dahilan, responsibilidad ng mga hari na tulungan ang bayan ng Diyos na sambahin si Jehova sa tamang paraan. Isa pa, dahil sa huwad na pagsamba, nakakagawa ang bayan ng iba pang malulubhang kasalanan at hindi nila napapakitunguhan nang tama ang iba. (Os. 4:1, 2) Bukod diyan, nakaalay kay Jehova ang mga hari at iba pang Israelita. Kaya kung samsamba sila sa ibang mga diyos, sinasabi sa Bibliya na para na rin silang nangalunya. (Jer. 3:8, 9) Isa sa pinakamasakit na puwedeng mangyari sa isang tao ay kapag nangalunya ang asawa niya. Ganiyan din kapag sumamba sa ibang diyos ang isang nakaalay na lingkod ni Jehova. Sobra niyang nasasaktan si Jehova.—Deut. 4:23. w24.07 22-23 ¶12-15

Linggo, Nobyembre 1

Hindi ako maghihinanakit magpakailanman.—Jer. 3:12.

Sinisikap ng mga elder na ipakita ang awa ni Jehova habang tinutulungan nila ang isa na inalis sa kongregasyon. Halimbawa, hindi hinintay ni Jehova na magsisi muna ang masuwayin niyang batang Israel bago niya sila tulungan. Siya ang unang kumilos. Inutusan ni Jehova si propeta Oseas na puntahan at patawarin ang asawa niya, kahit na kasalukuyan pa itong gumagawa ng kasala-

nan. Sa ganitong paraan itinuro ni Jehova kung gaano siya kamaawain. (Os. 3:1; Mal. 3:7) Gaya ni Jehova, talagang gusto ng mga elder na magsisi ang nagkasala, at hindi nila ginagawang mahirap para sa kaniya na bumalik. Sa ilustrasyon ni Jesus tungkol sa nawalang anak, ‘tumakbo ang ama at niyakap ang anak niya at hinalikan.’ (Luc. 15:20) Pansinin na hindi na hinintay ng ama na humingi ng tawad ang anak niya. Siya ang unang lumapit dahil mahal na mahal niya ito. w24.08 28 ¶7-8

Lunes, Nobyembre 2

Kung ang sinuman sa inyo ay kulang sa karunungan, patuloy siyang humingi sa Diyos, dahil sagana Siyang nagbibigay sa lahat at hindi naghahanap ng mali.
—Sant. 1:5; tlb.

Ipinapakita ng teksto sa araw na ito na hindi ipinagdadamot ni Jehova ang karunungan niya. Sagana siyang nagbibigay nito sa iba. Pansinin din na kapag nagbigay ng karunungan si Jehova, ‘hindi siya nandurusta,’ o “naghahanap ng mali.” Kapag humingi tayo ng karunungan sa kaniya, hinding-hindi niya tayo ipapahiya o ipaparamdam na may mali sa atin. Ang totoo, gusto niya na gawin talaga natin ito. (Kaw. 2:1-6) Pano naman natin matutularan si Jehova sa pagbibigay ng karunungan? (Awit 32:8) Maraming pagkakataon ang mga lingkod ni Jehova na ibahagi sa iba ang mga natutuhan nila. Halimbawa, sinasanay natin sa ministeryo ang mga baguhan. Matiyaga ring tinuturuan ng mga elder ang mga ministeryal na lingkod at iba pang bautisadong brother sa mga atas sa kongregasyon. Sinasanay naman ng mga makaranasan sa construction at maintenance ang ibang mga kapatid para tumulong sa gawain sa mga pasilidad na ginagamit natin. w24.09 28-29 ¶11-12

Martes, Nobyembre 3

Napamahal na kayo sa amin.—1 Tes. 2:8.

Mga brother, para maging kuwalipikado kayo bilang mga elder, dapat na ‘hindi kayo mapupulaan.’ (1 Tim. 3:2) Ibig sabihin, mayroon kayong magandang reputasyon sa kongregasyon dahil sa magandang paggawi ninyo. Dapat na maganda rin ang reputasyon ninyo sa mga di-kapananampalataya. Totoo, posibleng kuwestiyunin ng mga hindi lingkod ni Jehova ang mga paniniwala natin. Pero dapat, hindi nila makukuwestiyon ang pagiging tapat at mabuting tao natin. (Dan. 6: 4, 5) Tanungin ang sarili, ‘Maganda ba ang reputasyon ko sa loob at labas ng kongregasyon?’ Masasabing ‘lagi kayong gumagawa ng mabuti’ kung hinahanap ninyo ang magagandang katangian ng iba at pinupuri sila dahil dito. (Tito 1:8) Nagkukusa rin kayong gumawa ng mabuti sa iba kahit hindi na iyon inaasahan sa inyo. Bakit napakahalaga nito? Kasi maraming panahon ang ginagamit ng mga elder sa pagpapastol sa kongregasyon at paggawa ng mga atas nila. (1 Ped. 5:1-3) Totoo, malaking sakripisyo ito para sa kanila. Pero sulit naman ito dahil sa saya na nararamdaman nila.—Gawa 20:35. w24.11 20-21 ¶3-5

Miyerkules, Nobyembre 4

May higit na kaligayahan sa pagbibigay kaysa sa pagtanggap.—Gawa 20:35.

May mahahalagang atas sa kongregasyon ang mga ministeryal na lingkod. Kitangkita na pinapahalagahan ni apostol Pablo ang tapat na mga lalaking ito. Halimbawa, nang sumulat siya sa mga Kristiyanos sa Filipos, espesipiko niyang binati ang mga ministeryal na lingkod kasama ng mga tagapangasiwa. (Fil. 1:1) Masaya ang maraming bautisadong brother, kabataan man sila o may-edad na, sa pagiging ministeryal na lingkod. Halimbawa,

naging ministeryal na lingkod si Devan noong 18 siya. Naging ministeryal na lingkod naman si Luis noong nasa early 50’s siya. Ano ang masasabi niya sa atas na natanggap niya? “Napakalaking pribilehiyo sa akin na makapaglingkod sa mga kapatid sa kongregasyon sa ganitong paraan. Ramdam na ramdam ko ang pagmamahal nila sa akin. At ito ang paraan ko para makaganti sa kanila.” Siguradong iyan din ang nararamdaman ng maraming ministeryal na lingkod. Kung isa kang bautisadong brother at hindi pa ministeryal na lingkod, puwede mo ba itong gawing goal? w24.11 14 ¶1-3

Huwebes, Nobyembre 5

Nakikiusap ako sa iyo, O Jehova, alalahanin mong . . . ginawa ko ang mabuti sa paningin mo.—2 Hari 20:3.

Noong 39 si Haring Hezekias ng Juda, nagkaroon siya ng malubhang sakit. Ipinasabi ni Jehova kay propeta Isaias na mamamatay ang hari sa sakit niya. (2 Hari 20:1) Parang wala nang pag-asa ang sitwasyon ni Hezekias. Kaya nang marinig niya ito, nagmakaawa siya kay Jehova sa panalangin at umiyak siya nang husto. Nang marinig ni Jehova ang panalangin ni Hezekias at makita ang pag-iyak nito, naawa siya sa kaniya. Kaya ipinasabi niya kay Isaias: “Narinig ko ang panalangin mo. Nakita ko ang mga luha mo. Pagagalingin kita.” Nangako si Jehova na papahabain niya ang buhay ni Hezekias at ililigtas ang Jerusalem sa mga Asiryanos. (2 Hari 20:4-6) May sakit ka ba ngayon na parang imposible nang gumaling? Ipanalangin iyon kay Jehova. Huwag kang mag-alangan na sabihin sa kaniya ang nararamdaman mo kahit pa umiiyak ka habang ginagawa iyon. Tini-tiyak ng Bibliya na aaliwin tayo ng “Ama na magiliw at maawain at [ng] Diyos na nagbibigay ng kaaliwan sa anumang sitwasyon.”—2 Cor. 1:3, 4. w24.12 24 ¶15-17

Biyernes, Nobyembre 6

Umaasa ako, gaya rin ng mga taong ito, na bubuhaying muli ng Diyos ang mga matuwid at di-matuwid.

—Gawa 24:15.

Siguradong masayang-masaya tayo kapag binuhay-muli ang mga mahal natin! Mag-e-enjoy ka rin na matuto pa tungkol kay Jehova habang pinag-aaralan mo ang napakaraming nilalang niya. (Awit 104:24; Isa. 11:9) At higit sa lahat, masasamba na natin si Jehova nang hindi nakokonsensiya kasi hindi na tayo magkakasala. Ipagpapalit mo ba ang magagandang pagpapalang ito para “pansamantalang magpakasaya sa kasalanan” ngayon? (Heb. 11:25) Siguradong hindi! Sulit ang anumang sakripis-yong gagawin natin ngayon para sa mga pagpapalang ito. Tandaan, hindi laging mananatiling pag-asa ang Paraiso kasi darating ang panahon na magiging totoo na ito. Posible ang lahat ng ito dahil mahal na mahal tayo ni Jehova at ibinigay niya ang Anak niya! w25.01 29 ¶12

Sabado, Nobyembre 7

Napakaikli ba ng kamay ni Jehova?

—Bil. 11:23.

Sa aklat ng Mga Hebreo, marami tayong mababasang nagpakita ng pananampalataya kay Jehova. Isa na diyan si Moises. (Heb. 3:2-5; 11:23-25) At hindi siya binigo ni Jehova! Makahimalang nagbigay ang Diyos ng pagkain at tubig para mabuhay ang mga Israelita sa ilang. (Ex. 15:22-25; Awit 78:23-25) Matibay naman talaga ang pananampalataya ni Moises. Pero mga isang taon mula nang makalaya ang mga Israelita, nagduda siya sa kakayahan ni Jehova na magbigay ng karne sa bayan Niya. Hindi maisip ni Moises kung paano iyon gagawin ni Jehova, kasi milyon-milyon sila sa ilang. Kaya sinabi ni Jehova sa kaniya: “Napakaikli ba

ng kamay ni Jehova?” (Bil. 11:21-23) Parang sinasabi ni Jehova, ‘Sa tingin mo ba, hindi ko magagawa ang sinabi ko?’ w25.03 26 ¶1-2

Linggo, Nobyembre 8

Hindi . . nagpigil [ang Diyos] sa pagpaparusa sa sanlibutan noon.

—2 Ped. 2:5.

Dapat ba nating isipin na may mas malaking katuparan sa hinaharap ang lahat ng nangyari noong panahon ng Baha? Hindi, kasi walang sinasabi ang Bibliya. Totoo, ikinumpara ni Jesus ang panahon ng presensiya niya sa panahon ni Noe. Pero hindi niya sinasabi na may mas malaking katuparan sa hinaharap ang lahat ng nangyari noong panahon ng Baha, gaya ng pagsasara ni Jehova ng pinto ng arka. (Mat. 24:37-39) Ano ang reaksiyon ni Noe nang malaman niya ang babala ni Jehova? Ipinakita niyang nananampalataya siya noong nagtayo siya ng arka. (Heb. 11:7; 1 Ped. 3:20) Ganiyan din ang dapat gawin ng mga taong nakarinig ng mabuting balita ng Kaharian ng Diyos—kailangan nilang gawin ang mga natutuhan nila. (Gawa 3:17-20) Bukod sa pagtatayo ng arka, nangalal din si Noe, kaya tinawag siya ni Pedro na “isang mangingaral ng katuwiran.” Sa ngayon, mayroon tayong gawaing pangangaral sa buong mundo, at talagang nagsisikap tayong makibahagi dito. Pero kahit gawin natin ang buong makakaya natin, alam nating imposibleng mapangaralan ang lahat ng tao sa lupa bago dumating ang wakas. w24.05 8-9 ¶3-5

Lunes, Nobyembre 9

Pinararangalan niya ang mga natatakot kay Jehova.—Awit 15:4.

Dapat tayong maghanap ng mga pagkakataon para makapagpakita ng kabaitan at paggalang sa mga kaibigan ni Jehova.

(Roma 12:10) Makikita sa Awit 15:4 ang isang paraan kung paano natin magagawa iyan. Sinabi doon na ang isang panauhin sa tolda ni Jehova ay “hindi . . . sumisira sa pangako, kahit pa makasama ito sa kaniya.” Masasaktan natin ang iba kung hindi natin tutuparin ang mga pangako natin. (Mat. 5:37) Halimbawa, inaasahan ni Jehova na tutuparin ng mga panauhin niya ang panata nila sa pag-aasawa. Natutuwag rin siya kapag tagalang sinisikap ng mga magulang na tuparin ang mga ipinangako nila sa mga anak nila. Mahal natin ang Diyos at ang kapuwa natin, kaya gagawin natin ang buong makakaya natin para tuparin ang mga ipinangako natin. Mapaparangalan din natin ang mga kaibigan ni Jehova kung magiging mapagbigay tayo at mapagpatuloy sa kanila. (Roma 12:13) Kung sisikapin nating makasama ang mga kapatid bukod sa mga pulong at ministryo, mas titibay ang pakikipagkaibigan natin sa kanila at kay Jehova. Isa pa, natutularan natin si Jehova kapag mapagpatuloy tayo. w24.06 12 ¶15-16

Martes, Nobyembre 10

Ano ang hamak na tao para alalahanin mo?—Awit 8:4.

Ipinapaalam ni Jehova ang katotohanan sa mga mapagpakumbaba. (Mat. 11:25) Naipakita nating mapagpakumbaba tayo nang tanggapin natin ang tulong ng iba para malaman ang katotohanan. (Gawa 8:30, 31) Pero dapat pa rin tayong mag-ingat para hindi tayo maging mapagmataas. Kung mapagmataas tayo, baka isipin natin na ang mga opinyon natin ay kasinghalaga ng mga prinsipyo sa Bibliya at ng mga tagubilin ng organisasyon ni Jehova. Para mapanatili natin ang kapakumbabaan, kailangan nating tandaan kung gaano kaliit ang halaga natin kung ikukumpara kay Jehova. (Awit 8:3, 4) Puwede rin na-

ting ipanalangin kay Jehova na tulungan tayong maging mapagpakumbaba at maging handang magpaturo. Tutulungan niya tayong makita na nakakahigit ang kaisipan niya kaysa sa opinyon natin. Makikita natin ang kaisipan ni Jehova sa tulong ng Bibliya at ng organisasyon. Sa pagbabasa mo ng Bibliya, tingnan kung gaano kamahal ni Jehova ang mga mapagpakumbaba at na tagalang ayaw na ayaw niya sa mga mapride, mayabang, at mapagmataas. At kung makatanggap ka ng isang pribilehiyong mapapansin ng iba, mas kailangan mong mag-ingat at magsikap na manatiling mapagpakumbaba. w24.07 10 ¶8-9

Miyerkules, Nobyembre 11

Ang munti ay magiging isang libo at ang maliit ay magiging makapangyarihang bansa. Ako mismo, si Jehova, ang magpapabilis nito sa takdang panahon nito.—Isa. 60:22.

Simula 1919, gumamit si Jesus ng maliit na grupo ng mga pinahiran para organisahin ang gawaing pangangaral at maglaan ng espirituwal na pagkain sa mga tagasunod niya. (Luc. 12:42) At kitang-kitang pinagpapala ni Jehova ang pagsisikap ng maliit na grupong ito. (Isa. 65:13, 14) Kung hindi tayo organisado, hindi natin magagawa ang gawaing iniatas ni Jesus sa atin. (Mat. 28:19, 20) Halimbawa, kung walang mga nakaatas na teritoryo, baka mangaral lang tayo kung saan natin gusto. Kaya baka paulit-ulit na magawa ng magkakaibang mamamahayag ang isang teritoryo, pero hindi naman nagagawa ang ibang teritoryo. May naiisip ka pa bang dahilan kung bakit mahalagang maging organisado? Inoorganisa tayo ni Jesus sa ngayon kung paanong inorganisa niya ang mga tagasunod niya noong nasa lupa siya. w24.04 8-9 ¶2-4

Huwebes, Nobyembre 12

Kung gagawa ka ng mabuti, hindi ba sasang-ayunan kita? Pero kung hindi ka gagawa ng mabuti, ang kasalanan ay nakaabang sa may pinto at gusto ka nitong biktimahin.—Gen. 4:7.

Si Cain ang panganay na anak nina Adan at Eva. At minana niya ang pagiging makasalanan ng mga magulang niya. Sinabi pa ng Bibliya tungkol sa kaniya: “Masama ang mga ginagawa niya.” (1 Juan 3:12) Posibleng iyan ang dahilan kung bakit ‘hindi sinang-ayunan ni Jehova si Cain at ang handog nito.’ Imbes na magbago, “galit na galit si Cain at ang sama-sama ng loob niya.” Ano ang ginawa ni Jehova? Kinausap niya si Cain. (Gen. 4:3-7) Mabait na ipinaliwanag ni Jehova sa kaniya na kung magbabago siya, pagpapalain siya. At binabalaan niya rin ito na may masamang mangyayari kapag nagpadala ito sa galit. Nakakalungkot, hindi nakinig si Cain. Hindi siya nagpaakay kay Jehova sa pagsisisi. Nang mangyari ito, tumigil na ba si Jehova na akayin ang ibang makasalanan sa pagsisisi? Hindi! w24.08 10 ¶8

Biernes, Nobyembre 13

Piliin ninyo ang buhay para manatili kayong buhá.—Deut. 30:19.

May magandang buhay na naghihintay sa bansang Israel. Dahil sa pagpapala ni Jehova, puwede silang mabuhay nang mahabang panahon sa lupaing ipinangako niya sa kanila. Mabunga ang lupaing iyon at napakaganda! Ganito iyon inilarawan ni Moises para sa kanila: “Malalaki at magagandang lunsod na hindi kayo ang nagtayo, mga bahay na punô ng iba’t ibang magagandang bagay na hindi ninyo pinagpaguran, mga imbakang tubig na hindi kayo ang naghukay, mga ubasan at mga punong oli-

bo na hindi kayo ang nagtanim.” (Deut. 6:10, 11) Binabalaan din ni Moises ang mga Israelita na kung gusto nilang manatili sa mabungang lupaing iyon, kailangan nilang sumunod sa mga utos ni Jehova. Sinabi sa kanila ni Moises na ‘piliin ang buhay.’ Para magawa iyan, kailangan nilang makinig kay Jehova at ‘manatiling tapat sa kaniya.’ (Deut. 30:20) Pero hindi iyan ginawa ng mga Israelita. Kaya hinayaan ni Jehova na masakop sila at madalang bihag ng Asirya at pagkatapos, ng Babilonya.—2 Hari 17:6-8, 13, 14; 2 Cro. 36:15-17, 20. w24.11 9 ¶5-6

Sabado, Nobyembre 14

Walang taong makalalapit sa akin malibang ilapit siya ng Ama, na nagsugo sa akin.—Juan 6:44.

Sinasabi ng marami sa ngayon na sapat nang “maniwala [kay Jesus]” at tanggapin siya bilang tagapagligtas. (Juan 6:29, *Biblia ng Sambayanang Pilipino*) Pero may ilan sa mga kausap ni Jesus noon ang naniniwala naman sa kaniya pero iniwan siya bandang huli. Bakit nila ginawa iyon? Sumunod lang kay Jesus ang karamihan sa mga pinakain niya noon dahil ibinigay niya sa kanila ang gusto nila. Interesado sila sa pagpapagaling niya, libreng pagkain, at mga turong gusto nilang marinig. Pero ipinakitang ni Jesus na hindi siya bumaba sa lupa para lang ibigay ang gusto nila. Dumating siya para ituro sa kanila kung ano ang kailangang gawin para maging tunay na tagasunod niya. Kailangan nilang “lumapit sa [kaniya].” Kailangan nilang tanggapin at sundin ang lahat ng itinuro niya.—Juan 5:40. w24.12 12 ¶12-13

Lingo, Nobyembre 15

Mga asawang lalaki, patuloy na mahalín ang inyong asawang babae kung paanong inibig ng Kristo ang kongregasyon.—Efe. 5:25.

Ano ang makakatulong sa mga asawang lalaki na maitigil ang mapang-abusong pananalita at paggawi? Dapat nilang si-kaping tularan si Jesus. Matututo sila sa halimbawa niya kung paano nila dapat pakitunguhan ang asawa nila. Tingnan kung paano pinakitunguhan ni Jesus ang mga apostol at kung paano siya nakikipag-usap sa kanila. Mabait si Jesus sa mga apostol niya at binibigyan niya sila ng dangal. Kahit kailan, hindi siya naging malupit sa kanila o dominante. Makapangyarihan si Jesus, pero hindi niya ginamit iyon para takutin sila o pasunurin. Sa halip, mapagpakumbaba siyang naglingkod sa kanila. (Juan 13:12-17) Sinabi niya sa mga alagad niya: “Matuto kayo sa akin, dahil ako ay mahinahon at mapagpakumbaba, at magiginhawahan kayo.” (Mat. 11:28-30) Pansinin na mahinahon si Jesus. Iniisip ng ilan na kahinaan ito. Pero ang totoo, malakas ang ganitong mga tao kasi nakokontrol nila ang sarili nila. Kahit galitin si Jesus, nananatili siyang kalmado at nakokontrol niya ang emosyon niya. w25.01 10 ¶10-11

Lunes, Nobyembre 16

Ipagkatiwala mo kay Jehova ang anumang gagawin mo.—Kaw. 16:3.

Habang lumalapit ang wakas, mas hihi-rap ang buhay. Dahil sa kaguluhan sa politika, digmaan, sakuna, o bagong pandemic, baka magkaroon tayo ng di-naasahang gastusin o mawalan tayo ng trabaho, pag-aari, o bahay. Kaya paano natin maipapakita sa mga desisyon natin na nagtitiwala tayo kay Jeho-

va? Napakahalagang sabihin kay Jehova ang mga alalahanin mo. At siguradong makakatulong iyan sa iyo. Humiling ng karunungan para makagawa ng tamang desisyon. Hilingin ding maging kalmado ka para hindi ka “masyadong mag-alala.” (Luc. 12:29-31) Ipanalangin din na tulungan ka niyang maging konten-to. (1 Tim. 6:7, 8) Mag-research sa mga publikasyon natin ng mga puwede mong gawin kapag may problema ka sa pinansiyal. May mga artikulo at video tungkol sa paksang iyan sa jw.org, at marami ang natulungan ng mga ito. w25.03 28-29 ¶10-11

Martes, Nobyembre 17

Ipinakita sa akin ng Diyos na hindi ko dapat ituring na marumi ang sinuman.—Gawa 10:28.

Noong panahong kalooban na ng Diyos na maging bahagi ng bayan niya ang mga di-tuling Gentil, inatasan niya si apostol Pedro na mangaral kay Cornelio. Isa si Cornelio sa mga pinakau-nang Gentil na magiging Kristiyano. Ini-iwasan pa noon ng mga Judio ang mga Gentil, kaya kailangang baguhin ni Pedro ang pag-iisip niya para matularan ang kaisipan ng Diyos. At nang gawin niya iyon, “hindi na [siya] nagdalawang-isip” sa atas niya. (Gawa 10:28, 29) Nangaral siya kay Cornelio at sa pamilya nito, at nabautismuhan sila. (Gawa 10:21-23, 34, 35, 44-48) Paglipas ng mga taon, pinayuhan ni Pedro ang mga Kristiyano na “magkaisa sa pag-iisip.” (1 Ped. 3:8, tlb.) Magagawa natin iyan kung babaguhin natin ang pag-iisip natin at tutularan ang pag-iisip ni Jehova, na mababasa natin sa Bibliya. w25.03 9 ¶7-8

Miyerkules, Nobyembre 18

Huwag kayong magpapaligaw sa sari-sari at kakaibang turo.

—Heb. 13:9.

Talagang palayo na nang palayo ang pananaw ng mundo sa perpektong pananaw ng Diyos. (Kaw. 17:15) Kaya napakahalagang alam natin kung ano ang maling kaisipan at tanggihan iyon. Hindi natin dapat hayaan na mapahina ng iba ang loob natin at mapahinto tayo sa paglilingkod kay Jehova. Gaya ng sinabi ni apostol Pablo sa mga Hebreong Kristiyano, kailangan nating sumulong sa pagiging maygulang. Magagawa natin iyan kung papalalimin natin ang kaalaman natin sa katotohanan at kung tutularan natin ang kaisipan ni Jehova. Kailangan nating patuloy na gawin ito kahit nakapag-alay na tayo at nabautismuhan. Gaano man tayo katagal na sa katotohanan, dapat pa rin nating regular na basahin at pag-aralan ang Salita ng Diyos. (Awit 1:2) Tutulong ito sa atin na mapatibay ang pananampalataya natin—isang katangiang idiniin ni Pablo sa liham niya sa mga Hebreo.—Heb. 11:1, 6. w24.09 10 ¶7-8

Huwebes, Nobyembre 19

Lumapit kayo sa Diyos, at lalapit siya sa inyo.—Sant. 4:8.

Kung totoong-totoo sa atin si Jehova, magiging mas madali sa atin na manatiling tapat sa kaniya. Tingnan natin ang halimbawa ni Jose. Nanindigan siya at hindi nagpadala sa tuksong gumawa ng imoralidad. Totoo ang Diyos sa kaniya, at ayaw niya Siyang mapalungkot. (Gen. 39:9) Para maging totoo sa atin si Jehova at maging malapit tayo sa kaniya, kailangan nating maglaan ng panahon sa pananalangin at pag-aaral ng Bibliya. Kung malapit tayo kay Jehova gaya ni Jose, hindi rin natin gugustuhing guma-

wa ng kahit anong magpapalungkot sa Kaniya. Kapag nawala ang tiwala natin sa Diyos na buhay, madali tayong mapapalayo sa kaniya. Ganiyan ang nangyari sa mga Israelita noong nasa ilang sila. Alam nilang may Diyos, pero nagduda sila kung talagang ilalaan ni Jehova ang kailangan nila. (Ex. 17:2, 7) Dahil dito, nagrebelde sila sa Diyos. Siguradong ayaw natin silang tularan.—Heb. 3:12. w24.06 24 ¶14-15

Biyernes, Nobyembre 20

Ang mga mata ni Jehova ay nakatingin sa mga matuwid, at ang mga tainga niya ay nakikinig sa paghingi nila ng tulong.—Awit 34:15.

Nasa dulo na tayo ng mga huling araw, at siguradong makakaranas tayo ng mas mahihirap na sitwasyong magpapaluha sa atin. Nalulungkot si Jehova kapag nakikita niya tayong umiiyak. Mahalaga sa kaniya ang mga luha natin. Kaya kapag nasa mahihirap tayong sitwasyon, sabihin natin sa kaniya ang lahat ng nararamdaman natin. Huwag tayong lumayo sa mga kapatid sa kongregasyon. At basahin natin ang Bibliya para mapatibay tayo ni Jehova. Kung magtitiis tayo at mananatiling tapat, makakasigurado tayong gagantimpalaan niya tayo. Kasama na diyan ang pangakong papahirin niya ang bawat luha sa mga mata natin kapag sobra tayong nalulungkot, ginawan tayo ng masama ng taong mahalaga sa atin, at nawawalan na tayo ng pagasa. (Apoc. 21:4) Sa panahong iyon, kung iiyak man tayo, dahil na lang iyon sa kagalakan. w24.12 20 ¶3; 25 ¶19

Sabado, Nobyembre 21

“Kayo ang mga saksi ko,” ang sabi ni Jehova.—Isa. 43:12.

Inatasan tayo ni Jehova na maging mga Saksi niya, at nangangako siyang tutulongan niya tayong maging malakas ang loob. (Isa. 43:10, 11) Tingnan ang apat na paraan kung paano niya ginagawa iyan. Una, kasama natin si Jesus sa tuwing nangangaral tayo. (Mat. 28:18-20) Ikalawa, nag-atas si Jehova ng mga anghel para tulungan tayo. (Apoc. 14:6) Ikatlo, inilaan ni Jehova ang banal na espiritu niya para tulungan tayong maalala ang mga natutuhan natin. (Juan 14:25, 26) Ikaapat, nandiyan ang mga kapatid na makakasama natin. Sa tulong ni Jehova at ng mapagmahal na mga kapatid, kaya nating magkaroon ng lakas ng loob na patuloy na mangaral. Pero kung nalulungkot ka kapag halos wala kang makausap sa ministryo, pag-isipan ang mga ito: ‘Nasaan ba ang mga tao sa teritoryo namin kapag ganitong oras?’ (Gawa 16:13) ‘Nasa trabaho ba sila o namimili?’ Kung oo, baka puwede kang mag-street witnessing. w24.04 17 ¶10-11

Linggo, Nobyembre 22

Kung hindi kayang mamuno ng isang lalaki sa sarili niyang pamilya, paano niya aalagaan ang kongregasyon ng Diyos?—1 Tim. 3:5.

Kung isa kang ulo ng pamilya at gusto mong maging elder, makakaapekto sa kuwalipikasyon mo ang reputasyon ng pamilya mo. Kaya dapat kang ‘mamuno sa sarili mong pamilya sa mahusay na paraan.’ Dapat na kilala ka bilang isang mapagmahal at responsableng ulo ng pamilya. Ibig sabihin, pinapangunahan mo ang pamilya mo sa lahat ng bahagi ng pagsamba natin. Kung isa kang ama at may menor-de-edad na mga anak,

dapat na sila ay “masunurin at mabuti ang asal.” (1 Tim. 3:4) Dapat na tinuturuan at sinasanay mo sila sa mabibiging paraan. Siyempre, gaya rin sila ng ibang mga bata na kailangang magsaya at maglaro. Pero dahil sa mahusay na pagsasanay mo, masunurin sila, magalang, at may magandang paggawi. Dapat mo ring gawin ang buong makakaya mo para tulungan sila na maging malapit kay Jehova, sumunod sa mga prinsipyo sa Bibliya, at sumulong hanggang sa mabautismuhan. w24.11 22 ¶10-11

Lunes, Nobyembre 23

Walang pag-ibig na hihigit pa kaysa sa pag-ibig ng isa na nagbibigay ng sarili niyang buhay para sa mga kaibigan niya.—Juan 15:13.

Kapag mas marami tayong panahon sa pangangaral, mas mararamdaman natin ang tulong ni Jehova kaya mas titibay ang pagtitiwala natin sa kaniya. (1 Cor. 3:9) Pero tandaan na hindi ikinukumpara ni Jehova ang nagagawa mo sa nagagawa ng iba. Ang mahalaga sa kaniya ay kung gaano mo siya kamahal. Masayang-masaya siya kapag nakikita niyang pinapahalagahan mo ang napakagandang regalo niya—ang pantubos. (1 Sam. 16:7; Mar. 12:41-44) Naging posible lang na mapatawad tayo, maging malapit kay Jehova, at magkaroon ng buhay na walang hanggan dahil sa pantubos. Lagi sana nating ipakitang nagpapasalamat tayo sa pag-ibig ni Jehova, kasi iyon ang nagpakilos sa kaniya na ibigay ang mga pagpapalang ito. (1 Juan 4:19) Lagi rin sana nating ipakitang nagpapasalamat tayo kay Jesus, kasi mahal na mahal niya tayo at isinakripisyo niya ang buhay niya para sa atin. w25.01 31 ¶16-18

Martes, Nobyembre 24

Buong araw akong naghihirap.

—Awit 73:14.

Tingnan ang naramdaman ng manunulat ng Awit 73. Nakita niya na mukhang malusog, mayaman, at walang problema ang mga hindi naglilingkod kay Jehova. (Awit 73:3-5, 12) Dahil parang maayos naman ang buhay nila, naisip niya na mali ang desisyon niyang maglingkod kay Jehova. Sa kakaisip nito, nasabi niya: “Buong araw akong naghihirap.” (Awit 73:13, 14) Ano ang ginawa niya para maalís ang gumugulo sa isip niya? Pumunta ang salmista sa santuwaryo ni Jehova. (Awit 73:16-18) Nakapag-isip siya nang mabuti doon. Naging malinaw sa kaniya na kahit parang maayos naman ang buhay ng iba, wala silang magandang kinabukasan. Napanatag siya at nakita niyang tama talaga ang desisyon niya na unahin ang espirituwal na mga bagay. Dahil dito, naging determinado siyang patuloy na maglingkod kay Jehova.—Awit 73:23-28. w24.10 26-27 ¶11-12

Miyerkules, Nobyembre 25

Malaman nawa ng mga tao na ikaw, na ang pangalan ay Jehova, ikaw lang ang Kataas-taasan sa buong lupa.
—Awit 83:18.

Pinili tayo ni Jehova na maging “mga saksi” niya. (Isa. 43:10-12) Mga ilang taon na ang nakakalipas, sinabi sa isang liham ng Lupong Tagapamahala: “Wala nang hihigit pa sa karangalang matawag bilang Saksi ni Jehova.” Bakit natin nasabi iyan? Tingnan ang isang ilustrasyon. Isiping inakusahan ka ng isang kasalanan na hindi mo naman ginawa. Ngayon, kailangan mong pumili ng testigo sa iyo para patunayang mali iyon. Siyempre, pipiliin mo ang taong kilala mo, pinagkakatiwalaan, at may

magandang reputasyon para paniwalaan siya ng iba. Kaya nang piliin tayo ni Jehova na maging mga Saksi niya, ibig sabihin, kilala niya tayo at nagtitiwala siyang sasabihin natin sa iba na siya lang ang tunay na Diyos. Napakalaking karangalan niyan para sa atin! Kaya sinasamantala natin ang bawat pagkakataon na ipakilala siya sa iba at patunayang mali ang mga ibinibintang sa kaniya. Sa paggawa niyan, talagang masasabing mga Saksi tayo ni Jehova!—Roma 10:13-15. w24.05 18 ¶13

Huwebes, Nobyembre 26

Pinagaling niya ang lahat ng may sakit.
—Mat. 8:16.

Talagang naging masaya si Jesus sa paglilingkod sa iba. Halimbawa, sa isang pagkakataon, hindi lang siya basta nagturo sa mga tao. Inilaan din niya ang pisikal na pangangailangan nila. Gumawa siya ng himala para maparami ang pagkain at ibinigay ito sa mga alagad para ipamahagi. (Mar. 6:41) Dahil dito, naturuan niya ang mga alagad niya kung paano maglingkod sa iba. Naipakita rin niya na napakahalaga ng ganitong mga gawain. Isipin na lang ang sayang naramdaman ng mga apostol habang kasama nila si Jesus sa pagbibigay ng pagkain hanggang sa ‘makakain at mabusog ang lahat’! (Mar. 6:42) Isa lang ito sa maraming halimbawa na inuna ni Jesus ang kapakanan ng iba kaysa sa sarili niya. Ginamit niya ang buong buhay niya dito sa lupa para paglingkuran ang iba. (Mat. 4:23) Masayang-masaya si Jesus na turuan ang iba at ibigay ang pangangailangan nila. w24.11 16 ¶10-11

Biyernes, Nobyembre 27

Sa mga huling araw, magiging mapanganib at mahirap ang kalagayan.

—2 Tim. 3:1.

Habang mas humihirap ang kalagayan sa “mga huling araw” na ito, mas dumadamang ang pagkakataon natin na tumulong sa mga kapatid. Puwede rin tayong maging kanlungan sa kanila kung ipaparamdam natin sa kanila na mahal natin sila. Halimbawa, kapag nasa Kingdom Hall, puwede tayong makipagkuwentuhan sa kanila at patibayin sila. Gusto nating gawin ang buong makakaya natin para mapatibay sila, maging panatag, at maiparamdam na may nagmamahal sa kanila. Puwedeng maging kanlungan ang mga elder sa mahihirap na sitwasyon. Kapag may mga sakuna at medical emergency, kumikilos agad sila para tulungan ang mga kapatid. Nandiyan din sila para magpatibay. Mas madaling lapitan ang mga elder na kilalang mahinahon, mapagmalasakit, at laging handang makinig. Dahil sa mga katangiang iyan, nararamdaman ng mga kapatid na talagang mahal sila ng mga elder. Kaya kapag nagbigay sila ng payo na galing sa Bibliya, mas madali itong tanggapin ng mga kapatid.—1 Tes. 2:7, 8, 11. w24.06 29 ¶12-13

Sabado, Nobyembre 28

Hindi niya ipinagkait sa atin kahit ang sarili niyang Anak.—Roma 8:32.

Makapangyarihan-sa-Lahat si Jehova, pero hindi ibig sabihin nito na wala siyang nararamdaman. Dahil ginawa tayo ayon sa larawan niya at mayroon tayong emosyon, siguradong mayroon ding emosyon si Jehova. Sinasabi ng Bibliya na nasasaktan siya. (Awit 78:40, 41) Siguradong napakatindi ng sakit na naramdaman ni Jehova nang makita niyang pinahirapan at pinatay ang Anak niya! Itinuturo ng pantubos na

wala nang mas magmamahal sa atin kaysa kay Jehova—kahit pa ang pinakamalapit nating kapamilya o kaibigan. (Roma 8:32, 38, 39) Mahal natin ang sarili natin, pero mas matindi pa doon ang pagmamahal ni Jehova. Hindi ba gusto mong mapatawad ang mga kasalanan mo at magkaroon ng buhay na walang hanggan? Mas gusto iyan ni Jehova para sa iyo at handa siyang gawin iyan! Ang hiling lang niya ay tanggapin natin ang pantubos, manampalataya sa kaniya, at sundin siya. Napakagandang regalo ng pantubos at patunay iyon na mahal na mahal tayo ni Jehova.—Ecles. 3:11. w25.01 22-23 ¶8-9

Linggo, Nobyembre 29

Patuloy na tiyakin kung ano ang kalugod-lugod sa Panginoon.

—Efe. 5:10.

Normal lang na magdesisyon tayo base sa nakikita, naririnig, at nararamdaman natin. Pero hindi natin laging maaasahan ang nakikita, naririnig, o nararamdaman natin. At kahit tama ang mga iyan, posible pa rin nating magawa ang isang bagay na ayaw ni Jehova kung ang mga iyan lang ang magiging basehan natin. (Ecles. 11:9; Mat. 24:37-39) Pero kung lumalakad tayo ayon sa pananampalataya, malamang na mas makagawa tayo ng mga desisyong “kalugod-lugod sa Panginoon.” Magiging panatag at masaya tayo kung susundin natin ang payo ng Diyos. (Awit 16:8, 9; Isa. 48:17, 18) At puwede rin tayong mabuhay nang walang hanggan kung gagawin natin iyan. (2 Cor. 4:18) Paano mo malalaman kung lumalakad ka ayon sa pananampalataya o ayon sa nakikita mo? Pag-isipan ang mga ito: Ang basehan mo lang ba kapag nagdedesisyon ay ang mga nakikita mo? O nagtitiwala ka ba at nagpapagabay sa mga payo ni Jehova? w25.03 20-21 ¶3-4

Lunes, Nobyembre 30

Makipagpayapaan kayo sa isa't isa.

—1 Tes. 5:13.

May mahalagang papel ang bawat isa sa atin para maging kaakit-akit sa iba ang espirituwal na paraiso. Magagawa natin iyan kung tutularan natin si Jehova. Hindi niya pinipilit ang mga tao na maging bahagi ng organisasyon niya. Sa halip, ginagawa niya itong kaakit-akit para kusang-loob na lumapit ang mga tao sa kaniya. (Juan 6:44; Jer. 31:3) Kapag nalaman ng mga tapat-puso ang magagandang katangian ni Jehova, natural lang na mapalapit sila sa kaniya. Paano naman naaakit ang mga tao sa espirituwal na paraiso dahil sa magagandang katangian natin at mabuting paggawi? Ang isang paraan ay kung magiging mapagmahal at mabait tayo sa mga kapatid. Sa mga pulong, may dumadalong mga interesado. Gusto nating masabi rin nila ang sinabi ng mga di-sumasampalataya na posibleng dumalo noon sa mga Kristiyanong pagpupulong sa Corinto. Sinabi nila: “Talagang nasa gitna ninyo ang Diyos.” (1 Cor. 14:24, 25; Zac. 8:23) Kaya napakahalagang patuloy na sundin ang payo sa atin na nasa teksto sa araw na ito. w24.04 24 ¶16-17

Martes, Disyembre 1

Binuksan niya ang isip nila para lubusan nilang maintindihan ang kahulugan ng Kasulatan.—Luc. 24:45.

Naniniwala ang mga alagad ni Jesus sa Salita ng Diyos, at ginawa nila ang buong makakaya nila para masunod ito. (Juan 17:6) Pero hindi nila maintindihan kung bakit namatay si Jesus na gaya ng isang kriminal. Alam ni Jesus na may pananampalataya naman ang mga alagad niya at mahal nila si Jehova. Kailangan lang nilang mas maintindihan ang Kasulatan. (Luc. 9:44, 45; Juan 20:9) Kaya tinulungan niya silang maintindihan ang mga

nababasa nila. Tingnan kung paano iyan ginawa ni Jesus nang magpakita siya sa dalawang alagad niya na papunta sa Emaus. Hindi agad sinabi ni Jesus sa dalawang alagad kung sino siya. Nagtanong muna siya sa kanila. Bakit niya ito ginawa? Malamang na gusto niyang sabihin nila ang iniisip nila. At iyon nga ang ginawa nila. Sinabi nila na inaasahan nilang ililigtas ni Jesus ang Israel sa mga Romano. (Luc. 24:18-27) Ginamit ni Jesus ang Kasulatan para tulungan silang maintindihan ang nangyari. Kinagabihan, nagpakita rin si Jesus sa iba pang alagad at ipinaliwanag din sa kanila ang mga katoohanang ito.—Luc. 24:33-48. w24.10 14 ¶9-10

Miyerkules, Disyembre 2

Wala akong ginagawa sa sarili kong pagkukusa; kung ano ang itinuro sa akin ng Ama, iyon din ang sinasabi ko.—Juan 8:28.

Ang mga sinabi at ginawa ni Jesus ay galing sa Ama niya sa langit. Galing din sa Salita ng Diyos ang mga itinuturo at ibinibigay na tagubilin ng organisasyon. (2 Tim. 3:16, 17) Lagi tayong pinapaalalahanan na basahin at isabuhay ang Salita ng Diyos. Malaki ang naitutulong sa atin ng pag-aaral ng Bibliya gamit ang mga publikasyon natin. Naikukumpara kasi natin ang mga itinuturo ng Bibliya sa mga tagubiling tinatanggap natin sa organisasyon. At kapag nakikita nating nakabase sa Kasulatan ang mga tagubiling tinatanggap natin, lalong tumitibay ang tiwala natin sa organisasyon ni Jehova. (Roma 12:2) Ipinangaral ni Jesus ang “mabuting balita ng Kaharian ng Diyos.” (Luc. 4:43, 44) Iniutos din ni Jesus sa mga alagad niya na ipangaral ang Kaharian. (Luc. 9:1, 2; 10:8, 9) Sa ngayon, ipinapangaral din ng lahat ng kabilang sa organisasyon ni Jehova ang mensahe ng Kaharian saanman sila nakatira. w24.04 9 ¶5-7

Huwebes, Disyembre 3

Gagawin namin ang lahat ng iniutos mo, at pupunta kami saan mo man kami isugo.—Jos. 1:16.

Patuloy na magtiwala sa mga tagubiling mula sa organisasyon ni Jehova. Sa Israel noon, ginamit ni Jehova si Moises at pagkatapos si Josue para magbigay ng tagubilin sa bayan Niya. (Jos. 1:17) Nang tanggapin ng mga Israelita ang mga lalaking ito bilang mga kinatawan ng Diyos na Jehova, pinagpala sila. Pagkalipas ng daan-daang taon, nang mabuo ang kongregasyong Kristiyano, nanggagaling ang mga tagubilin sa 12 apostol. (Gawa 8:14, 15) Bandang huli, kasama na sa grupong ito ang iba pang matatandang lalaki sa Jerusalem. Dahil sinunod ng mga Kristiyano noon ang mga tagubilin ng tapat na mga lalaking ito, “patuloy na tumitibay ang pananampalataya ng mga kongregasyon at nadaragdagan sila araw-araw.” (Gawa 16:4, 5) Sa ngayon, pinagpapala rin tayo kapag sinusunod natin ang mga tagubiling mula sa organisasyon ni Jehova. w24.07 10 ¶10

Biernes, Disyembre 4

Natagpuan ko si David na anak ni Jesse, isang lalaking kalugod-lugod sa puso ko.—Gawa 13:22.

Mahal na mahal ni Jehova si Haring David. Tinawag pa nga niya itong “isang lalaking kalugod-lugod sa puso” niya. Pero nakagawa ng malulubhang kasalanan si David, kasama na dito ang pangangalunya at pagpatay. Ayon sa Kautusang Mosaiko, dapat siyang mamatay. (Lev. 20:10; Bil. 35:31) Pero hindi hinayaan ni Jehova na mangyari ito, kasi gusto niyang tulungan si David na magsisi. Kahit hindi pa nagpapakita ng pagsisisi si David, pinapunta na ni Jehova si propeta Natan sa kaniya. Guma-

mit si Natan ng isang ilustrasyon na talagang magpapaunawa kay David kung gaano kasama ang ginawa niya. Tumagos ito sa puso ni David, at nagsisi siya. (2 Sam. 12:1-14) Sumulat siya ng isang awit na nagpapakita na talagang nagsisi siya. (Awit 51, superskripsiyon) Nakatulong ang awit na iyon para mapakilos ang maraming makasalanan na magsisi. Hindi ba nakakatuwang malaman na tinulungan ni Jehova si David na magsisi dahil mahal niya ito? w24.08 10 ¶9

Sabado, Disyembre 5

[Patunayan] ninyo sa inyong sarili kung ano ang mabuti, katanggap-tanggap, at perpektong kalooban ng Diyos.—Roma 12:2.

Hindi madaling magpalaki ng mga anak. Kung isa kang magulang na may malit pang anak, kinokomendahan ka namin sa pagsisikap mong tulungan siyang magkaroon ng matibay na pananampalataya. (Deut. 6:6, 7) Habang lumalaki ang anak mo, baka magkaroon siya ng ser-yosong mga tanong tungkol sa paniniwala natin, pati na sa mga pamantayan ng Bibliya. Sa umpisa, baka mag-alala ka sa mga itinatanong niya. Baka nga maisip mo na itinatanong niya iyon dahil humihina ang pananampalataya niya sa Diyos at sa Bibliya. Pero ang totoo, habang lumalaki ang isang bata, kailangan niya talagang magtanong para maging kumbinsido sa pinapaniwalaan niya. (1 Cor. 13:11) Kaya huwag kang mag-alala. Kapag nagtatanong siya, isiping pagkaka-taon iyon para tulungan siyang gamitin ang kakayahan niyang mag-isip. w24.12 14 ¶1-2

Linggo, Disyembre 6

Tayo . . . ang uri na may pananampalataya na makapagligligtas ng ating buhay.
—Heb. 10:39.

Kailangan ng mga Hebreong Kristiyano ang matibay na pananampalataya para makaligtas sa papalapit na kapighatian sa Judea. (Heb. 10:37, 38) Sinabi ni Jesus sa mga tagasunod niya na kapag napapalibutan na ang Jerusalem ng nagkakampong mga hukbo, kailangan na nilang tumakas papunta sa mga bundok. Dapat itong sundin ng lahat ng Kristiyanon, nakatira man sila sa loob ng lunsod o sa kalapit na mga lugar. (Luc. 21:20-24) Kapag may umaataakeng hukbo noon, karaniwan nang pumapasok sa loob ng napapaderang lunsod ang mga nakatira sa kalapit na mga lugar para maging ligtas sila. Sa ganitong sitwasyon, parang hindi praktikal ang sinabi ni Jesus. Kaya talagang kailangan ang matibay na pananampalataya para tumakas papunta sa mga bundok. Kailangan ding magtiwala ng mga Hebreong Kristiyano sa mga ginagamit ni Jesus para magbigay ng tagubilin sa kongregasyon. Posibleng nagbigay ang mga nangunguna noon ng espesipikong mga tagubilin kung kailan tatakas at kung paano gagawin iyon.—Heb. 13:17. w24.09 10 ¶9-10

Lunes, Disyembre 7

May ibinigay siyang mga tao bilang regalo.—Efe. 4:8.

Noong nasa lupa si Jesus, perpekto niyang nagawa ang atas na ibinigay sa kaniya ng Ama niya. (Juan 17:4) Pero hindi inisip ni Jesus, ‘Mas maganda ang kakalabasan ng trabaho kung ako mismo ang gagawa nito.’ Nagsanay rin siya ng iba para sa gawaing ito. May tiwala si Jesus sa mga alagad niya. Inatasan niya sila na ipangaral at ituro ang mabuting balita at pangalagaan ang mga

tupa ni Jehova. Deretsahang pinayuhan ni Jesus ang mga alagad niya sa mabait na paraan. May ilan sa kanila na nagdududa kung talaga bang binuhay siyang muli. Kaya pinayuhan niya sila. (Luc. 24:25-27; Juan 20:27) Sinabi rin niya sa kanila na magpokus sa pangangalaga sa mga tupa ni Jehova imbes na sa mga negosyo nila. (Juan 21:15) Ipinaalala niya sa kanila na huwag ikumpara ang mga pribilehiyo nila sa pribilehiyong nataanggap ng iba. (Juan 21:20-22) Itinuwid din niya ang maling mga iniisip nila tungkol sa Kaharian at tinulungan silang magpokus sa pangangaral ng mabuting balita.—Gawa 1:6-8. w24.10 15-16 ¶13-14

Martes, Disyembre 8

Ang mga matuwid ang magmamay-ari ng lupa, at titira sila roon magpakailanman.—Awit 37:29.

Kapag masunurin tayo kay Jehova, patuloy tayong mabubuhay. Gaya ng mga Israelita na papasók na noon sa Lupang Pangako, malapit na rin tayong pumasok sa ipinangako ng Diyos na bagong sanlibutan. Magiging paraiso na ang buong lupa. (Isa. 35:1; Luc. 23:43) Wala na doon ang Diyablo at ang mga demonyo. (Apoc. 20:2, 3) Mawawala na ang huwad na relihiyon na naglalayo sa mga tao mula kay Jehova. (Apoc. 17:16) Wala na ring mga gobyerno ng tao na magpapahirap sa mga sakop nila. (Apoc. 19:19, 20) Walang lugar doon ang mga rebelde. (Awit 37:10, 11) Doon, susunod ang mga tao sa matuwid na mga utos ni Jehova, kaya magkakaisa ang lahat at magiging payapa. Dahil diyan, mamahalin at pagtitiwalaan nila ang isa’t isa. (Isa. 11:9) Hindi ka ba nananabik na mabuhay sa Paraisong lupa? Kung susundin natin si Jehova, puwede tayong mabuhay doon, hindi lang nang daan-daang taon, kundi nang walang hanggan!—Juan 3:16. w24.11 9 ¶7

Miyerkules, Disyembre 9

Ang mabuting balitang ito tungkol sa Kaharian ay ipangangaral sa buong lupa para marinig ng lahat ng bansa.
—Mat. 24:14.

Kitang-kita na natutupad na sa ngayon ang hula sa teksto sa araw na ito. Available na sa mahigit 1,000 wika ang mensahe ng Kaharian. At dahil sa website natin na jw.org, posibleng malaman ng napakaraming tao sa mundo ang mabuting balita. Pero sinabi ni Jesus sa mga alagad niya na “hindi [nila] malilibot ang lahat ng lunsod.” Ibig sabihin, hindi nila mapapangaralan ang lahat ng tao bago ang pagdating niya. (Mat. 10:23; 25:31-33) Marami sa ngayon ang nakatira sa mga lugar na ipinagbabawal ang gawain natin. At kada minuto, daan-daang sanggol ang ipinapanganak. Ginagawa natin ang buong makakaya natin para maipangaral ang mabuting balita “sa bawat bansa at tribo at wika.” (Apoc. 14:6) Pero kahit gawin natin iyan, hindi natin mapapangaralan ang lahat ng tao sa buong lupa bago dumating ang wakas. w24.05 10 ¶6-7

Huwebes, Disyembre 10

Hindi na sila dalawa, kundi isang laman.—Mat. 19:6.

Kapag nakikipag-usap si Jesus, nakakapagpatibay ito at nakakarepresko. Hindi siya masakit magsalita sa mga tagasunod niya. (Luc. 8:47, 48) Talaga ngang napakagandang halimbawa niya para sa mga Kristiyanong asawang lalaki! Inutusan ni Jesus ang mga asawang lalaki na manatiling tapat sa asawa nila. Inulit niya ang sinabi ng Ama niya na dapat ‘mamuhay kasama ng kaniyang asawang babae’ ang asawang lalaki. (Mat. 19:4-6) Ang pandiwang Griego na ginamit sa pananalitang “mamumuhay kasama ng” ay literal na nangangahulugang

“pagdikitin.” Kaya dapat na maging sobrang tibay ng pagsasama ng mag-asawa, na para bang magkadikit sila. Kapag na-putol ang ganiyang ugnayan, siguradong may pinsalang maiiwan sa bawat isa. Kung ganiyan kalapit ang lalaki sa asawa niya, hinding-hindi siya titingin sa anumang uri ng pornograpiya. Ilalayo niya agad ang “paningin [niya] sa mga bagay na walang kabuluhan.” (Awit 119:37) Para bang nakikipagtipan siya sa mata niya na hindi siya titingin sa ibang babae nang may pagnanasa.—Job 31:1. w25.01 10 ¶12-13

Biyernes, Disyembre 11

[Ang ating Diyos ay] magpapatawad . . . nang lubusan.—Isa. 55:7.

May mga pagkakataon na mahirap malaman kung talagang pinatawad ka na ng isang tao. Ibang-iba ang pagpapatawad ni Jehova kumpara sa pagpapatawad ng di-perpektong mga tao. Hinding-hindi natin mapapantayan ang paraan ng pagpapatawad niya. Sinabi ng salmista tungkol kay Jehova: “Sa iyo ay may tunay na kapatawaran, para ikaw ay lubos na igalang.” (Awit 130:4) “Tunay na kapatawaran” ang ibinibigay ni Jehova. Ipinakita niya kung ano talaga ang ibig sabihin ng pagpapatawad. Sa ilang talata sa Hebreong Kasulatan, may isang salita na ginamit ang mga manunulat ng Bibliya para tukuyin ang pagpapatawad ni Jehova na hindi ginamit para tukuyin ang pagpapatawad ng tao. Kapag pinatawad ni Jehova ang isang tao, talagang binubura niya ang naging kasalanan nito. Lubusan din niyang ibinabalik ang pakikipagkaibigan niya dito. Talagang nagpapasalamat tayo dahil lubusan tayong pinapatawad ni Jehova at handa siyang gawin ito nang paulit-ulit. w25.02 8 ¶1-3

Sabado, Disyembre 12

Inutusan niya kaming mangaral sa mga tao at lubusang magpatotoo.

—Gawa 10:42.

Kahit hindi makinig sa atin ang mga tao, masasabing matagumpay pa rin tayo. Bakit? Kasi nakapagpatotoo tayo, at iyan naman ang ipinapagawa sa atin ni Jehova at ng Anak niya. Kahit wala tayong makausap o ayaw makinig ng mga tao sa mensahe natin, masaya pa rin tayo kasi alam nating napapasaya natin ang Ama natin sa langit. (Kaw. 27:11) Masaya rin tayo kapag may natagpuang interesado ang ibang kapatid. Inihalin-tulad ng *Bantayan* ang gawain natin sa paghahanap sa isang nawawalang bata. Marami ang naghahanap sa kaniya sa iba't ibang lugar. Pero kapag nahanap na ang bata, masaya ang lahat—hindi lang ang nakahanap sa kaniya. Ganiyan din pagdating sa paggawa ng alagad. Lahat tayo, kailangan para matapos ang buong teritoryo, at masaya tayo kapag may isang interesado na nagsimula nang dumalo. w24.04 18 ¶13-14

Linggo, Disyembre 13

Naging mananampalataya ang lahat ng nakaayon sa buhay na walang hanggan.

—Gawa 13:48.

Talagang kaabang-abang ang mga posibleng mangyari sa hinaharap! Umaasa tayo na sa tulong ni Jehova, dami pa ang tatanggap sa katotohanan bago magsimula ang malaking kapighatian. At natutuwa tayo na kahit sa mismong malaking kapighatian, posibleng may mga tao pa rin na aalis sa sistema ni Satanas at sasama sa atin sa pagpuri kay Jehova. Pero sa ngayon, mayroon tayong dapat gawin na hindi na mauulit kahit kailan. Pribilehiyo natin ngayon na ipangaral ang mabuting balita ng Kaharian ng Diyos sa buong mundo. Bu-

kod diyan, kailangan din nating patuloy na babalaan ang mga tao na malapit nang magwakas ang masamang sistemang ito. Mahal natin ang mabuting balita, ang mga tao, at higit sa lahat, ang Diyos na Jehova at ang pangalan niya. Kaya patuloy nating ibibigay ang buong makakaya natin sa pangangaral hanggang sa sabihin na ni Jehova, “Tapos na!” w24.05 19 ¶14-16

Lunes, Disyembre 14

Kayo ay magbihis ng kapakumbabaan sa pakikitungo sa isa't isa, dahil ang Diyos ay laban sa mga mapagmataas, pero nagpapakita siya ng walang-kapantay na kabaitan sa mga mapagpakumbaba.—1 Ped. 5:5.

Noong gabi bago mamatay si Jesus, itinuro niya kay Pedro at sa iba pang mga apostol kung paano magiging mapagpakumbaba. Nagulat ang mga apostol kasi hindi siya nag-alangang gawin ang atas ng isang alipin! Hinubad ni Jesus ang balabal niya, nagtali ng tuwalya sa baywang, naglagay ng tubig sa palanggana, at hinugasan ang paa ng mga apostol. (Juan 13:4, 5) Posibleng matagal din bago natapos si Jesus sa paghuhugas ng mga paa ng 12 apostol. Kasama sa mga ito si Judas, ang magtatraidor sa kaniya. Pero dahil mapagpakumbaba si Jesus, tinapos niya ang atas na iyon. Sinabi niya: “Alam ba ninyo kung bakit ko ginawa iyon? Tinatawag ninyo akong ‘Guro’ at ‘Panginoon,’ at tama kayo, dahil gayon nga ako. Kaya kung ako na Panginoon at Guro ay naghugas ng mga paa ninyo, dapat din kayong maghugas ng mga paa ng isa't isa.”—Juan 13:12-14. w25.03 10 ¶9-11

Martes, Disyembre 15

Pinapatnubayan mo ako ng iyang payo, at pagkatapos ay aakayin mo ako sa kaluwalhatian.—Awit 73:24.

Hindi madaling manatiling malapít kay Jehova sa sistemang ito ni Satanas. Marami ang hindi naniniwala sa Diyos. At kadalasan na, para bang mas maganda pa ang buhay ng mga hindi sumusunod sa kaniya. Posibleng magpahina iyan ng pananampalataya natin. Kahit naniniwala tayong may Diyos, baka pagdudahan natin kung tutulungan niya ba talaga tayo. Ganiyan ang naisip ng manunulat ng Awit 73. Nakita niyang masya ang buhay ng mga taong hindi sumusunod sa pamantayan ng Diyos. Kaya kinuwestiyon niya kung sulit ba talagang maglingkod sa Diyos. (Awit 73:11-13) Ano ang nakatulong sa salmista na matitama ang pananaw niya? Pinag-isipan niya ang mangyayari sa mga umiwan kay Jehova. (Awit 73:18, 19, 27) Pinag-isipan niya rin ang mga pagpapalang tinatanggap ng mga lingkod ng Diyos. Puwede rin nating gawin iyan. Alalahanin natin ang mga pagpapala sa atin ni Jehova. w24.06 24-25 ¶16-17

Miyerkules, Disyembre 16

Huwag nawang makita sa pamumuhay ninyo ang pag-ibig sa pera.—Heb. 13:5.

Noong panahon ng Bibliya, sinasamtala ng ilan ang pangungutang sa kanila ng mga kapatid nilang mahihirap; nagpapatong sila ng tubo. May mga hukom din na tumatangap ng suhol at hinahatulan ang mga walang kasalanan. Kasuklam-suklam kay Jehova ang ganiyang mga gawain. (Ezek. 22:12) Makakabuting pag-isipan kung ano ang tingin natin sa pera. Tanungin ang sarili: ‘Lagi ko bang iniisip ang pera at ang mga puwede kong mabili dito? Kapag nangutang ako, matagal ba akong magbayad kasi inii-

sip ko na hindi naman iyon kailangan ng inutangan ko? Pakiramdam ko ba, importante ako kasi may pera ako? Nahihirapan ba akong maging mapagbigay? Materyalistiko na ba agad ang tingin ko sa mga kapatid dahil lang mayaman sila? Sa mayayaman lang ba ako nakikipagkaibigan?’ Maiingatan natin ang pakikipagkaibigan natin sa Diyos kung hindi natin iibigin ang pera. Kung gagawin natin iyan, hindang-hindi tayo iiwan ni Jehova! w24.06 12-13 ¶17-18

Huwebes, Disyembre 17

Hindi ako lumalakad sa masamang landas, para masunod ko ang salita mo.—Awit 119:101.

Para malabanan ang tukso, dapat na gustong-gusto nating gawin ang tama. Kapag natutuhan nating ‘kapootan ang kasamaan at ibigin ang kabutihan,’ magiging mas determinado tayong gawin ang tama. (Amos 5:15) Tutulong din ito sa atin na maging matatag kapag napa harap tayo sa alanganing sitwasyon. Dapat na maging abala tayo sa espirituwal na mga gawain. Nakakatulong ang mga pulong at ministeryo para mas gustuhin nating mapasaya si Jehova. (Mat. 28: 19, 20; Heb. 10:24, 25) Kapag binabasa natin at pinag-aaralan ang Salita ng Diyos at binubulay-bulay ito, mas tumitindi ang kagustuhan nating gawin ang tama at iwasan ang masama. (Jos. 1:8; Awit 1:2, 3; 119:97) Tandaan din ang sinabi ni Jesus sa mga alagad niya: “Patuloy kayong . . . manalangin para hindi kayo mahulog sa tukso.” (Mat. 26:41) Kapag ginagawa natin ito, binibigyan natin si Jehova ng pagkakataong tulungan tayo at mas nagiging determinado tayong gawin ang gusto niya.—Sant. 4:8. w24.07 17-18 ¶14-16

Biyernes, Disyembre 18

Bibigyan kita ng kaunawaan at ituturo ko sa iyo ang daan na dapat mong lakaran. Papayuhan kita habang nakatingin ako sa iyo.—Awit 32:8.

Sikaping tularan ang paraan ni Jehova kapag nagsasanay ng iba. Tandaan na sagana siyang nagbibigay ng karunungan. Magagawa natin iyan kung ituturo natin ang lahat ng alam natin sa mga sinasanay natin. Hindi natin ito ipagdadamot sa kanila dahil iniisip natin na baka palitan nila tayo. Huwag din nating isipin, ‘Wala namang nagsanay sa akin, kaya bahala na siyang matuto sa sarili niya!’ Hindi dapat mag-isip ng ganiyan ang isang lingkod ni Jehova. Sa kabaligtaran, masaya nating ibinabahagi sa iba ang lahat ng alam natin, ‘pati na ang mismong sarili natin.’ (1 Tes. 2:8) Umaasa tayo na sila ay “magiging lubusan ding kuwalipikado na magturo sa iba.” (2 Tim. 2:1, 2) Kung lahat tayo, saganang magbibigay ng karunungan sa isa’t isa, lahat tayo ay magiging marunong at masaya. w24.09 29 ¶12-13

Sabado, Disyembre 19

[Tayo ay] mga bahaging magkakaugnay.—Roma 12:5.

Kung pakiramdam mo, hindi ka magaling sa kahit anong bagay, huwag masiraan ng loob. Siguradong mayroon ka pa ring mga katangian na magagamit sa kongregasyon. Pag-isipan ang sinabi ni Pablo sa 1 Corinto 12:12-30, at ipanalangin kay Jehova na tulungan kang makita kung paano ito makakatulong sa iyo. Tinitiyak ng mga sinabi ni Pablo na lahat ng lingkod ni Jehova, kasama ka na, ay may mahalagang papel sa kongregasyon. Gawin ang buong makakaya mo ngayon para paglingkuran si Jehova at ang mga kapatid. Makakasigurado kang napapansin ng mga elder ang

mga ginagawa mo at bibigyan ka nila ng atas na kaya mo. (Roma 12:4-8) Lahat tayo, dapat maging malapit kay Jehova, maging masaya sa pagbibigay, at mamuhay sa paraang gusto ng Diyos. w24.11 17 ¶12-13

Linggo, Disyembre 20

Nagsimula siyang manalangin kay Jehova at umiyak nang labis-labis.—1 Sam. 1:10.

Nakaranas si Hana ng maraming problema. Dahil dito, sobra siyang nalungkot at napaiyak siya. May isa pang asawa ang asawa niya. Ang pangalan nito ay Penina, at galit ito kay Hana. Bukod diyan, may mga anak si Penina, pero wala lang anak si Hana. (1 Sam. 1:1, 2) Dahil baog si Hana, lagi siyang iniinsulto ni Penina. Sa sobrang lungkot niya, “umiiyak siya at hindi kumakain,” at naging “napakabigat ng kalooban” niya. (1 Sam. 1:6, 7, 10) Ano ang nagpagaan ng loob ni Hana? Ang isang nakatulong sa kaniya ay ang pagpunta niya sa tabernakulo para sambahin si Jehova. Doon, nagmakaawa siya kay Jehova: ‘Bigyangpansin mo ang pagdurusa ng iyong lingkod at alalahanin mo ako.’ (1 Sam. 1:11) Talagang tinulungan siya ni Jehova. Pinakinggan niya si Hana at inunawa ang nararamdaman nito. Bandang huli, pinagpala niya si Hana at nagkaanak ito.—1 Sam. 1:19, 20; 2:21. w24.12 21 ¶5-7

Lunes, Disyembre 21

Espesyal para sa akin ang mga anak ng tao.—Kaw. 8:31.

Itinuturo ng pantubos na mahal na mahal ni Jesus ang mga tao, lalo na ang mga alagad niya. (Juan 13:1) Alam ni Jesus na hindi magiging madali ang atas niya dito sa lupa, lalo na ang kamatayan niya. Pero ginawa pa rin niya ang mahihirap na bagay na iyon, hindi lang dahil iniutos iyon sa kaniya, kundi dahil mahal na mahal niya ang mga tao. Ginawa niya ang lahat para mapangaralan, maturuan, at matulungan sila. Kahit noong araw na mamamatay na siya, hinugasan pa rin niya ang paa ng mga apostol niya para turuan sila. At pinatibay niya rin sila. (Juan 13:12-15) Noong nakapako na siya sa tulos, nakapagbigay siya ng pag-asa sa kriminal na katabi niya at naihabilin pa nga ang nanay niya sa iba. (Luc. 23:42, 43; Juan 19:26, 27) Kaya naipakita ni Jesus na mahal na mahal niya ang mga tao, hindi lang nang matatay siya, kundi sa buong buhay niya. w25.01 23 ¶11

Martes, Disyembre 22

Siya ang tumanggap ng parusa para magkaroon kami ng kapayapaan, at dahil sa mga sugat niya ay gumaling kami.—Isa. 53:5.

Gumamit ang Bibliya ng ilustrasyon para maintindihan natin ang kalayaang resulta ng pagpapatawad ni Jehova. Sinasabi nito na dahil hindi tayo perpekto, para tayong ‘alipin ng kasalanan.’ Pero dahil sa pagpapatawad ni Jehova, “pinalaya [tayo] mula sa kasalanan.” (Roma 6:17, 18; Apoc. 1:5) Gaya ng isang pinalayang alipin, napakasaya rin natin kapag pinapatawad ni Jehova ang mga kasalanan natin. At dahil din sa pantubos na inilaan ni Jehova sa pamamagitan ng Anak niya, para tayong pinaga-

ling. (1 Ped. 2:24) Kapag nagkakasala kasi tayo, nagkakasakit tayo sa espiirituwal—nasisira ang kaugnayan natin kay Jehova. Pero dahil sa pantubos, puwede niya tayong mapatawad para maibalik ang pakikipagkaibigan natin sa kaniya. Gaya ng isang taong gumaling sa isang malubhang sakit, nagiginhawahan din tayo kapag napapagaling tayo sa espiirituwal at naibabalik ang pakikipagkaibigan natin kay Jehova. w25.02 13 ¶16-17

Miyerkules, Disyembre 23

Kung patuloy ninyong ginagawa ang mga bagay na ito, hinding-hindi kayo mabibigo.—2 Ped. 1:10.

Sa ilustrasyon tungkol sa mga talento, sinabi ni Jesus na may dalawang alipin na naging tapat sa panginoon nila at may isa na hindi. (Mat. 25:14-30) Tumutukoy sa tapat na mga pinahirang Kristiyano ang dalawang tapat na alipin. Inaanyayahan sila ng Panginoon, si Jesus, na ‘makipagsaya sa kaniya.’ Tatanggapin nila ang gantimpala nila sa langit, ang unang pagkabuhay-muli. (Mat. 25: 21, 23; Apoc. 20:5b) Babalang halimbawa naman para sa mga pinahiran ang tamad na alipin. Paano? Dapat nilang patunayan na masipag sila. Sa ilustrasyon tungkol sa mga talento, gaya rin ng ilustrasyon tungkol sa mga dalaga, hindi sinasabi ni Jesus na may mga pinahiran na magiging tamad. Sinasabi lang niya kung ano ang puwedeng mangyari kung hindi sila magiging masipag. Hindi nila ‘matitiyak na mananatili silang kasama sa mga tinawag at pinili,’ at hindi sila papayagang makapasok sa Kaharian sa langit. w24.09 23 ¶10, 12; 24 ¶13

Huwebes, Disyembre 24

[Tiyakin] *ninyo kung ano ang mas mahahalagang bagay.*

—Fil. 1:10, tlb.

Gusto nating lahat na maibigay ang pangangailangan ng pamilya natin. (Ecles. 7:12; 1 Tim. 5:8) Kaya normal lang na pag-isipan kung gaano kalaki ang suwel-do kapag naghahanap ng trabaho. Pero kung iyan lang ang basehan ng isang tao, baka lumalakad siya ayon sa nakikita niya. Para maipakitang lumalakad tayo ayon sa pananampalataya, pag-iisipan din natin kung paano makakaapekto sa kaugnayan natin kay Jehova ang pipiliin nating trabaho. Pag-isipan ang mga ito: ‘Sa trabahong ito, may magagawa ba akong bagay na ayaw ni Jehova?’ (Kaw. 6:16-19) ‘Maapektuhan ba nito ang pagsamba ko kay Jehova? Madalas ba akong mapapalayo nang matalagal sa pamilya ko dahil dito?’ Kung oo ang sagot mo, mas mabuting hindi tanggapin ang trabaho kahit mahirap makahanap nito. Kung makikita sa mga desisyon natin na nagtitiwala tayong ibibigay ni Jehova ang mga kailangan natin, lumalakad tayo ayon sa pananampalataya. —Mat. 6:33; Heb. 13:5. w25.03 21 ¶5-6

Biyernes, Disyembre 25

Maging mabait kayo sa isa’t isa at tunay na mapagmalasakit, at lubusan ninyong patawarin ang isa’t isa.

—Efe. 4:32.

Dapat na lagi nating pagsikapang matularan ang pananaw ni Jehova sa mga kapatid. Magagawa natin iyan kung magpopokus tayo sa magagandang katangian nila at hindi sa mga pangit na katangiang mawawala naman sa hinaharap. Maaayos natin ang anumang di-pagkakaunawaan kung magpapakita tayo ng pag-ibig. Kaya gugustuhin ng mga tao na maging bahagi ng espiri-

tuwal na paraiso kasi gusto nilang mapakitunguhan sa ganiyan ding paraan. Lagi sana nating pahalagahan ang paraisong ito na ginawa ni Jehova para sa atin. Kung gusto ng sinuman na maginhawahan at maging kontento, kalmado, at ligtas, kailangan niyang maging bahagi ng espirituwal na paraiso at huwag na huwag itong iiwan. Pero dapat tayong mag-ingat, dahil ginagawa ni Satanas ang buong makakaya niya para ilayo tayo dito. (1 Ped. 5:8; Apoc. 12:9) Huwag natin siyang hayaang magtagumpay. Gawin natin ang lahat para maprotektahan ang kagandahan, pagiging dalisay, at kapayapaan ng espirituwal na paraiso. w24.04 24-25 ¶18-19

Sabado, Disyembre 26

Unahin ang Kaharian.—Mat. 6:33.

Mga magulang, puwede ninyong matulungan ang mga anak ninyo na magkaroon ng kagustuhang maglingkod kay Jehova. Ituro sa kanila na dapat unahin ang espirituwal na mga bagay, gaya ng pag-aaral ng Bibliya, pagdalo sa pulong, at pangangaral. Dapat din kayong maging magandang halimbawa dito. Kasi kung hindi magiging malapit kay Jehova ang mga anak ninyo, baka maisip nilang Saksi lang sila kasi Saksi ang pamilya ninyo. Dahil diyan, baka hindi nila maramdaman na ganoon kahalaga ang pagsamba kay Jehova o baka huminto pa nga sila sa paglilingkod sa kaniya. Wala na bang pag-asang maging kaibigan ulit ni Jehova ang mga huminto na sa paglilingkod sa kaniya? Mayroon, kasi puwede pa rin silang magsisi at bumalik kay Jehova. Para magawa iyan, baka kailangan nilang lunukin ang pride nila at tanggapin ang tulong ng mga elder sa kongregasyon. (Sant. 5:14) Sulit ang lahat ng pagsisikap na ito kasi maibabalik nila ang kaugnayan nila kay Jehova! w24.07 25 ¶18-19

Lingo, Disyembre 27

Tumakas kayo mula sa seksuwal na imoralidad!—1 Cor. 6:18.

Paano ninyo patuloy na mapapasaya si Jehova sa panahon ng pagiging magka-sintahan ninyo? Natural lang na maging mas malapit kayo sa isa't isa sa panahong ito. Kaya ano ang makakatulong para hindi kayo makagawa ng imoralidad? Iwasan ang malalaswang usapan, mga sitwasyong dalawa lang kayo, at sobrang pag-inom. (Efe. 5:3) Patitindihin kasi ng mga ito ang pagnanasa ninyo at mahihirapan kayong gawin ang tama. Makakabuti kung regular ninyong pag-uusapan ang mga gagawin ninyo para masunod ang mga pamantayan ni Jehova. (Kaw. 22:3) Habang lumalalim ang pagmamahal ninyo, baka may ilang angkop na paraan para magpakita kayo ng pagmamahal sa isa't isa. Pero kung dahil dito, magising ang pagnanasa ninyo, baka mahirapan na kayong gumawa ng tamang desisyon. (Sol. 1:2; 2:6) Posible ring mauwi sa imoralidad ang pagpapakita ng pagmamahal. (Kaw. 6:27) Kaya sa simula pa lang, pag-usapan na ang mga limitasyong gagawin ninyo para masunod ang mga prinsipyo sa Bibliya.—1 Tes. 4:3-7. w24.05 29 ¶10-11

Lunes, Disyembre 28

Tiyakin ninyo na ang inyong “Oo” ay oo at ang inyong “Hindi” ay hindi.
—Mat. 5:37.

Gusto natin na maging isa na maaasahan, lalo na sa mahihirap na sitwasyon. (Kaw. 17:17) Paano natin maipapakita na maaasahan tayo? Gawin natin ang buong makakaya natin na matularan si Jehova. Halimbawa, tuparin natin ang mga pangako natin at sikapin nating maging nasa oras. Paano nakikinabang ang kongregasyon kapag maaasahan ang mga elder? Kapag alam ng mga kapatid na

puwede silang humingi ng tulong anumang oras sa mga elder, gaya ng group overseer nila, napapanatag sila. At kapag nakikita nila na bukal sa puso ang pagtulong sa kanila, nararamdaman nila na mahal sila ng mga elder. Kapag nakikita naman ng mga kapatid na nagpapayo ang mga elder base sa Bibliya at publikasyon natin imbes na sa sariling opinyon, mas nagtitiwala sila. Nakukuha rin ng mga elder ang tiwala ng mga kapatid kapag hindi sila nagsasabi sa iba ng kompendisyal na mga bagay at kapag talagang ginagawa nila ang sinabi nilang gagawin nila. w24.06 30 ¶14-15

Martes, Disyembre 29

Patuloy mo silang bibigyan ng kapayapaan, dahil sa iyo sila nagtitiwala.—Isa. 26:3.

Sa ngayon, hindi natin inaasahan na aalisin ni Jehova ang lahat ng problema natin, pero makakasigurado tayong aalalayan niya tayo para makayanan ang mga iyon. (Awit 41:3) Ginagamit ni Jehova ang banal na espiritu niya para bigyan tayo ng lakas, kaunawaan, at kapayapaan. (Kaw. 18:14; Fil. 4:13) Ipinapaalam din niya sa atin na darating ang panahon, wala nang magkakasakit. At talagang napapatibay tayo ng pag-asang iyan. (Isa. 33:24) Mapapalakas tayo ng mga salita ni Jehova na nasa Bibliya kapag nasa mahirap na sitwasyon tayo. (Roma 15:4) Mula noong malaman ng isang sister sa West Africa na may cancer siya, lagi na siyang umiiyak. Sinabi niya: “Talagang napatibay ako ng Isaia 26:3. . . . Tiniyak sa akin ng tekstong iyan na puwede tayong bigyan ni Jehova ng kapayapaan para matiis ang anumang pagsubok.” May tekstobang na talagang nakapagpatibay sa iyo noong napaharap ka sa isang napakahirap na sitwasyon, na parang wala nang pag-asa? w24.12 24 ¶17-18

Miyerkules, Disyembre 30

Malayo pa, natanaw na siya ng kaniyang ama at naawa ito sa kaniya; tumakbo ito at niyakap at hinalikan siya.—Luc. 15:20.

Ano ang nararamdaman ng mga elder sa mga napalayo? Gusto nilang bumalik na ang mga ito. (Luc. 15:22-24, 32) Nagsasaya sa langit kapag may bumalik na nagkasala, at ganiyan din sa lupa! (Luc. 15:7) Malinaw na hindi kinukunsinti ni Jehova ang mga di-nagsisising nagkasala. Pero hindi niya sila sinusukuan. Gusto niya silang manumbalik. Makikita sa Oseas 14:4 kung ano ang nararamdaman ni Jehova para sa mga nagsisisi: “Pagagalingin ko sila, at hindi na sila magiging taksil. Mamahalin ko sila nang buong puso, dahil wala na ang galit ko sa kanila.” Hindi ba mapapakilos niyan ang mga elder na maghanap ng anumang senyales na nagsisisi na ang nagkasala? At nakakapagpatibay din ito sa mga nagkasala kasi ipinapakita nito na mahal pa rin sila ni Jehova at na gusto niyang bumalik na sila. w24.08 28 ¶8-9

Huwebes, Disyembre 31

Ipakita ninyong mapagpasalamat kayo.—Col. 3:15.

Ang totoo, baka may pagkakataong hindi napapahalagahan ang ginagawa natin. Minsan, baka talagang nagsikap tayo —naglaan tayo ng panahon at lakas o gumastos pa nga—para tulungan ang iba. Pagkatapos, parang wala lang sa kanila iyon. Kung mangyari iyan, paano natin maiiwasang madismaya o mainis? Tandaan na kahit parang hindi pinapahalagahan ang mga ginagawa natin, puwede pa rin tayong maging masaya sa pagbibigay. (Gawa 20:35) Paano? Tandaan na kapag nagbibigay ka, tinutularan mo si Jehova. Patuloy siyang nagbibigay sa mga tao, pahalagahan man nila iyon o hindi. (Mat. 5:43-48) Nangangako si Jehova na kung magbibigay tayo “nang hindi umaasa ng anumang kabayaran . . . , magiging malaki ang gantimpala” natin. (Luc. 6:35) Kaya huwag madismaya kung hindi ka pasalamatan sa ginawa mo. Tandaan na gagantimpalaan ka ni Jehova sa mabubuting bagay na ginagawa mo para sa iba at dahil ‘masaya kang nagbibigay.’ —Kaw. 19:17; 2 Cor. 9:7. w24.09 29 ¶14-16